

A - Kitabu

LUISA PICCARRETA

"BINTI MDOGO WA UTASHI WA MUNGU"

SAA 24 ZA MATESO YA BWANA WETU YESU KRISTO



SALA YA KUJIANDAA

Ee Bwana wangu Yesu Kristo, kifudufudi mbele ya uwepo wako wa kimungu, naomba Moyo Wako wenye upendo kabisa ukubalie kunipokea na kunikaribisha kwenye tafakari ya uchungu ya saa ishirini na nne, muda ambamo, kwa ajili ya pendo lako kwetu, ulitaka sana uteseke katika Mwili Wako mwabudika na katika Roho Yako takatifu kabisa, uteseke hadi kifo cha Msalaba. Ah! Nijalie mimi msaada, neema, upendo, kuteseka moyoni na ufahamu wa maumivu yako pindi ninapotafakari sasa saa ya.....

Na kwa Mateso yale nisyoweza kutafakari sasa nakutolea utashi ule ambao nilipasika niutekeleze na kwa nia ya moyoni nataka kuyatafakari Mateso hayo katika saa zote ambamo nitapasika kufanya shughuli zangu nyingine au nitakapopasika kulala.

Ee Bwana Mwenye Huruma, pokea nia yangu ya kimapenzi, na ujalie nia yangu hiyo iwe na manufaa kwangu na kwa wengine wengi, kana kwamba ningekuwa nimetekeleza yote kwa ufanisi na kwa utakatifu kama nilivyokuwa nimenuia kufanya. Hata hivyo, kwa sasa nakutolea shukrani Ee Yesu Wangu, ambaye kwa njia ya sala, unaniita niunganike nawe; na ili nikupendeze zaidi basi, mimi nachukua sasa mawazo yako, Ulimi Wako, na Moyo Wako. Na kwa namna hiyo natarajia kusali sasa huku nikijizamisha na kujiunganisha mimi mwenyewe kikamilifu kabisa katika Utashi Wako na katika Pendo Lako; na huku nikipanua na kunyosha mikono yangu ili kukukumbatia, nalaza na kichwa changu penye Moyo Wako, na hivyo naanza.

SALA YA KUSHUKURU

Ee Mpendevu Wangu Yesu, Wewe umeniita katika saa hii ya Mateso yako ili niambatane Nawe, na mimi ndiyo nimefika. Ninakuona ukiwa na uchungu sana na Mateso makali, unasali, unalipa malipizi na unateseka, na kwa sauti yako laini sana unatoa maneno mazuri ya kuulilia wokovu wa roho mbalimbali. Nimejitahidi kukufuata katika yote, na sasa lakini, inaponipasa kukuacha kwa muda, ili niende kwenye shughuli zangu za kawaida, naonja wajibu wa kukuambia “ASANTE” pamoja na kukuambia “NAKUTUKUZA”.

Ndiyo kweli, Ee Yesu, ‘Asante, Asante’ nairudia rudia mara elfu na elfu, na ninakusifu na kukutukuza kwa ajili ya kila kitu ulichotenda na kwa kila Teso ulilopata kwa ajili yangu mimi na kwa ajili ya watu wote. Asante, na ninakutukuza kwa kila tone la Damu ulilodondosha, kwa kila pumzi yako, kwa kila pigo lako la moyo, kwa kila hatua uliyotembea, kwa kila neno, mtazamo wako na kwa kila uchungu mkali na madharau uliyoyavumilia. Kwa hayo yote Ee Yesu wangu, napenda kukuandikia na kukutulia sahihi ya “ASANTE” na “NAKUTUKUZA”. Oh, Ee Yesu, ujalie nafsi yangu yote, ikuletee mtiririko usiokoma wa shukrani na kukutukuza, ili kuvutia mkondo wa neema na baraka zako juu yangu na juu ya watu wote.

Oh, Ee Yesu, nikumbatie na kunibana kwenye Moyo Wako kwa Mikono Yako mitukufu, na hivyo juu ya chembe zote za nafsi yangu, uchore kauli hii yako: “NAKUBARIKI”; na hivyo ujalie pasitoke lolote toka kwangu isipokuwa utenzi usiokoma kwako. Kwa hiyo basi, najiachilia, ili nibaki ndani yako hata niweze kukufuata katika chochote utakachofanya Wewe. Yaani ni Wewe utatenda badala yangu. Nami tangu sasa, nayaacha mawazo yangu ndani yako, ili yakutetee dhidi ya maadui wako, nakuachia pumzi yangu, ili ikusindikize na kuambatana nawe, nakuachia pigo la moyo wangu, ili likuambie daima “NAKUPENDA” na ili likupe pendo ambalo watu wengine wanakunyima; nakuachia matone ya damu yangu yalipe na kurejesha heshima na hadhi ambavyo vinaondolewa na maadui wako kwa njia ya matusi, kukutemea mate na kukuchapa makofi; nakuachia nafsi yangu yote ili ikulinde.

Pendo Langu Tamu, ingawa yanipasa sasa niende kwenye shughuli zangu, nabaki Moyoni Mwako kwani nahofia kutoka nje. Utaendelea kunishikilia ndani yako au la? Mapigo ya mioyo yetu yataelewana na yataungamana yenyewe hata kuweza kunipa mimi uzima, upendo, na muungano na wewe, muungano usiokoma. Yesu Wangu, ukiona ninataka kukutoroka, pigo la Moyo Wako liingie hima ndani ya pigo la moyo wangu, Mikono Yako inibanie kwa nguvu zaidi kwenye Moyo Wako, Macho Yako yaniangalie na kunitupia radi ya moto ili mimi ninapokuhisi tu, nivutiwe kwenye mwungano na Wewe. Oh, Yesu Wangu, nipe busu la Pendo la kimungu, nikumbatie na unibariki; Mimi nakubusu katika Moyo Wako mtamu na ndivyo nabaki ndani yako.

SAA YA KWANZA

(Kuanzia Saa Kumi na Moja Hadi saa Kumi na Mbili Jioni)

Yesu Anaagana na Mama Yake Mtakatifu Sana

(Sala ya Kujiandaa.

Tazama Uk. 1)

Ee Mama wa Mbinguni, saa ya kuachana imefika, na mimi ndiyo naja kwako. Ee Mama, unipe pendo lako na malipizi uliyotoa, nipe teso lako kwani pamoja nawe nataka kumfuata Yesu Mteseka hatua kwa hatua. Na tazama Yesu yule anakuja! Na wewe, mwenye moyo unaofurika kwa pendo unamkimbia, na unapomwona jinsi alivyochoka na kujaa uchungu, moyo wako unakubana kwa teso na maumivu, nguvu zako zinapunguka na unaelekea kumwangukia chini miguuni pake.

Ee Mama yangu mtamu, Je wewe unajua kwa nini Yesu Mwabudiwa amekuja kwako? Ah! Yeye amekuja ili akuage kwa mara ya mwisho! Ili akuambie neno lake la mwisho! Ili umkumbatie kwa mara ya mwisho! Ee Mama, nami najibana kwako kwa upendo wote uwezekanao toka huu moyo wangu fukara, ili ninapokuwa nimejibana kwako, nami pia niweze kuambulia ukumbatio wa Yesu Mwabudiwa. Labda wewe hutanipokea, au labda kwako haifurahishi moyoni mwako kuwa na roho moja karibu nawe inayoshiriki maumivu, mapendo na malipizi?

Ee Yesu, katika saa hii inayoutesa hivyo Moyo Wako laini, je ni fundisho gani unalotupa wewe kuhusu utii na heshima ya upendo wa Mwana kwa Mama yako? Ni upatano na uelewano gani mtamu na wa kupendeza waonekana kati Yako na Maria! Wimbo gani mtamu wa upendo unaopanda juu hadi kwenye kiti cha umilele na kusambaa kwa ajili ya wokovu wa viumbe vyote vya dunia!

Ee Mama yangu wa mbinguni, Je unajua ni nini anachotaka Yesu Mwabudiwa toka kwako? Si kitu kingine ila tu Baraka yako ya mwisho. Ni kweli kwamba kutoka katika chembe zote za nafsi yako hakitoki kitu kingine isipokuwa mibaraka na masifu kwa Muumba wako. Hata hivyo Yesu, anapokuaga leo, anataka tu kusikia lile neno tamu: **“NAKUBARIKI EE MWANANGU!”**. Na Neno hilo **‘NAKUBARIKI’** huondoa katika sikio la Yesu maneno yale yote ya kufuru na matusi, na badala yake, utamu na uzuri huteremka na kuingia moyoni mwake. Na Yesu anataka lile neno lako **‘NAKUBARIKI’**, kwani linarekebisha na linalipa fidia kwa madharau yale yote yaliyotoka kwa viumbe.

Na hata mimi najiunga nawe, ee Mama mpendevu: Juu ya mabawa ya kisulisuli napenda nizunguke mbinguni, kwenda kwa Mungu Baba, kwa Roho Mtakatifu na kwa Malaika wote, ili kuwaomba kila mmoja wao ile **‘NAKUBARIKI’** kwa ajili ya Yesu. Nitazichukua hizo baraka zao zote na kumpelekea Yesu. Na hapa duniani, nataka pia nizunguke kwa viumbe vyote na kuvimba toka kila mdomo, toka kila pigo la moyo, kila hatua ya mguu, kila pumzi, kila mtazamo wa jicho, na kutoka kila wazo, zitoke

baraka na sifa kwa Yesu; na iwapo hakutakuwa na kiumbe hata kimoja kinachohiari kutoa, naazimia kutoa mimi peke yangu badala ya hivyo viumbe vyote.

Oh Mama mpendwa, mimi baada ya kuzungukazunguka na kuomba **‘NAKUBARIKI’** toka kwa Utatu Mtakatifu, kwa Malaika, kwa viumbe vyote, kwa mwanga wa jua, kwa harufu nzuri ya maua, kwa mawimbi ya bahari, kwa kila mvumo wa upepo, kwa kila mwako wa moto, kwa kila jani linalotikisika, kwa kila mng’aro wa nyota, na kwa kila mwendo wa maumbile, nakuja kwako, Mama, na kuleta hizo **‘BARAKA’** zangu, ili kuunganisha na hizo **‘BARAKA’** za kwako.

Mama yangu mtamu, nakuona unapata faraja na kitulizo, na mara unatoa na kumkabidhi Yesu Baraka zangu zote nilizoleta kwa ajili ya fidia kwa makufuru na matusi anayopata toka kwa viumbe. Halafu basi, pindi mimi ninapotoa hayo yote kwako, nasikia hiyo sauti yako nyembamba ya kutetemeka ikisema: “Mwanangu, unibariki na Mimi pia”.

Ee Pendo Langu Tamu, unibariki pia mimi pamoja na Mama yako: bariki mawazo yangu, moyo wangu, mikono yangu, hatua zangu, kazi zangu, na pamoja na Mama yako ubariki viumbe vyote.

Ee Mama yangu, unaposhangaa kuona uso wa Mteseka Yesu, uso uliochoka na wa uchungu, uso wenye fadhaa, mara unakumbuka moyoni yale Mateso atakayopasika kuyapata hivi punde. Unaona tayari uso wake uliofunikwa na mate atakayotemewa na watu; na wewe unambariki. Unaona kichwa chake chenye matobo ya miiba, macho yake yaliyofungwa kitambaa, kiwiliwili chake kilichocharazwa kwa mijeledi, mikono na miguu yake iliyotobolewa na misumari. Nawe na baraka zako unamfuata popote anakoenda. Na hata mimi pia namfuata pamoja nawe. Pindi Yesu anapopigwa mijeledi, anapogongwa akipigiliwa misumari, anapopigwa makofi, anapovalishwa taji la miiba kichwani, pote hapo ataikuta **‘NAKUBARIKI’** yako na pamoja na ya kwangu.

Ee Yesu, Ee Mama, naunganika nanyi katika Mateso; uchungu wenu ni mkali sana katika dakika hizi za mwisho, Moyo wa kila mmoja wenu unavuta na unapasua Moyo wa mwenzake. Ewe Mama, bandua moyo wangu kutoka dunia na ukaufungamanishe kwa nguvu na Yesu ili, huku nikigandamana naye, niweze kushiriki kikamilifu Mateso yake. Na pindi mnapokuwa mmebanana mkikumbatiana, mnatazamana na kuonana kwa mara ya mwisho, mnapobusiana kwa kuagana, mimi nitakuwa nimesimama katikati ya mioyo yenu, na kwa njia hiyo nitaweza kuambulia busu lenu la mwisho na kupata kumbatio la mwisho la kila mmoja wenu. Je hamuoni kwamba mimi siwezi kamwe kubaki peke yangu bila ninyi kutokana na unyonge wangu na ubaridi wangu.

Yesu na Mama, nishikilieni na kunibana kwenu; nipeni pendo lenu na nipeni utashi wenu; tulizeni kiu ya moyo wangu masikini, nikumbatieni kutoka ndani ya mikono yenu. Na pamoja nawe, Ee Mama mpendevu, nataka hatua kwa hatua kumfuata Yesu mwabudiwa kwa nia ya kumpa faraja, kitulizo, upendo, na fidia kwa yote na wote.

Ee Yesu, pamoja na Mama yako, ninakubusu katika Mguu wako wa kushoto, nikikuomba unisamehe mimi na viumbe vyote kwa mara zote tulipoacha kutembea kuelekea kwa Mungu. Nabusu na Mguu wako wa kulia. Unisamehe mimi na watu wote kwa kosa la kugoma kutafuta ukamilifu uliotaka toka kwetu.

Nabusu na Mkono wako wa kushoto. Utushirikishe na kutupatia usafi wako wa kiroho. Nabusu Mkono wako wa kulia. Unibarikie mapigo yote ya moyo wangu, mawazo yangu na hisia zangu, ili baada ya kujaliwa nguvu ya Baraka yako, vyote hivyo vikatakatifuzwe; pamoja na mimi uvibariki pia viumbe vyote, na kwa Baraka hiyo ukavimwagie wokovu wa roho zao.

Ee Yesu, pamoja na Mama yako, ninakukumbatia, na ninapobusu Moyo Wako, ninakuomba uuweke moyo wangu kati ya mioyo yenu miwili ili ulishwe daima na mapendo yenu, mateso yenu, hisia zenu na matamanio yenu, na uhai wenu wenyewe.



TAFAKARI NA ZOEZI

Yesu, kabla ya kuanza Mateso yake anaamua kwenda kwanza kwa Mama yake akaombe Baraka. Kwa tendo hilo Yesu anatumfundisha utii, siyo tu utii kwa nje, bali pia utii kwa ndani rohoni, ambao lazima tuutekeleze na kuuonyesha ili kuitikia mvuto na uangazo wa neema. Mara kadhaa huwa tunasita kutekeleza mvuto na uangazo huo mzuri. Au tunazuiwa na ubinafsi wetu unaoungana na kishawishi fulani, au kwa kulinda heshima ya kibinadamu, au kwa kuogopa kulazimika kuongoka na kurekebisha tabia zetu.

Yamkini kitendo hicho cha kugomea uangazo na mvuto huo mzuri wa kutekeleza fadhila fulani, kuogopa kujasiri tendo lolote jema, kusita kutimiza ibada fulani, kitendo hicho humfanya Bwana Yesu arudi nyuma na kutuacha. Kitendo hicho kinatuzuia tusipate uangazo mwingine mpya wala mvuto mpya. Kinyume chake lakini kitendo cha kuitikia na kutii kwa wepesi, kwa uchaji na kwa busara uangazo huo mtakatifu, hutuwezesha kuvuta uangazo mkubwa zaidi na neema nyingi zaidi.

Inapotokea mashaka, mtu akimbilie haraka kabisa na kwa nia sahihi na njema kwenye zana ile kuu ya sala na kwenye ushauri wa uhakika. Kwa njia hiyo Mungu mwema hataacha kuiangazia roho katika kutekeleza ule uangazo wa wokovu, na hataacha kamwe kuiongezea hiyo roho manufaa makubwa zaidi ya uangazo huo. Katika nia ile ile ya Yesu, na katika utashi wake, tutekeleze mambo yetu yote, kazi zetu, vitendo vyetu, sala zetu, saa zetu za Mateso ya Yesu. Tujitoe sisi wenyewe kuwa sadaka kama alivyofanya Yeye kwa ajili ya utukufu wa Baba na kwa ajili ya manufaa ya roho mbalimbali.

Tujiweke tayari kujisadaka katika yote ili kuonyesha pendo kwa Yesu Wetu mpendwa. Tuungane na kufanana na Roho yake, tutende kwa hisia na vionjo vile vile kama vya kwake, tujikabidhi ndani yake, siyo tu wakati wa mateso yetu yote na matatizo yanayotuzunguka bali zaidi wakati hayo yanapojitokeza toka ndani mwetu. Na kwa hiyo, pale yanapotokea, tujione tupo tayari kupokea kila aina ya taabu. Tunapofanya hivyo, sisi tutakuwa tunatoa vitu vidogo vitamu kwa Yesu wetu. Endapo tutatekeleza yote hayo katika Utashi wa Mungu, Utashi wenye aina zote za utamu, Utashi wenye ujazo wote na aina zote za kuridhika, sisi tutakuwa tunatoa kwa Yesu, vitu vikubwa vyenye utamu, na kwa njia hiyo tutazima au tutapunguza ile sumu kali ya ubaya inayoletwa na viumbe. Ndivyo tutaufaraji na kuutuliza Moyo Wake wa kimungu.

Kabla ya kuanza tendo lolote, tuwe tunaomba daima Baraka ya Mungu, ili kila tutendalo liwe limeguswa na Umungu na kwa njia hiyo kila tendo letu litavuta Baraka zake Mungu, siyo juu yetu sisi tu, bali hata juu ya viumbe vyote.

Yesu wangu, Baraka yako initangulie, inisindikize, na inifuate ili chochote nitendacho kilete muhuri wa 'NAKUBARIKI' yako.

SAA YA PILI

(Kuanzia Saa Kumi na Mbili Hadi Saa Moja Jioni)

Yesu Anamwacha Mama Yake Mtakatifu Sana Na Anaelekea Kwenye Chumba cha Karamu ya Mwisho

(Sala ya Kujiandaa.

Tazama Uk 1)

Yesu Wangu mwabudiwa, pindi nimekuwa nashiriki maumivu yako na yale ya Mama mteseka, nagundua kuwa unaamua kuondoka na kuelekea kule ambako Utashi wa Baba unakuika. Pendo kati ya Mwana na Mama ni kuu hivi kiasi kwamba inashindikana kutengana. Kwa hiyo Wewe unajikabidhi ndani ya moyo wa Mama na Malkia, na Mama anajiweka katika Moyo Wako, kwani kwa namna yoyote ile, haiwezekani kabisa kuwatenganisha. Na kishapo, mnapeana baraka kati yenu, Wewe unampa busu la mwisho ili kumtia moyo na nguvu katika mateso makali atakayoyakabili, na ndivyo unamuaga kwa mara ya mwisho na mnaondoka.

Lakini, hali na rangi ya uso wako, midomo yako inayotetemeka, sauti yako iliyokauka na kukatika kana kwamba unataka kulia unapoagana na Mama, yote hayo huonyesha jinsi unavyompenda na unavyoteseka kuachana naye! Hata hivyo, ili tu kutekeleza Utashi wa Baba, Wewe na Mama mnajiweka chini ya mapenzi yake huku mioyo yenu ikiwa imeunganika mmoja ndani ya mwenzake. Mnataka kulipa fidia kwa makosa ya watu kama vile haya: wanaoshindwa kutengana na mapenzi ya ndugu na marafiki, wanaoshindwa kutengana na vifungo au mahusiano mbalimbali hata yale yaliyo halali na matakatifu, na hivyo kuwa watu wasiojali kutekeleza Utashi Mtukufu wa Mungu. Mnataka pia kulipa fidia kwa makosa ya wale wanaoshindwa kuishi kitakatifu kulingana na hali ya wito wao wanaoupata toka kwa Mungu. Ni Mateso makali gani wanayokupa hawa watu wanapolipinga na kuligomea moyoni mwao lile Pendo unalotaka kuwapatia! Badala yake, wao wanajiridhisha na pendo la viumbe mbalimbali!

Ewe Pendo Langu Pendevu, wakati ninapolipa fidia hiyo pamoja nawe, uniruhusu nibaki na Mama yako, ili nimfariji na kumshikilia kwanza wakati wewe unapoondoka; kishapo nitaongeza hatua kuharikisha kukufikia. Lakini kwa uchungu wangu mkali sana, namwona Mama ameishiwa nguvu na anatetemeka, na teso lake ni kali hivi kwamba anapojaribu kusema ‘kwaheri’ kwa Mwanae, sauti yake inafifia midomoni, na anashindwa kutamka maneno, anatetereka, na katika mojonzi yake ya mapendo anasema: “Mwanangu, Mwanangu, Nakubariki! Jinsi gani inavyoniuma kutengana nawe, ni ukatili kuliko kifo chochote!”. Na mateso yanamzuia asiweze kusema chochote tena, kwani yanamfanya anyamaze kama bubu.

Malkia wa Masikitiko, uniache nikushikilie, niache nikupanguse machozi, na nikuhurumie katika teso lako kali. Mama yangu, mimi sitakuacha peke yako, na wewe unichukue nje nawe; katika dakika hizi za mateso namna hiyo kwako na kwa Yesu, unifundishe kitu cha kufanya, jinsi gani ya kumtetea Yesu, namna gani ya kumlipa fidia na kumfariji, na unifundishe iwapo lazima nitoe uhai wangu kwa ajili ya kutetea uhai wake. La hasha, mimi sitatoka nje ya bushuti lako hili; utakaponipa ishara tu nitarukia kwa Yesu na kumfikishia pendo lako, hisia zako, mabusu yako pamoja na ya kwangu. Hayo yote nitayaweka ndani ya kila donda, ndani ya kila tone la Damu yake, ndani ya kila umivu na dharau, ili kwamba katika kila umivu lake, aonje mabusu na pendo la Mama, na hapo maumivu yatatuliza na kupunguza uchungu wake. Kishapo nitarudi tena ndani ya bushuti lako nikikuletea mabusu yake Mwanao ili kutuliza uchungu wa moyo wako uliopondeka.

Mama yangu, moyo wangu unagongagonga, nami nataka sana kwenda kwa Yesu: Sasa ninapobusu mikono yako ya kimama, unibariki kama ulivyombariki Yesu na uniruhusu niende mara kwake.

Mpendwa Yesu Wangu, pendo ndilo linaniongoza na kunionyesha hatua zako zilimopita hata ninakukuta wakati Wewe na Wafuasi wako wapendwa mnatembea na kupita katika barabara za Yerusalemu. Ninapokutazama, nakuona upo bado na uso wa masikitiko na uchovu sana, nasikia ndiyo sauti yako laini, lakini ni ya kinyonge, kiasi kwamba inawasikitisha hata Wafuasi wako kwani wamefadhaika.

Nakusikia ukisema: “Leo ndiyo mara ya mwisho kwangu kutembea katika barabara hizi nikiwa peke yangu, kesho nitapita humu humu nikiwa nimefungwa kamba, nikiburuzwa na katika madharau elfu na elfu!”. Na huku ukionyesha sehemu za vituo ambamo utadhulumiwa na kuteswa zaidi unaendelea kusema: “Maisha yangu yanaelekea kuchwa hapa duniani kama vile jua linavyozama saa hizi, na kesho, saa kama hii, sitakuwepo tena. Lakini kama ilivyo kwa jua, nitafufuka siku ya tatu”. Mbele ya maneno hayo yako, Mitume wanashikwa na masikitiko na wanaingia katika ukimya kwani hawajui la kujibu. Nawe unaendelea kusema:

“Jipeni moyo, msipondeke, mimi siwaachi, bali nitakuwa nanyi daima; lakini ni lazima mimi nife kwa ajili ya faida ya ninyi nyote”. Unapotamka hivyo, unapata fadhaa, lakini katika sauti ya kutetemeka unaendelea kuwafundisha. Na kabla ya kuingia na kujifungilia katika chumba cha Karamu, unaangalia jua likielekea kuzama kama vile uhai wako unavyoelekea kuzama, unatolea hatua zako zote kwa ajili ya wale wanaoelekea machweo ya uhai wao, unawapa neema itakayowawezesha kufa ndani yako. Ndivyo unavyotoa fidia kwa ajili ya wale ambao, kwa kusikitishwa na mabaya au kwa kudanganyika, wamekata tamaa na wanagoma na kukaidi kurekebisha maisha yao ili wafuate njia zako.

Halafu mwishowe unauangalia tena mji wa Yerusalemu, uwanja wa miujiza yako, na mji kipenzi cha Moyo wako, mji ambao kinyume cha Pendo hilo, sasa upo katika kuandaa Msalaba na wanaponda misumari ili kukamilisha mauaji ya Mungu. Wewe unatetemeka, Moyo wako unapasuka kwa uchungu na unalia juu ya kuangamia kwa mji huo. Kwa majonzi hayo, unalipa fidia ya roho zile nyingi za watu wa maisha ya wakfu, ambao wakati wewe ulipotamani kuonyesha mambo makuu ya Upendo wako

ndani yao, wao lakini wanakuletea mateso na uchungu zaidi. Ninataka nilipe fidia hiyo pamoja Nawe ili kupoza uchungu wa Moyo wako uliopondeka.

Hata hivyo nakuona bado umepigwa butwaa na sikitiko na hali ya Yerusalemu. Unageuza macho yako na mara unaelekea na kuingia ndani ya Chumba cha Karamu ya mwisho. Ewe Pendo Langu, hebu unibane kwenye Moyo Wako ili machungu yako yawe machungu yangu ili pamoja nawe niweze kuyatolea, na Wewe uihurumie roho yangu, uimwagie Pendo lako na unibariki.



TAFAKARI NA ZOEZI

Yesu kwa uhiari wake, anajitenga na Mama yake Mtakatifu ingawa kama Moyo wake laini kabisa unapata pigo kali sana. Na sisi, ili tuweze kutimiza Utashi wa Mungu, je tupo tayari hivyo kusadaka mapenzi mbalimbali hata yale yaliyokuwa halali na matakatifu? Hebu tutafakari na kujichunguza hasa juu ya nyakati zile ambapo uwepo wa Mungu hutoweka au kufifia hata usionjeke tena?

Yesu, wakati anatembea hatua zake za mwisho, hakutembelea pa tupu pasipo na faida yeyote bali katika hatua hizo alikuwa akimtukuza Baba na akiomba wokovu wa roho mbalimbali! Na sisi pia yatupasa kuweka nia hizo hizo alizoweka Yesu, yaani kujitolea sadaka kwa ajili ya utukufu wa Baba na kwa manufaa ya roho za watu. Zaidi, tujikute na sisi tukiingiza hatua zetu katika hatua za Yesu Kristo. Yesu hakukanyaga hatua zake patupu na bila malengo, bali aliunganisha hatua zake na zile hatua za viumbe ili kutoa fidia kwa hatua zote mbaya. Hivyo alitoa utukufu utakiwao kwa Baba na alitoa pia uzima wake kwa ajili ya hatua zote mbaya za viumbe ili kuviwezesha viumbe hivyo kutembea katika njia ya heri. Na sisi pia tutafanya kadhalika. Tutaweka hatua zetu ndani ya zile za Yesu Kristo tukiwa na nia hizo hizo. Je tunapotembea barabarani tunakuwa na tabia ya heshima na ya tafakari hata tuweze kuwa mfano mzuri kwa wengine?

Katika uchungu na Mateso yake Yesu alikuwa anatembea, huku mara kwa mara akitoa kwa Mitume wake neno linalogusia Mateso yake hayo yaliyokuwa yanakaribia. Na sisi je katika mazungumzo yetu tunasema mambo gani? Je imewahi kutokea katika nafasi kama hizo za mazungumzo, kwamba tunagusia Mateso ya Mungu Mwokozi wetu?

Yesu mwenye kutupenda, alipowaona Mitume wameshikwa na uchungu na wanakata tamaa, alitafuta jinsi ya kuwatuliza. Je na sisi katika mazungumzo yetu huwa tunaweka nia ya kumtuliza Yesu Kristo na kumtia moyo? Je huwa tunafanya mazungumzo hayo katika Utashi wa Mungu, kwa lengo la kuingiza roho ya Yesu Kristo ndani ya watu wengine?

Yesu anakwenda kwenye Chumba cha Karamu ya mwisho. Kwa upande wetu, tunapotarajia kutenda lolote yatupasa kuingiza na kufungilia ndani ya Moyo wa Yesu Kristo mambo yetu yote: mawazo, hisia za dukuduku zetu, mapigo ya moyo wetu, sala zetu, matendo yetu, chakula, kazi nk. Tukifanya hivyo matendo yetu yote yatapata tabia na nguvu ya kimungu. Lakini kwa vile ni vigumu kuendelea kudumisha daima tabia hiyo ya kimungu, maadam roho ya binadamu huwa inapata ugumu fulani wa kuingiza na kuunganisha kwa mfululizo matendo yake ndani ya Yesu, roho hiyo inaweza kuongeza uwezo wake kupitia Utashi wake mwema. Yesu kwa upendeleo wake mkubwa, atatoa uwezo huo kwa vile ni Yeye anayelinda kila wazo, kila neno na kila pigo la moyo. Na pia ni Yeye anayeyapanga haya yote, katika foleni ya msaada ndani na nje ya moyo wake, huku akiviangalia kwa upendo mkubwa kama tunda la utashi wa kiumbe.


Halafu, wakati roho inapojiingiza na kujiunganisha na Yesu, na hapo hapo inaanza kutekeleza matendo yake ya dakika hiyo pamoja na Yesu, huyu Yesu mwema atavutwa kabisa mara ile kuelekea

hiyo roho, na hivyo ataanza naye kutenda matendo hayo hayo ambayo roho inatenda. Na hapo Yesu atageuza vitendo vyote vya kile kiumbe na kuvifanya viwe vitendo vya kimungu. Hayo yote ni matokeo ya wema wa Mungu. Ni Yeye anayetunza mahesabu na kufuatilia yote, ni Yeye anayelipa yote hata kitendo kidogo kabisa katika Utashi wa Mungu, analipa yote ili kwamba kiumbe kisinyang'anywe au kupoteza, au kuibiwa kitendo chake hata kimoja.

Ewe Uhai wangu na Ewe uliye Chote Changu, unijalie hatua zako ziongoze hatua zangu na kila nikanyagapo ardhi, mawazo yangu yawe mbinguni.

(Sala ya Kushukuru.

Tazama Uk 2)



SAA YA TATU

(Kuanzia Saa Moja Usiku Hadi Saa Mbili Usiku)

Karamu ya Kisheria

(Sala ya Kujiandaa.

Tazama Uk 1)

Ee Yesu, tayari unawasili katika Chumba cha Karamu ya Mwisho wewe pamoja na Wafuasi wapendwa na unaketi kwa karamu pamoja nao. Unapojinyenyekea kula chakula cha kimwili kwa mara ya mwisho, ni jinsi gani ya utulivu na jinsi gani ya upendo inaonyesha Nafsi yako yote! Ndani yako yote ni upendo. Hata katika hili, Wewe hulipi fidia kwa dhambi za ulafi tu, bali unaomba hata utakaso wa chakula, na kwa vile chakula hubadilika kuwa nguvu, hivyo pia unatuomba sisi utakatifu hata katika vitu vidogo sana na vya kila siku.

Yesu, Uhai Wangu, Jicho lako pendevu na lenye kupenya yaelekea linachunguza Mitume wote, na hata katika tendo lile la kula chakula, Moyo Wako unaendelea kuchomwa unapowaona Mitume wako dhaifu na waoga bado kama vile Yuda mjeuri, ambaye tayari amekwisha kuingiza mguu wake motoni mwa milele. Na wewe, toka kina cha Moyo Wako, kwa uchungu mkuu unasema: “Je Damu yangu ina manufaa gani? Tazama, roho niliyoitendea mema mengi sana imepotea!”. Na kwa Macho yako yanayong’aa kwa nuru na kwa upendo unamwangalia kana kwamba ungemtakia atambue na kuelewa uovu anaotarajia kuutekeleza. Lakini wema wako mkuu kabisa unakufanya uvumilie Teso hili, na wala hufanyi lionekane hata kwa Wafuasi wako wapendwa.

Wakati unateseka sababu ya Yuda, Moyo Wako lakini unajaa furaha kumwona kushoto kwako Mfuasi wako mpendwa Yohane. Ni furaha kubwa hivi kiasi kwamba, kwa kushindwa kuzuia upendo wako, unamvuta kwako kwa upenzi na unamruhusu aegeshe kichwa chake juu ya Moyo wako ili aanze kuonja paradisi kabla ya wakati wake. Pia katika dakika hii takatifu, kutokana na Wafuasi wale wawili, huonekana aina mbili za watu wa Taifa: Wale waliolaaniwa na wale walioteuliwa. Waliolaaniwa ni katika Yuda ambaye tayari anaonja moto wa milele moyoni mwake, na walioteuliwa ni katika Yohane ambaye anapumzika na kufurahia ndani yako.

Ewe Mtamu Chema Changu, hata mimi najisogeza kando yako na pamoja na Mwanafunzi wako mpendwa nataka kulaza kichwa changu kilichochoka juu ya Moyo Wako mwabudika. Nakuomba unijalie, pindi ninapokuwa bado katika dunia hii, nionje matamu ya mbinguni ili ninapokuwa nimetekwa na uzuri na utulivu wa Moyo Wako, dunia hii isibaki kuwa dunia kwangu, bali iwe ni mbingu. Lakini kumbe katika utulivu ule mtamu kabisa wa kimungu, ninaonja yanakujia mapigo ya moyo yenye Mateso. Ni kutokana na roho zile zilizopotea! Ee Yesu, usiruhusu roho nyingine tena zipotee! Ujalie pigo la Moyo Wako, linapotiririkia katika pigo la moyo wao, lifanye waonje mapigo ya uzima wa mbingu kama

Mwanafunzi wako mpenzi Yohane alivyoona. Wakiisha kuvutwa na utamu na raha ya Pendo lako, wote wavutwe kuelekea kwako.

Ee Yesu, wakati nabaki bado katika Moyo Wako, unipe na mimi chakula kama ulivyowapa Mitume: chakula cha upendo, chakula cha Neno lako la kimungu, chakula cha Utashi wako wa kimungu. Ee Yesu Wangu, usininyime chakula hicho ambacho Wewe Mwenyewe unatamani sana kunipatia ili uhai wako wenyewe utengenezwe ndani yangu.

Mtamu Chema Changu, pindi nipo hapa kando yako, ninaona kwamba chakula unachokula na Wafuasi wapenzi wako siyo kingine kile bali ni mwanakondoo. Huyu ni mwanakondoo wa mfano tu. Katika mwanakondoo huyu haijabakia tena ile nguvu ya uhai kutokana na nguvu ya moto. Kwa hiyo, Wewe, Mwanakondoo wa Fumbo, ambaye kwa nguvu ya Upendo unatakiwa kujimaliza kwa ajili ya viumbe vyako, hutasaza hata tone moja la Damu yako kwa ajili Yako Mwenyewe, bali utamimina yote kwa ajili ya kutupenda sisi. Ni kwa hoja hiyo, ee Yesu, hakuna unachotenda sasa kisichokuwa ishara hai ya Mateso yako makali kabisa ambayo yapo daima akilini mwako, moyoni mwako, na katika yote. Na hili linanifundisha kwamba hata mimi, kama nitaliweka mbele ya akili yangu na mbele ya moyo wangu wazo la Mateso yako, Wewe hutaweza kamwe kunikatalia chakula cha Pendo lako. Nikushukuruje Wewe!

Ee Yesu Wangu, hakuna tendo linalokupita bila kuhusisha uwepo wangu na bila kuwa na nia ya kunitendea mimi jema la pekee. Kwa hiyo nakuomba Mateso yako yawepo daima akilini mwangu, moyoni mwangu, machoni pangu, katika hatua zangu, katika maumivu yangu, ili kokote ninakoelekea, ndani au nje ya mimi mwenyewe, nikukute Wewe upo tayari mbele yangu. Na unijalie neema ya kutokusahau kile ulichonitendea na kile ulichoteswa kwa ajili yangu. Hatma ya maisha yangu iwe ni hii: Baada ya kuvutia na kuingiza nafsi yangu yote ndani yako, kamwe nisipate kutengana nawe.



TAFAKARI NA ZOEZI

Kabla ya kula chakula, tuunganishe nia zetu na nia zile za Yesu mwema na mpendwa wetu. Tujifikirie kwamba ndani ya mdomo wetu tunao Mdomo wa Yesu, na kwamba tunazungusha ulimi wetu na kinywa chetu pamoja na Kinywa cha Yesu. Tunapofanya hivyo siyo tu tutavutia ndani yetu uhai wa Yesu Kristo, bali tutakuwa tunaungana naye katika kutoa utukufu kwa Baba, kutoa sifa, upendo, shukrani, na fidia nzima itakiwayo toka viumbe, yaani ile fidia aliyokuwa anatoa Yesu Mwema katika tendo la kula chakula. Tujione na sisi kuwa tupo mezani kando ya Yesu Kristo, na sasa ndiyo saa ya kumwangalia, saa ya kumwomba atugawie kipande cha mkate, saa ya kubusu upinde wa vazi lake, ni saa ya kutafakari jinsi anavyoanza kutembeza Midomo yake, kutembeza Macho yake, na pia saa ya kugundua jinsi Uso wake mpendevu unavyoanza mara kupoteza mng'ao wake anapoanza kuona ufedhuli mwingi sana wa kibinadamu.

*Kama vile Yesu anayetupenda alivyokuwa anazungumza juu ya Mateso yake, wakati wa karamu ya sheria ndivyo nasi, pindi tunapokula chakula tutajaribu kutafakari kama tulivyofanya juu ya **'Saa za Mateso'**. Malaika tayari wananing'inia juu ya midomo yetu wakiwa tayari wanangojea kukusanya sala zetu, kuchukua fidia zetu na kuzipeleka mbele ya Baba, ili kutuliza kwa kiasi fulani ile hasira yake ya Haki juu ya makosa mengi sana anayopata toka kwa viumbe. Malaika wanachukua sala sawa kama walivyofanya wakati Yesu alipokuwa hapa duniani. Na sisi, tunaposali, je tunaweza kusema kuwa Malaika wameridhika kwa vile tulikuwa tumetulia, tumesali kwa heshima na ibada hata wao kuweza kuzipeleka sala zetu hizo mbinguni katika furaha kama walivyopeleka sala za Yesu wetu, au je sala zetu zimekuwa tofauti?*

Pindi Yesu Mteseka alipokuwa anakula chakula, aliendelea kuumia kutokana na kupotea kwa Yuda, na ndani ya huyu Yuda alikuwa anazona roho zote zilizopasika kupotea. Na kwa vile Teso la kupotea kwa roho ndilo kali kupita yote, kwa kushindwa kulivumilia hilo, alimvutia kwake Yohane ili ajipatie kitulizo. Ndivyo na sisi tuwe kwake kama Yohane, daima kando yake, kushiriki katika Mateso yake, kumpa faraja, na kumpa pumziko katika moyo wetu. Sisi tutachukua maumivu yake, tutajiainisha ndani yake, na hivyo tutayasikia mapigo ya ule Moyo wa kimungu uliukumizwa na kupata madonda kutokana na kupotea kwa roho mbalimbali. Na sisi tutampa mapigo ya kwetu ili kufuta na kuyaondoa yale madonda, na badala yake ni sisi tutakaompatia roho zile zinazoelekea kupotea ili roho hizo zipate kuongoka na ziokoke.

*Kila pigo la Moyo wa Yesu ni sauti inayosema **"NAKUPENDA"**, ni sauti inayojirudia hivyo katika mapigo yote ya mioyo ya viumbe ambavyo Yesu angependa kuvifungilia vyote ndani ya Moyo wake, ili kubadilishana na mapigo yao ya moyo. Lakini Yesu mwenye Upendo anashindwa kupata hilo kutoka kwa wengi wao, na kwa hiyo Moyo Wake hubaki ukibanwa na kuzibwa na kupata uchungu. Na sisi tunamwomba Yesu aandike sauti na neno **"NAKUPENDA"** ndani ya kila pigo la moyo wetu, ili hata moyo wetu uwe na Uhai ule wa Moyo Wake, ambao unarudiarudia kupiga ndani ya mapigo ya viumbe hata kuweza kuvisukuma viseme **"NAKUPENDA YESU"**. Yaani sisi tutayeyukia ndani yake na Mpendwa Yesu atatufanya tusikie sauti na neno lake: **"NAKUPENDA"**. Neno hili **"NAKUPENDA"** ni kubwa sana*

na zito sana, ni neno linalojaza mbingu na dunia, linazunguka kati ya Watakatifu, linateremka chini hadi tohorani. Mioyo yote ya viumbe inaguswa na sauti ya neno hilo **“NAKUPENDA”**. Hata viumbe vingine vyenyewe hujisikia uhai mpya kwa jinsi wanapoonja na kuonja matokeo ya neno hilo.

Hata katika pumzi yake, Yesu anaonja kama inambana na kumziba, kwa sababu ya kupotea kwa baadhi ya roho. Na sisi tutampatia pumzi yetu ya upendo iwe kitulizo chake. Na kwa kutwaa pumzi yake, sisi tutagusa roho zile zinazojibandua toka mikononi mwa Yesu, na kwa kuzigusa, tutazigawia uhai utokao katika pumzi ya kimungu. Kwa hiyo, badala ya roho hizo kumtoroka, zitaweza sasa kumrudia na kujibana kwake. Na nyakati tunapokuwa katika mateso, na tunapoonja pumzi yetu imebana na haitoki tena kirahisi, tumfikirie hapo Yesu ambaye ndani ya pumzi yake kuna pumzi ya viumbe. Hata Yeye, jinsi roho zinavyozidi kupotea, anajionja pumzi yake inakatika. Sisi kwa upande wetu tuweke pumzi yetu ya mateso na mahangaiko ndani ya pumzi ya Yesu ili tuweze kumtuliza, na pamoja na teso letu tumkimbilie hima mtu yule mdhambi, ili kumlazimisha na kumsukumia ajifungie ndani ya Moyo wa Yesu.

Mpendwa Chema Changu, pumzi yangu iwe ni mwito wangu wa daima kwa kila pumzi ya kiumbe, ili Wewe umsukumie kiumbe huyo ajifungilie ndani ya pumzi yako.

Neno la kwanza alilotamka Yesu pale Msalabani lilikuwa ni neno la **‘msamaha’**, ili kuzitetea roho zote mbele ya Baba na ili kugeuza Haki iwe Huruma. Nasi kwa upande wetu, tutamtolea Yesu matendo yetu kama **‘utetezi’** kwa mdhambi, ili baada ya kulainishwa na utetezi wetu, pasiwe na roho yoyote inayoweza ikaenda motoni. Tutaungana Naye, ili kulinda mlangoni roho za viumbe zisimtendee maovu. Tutamfanya afurike na kuwaka upendo, iwapo tutakubalia kwa moyo mkunjufu kila kitu atakachokuwa anatuletea: hali ya ubaridi, magumu, giza na mawingu, madhulumu, vishawishi au majaribu, kuvurugika, mazingizio, magonjwa na mengineyo. Tutayapokea hayo ili kumfariji katika maumivu anayopata toka kwa viumbe. Yesu huwa hafuriki na kumwaga upendo tu kwa viumbe, bali mara nyingi anapoonja ubaridi wa viumbe, huwa anaiendea hiyo roho na kuifanya ionje ubaridi wake, ili kuimwagia baridi yake. Iwapo roho hiyo itakubalia, Yesu atajionja kuburudika na ubaridi wa viumbe wa aina zote, na baridi hiyo itakuwa ndiyo mlinzi mlango wa ule moyo mwingine hata kuifanya umpende Yesu Mpenda. Na mara nyingine, Yesu husikia na kuonja ugumu wa mioyo ndani ya Moyo Wake, na kwa kushindwa kuivumilia na kuizuia mioyo hiyo, huwa anatamani aimwage nje kwa kutujia sisi. Anagusisha Moyo Wake kwenye moyo wetu, anatufanya sisi tushiriki Teso lile lililo ndani yake. Nasi, tukiisha kulichukua Teso la Yesu na kulifanya la kwetu, tunachukua Teso hilo na kulizungusha nje ya moyo wa mdhambi, ili kuyeyusha ule ugumu wake, na hivyo kuuongoza moyo huo tena kwake Yesu.

Mpendwa Chema Changu, Wewe unateseka sana kwa ajili ya roho mbalimbali kupotea, na mimi, ili kuteseka pamoja nawe, naiweka nafsi yangu mikononi mwako na chini yako. Nitatwaa mimi Mateso yako, na mateso ya wadhambi na nitakuacha umepoa na kupumzika, na mdhambi atabaki amerudi na kutekwa mikononi mwako.

Ee Yesu Wangu, Ah, ujalie nafsi yangu yote iyeyuke kuwa upendo, ili iwe inadumu daima kuwa kitulizo na inogeshe machungu yako yote.

(Sala ya Kushukuru.

Tazama Uk 2)

SAA YA NNE

(Kuanzia Saa Mbili Usiku Hadi Saa Tatu Usiku)

Karamu ya Ki-Ekaristi

(Sala ya Kujiandaa.

Tazama Uk 1)

Pendo Langu Tamu, Wewe usiyeshiba kamwe katika Pendo lako, naona kwamba, wakati unapohitimisha karamu ya kisheria, ukiwa pamoja na Wanafunzi wako wapendwa, unainuka toka mezani na ukiungana nao, unaimba utenzi wa shukrani kwa Baba, kumshukuru kwa kuwapa chakula, kwa njia hiyo unataka kulipa fidia kwa kosa la viumbe la kutotoa shukrani kwa mahitaji mengi sana, ambayo Mungu anatupatia kwa ajili ya kutegemeza uhai wa kimwili. Kwa hiyo Ee Yesu, katika kila kitu unachotenda, unachogusa, unachooona, daima unalo neno moja tu juu ya mdomo wako, nalo ni: Shukrani zitolewe kwako Ee Baba.

Na mimi pia, nikiunganika nawe nayachukua maneno toka mdomoni mwako, na katika yote na daima nitakuwa nasema: Asante kwa niaba yangu mwenyewe na ya watu wote. Nitasema hivyo kwa ajili ya kuendeleza fidia kwa makosa ya kutoshukuru.

Yesu Anaosha Miguu ya Mitume

Ee Yesu Wangu, yaelekea Pendo lako halina pumziko. Naona unawaketisha tena Wanafunzi wako wapendwa. Unatwaa bakuli la maji, unajifunga kiunoni taulo nyeupe, unainama na kupiga magoti miguuni pa Mitume katika tendo la unyenyekevu mkubwa hivi kiasi kwamba unavuta mshangao wa Mbingu yote na kuiacha imeduwaa. Na hata Mitume wenyewe wanashituka na kubaki wameduwaa bila kujimudu wanapokuona umepiga magoti mbele ya miguu yao. Hebu uniambie, Pendo Langu, unataka nini? Unanua kufanya nini kwa hiki kitendo cha unyenyekevu wa namna hiyo? Unyenyekevu ambao hatujawahi kuuona wala hatutauona kamwe?

“Ah, Binti yangu! Mimi nazitaka roho zote. Nikiwa chini ya miguu yao kama ombaomba fukara, ninawaomba, ninawasihi, na kwa kuwalilia naweka mitego ya upendo ili niwapate.

Nikiwa chini ya miguu yao, kwa bakuli hii ya maji yaliyochanganywa na machozi yangu, nataka niwatakase toka kila aina ya kasoro, ili kuwaandaa kunipokea mimi katika Sakramenti. Tendo la kunipokea katika Ekaristi limenishika kabisa, na kugusa Moyo Wangu kiasi kwamba sitaki kulikabidhi adhimisho hili wala kwa Malaika, na wala kwa Mama yangu mpenzi. Mimi mwenyewe, nataka kuwatakasa kabisa hadi viungo na mishipa yao ya ndani, ili kuwaweka sawa kupokea tunda la Sakramenti hii. Na kwa kupitia Mitume hawa, ninataka kuziandaa roho za watu wote.

Nataka kulipa fidia kwa ajili ya kazi zote takatifu na kazi za maadhimisho ya Sakramenti, hasa kazi zile zinazofanywa na Mapadre katika roho ya majivuno, ubinafsi, na bila uwepo wa roho ya kimungu.

Ah! Ni kazi ngapi nzuri zinanifikia zaidi kwa ajili ya kunidhalilisha, badala ya kuniletea heshima! Zaidi kwa ajili ya kunichukiza, kuliko kunipendeza! Zaidi kwa ajili ya kuniua, kuliko kuniletea Uhai! Hayo ndiyo makosa yanayonisikitisha zaidi. Ah, ndiyo Binti yangu! Orodhesha makosa yote wanayonitendea ndani kabisa ya Moyo Wangu, na unilipe fidia kwa kutumia fidia zile zile za kwangu. Utulize Moyo Wangu wenye masikitiko”.

Ee Chema Changu Mteseka, nachukua uzima wako, ili uwe uzima wangu, na hivyo pamoja nawe nanuia kukulipa fidia kwa makosa hayo yote. Nataka niingie kilindini kabisa kwenye maficho ya ndani ya Moyo Wako wa kimungu, na kwa Moyo Wako wenyewe nilipe fidia ya makosa ya ndani na ya sirini unayopata toka kwa wale walio wapenzi wako zaidi. Ninataka, Ee Yesu, kukufuata katika kila kitu, na pamoja nawe, nataka nizizungukie roho zote ambazo zinatakiwa zikupokee katika Ekaristi, na nataka niingie katika mioyo yao, na nitaunganisha mikono yangu na yako, ili tuzisafishe roho hizo. Ee Yesu, kwa haya machozi yako, na kwa maji ambayo ulioshea miguu ya Mitume, tuoshe roho zile ambazo zapasika kukupokea; tusafishe mioyo yao, tuiwashe moto, tuikung’ute mavumbi yanayoichafua na kuiziba, ili wanapokupokea, wewe upate ndani yao hali ile inayokupendeza, badala ya mambo yanayokuchukiza.

Ona lakini, Mpendwa Chema Changu, wakati upo makini kabisa katika kuosha miguu ya Mitume, nakuangalia, na natambua kuwa Teso lingine kubwa linachoma Moyo Wako Mtukufu. Hawa Mitume wanawakilisha wana wote wa baadaye wa Kanisa, na kila mmoja wao anawakilisha aina mojawapo ya maovu yote yatakayokuja kuwepo ndani ya Kanisa, na kwa hiyo wanawakilisha aina zote za Mateso yako. Katika Mtume huyu unaona udhaifu mbalimbali, katika yule kuna uwongo na udanganyifu, katika huyu kuna unafiki na ufedhuli, katika yule kuna upendo uliotafunwa na ubinafsi wake, katika Mtakatifu Petro kuna kukosea maamuzi na makosa yote ya viongozi wa Kanisa, katika Mtakatifu Yohane ni makosa ya wale wote unaowaamini sana, katika Yuda kuna uhaini na aina zote za uovu mbaya unaotekelezwa na hao. Moyo Wako umebanwa kabisa na Teso kali na Pendo, umebanwa hivyo kiasi kwamba unashindwa kuinuka, badala yake unabaki huku umechuchumaa pale penye miguu ya kila Mtume huku ukianguka katika kilio, unasali na kulipa fidia kwa kila moja ya makosa hayo, na unawaombea wote msamaha na kuwalipia malipizi mara hii. Yesu Wangu, hata mimi najiunganisha Nawe. Sala zako nazifanya ziwe ni sala zangu, na hivyo kwa fidia unazotoa Wewe na malipizi unayolipa Wewe kwa ajili ya kila roho. Nataka niyachanganye machozi ya kwangu pamoja na ya kwako ili Wewe usibaki kamwe peke yako bali uwe nami daima hata tuweze kushirikishana pamoja maumivu yako.

Yamkini unaposogea mbele, Pendo Langu Tamu, katika zoezi la kuosha miguu ya Mitume, nakuona umetua penye miguu ya Yuda. Ninasikia unavyopumua kwa Mateso makali. Nakuona siyo unalia tu, bali hata unakoroma; na wakati unaosha miguu hiyo, unaiinamia na kuibusu, unaiinua na kuibana kwenye Moyo Wako. Kwa vile unashindwa kabisa kutoa sauti kwa sababu imezibwa na kukatishwa na kilio, unamwambia kwa Macho yako yaliyovimba kwa machozi na unamwambia kwa moyo:

“Mwanangu! Eh, ninakuomba kwa sauti za machozi, usiende motoni! Nipe mimi roho yako ambayo naiomba sasa hapa chini ya miguu yako! Sema, ni kitu gani unachotaka? Ni nini unatamani na kutarajia? Mimi nitakupa kila kitu ili mradi usipotee. Eh, Uniondolee Teso hilo toka ndani mwangu Mimi Mungu wako!”.

Unarudia tena kuishika miguu ile na kuibania kwenye Moyo Wako. Lakini, unapoona ugumu ule wa Yuda, Moyo Wako unabakwa kabisa, Pendo lako linakuziba kabisa, na linakulegeza hata unaanza kuzirai. Ee Yesu, Moyo Wangu na Uhai Wangu, hebu uniruhusu mimi nikushikilie mikononi mwangu. Naelewa kwamba hizo ndizo mbinu zako za kimapenzi unazotumia kwa kila mdhambi mwenye roho ngumu.

Ee! Ninakuomba, Moyo Wangu, pindi ninapokuhurumia na kukulipa fidia kwa maovu unayopata toka kwa roho mbalimbali zinazokukaidi na zinazogoma kuongoka, hebu kwa pamoja tuzunguke duniani kule ambako wako wadhambi wenye roho ngumu, tuwapatie machozi yako, ili kuwalainisha, tuwape mabusu yako na mapendo yako makali ili tuwafungilie kwako hata wasiweze kutoroka tena na kwa njia hiyo tupoze maumivu yako yatokanayo na kupotea kwa Yuda.

Kuwekwa Ekaristi Takatifu

Yesu Wangu, Furaha na Utamu Wangu, ninaona kuwa Pendo lako lipo mbioni, linakimbia kwa kasi. Unainuka hata kama upo katika maumivu, unaenda mbio kule kwenye Altare palipoandaliwa Mkate na Divai kwa ajili ya mageuzo. Ninakuona, Moyo Wangu, unaanza kuchukua sura mpya kabisa ambayo sijawahi kuiona kamwe. Nafsi yako ya kimungu inatwaa sura laini, ya upendo na ya mapenzi ya kirafiki: Macho yako yanatoa mwanga zaidi utadhani yamekuwa jua; Uso wako wenye rangi ya mawaridi unaangaza, Midomo yako inatabasamu, na inaungua kwa upendo; Mikono yako ya uumbaji inajiweka tayari kuanza kazi yake ya kuumba. Ninakuona, Pendo Langu, umebadilika kabisa. Yaelekea Umungu Wako unafurika nje na kufunika Ubinadamu wako.

Yesu, Moyo Wangu na Uhai Wangu, hiyo Sura yako ya leo ambayo hatujawahi kuiona kabla inawashitua Mitume wote: wameshikwa na mshangao mkubwa hata hawathubutu kupumua. Mama mtamu anakimbia kiroho na kuelekea kwenye Altare kwenda kuchungulia makuu ya Pendo lako. Malaika nao wanateremka toka Mbinguni na wanaulizana: Kuna nini? Kuna nini? Ni kweli jambo la ajabu lisilowezekana! Ni kweli limepita mipaka na limepita kiasi mno: Mungu anayeumba, sasa anaumba siyo mbingu au dunia, bali anajiumba Yeye Mwenyewe. Na ni wapi? Ndani ya vitu vidogo na vinyonge vya mkate mdogo na divai kidogo! Lakini, wakati Mitume wote wamekwisha kuketi wakikuzunguka, Ee Pendo Lisilozimika, nakuona unachukua Mkate katika mikono yako, unautolea kwa Baba na ninasikia sauti yako tamu sana inayosema:

“Baba Mtakatifu, sifa zitolewe kwako Wewe ambaye daima huwa unamsikiliza Mwanao. Baba Mtakatifu, fika haraka uwe nami na uungane nami. Wewe ulinituma Mimi siku moja toka Mbinguni nje duniani kujimwilisha katika tumbo la Mama yangu, ili kuja kuokoa wana wetu. Sasa hebu uniruhusu mimi nijimwilishe katika kila moja ya Hostia, kwa lengo la kuendeleza wokovu wao, na ili niwe uhai wa kila

mmoja wa wana wangu. Tazama, Ee Baba: Ni saa chache tu zilizobakia za Uhai wangu. Nani atakuwa na moyo wa kuwaacha wana wangu wapweke na wakiwa. Maadui wao ni wengi: giza, mateso, udhaifu unaowakabili. Ni nani atakayewasaidia? Eh, ninakuomba nibakie ndani ya kila Hostia ili niwe uhai wa kila mmoja wao, na hivyo niweze kuwafukuzia mbali maadui, niwe nuru yao, nguvu na msaada wao katika kila kitu. Vinginevyo watakwenda wapi? Nani atawasaidia? Kazi zetu ni za milele, Pendo langu halizuiliki. Mimi siwezi na wala sitaki kamwe kuwaacha wana wangu”.

Baba analainika mbele ya sauti hiyo nyororo na ya kimapenzi ya Mwana. Anashuka toka Mbinguni. Amekwish kufika Altareni na huku akiungana na Roho Mtakatifu, wanakubaliana na Mwana. Na Yesu, kwa sauti nyembamba na ya kuvutia sana, anatamka maneno ya Konsekrasio, na bila kujiacha Yeye Mwenyewe anajiumba Mwenyewe ndani ya ule Mkate na ndani ya Divai ile.

Halafu unawakominisha Mitume wako; na ninaamini Mama Yetu wa Mbinguni hakuweza akabaki bila kukupokea. Ah, Yesu! Mbingu zinainama na wote wanakutolea tendo la uabudu katika hali hii yako mpya ya kujihinisha kwa kina kabisa.

Lakini, Ee Yesu Mtamu, wakati Pendo lako sasa linabaki limeridhika na kufurahi baada ya kukamilisha yote, huku ukiwa huna kingine cha kufanya, ninaona, Ee Chema Changu, hapa juu ya Altare hii, Hostia zote zilizogeuzwa. Hostia hizi zitaendeleza na kudumisha Mateso yako makali yaliyosambaa katika kila Hostia moja moja. Zitasambaza daima Mateso yako hadi mwisho wa nyakati kwa vile viumbe vinakuletea ufedhuli mkubwa mno na maovu yanayopita kiasi. Na mimi, Moyo wa moyo wangu, nataka niwepo daima nawe katika kila tabernakulo, katika kila chiborio, na katika kila Hostia iliyogeuzwa itakayokuwepo hadi mwisho wa dunia. Nataka niwepo ili nitoe matendo yangu ya fidia kwa maovu yale unayotendewa.

Ee Yesu, ninakutafakari ukiwa ndani ya Hostia Takatifu, na kana kwamba ningekuona katika Nafsi yako abudika, ninabusu Uso wako mtukufu. Lakini ninapokubusu ninaonja kabisa matobo ya miiba yako. Ee Yesu Wangu, katika Hostia hii Takatifu ni viumbe wengi wangapi wanaendelea kukutesa, hata wasipunguze au kukuondolea hiyo miiba! Wanakujia, na badala ya kukuletea heshima na kukutolea shukrani kwa mawazo yao mazuri, wao wanakuletea mawazo mabaya, na Wewe kwa upande wako, unainamisha tena Kichwa sawa kama wakati wa Mateso ili uweze kupokea tena na kuivumilia miiba ya mawazo haya mabaya. Ee Pendo Langu, mimi, pamoja nawe, nainamisha kichwa ili kugawana nawe maumivu yako. Ninayaweka mawazo yangu yote ndani ya akili yako ili kusukumia nje miiba hiyo inayokutesa mno, na kila wazo la kwangu litiririkie ndani ya kila wazo lako ili nikutolee tendo la fidia kwa kila wazo baya, na hivyo niweze kutuliza akili yako iliyochoka sana.

Yesu, Chema Changu, ninabusu sasa Macho yako mazuri: Nakuona katika Hostia hiyo Takatifu, pamoja na Macho yako ya upendo, ukiwa katika hali ya kuwangojea wale wote wanaokujia, ili kuwaona na kuwatazama kwa Macho yako ya upendo, na wao waweze kukutazama kwa macho yao ya upendo. Lakini, ni wengi wangapi kati yao wanaokujia wewe, na badala ya kukutazama na kukutafuta wewe, wao wanatazama vitu vinavyowavuruga, na kwa hiyo wanakuondolea ile hamu ambayo huwa unapata, wakati Macho yako yanapokutana na ya wale mnaotazamana kwa upendo. Unalia, na mimi nanapokubusu,

ninaonja midomo yangu inalowa na machozi yako. Yesu Wangu, usilie. Nataka kuweka macho yangu ndani ya Macho yako, ili tugawane kati yetu hayo maumivu yako, na ili nilie pamoja nawe. Nakutolea macho yangu yakaze kukutazama Wewe, kwani nataka kutoa fidia kwa utundu wa macho yote ya viumbe.

Yesu Pendo Langu, nabusu Masikio yako matukufu. Tayari ninakuona unataka kusikiliza kile ambacho viumbe wanataka kutoka kwako ili uwafariji. Wenyewe lakini, wanaleta Masikioni mwako sala walizosema ovyo ovyo, sala za wakata tamaa, sala za mazoea tu. Katika Hostia hii Takatifu sikio lako linaumizwa zaidi kupita pale katika Mateso yenyewe. Ee Yesu Wangu, napenda nitwae ule utulivu na amani ya mbinguni, na niingize ndani ya Masikio yako, ili kukulipa fidia, na nataka niingize masikio yangu ndani ya yale ya kwako, siyo tu kwa ajili ya kugawana kati yetu maumivu hayo, lakini hasa ni kwa ajili ya kunifanya niwe daima macho, kwa kile unachotaka na kinachokutesa Wewe, na hivyo niweze kufanya mara lile tendo langu endelevu la kutoa fidia na kukufariji.

Yesu, Uhai Wangu, ninabusu Uso Wako Mtukufu. Nauona umejaa damu, umevimba na umechujuka rangi. Viumbe mbalimbali, Ee Yesu, wanakuja mbele ya Hostia hii Takatifu na katika hali yao isiyo na adabu na katika mazungumzo yao machafu wanayofanya mbele yako, wao wanakuchapa makofi na kukutemea mate badala ya kukutolea heshima. Na Wewe, kama ilivyokuwa wakati wa Mateso, unawapokea na unawavumilia yote katika amani na saburi yote. Ee Yesu, nataka kusogeza uso wangu siyo tu karibu nawe ili nikupapase na kukubusu wakati unapopigwa makofi na ili kupangusa mate waliyokutemea, bali hasa nataka niingize uso wangu ndani ya Uso wako wenyewe ili tugawane maumivu hayo. Zaidi ya hilo, ninanua kutokana na nafsi yangu mwenyewe, nitengeneze vibinadamu vidogo vingi kabisa na kuviweka mbele yako mfano wa sanamu zilizopiga magoti, na kazi yao iwe kupiga goti na katika hali hiyo kwa mfululizo wawe wanakutolea fidia kwa matendo yote ya kukukosea adabu yafanywayo mbele yako.

Yesu, Changu Chote, ninabusu Mdomo wako Mtamu kabisa. Naona kwamba, katika kuingia na kuteremkia katika mioyo ya viumbe, Mguu wako wa kwanza unaukanyaga juu ya ulimi wao. Oh! Jinsi gani unavyoingia katika uchungu mkubwa unapokuta ndimi nyingi ni meno-msumeno, zina machafu, zina maovu! Ah, unaonja kama kichefuchefu kutokana na ndimi hizo. Na mbaya zaidi, unapoanza kuteremkia katika mioyo yao! Oh, Yesu, kama ingekuwa inawezekana, ningependa nijikute nipo ndani ya mdomo wa kila kiumbe ili nikuletee utamu, na ili nikulipe malipizi kwa kila ubaya unaotendewa na ndimi hizo.

Chema Changu Uliychoka, nabusu Shingo yako Tukufu. Nakuona umechoka, umedhoofika mno, na umejaa kabisa mawazo ya hekaheka zako za mapendo. Hebu niambie Ee Yesu, unafanya nini?

“Binti yangu, katika Hostia hii natenda kazi tangu asubuhi hadi jioni nikitengeneza minyororo ya upendo kiasi kwamba jinsi roho zinavyonijia, nahakikisha wanakuta minyororo yangu ya upendo ipo tayari, kwa ajili ya kuwafungilia ndani ya Moyo Wangu. Lakini unajua ni nini zinanitendea hizo roho? Roho nyingi zinatenda ubaya juu ya minyororo hiyo, kwani wanatumia nguvu kujirarua hata kuweza kuikata hiyo minyororo, na kwa vile imefungwa kwenye Moyo Wangu, mimi ninararuriwa na kupata maumivu ya kilio cha kufa. Kishapo, zinapokata minyororo yangu, kila kitu nilichofanya huwa ni kazi bure, badala yake roho hizo huenda kutafuta minyororo ya viumbe. Na hilo wanalitenda hata mbele ya Macho yangu, kwani

wananitumia mimi ili kufikia malengo yao. Hilo hunitesa kabisa kabisa. Linanipa homa kali ya juu hata kunifanya nizirai na kulia kwa Mateso.

Ee Yesu, ni jinsi gani nakuonea huruma! Pendo lako linakubana kabisa. Eh, nakuomba! Ufunge moyo wangu kwa minyororo hiyo yote kwa ajili ya kukutuliza kwa kazi yako na kwa ajili ya kukulipa fidia wakati minyororo yako ya mapenzi inapokatwa. Hivyo Wewe utaweza kulitoa Pendo lako kwao kwa kubadilisha na lile la kwangu.

Yesu Wangu Mshale wa Kimungu, ninabusu Kifua chako. Moto uliopo ndani yake ni mwingi na mkali vile kiasi kwamba unatamani hata uwe unacheza ndani ya Sakramenti hii ili upunguze ukali wa miali ya moto huo, miali inayozidi kupanda juu sana. Pia, kwa namna hiyo utaweza kupata pumziko kidogo katika kazi yako. Mchezo wako ni kutengeneza mishale, singe na mikuki ya aina mbalimbali. Ni kwamba pale viumbe wanapokujia mbele yako, Wewe unaanza kucheza nao kwa kuvuta na kufyatua mishale ya upendo ukiwalenga na kuwapiga na kuwachoma kwa mishale hiyo inayotoka kwenye Kifua chako. Pale ambapo roho hizo wanapokea na kukubali Wewe unashangilia na kusherehekea. Ndivyo mchezo wako unavyoandaliwa. Lakini, Ee Yesu, wengi husukumia mbali mishale yako, na badala yake wanakutupia Wewe mishale ya ubaridi, ya uzembe na ya utepetevu, na ya ufedhuli. Wewe unachomwa na kuumizwa vibaya hivi hata unalia kwani viumbe wanasababisha mchezo wako wa upendo usifanikiwe bali ushindikane. Ee Yesu, hebu pokea hapa kifua changu ambacho kipo tayari kupokea siyo tu mishale yako inayolengwa kwangu, bali hata ile inayokataliwa na wengine. Na kwa hiyo, michezo yako haitashindikana tena. Na kwa kubadilishana nawe nataka nilipe fidia kwa ubaridi, utepetevu na ufedhuli unaoupata.

Ee Yesu, ninabusu sasa Mkono wako wa kushoto nikitaka kulipa fidia kwa miguso na mipapaso yote haramu au isiyo mitakatifu inayofanyika mbele ya Macho yako. Ninakuomba, kwa mkono huu unishikilie mimi daima nikiwa nimebanwa kwenye Moyo Wako.

Ee Yesu, nabusu Mkono wako wa kulia nikitaka kulipa fidia kwa makosa yote ya kufuru kama vile Misa zinazoadhimishwa vibaya. Ni mara ngapi, Pendo Langu, huwa unalazimishwa kuteremka toka Mbinguni kupitia mikono ya Mapadre ambao wanakuika kwa nguvu ya uwezo waliopewa. Lakini unaikuta mikono hiyo imejaa matope yanayodondosha uozo na takataka. Na hata kama unapata kichefuchefu kutokana na mikono hiyo, hata hivyo upendo wako unakulazimisha ubaki hapo hapo. Yamkini, katika baadhi ya Wahudumu wako wengine hali ni mbaya zaidi. Ndani ya hao unawakuta Mapadre wa Mateso yako ambao kwa madhambi yao makubwa na makufuru wanarudia tendo lile la kijina la mauaji ya Mungu. Yesu Wangu, kwa kuliwaza hilo tu, ninatishika sana: Tena kwa mara nyingine, kama wakati ule wa Mateso, Wewe unajiweka tayari kukaa katika mikono ile isiyostahili, ukiwa ni Mwanakondoo mpole mteseka unayesubiri kifo chako kwa mara nyingine. Ee Yesu, ni jinsi gani unateseka na ni jinsi gani ungetamani mkono unaokupenda uje kukuokoa toka mikono ile iliyojaa madamu! Eh, ninakuomba! Pale unapojikuta upo katika mikono namna hiyo, unifanye mimi niwepo kwa ajili ya kukulipa fidia. Nataka nikufunike kwa usafi wa Malaika na kukupulizia vipodozi vya fadhila zako ili kuondoa harufu mbaya ya mikono ile na badala yake nikutolee moyo wangu kama mahali pa kukimbilia na kujificha. Pindi utakapokuwa ndani

yangu, mimi nitakuwa nakuomba kwa ajili ya Mapadre ili wawe wahudumu wako wanaofaa na wasihatarishe tena Uhai wako wa kisakramenti.

Ee Yesu, nabusu Mguu wako wa kushoto nikitaka kukulipa fidia kwa ajili ya wale wanaokupokea kwa mazoea tu bila kuwa na hali inayotakiwa.

Ee Yesu, nabusu Mguu wako wa kuume nikitaka kulipa fidia kwa ajili ya wale wanaokupokea kusudi wakakudhalilishe. Eh, ninakuomba! Wakati anapotarajia kulitenda hilo, Wewe urudie ule muujiza uliotenda wakati Longino alipokutoboa Moyo kwa mkuki: Damu ile ilipotoka iliruka na ikagusa macho yake. Wewe ulimwongoa na ukamponya. Na hivyo iwe sasa. Kwa mguso wako wa kisakramenti ugeuze madharau yawe upendo.

Ee Yesu, nabusu Moyo Wako, kilindi yanapomwagikia na kujaa madharau yote. Na mimi natamani kulipa fidia kwa ajili ya yote na kwa ajili ya wote. Nataka kukupatia Wewe upendo kama kitu mbadala, na daima niwe nawe kushiriki maumivu yako.

Eh, ewe Mshale wa Upendo utokao mbinguni! Endapo kufuru lolote likitorokea nje ya fidia ninayotoa, ninakuomba, unifanye mimi kuwa mfungwa wa Moyo Wako na mfungwa wa Utashi Wako ili kitu chochote kisithubutu kunitoroka. Nitamwomba Mama mtamu ili awe ananikumbusha na kunishitua daima, na hivyo mimi na yeye tukulipe fidia kwa ajili ya yote na ya wote. Tutakubusu kwa pamoja, na tutakapokuwa tunakulipa fidia tutakuondolea mbali yale mawimbi ya machungu ambayo kwa sikitiko unayapata toka kwa viumbe. Ee Yesu, ukumbuke kuwa hata mimi ni mfungwa wako duni¹. Ni kweli mahabusu yako Wewe, kale kanafasi kadogo ndani ya Hostia moja, ni mahabusu membamba mno kuliko mahabusu ya kwangu. Kwa hiyo basi, unifungilie mimi ndani ya Moyo Wako. Kwa minyororo ya Pendo lako, siyo tu unifanye mimi kuwa mahabusu, bali hata ufungilie kwa minyororo kila wazo langu moja baada ya lingine, ufungilie na mapenzi yangu, matamania yangu. Ufungilie mikono yangu, na miguu yangu, fungilia hayo yote kwenye Moyo Wako hata mimi nisiwe tena na mikono mingine wala miguu mingine isipokuwa hiyo ya kwako.

Kwa namna hiyo, Pendo Langu, gereza langu litakuwa ni huo Moyo Wako na minyororo itakuwa ni Upendo. Na geti litakalonizua nisitoke kwa ujanja ujanja toka moyoni mwako litakuwa ni Utashi wako Mtukufu. Miali yako ya moto itakuwa ni chakula changu, pumzi yangu, kila kitu nilicho nacho. Kwa hiyo sitaweza kukiona kitu chochote kingine isipokuwa miali ya moto, sitaweza kugusa chochote isipokuwa moto. Miali yako na moto wako vitanipatia mimi uhai na mauti jinsi unavyopitia Wewe katika Hostia. Hivyo mimi nitakutolea uzima wangu. Na wakati mimi nitabaki nimefunguliwa ndani Yako, Wewe utabaki umefunguliwa huru ndani yangu mimi. Je huo si ndiyo mpango wako katika kitendo chako cha kujifungilia ndani ya Hostia? Yaani, nia yako ya kutaka ufunguliwe huru na watu wale wenye moyo safi

1

Hapa Luisa anadokeza juu ya Nafsi yake mwenyewe. Ni kipindi cha uhai wake wote cha miaka 64 aliyomaliza akiugulia katika kitanda kilichozungukwa na pazia, sawa na kifungoni, akiugua katika kutimiza utume wake wa kuwa sadaka pamoja na Yesu, na kama Yesu, katika Tabernakulo

wanaokupokea katika Komunyo, na ndivyo uweze kuanza kuishi Uhai wako ndani yao? Na sasa, ili kunipa ishara ya upendo, unibariki na unibusu wakati mimi nanapokukukumbatia na kubaki ndani Yako.

Ee Mtamu Moyo Wangu, ninaona kuwa baada ya kuiweka Sakramenti Kuu na baada ya kuona ufedhuli mkuu na makufuru ya viumbe dhidi ya upendo wako usio na mipaka, hata kama umeumizwa sana na kuchomwa sana, hata hivyo Wewe hurudi nyuma, na badala yake unataka kufungua Moyo Wako na kujieleza yote katika ukuu wa Pendo lako.

Ninakuona sasa Ee Yesu unainua kichwa ukiwaelekea Mitume wako, na kuwaambia hilo ulilolifanya Wewe na wao wawe wanalitenda. Ndivyo unawapa uwezo wa kugeuza, unawafanya kuwa Mapadre na unaweka na Sakramenti nyingine. Ee Yesu, kwa namna hiyo unatufikiria sisi katika kila jambo na unalipa fidia kwa yote: mahubiri mabovu, sakramenti zinazoadhimishwa na kupokewa katika hali mbaya hata zisilete manufaa yoyote; miito isiyo sahihi kwa kusababishwa na makosa ya wao wenyewe Mapadre au makosa ya yule aliyetoa Daraja iwapo hakutumia mbinu zote za kufuatilia miito sahihi. Ah, Ee Yesu, hakuna jambo linalokupita! Na mimi nataka nikufuate na nikulipe fidia kwa makosa yote hayo.

Baada ya hapo, kisha timiza yote, unawachukua Mitume wako na unaanza kuelekea Bustanini Getsemani ili ukaanze Mateso yako makali. Mimi nitakufuata katika yote ili nikusindikize kwa uaminifu.



TAFAKARI NA ZOEZI

Yesu amejificha ndani ya Hostia kwa ajili ya kutoa uzima kwa wote. Katika maficho yake anakumbatia karne zote na anatoa nuru kwa watu wote. Na hata sisi, tukiwa tumejificha ndani yake, kwa njia ya sala zetu na fidia zetu, tutatoa nuru na uhai kwa watu wote, na hata kwa wazushi wenyewe na wasioamini chochote kwani Yesu habagui mtu.

Je tutende nini wakati tupo katika maficho hayo? Ili tufanane na Yesu Kristo, inatupasa nasi tufiche kila kitu ndani yake, yaani mawazo, macho, maneno, mapigo ya moyo, mapenzi, matamania, hatua zetu na matendo yetu, na hata sala zetu tuzifiche ndani ya sala za Yesu. Kama vile Yesu Mpenda sisi, anavyokumbatia karne zote katika Ekaristi Takatifu, nasi pia tutazikumbatia pamoja naye. Huku tukiwa tumeunganika naye, tutakuwa ni wazo la kila akili, tutakuwa ni neno la kila ulimi, tamania la kila moyo, hatua ya kila mguu na tendo la kila mkono. Tunapofanya hivyo tutakuwa tunaupiza Moyo wa Yesu kutoka maovu yale ambayo viumbe vyote wanataka kuyatenda. Sisi tunataka tumletee kila jema tunaloweza kulitenda badala ya yale mabaya yote! Kwa njia hiyo tutakuwa tunamsukuma Yesu atoe wokovu, utakatifu na upendo kwa watu wote.

Maisha yetu, ili yafanane na yale ya Yesu, ni lazima yaunganishwe na kuwa kitu kimoja na Uhai wake. Roho (mtu), katika nia yake, lazima aingie na kuwepo katika Tabernakulo zote za hapa duniani, ili kumsindikiza Yesu daima na ili kumfariji na kumlipa fidia endelevu, na katika nia hiyo roho (mtu) afanye matendo yake yote ya kutwa nzima. Tabernakulo ya kwanza ni ndani yetu wenyewe, ndani ya moyo wetu. Kwa hiyo ni muhimu na lazima kuwa makini sana kwa lolote ambalo Yesu Mwema anataka kufanya ndani yetu. Mara nyingi sana Yesu awapo ndani ya moyo wetu hutufanya tuonje tamaa ya sala. Ah! Ni Yesu anayetamani kusali na anayetaka tuwe naye, anajiainisha na sauti yetu wakati wa sala, na vionjo vyetu vya mapenzi, na moyo wetu. Anajiainisha hivyo ili sala yetu iwe ni kitu kimoja tu sawa na sala yake. Na kwa namna hiyo, ili tutoe heshima itakiwayo kwa sala ya Yesu, tunatakiwa tumtolee nafsi yetu yote kwa umakini kabisa, kiasi kwamba Yesu Mpenda sisi, apandishe sala yake mbinguni, kwa ajili ya kuzungumza na Baba na kwa ajili ya kuleta tena duniani matunda ya sala yake yenyewe.

Ni lazima pia kuzingatia mabadiliko mbalimbali yanayotokea ndani yetu, kwani Yesu Mwema, wakati huu anatufanya tuteseke, wakati mwingine anatutaka tusali, na wakati mwingine anatingiza katika msisimuko huu na mara katika msisimuko mwingine. Anafanya hivyo ili kurudia kuishi maisha yaliyokuwa yake mwenyewe.

Tufikirie kuwa Yesu anatingiza katika fursa ya kujifunza fadhila ya subira. Kutoka kwa viumbe Yeye anapata madharau mengi mno na ya aina zote, hata anaonja analazimika kutwaa mijeledi ili awachape hawa viumbe. Hebu ona lakini anavyotupatia sisi fursa ya kutenda zoezi la subira. Sisi yatupasa kumtolea Yesu heshima kwa kuvumilia yote kwa utulivu kama afanyavyo yeye. Subira yetu itanyang'anya toka mikononi mwake ile mijeledi, ambayo inawaandama viumbe wengine, kwani Yeye anatufanyia sisi hiyo hiyo subira ya kimungu. Jinsi inavyotokea mintarafu fadhila ya subira, ni ndivyo inakuwa mintarafu fadhila nyinginezo zote. Yesu Mpenda sisi, katika Sakramenti, anatenda fadhila zote, na sisi tunachota toka kwake fadhila za: nguvu, upole, subira, uvumilivu unyenyekevu na utii.

Yesu Mwema, anatupatia sisi nyama zake ziwe chakula, na sisi tumpatie Yeye chakula cha upendo, utashi, matamano, mawazo na mapenzi. Kwa namna hiyo tutasimama sambamba na upendo wa Yesu. Hatutaruhusu kitu chochote kiingie ndani yetu isipokuwa Yeye, kwani chochote tutakachotenda, budi kifae kuwa lishe kwa Yesu Mpendwa. Wazo letu sisi lazima lilishe wazo la kimungu, yaani tufikirie kuwa Yesu yupo amejificha ndani yetu na anataka lishe ya wazo letu. Tukiwaza hivyo tutakuwa tunalisha kiroho wazo la kimungu. Neno letu, mapigo yetu ya moyo, mapenzi yetu, matamano, hatua, matendo, lazima yote hayo yatumike kumlisha Yesu. Na lazima pia tujiwekee nia ya kulisha viumbe wote katika Yesu.

Ee Pendo Langu Tamu, Wewe katika dakika hii ulijigeuza mwenyewe kuwa Mkate na Divai. Eh, Ee Yesu, ujalie kila kitu ninachotamka au ninachotenda kiwe ni konsekrasio yako endelevu ndani yangu na ndani ya roho za watu.

Uhai Wangu Mtamu, ninapokominika fanyiza kuwa kila pigo langu la moyo, kila tamano, kila penzi langu, wazo na neno vionje uwezo wa mageuzo ya kisakramenti kiasi kwamba nafsi yangu ndogo yote iliyogeuzwa ibadilike kuwa Hostia nyingi zitakazoniwezesha kukupeleka na kukufikisha Wewe kwa roho mbalimbali.

Ee Yesu, Pendo Langu Tamu, mimi niwe ndiyo Hostia yako ndogo inayoweza kukufungilia ndani yangu Wewe Mwenyewe mzima kama Hostia hai.

(Sala ya Kushukuru.

Tazama Uk 2)



SAA TATU ZA MATESO MAKALI KATIKA BUSTANI YA GETSEMANI

SALA YA KUJIANDAA KABLA YA KILA SAA YA MATESO MAKALI BUSTANINI GETSEMANI



Ee Mkombozi wangu Yesu, Eh! Unichukue nikufuate pamoja na Mitume wako wapendwa watatu, ili nikashuhudie Mateso yako makali katika bustani ya Mizeituni. Nikiwa nimekumbushwa na onyo lako la upendo kwa Petro na wale Wanafunzi wengine wawili walipokuwa wameshikwa na usingizi, mimi nataka kukesha nawe angalau kwa saa moja katika Getsemani. Ninataka kuonja angalau mkuki moja wa Moyo Wako unaoteseka, mhemuko moja wa pumzi yako ya kutweta. Nataka kukazia macho yangu juu ya Uso wako wa kimungu na kutafakari jinsi unavyopoteza rangi, unavyofadhaika, unavyohangaika, unavyopinda na kudondoka hadi mavumbini.

Ninaona tayari, Ee Yesu Wangu Mwenye Kuumia sana, jinsi Mwili wako mzima unavyoyumba na kudondoka. Mara unayumbia upande huu, mara upande mwingine. Na Mikono yako ya upendo imekufa ganzi na imepishana.

Naanza kusikia majonzi yako, vilio vyako vya upendo na vya Mateso yasiyoelezeka, unavyoelekeza juu mbinguni. Ee Yesu Wangu, unayeteseka katika Bustani yenye giza ya Getsemani, katika saa hii nitakapokeshwa na Wewe, unijalie kijito cha Damu yako na matone ya hiyo Damu abudiwa vitiririkie na kutua juu yangu kama vijito kutoka sehemu zote za Mwili wako.

Ewe joshu azizi la Chema Changu Kikuu anayehangaika na Mateso kwa ajili yangu! Eh, Hebu mimi nikufyonze, na ninywe hadi nimalize tone la mwisho, na pamoja nawe nifyonze na kunywa angalau kidogo kile kikombe kichachu cha Mpendwa, ili ndani yangu nionje yale maumivu ya Moyo Wake wa kimungu. Na zaidi, nionje pia jinsi moyo wangu unavyopasuka kwa toba ya kumkosea na kumdharau Bwana wangu ambaye sasa anajihinisha katika Mateso makali ya kifo.

Ah, Yesu Wangu! Naomba unipe neema, ukanipe na msaada wa kuumia, kuhema, kutweta na kulia pamoja nawe angalau kwa saa moja tu katika Bustani ya Mizeituni.

Ewe Mama Maria Mteseka, nisaidie niweze kuonja uchungu na mateso ya moyo wako uliochomwa kwa ajili ya Yesu anayehangaika na Mateso makali pale Getsemani.

Na hivyo iwe. Amina.

SALA YA KUSHUKURU BAADA YA KILA SAA YA MATESO MAKALI YA PALE BUSTANINI

Nakushukuru, Ewe Bwana Wangu Mtamu, uliyehiari na kuruhusu mimi niwe nawe na kukusindikiza angalau kwa saa hii moja katika Mateso yako makali mno Bustanini. Ewe Yesu Wangu Mwema, ona ni faraja ndogo mno uliyoweza kupata ndani yangu! Hata hivyo lakini, upendo wako usio na mipaka na mapendo yanayofurika ya Moyo Wako mwema na mpole, hufanya uone kitulizo hata katika tendo dogo mno tu la huruma ambalo kiumbe anakutendea. Ah! Haitawezekana itoke akilini mwangu picha ya Nafsi yako abudiwa inayotetemeka, iliyopigika, iliyoumizwa na kuchakazwa, iliyonyenyekeshwa hadi mavumbini na iliyochafuka na kulowa kwa jasho la Damu katika kilindi cha Mateso ya Getsemani. Ee Yesu, nimethibitisha kuwa kukaa nawe wakati wa maumivu yako makali na kuonja ule uchungu wa mwisho wa Mateso ya Moyo Wako wa kimungu, ni fursa na bahati kubwa kweli anayoweza kupata mtu hapa duniani.

Ee Yesu, kwa ukarimu wote, nayakana mambo yote ya uwongo na ya dunia hii. Nakutaka Wewe tu, Wewe uliyedhulumiwa, uliyeteswa, uliyepigwa. Ee Bwana Wangu, kutoka Bustanini hadi Kalvarini nataka nikusindikize kwa uaminifu na upendo na kubaki nawe daima.

Ee Yesu, ukubali nishikwe na kufungwa kamba pamoja nawe; niburuzwe na nikafikishwe Barazani pamoja nawe. Uniruhusu nishiriki manyanyaso, madharau; uniruhusu nitemewe mate, na nipigwe makofi kwa jeuri kama wanavyokutendea wewe. Uniongoze niwe nawe kwenda kwa Pilato, na toka hapo tuende kwa Herode na tena nirudi nawe kwa Pilato. Unifungilie pamoja nawe kwenye kizingiti ili nami nipigwe mijeledi ile unayopata wewe. Yesu, unipe miiba hiyo hiyo ya kwako, ili inichome na kunitoboa. Unifanye nihukumiwe kufa pamoja nawe kwa kusulibiwa msalabani. Wewe kama mhanga wa Upendo kwa ajili yangu, na mimi nife kama mhanga wa kulipa malipizi kwa ajili ya dhambi zangu.

Unijalie linipate jambo lile lile alilopata Mkirene ili nikufuate hadi Kalvarini na pale nikapigiliwe misumari msalabani, nikateswe na nikafe pale pamoja nawe.

Ewe, Mama mteseka, uliyenisaidia kushiriki uchungu wa Mateso ya Yesu anayehangaika Bustanini, unisaidie ili nibaki nimesulibiwa pamoja naye juu ya Msalaba huo huo wa Yesu. Unisaidie nielewe namna ya kulipa fidia zinazostahilika katika mastahili yenyewe ya Mateso yake na Kifo chake msalabani.

Na hivyo iwe. Amina



SAA YA TANO

(Kuanzia Saa Tatu Hadi Saa Nne Usiku)

Saa ya Kwanza ya Mateso Makali Bustanini Getsemani. Maumivu Makali ya Pendo

*(Sala ya Kujiandaa Kabla ya Kila Saa.
(Sala ya Kujiandaa Kabla ya Kila Saa ya Mateso Makali.*

*Tazama Uk 1)
Tazama Uk 26)*

Yesu Wangu Mwenye Uchungu, najionja ninavutwa na mnaso wa umeme kuingia Bustanini humu. Naelewa kwamba unaniita Wewe uliye sumaku kali kabisa ya moyo wangu ulioumizwa sana. Nami nakukimbilia huku nikiwaza ndani yangu: “Ni nini mvuto huo mkali wa upendo ninaousikia ndani yangu? Ah, labda Yesu Wangu anayedhulumiwa na kuonewa anazidiwa na uchungu mkali mno hata anahitaji niende kuwa naye na kumfariji!”. Mimi sasa namkimbilia Yeye.

Ah, kuna mambo gani! Najikuta ninapumbazika na kuvurugika ninapoingia Bustanini: Giza nene la usiku, ukali wa baridi, majani ya miti yanavyotikisika kwa taratibu mno yakitoa sauti laini ya upepo inayoashiria maumivu, uchungu, masikitiko, na hata kifo kwa ajili ya Yesu Wangu Mteseka. Na nyota zinazomeremeta zinaonekana kuwa zinaigiza macho yanayolialia, lakini zote zinakesha kuangalia na kufuatilia, huku zikinipa hisia za machozi ya Yesu, na hivyo kunionya juu ya tabia yangu ya kukosa shukrani. Na mimi natetemeka, naendelea kunyemelea kwa vidole huku nikimtafuta Yesu na kumwita! “Yesu, Uko wapi? Unanivutia kwako lakini hutaki kujionyesha? Unaniita huku unajificha?”

Hali yote ni kitisho, yote ni fadhaa mtupu, na ni kimya cha kina. Lakini ninapotaribu kuelekeza na kukaza masikio yangu nasikia kwa mbali pumzi ya kuhema na maumivu. Na kweli ndiye Yesu ninayemkuta. Lakini, ni mabadiliko ya ajabu yaliyoje! Siyo tena yule Yesu Mtamu wa ile Karamu ya Ekaristi, yule ambaye Uso wake ulikuwa unang’aa na kuangaza kwa uzuri kama wa madini azizi, uzuri uliokuwa unavutia na kuteka macho. Kumbe sasa ni Uso ulio na uchungu, uchungu wa mauti unaochafua ile sura yake nzuri ya kuzaliwa nayo. Tayari anatweta, na ninaonja kushituka sana nikifikiri kuwa, huenda sitasikia tena sauti yake kwani yaelekea kuwa tayari anakufa. Kwa hiyo naikumbatia Miguu yake, halafu ninajasiri zaidi zaidi kwa kuinuka na kujongea zaidi kwenye Mikono yake, naweka mkono wangu juu ya Panda la uso wake ili kumtegemeza na kwa sauti ya kupwepa ninamwita: “**Yesu, Yesu**”.

Na Yeye, akiguswa na kushitushwa na sauti yangu ananiangalia na kuniambia:

“Binti, upo hapa? Nilikuwa nakungojea, na huo ulikuwa ndio uchungu ulioniumiza zaidi; kuachika kabisa, kuachika na watu wote. Nimekuwa nakungojea, ili uwe mtazamaji na mfuatiliaji wa maumivu

yangu, ili nikushirikishe na wewe unywe pamoja nami kile kikombe cha machungu ambacho hivi punde tu Baba wa Mbinguni ataniletea kwa njia ya Malaika. Tutakiinua na kukinywa pamoja kwa vile hakitakuwa kikombe cha raha wala faraja bali cha machungu makali kabisa. Ninahitaji kabisa mtu fulani anayenipenda kweli anywe angalau matone machache. Ni kwa hoja hiyo nimekuita, ili ukubali na ugawane na mimi maumivu yangu, na unithibitishie kuwa hutaniacha kamwe peke yangu katika upweke huo mkuu”.

Ah, ndiyo Yesu Wangu Mteswa, tutakunywa pamoja hicho kikombe cha machungu yako, tutateswa pamoja katika maumivu yako na wala sitajitenga kamwe na ubavu wako!

Muda huo Yesu Mteseka, baada ya kutiwa moyo nami, anaingia katika Mateso yake makali ya kifo, anaingiwa na maumivu makali sana ambayo hatujawahi kuyaona na wala kuyaelewa. Na mimi, huku nikishindwa kubaki wima na imara, na huku nikitaka kumhurumia na kumfariji ninamwambia:

“Hebu niambie: Ni kwa nini umedhoofika na unateswa vile? Na kwa nini ni mara hii katika Bustani hii? Na kwa nini ni mara usiku huu? Ni usiku wa mwisho wa maisha yako yapitayo: Zinasalia saa chache tu kabla ya kuanza Mateso yako. Hapa nilitegemea kumwona walau Mama wa Mbinguni, mpendwa wako Magdalena na Mitume wako waaminifu. Kumbe lakini unajikuta upo peke yako, mhanga wa uchovu, udhaifu na ulegevu wa kifo cha polepole lakini bila kukuua. Ee Chema Changu na Chote Changu, je mbona hunijibu? Hebu zungumza nami!”.

Yamkini inaelekea unakosa maneno ya kuzungumza. Una uchungu mkali mno unaokutesa. Macho yako hayo yanayonitazama, yakiwa ndiyo yamejaa nuru, lakini papo hapo yakiteseka na yakiomboleza, yaelekea yanatafuta msaada. Uso wako huo umechoka na kuchujuka. Midomo yako imekaukiwa na upendo. Nafsi yako yote ya kimungu, toka utosini, kichwani hadi kwenye wayo inatetemeka yote. Moyo Wako unahema na unapiga kwa nguvu sana. Na mapigo hayo ya Moyo yanatafuta roho za watu na yanakuletea maumivu makali kweli hata inaelekea unaweza kukata roho dakika yoyote. Mapigo hayo huniambia kuwa Wewe umeachika, mpweke na unanihitaji nikeshe pamoja nawe.

Nipo hapa, Ee Yesu, nafsi yangu yote iwe kwako na pamoja nawe. Moyo wangu hauwezi kuvumilia kukuona umejitupa ardhini. Nakuchukua kwa mikono yangu nikuinue, nakukumbatia penye moyo wangu. Nataka nihesabu maumivu yako moja baada ya lingine, pia moja baada ya lingine ya makosa watakayokutendea hivi punde. Napenda nikupatie kitulizo kwa Mateso hayo yote na nikulipe fidia kwa makosa hayo yote, na kwa yote nikuonyeshe huruma yangu.

Lakini, Ee Yesu Wangu, pindi nanapokushikilia mikononi mwangu, Mateso yako yanazidi kuongezeka. Ee Uhai Wangu, nasikia na ninaonja moto unaotiririka ndani ya mishipa yako ya damu, na nasikia Damu yenyewe inachemka hata karibu inapasua mishipa ili itoke nje. Hebu nieleze Ee Pendo Langu, Una nini? Sioni wala mijeledi, wala miiba, wala misumari, wala Msalaba. Yamkini hata hivyo ninapoegesha kichwa changu juu ya Moyo Wako, naonja na kusikia miiba katili inavyokuchoma na kukutoboa kichwani, mijeledi mikali inakuchubua bila huruma na kunyofoa vipande vya nyama yako nje na ndani ya Mwili wako bila kukusamehe. Naona Mikono yako imekufa ganzi na imevimba na

kupinda zaidi kuliko wakati wa misumari. Hebu nieleze Ewe Chema Changu, nani huyo mwenye mamlaka ya kukuingilia hata ndani yako kwa ajili ya kukutesa na anayekusababishia vifo vingi vile kwa maumivu hayo yote anayokupa?

Ah, hapo inaelekea Yesu Mbarikiwa, anafungua Midomo yake iliyopondeka na inayokufa na ananiambia:

“Binti yangu, unataka kujua ni nani anayenitesa zaidi ya wauaji wangu hata ionekane kuwa wauaji wangu si chochote mbele ya huyo anitesaye? Anitesaye ni Pendo la milele. Hilo linadai lichukue nafasi yake ya kwanza mbele ya yote. Hilo Pendo la milele hunisababishia Mateso makali kwa pamoja: kwa nje pamoja na hata Mateso ya sehemu zangu za ndani. Kumbe wauaji wangu watasababisha niteswe pole pole, kwa reja reja. Ah, Binti yangu, ni Pendo linalonitawala katika yote, juu yangu na ndani yangu: Pendo ni msumari kwangu, ni mjeledi, ni taji la miiba, Pendo ni kila Teso! Pendo ni Mateso yangu ya daima kumbe Mateso wanayonitendea binadamu huwa ni kwa muda na ni ya muda. Ah, Binti yangu, ingia moyoni mwangu, ingia na jififishe katika Pendo langu, kwani ni katika Pendo langu tu utaweza kufahamu nimeteswa mangapi na nimekupenda kiasi gani, na pale utajifunza kunipenda mimi na kuteswa kwa ajili ya upendo tu”.

Yesu Wangu, maadam ni Wewe unayeniita ndani ya Moyo Wako ili niweze kuona kile ambacho Pendo limesababisha uteseke, mimi nakuja na kuingia ndanimu. Lakini wakati ninapoingia hapo, naona mara mazito na ya kushangaza ya Pendo: kichwani huvai taji la miiba ya miti, la hasha, bali unavaa taji la miiba ya moto, mwilini huchapwi na mijeledi ya kamba, la hasha, bali na mijeledi ya moto, msalabani husulibishwi kwa misumari ya chuma, la hasha, bali unasulibishwa na misumari ya moto. Kila Teso limekuwa ni moto unaopenyeza hadi ndani ya mifupa na hata ndani ya uti wa mifupa. Ndani ya moto unachuja Ubinadamu wako mtukufu wote. Hapo unapata Mateso ya kifo, na hakika ni makali zaidi ya Mateso yale ya Njia ya Msalaba. Na kwa njia hiyo huandaliwa josho la Upendo kwa ajili ya roho zote watakaotamani kusafisha madoa yoyote ya uchafu na kujipatia uhalali wa kuwa wana na mabinti wa upendo.

Ewe Pendo Lisilo na Ukomo, ninaonja natembea katikati ya kina na utajiri wa upendo, na ninatambua kuwa ili niweze kuingia katika Pendo na kulielewa ingenipasa kwa nafsi yangu yote niwe ni Upendo.

Basi ninakuomba Wewe univalishe kichwani na uvalishe kila fikra yangu kwa taji la Upendo. Ninakuapia, Ee Yesu, kwa mjeledi wa Upendo, nitapiga roho yangu, nitaupiga mwili wangu, nguvu zangu, vionjo vyangu, matamano yangu, mapenzi yangu, na vitu vyote. Na katika yote niwe nimepigwa mijeledi na nimefyonzwa na Upendo. Fanyiza, Ewe Pendo Lisilokoma, pasiwepo na kitu chochote ndani yangu kisichopata uhai wake kutokana na Upendo.

Ee Yesu, Kiini cha aina zote za mapendo, ninakuomba upigilie kwa misumari mikono yangu na miguu yangu kwa misumari ya Upendo, ili baada ya kupigiliwa kwa misumari ya Upendo nigeuke kuwa Upendo, niwazie Upendo, nivae Upendo, na nijilishe kwa Upendo. Upendo unishikilie nibaki

nimepigiliwa misumari ndani yako ili, Ee Yesu, pasiwepo na kitu chochote ndani na nje yangu kinachotarajia kunirarua na kuniondoa kutoka Upendo.



TAFAKARI NA ZOEZI

Yesu Kristo, katika saa hii, akiwa ameachika na Baba yake wa Milele, aliteseka kwa moto mkali kabisa wa mapendo yaliyochemka. Yanachemka hivi hata kuweza kubomoana dhambi zote hata zile zisizofikirika na zote zinazowezekana. Yanachemka hata kuweza kuwasha moto wa upendo wake ndani ya viumbe vyote, hata kama vingekuwa ni vya milioni na milioni ya ma-dunia. Mapendo hayo yanachemka hata kuweza kuwasha moto wa upendo wake ndani ya walaaniwa wa moto wa milele kama wasingekuwa ni sugu wa ukaidi na kiburi kwa umilele wote.

Hebu tuingie ndani ya Yesu. Baada ya kufaulu kupenyeza hadi katika undani wake wote, tupenye hadi katika mishipa yake ya siri kabisa, na hadi katika mapigo yake yenye moto ya Moyo Wake. Tupenye hadi katika ufahamu wake uliokuwa kana kwamba umewashwa moto, na kutoka hapo tututwae huo Upendo, na kwa ndani yetu na nje yetu, tukauvae ule moto uliokuwa unamwunguza Yesu. Baada ya hapo, tutoke nje yake Yesu, na tujimwage katika Utashi Wake. Humo tutaviona viumbe vyote. Kwa kila kiumbe tumtolee na kumpatia Pendo la Yesu. Kwa pendo hilo tuguse tena mioyo ya viumbe vyote, tuguse akili zao ili tujaribu kuwageuza wote wawe upendo. Halafu kwa njia ya matamania ya Yesu, mapigo yake ya moyo na mawazo yake tumtengeneze Yesu ndani ya moyo wa kila kiumbe.

Pale ndani tutawaleta viumbe wote ambao wanamchukua Yesu ndani ya moyo wao. Hao tutawaweka wamzunguke Yesu na ndipo tutasema kwake: “Ee Yesu, hapa tunakuletea viumbe wote ambao pia wanaye Yesu ndani ya moyo wao ili wakupatie faraja. Sisi hatuna jinsi nyingine ya kukuletea kitulizo kwa Pendo lako isipokuwa kukuletea kila kiumbe ndani ya Moyo Wako”.

Tunapofanya hilo tutakuwa tunampatia Yesu faraja za kweli kwani miali ya moto inayomwunguza ni mingi mno hata anarudiarudia kusema: “Ninaungua moto, na hayupo anayetwaa Pendo langu. Ah, tafadhali nipeni kitulizo, twaeni Pendo langu, na ninyi nipeni upendo”.

Ili tuweze kufanana na Yesu katika mambo yote, hatuna budi kujielekeza ndani yetu sisi wenyewe na kujihoji wenyewe juu ya haya yafuatayo: Katika yote tunayotenda je tunaweza tukasema kwamba kuna mtiririko daima wa mapendo unaokimbia kati yetu na Mungu? Je na maisha yetu ni mtiririko wa kudumu wa mapendo tunayopata toka kwa Mungu? Pale tunapowaza ni mtiririko wa upendo wa Mungu, pale tunapotenda kitu ni mtiririko wa upendo, neno letu ni upendo, mdundo wa moyo wetu ni upendo; yote tunapata toka kwa Mungu. Lakini je matendo yetu hayo yote yanakimbia kwa upendo kuelekea kwa Mungu? Je Yesu anauona ndani yetu ule uzuri na mvuto wa utamu wa Pendo lake linalomkimbilia Yeye hata aweze kutekwa na mvuto huo ili kumfanya ajazwe upendo mkuu zaidi pamoja nasi?

Endapo katika matendo yetu yote hadi sasa hatujawahi kujiwekea kusudio la kukimbia pamoja katika Pendo la Yesu, basi tutaingia ndani yetu wenyewe na pale tutamwomba msamaha kwa kumfanya apoteze ule utamu na mvuto wa Pendo lake kwetu.

Je sisi huwa tunakubali tuundwe kwa mikono ya Mungu kama vile Ubinadamu wa Yesu ulivyokubali? Kila kitu kinachotokea ndani yetu ambacho siyo dhambi budi kihesabike kuwa ni kazi ya Mungu. Tunapotenda kile kilicho kinyume cha hilo, tunakuwa tunamnyima Mungu utukufu wake, tunafukuza uhai wa kimungu toka ndani yetu na tunapoteza utakatifu. Kila kitu chema tunachosikia au kuonja ndani yetu huwa si kingine bali ni kazi ya upendo; iwe ni uangazo, tamaa ya kujinyima na kujikatalia, na hata neema fulani fulani. Je sisi huwa tunayapokea mambo hayo kwa namna ile anayotaka Mungu? Je tunampa Yesu uhuru wa kutenda kazi yake? Au je, tunapojifanyia yote kwa mtindo wa kibinadamu tu au kama kitu kisichohusiana na upendo, hatupingi hapo kazi ya Mungu na hivyo kumlazimisha Yeye akunje na kufumba mikono yake? Je tutajikabidhi mikononi mwake kama wafu ili tupokee adhabu zile zote ambazo Bwana ametuandalia kwa ajili ya utakaso wetu?

Pendo Langu na Chote Changu, Pendo lako lininyeshee popote katika nafsi yangu na liunguze chochote ambacho si chako na ufanye kwamba pendo langu likimbilie daima kwako kwa ajili ya kuunguza kila kitu kinachoweza kusikitisha na kupinga Moyo wako.

(Sala ya Kushukuru baada ya kila Saa ya Mateso Makali.

Tazama Uk 27)

(Sala ya Kushukuru baada ya Kila Saa.

Tazama Uk 2)

SAA YA SITA

(Kuanzia Saa Nne Usiku Hadi Saa Tano Usiku)

Saa ya Pili ya Mateso Makali Bustanini Getsemani: Mahangaiko Juu ya Mateso

(Sala ya Kujiandaa Kabla ya Kila Saa.

(Sala ya Kujiandaa Kabla ya Kila Saa ya Mateso Makali.

Tazama Uk 1)

Tazama Uk 26)

Ee Yesu Wangu Mtamu, ni tayari saa moja imepita tangu ulipoingia hapa Bustanini. Upendo ndio umetawala yote na kukushika hata umesababisha upate kwa mpigo Mateso yale yote ambayo wauaji wako wakatili watakutendea katika Njia yote ya Msalaba. Upendo umekuongezea ziada ya maumivu ambayo maadui wako hawawezi kukutendea, yaani maumivu makali katika sehemu za ndani ya Nafsi yako.

Ee Yesu Wangu, ninakuona tayari unayumbayumba katika hatua zako; hata hivyo unataka utembe kuelekea mahali. Hebu nieleze, Ewe Chema Changu, je unataka kuelekea wapi? Ah, naelewa! Unataka kwenda kuwaona Wafuasi wako wapendwa. Hata mimi nataka nitangulizane nawe ili niwe ninakushikilia wakati unapoyumba.

Kumbe, Ee Yesu Wangu, unakabili Teso lingine katika Moyo Wako: Wao tayari wamelala usingizi. Wewe daima katika tabia yako ya upole na huruma, unawaita kuwaamsha na kwa upendo wa kibaba kabisa unawaonya na kuwashauri kukesha na kusali. Kishapo unarejea tena bustanini mahali ulipotokea. Lakini unapata tena mkuki mwingine moyoni. Katika pigo hilo Ewe Pendo Langu, naona wazi mapigo yote yatokanayo na roho za watu wote wa maisha ya wakfu. Hao, au kwa njia ya vishawishi au kutokana na hali ya roho zao, au kwa kukosa kujitawala na kujihinisha, badala ya kufungamana nawe na badala ya kukesha na kusali, wanajilegeza na kujiachilia wenyewe. Katika hali ya utepetevu na uchovu wa nafsi zao, badala ya kusonga mbele katika upendo, na kuunganika nawe, wao wanalegea na kurudi nyuma. Ni jinsi gani nakusikitikia Ewe Mpenzi Kipenzi! Na ninakulipa fidia kwa ufedhuli wote utokao kwa wale unaowapenda na kuwaamini kabisa. Hayo ndiyo makosa yanayoutesa zaidi Moyo Wako mwabudiwa, na ndiyo maumivu hayo yote na ya namna hiyo yanayosababisha uingie katika kilio cha umahututi.

Lakini, Ewe Pendo lisilo na mipaka, Damu yako ambayo tayari yachemka katika mishipa yako, inashinda kila kitu na inasahau yote. Nakuona umelala kifudifudi ardhini na unasali. Unajitolea sadaka, unalipa fidia na kwa niaba ya wote unajitahidi kumtukuza Baba kwa ajili ya mabaya aliyotendewa na viumbe. Hata mimi, Ee Yesu Wangu, naanguka kifudifudi na pamoja Nawe nataka kutekeleza kile unachofanya Wewe.

Lakini, Ewe Yesu, Utamu wa moyo wangu, naona kuwa usumbufu na usumbufu wa madhambi yote, matatizo yetu, madhaifu yetu, jinai zetu za kutisha na ufedhuli wetu mchafu kabisa, yote hayo yanakujia kwa pamoja, yanatua juu yako, yanakukandamiza chini kukuvunja, yanakuumiza, yanakuuma na kukutafuna. Na Wewe, je unafanya nini? Damu yako yenye kuchemka katika mishipa inapambana na hayo yote. Inapasua mishipa na inamiminika nje kama mito mikubwa, inakulowesha kabisa mwili mzima, inamwagika na kufurika chini ardhini. Mwishowe unaitolea Damu hiyo kwa ajili ya maovu na unatolea Uhai wako kwa ajili ya mauti. Ah, Pendo, ninakuona ni jinsi gani ulivyodhoofika na kukonda! Tayari unatweta! Ewe Chema Changu, Uhai Wangu Mtamu, Eh, Usife! Inua Uso wako kutoka udongo huo ulioulowesha kwa Damu yako tukufu. Inuka, njoo nikushikilie mikononi mwangu. Fanyiza mimi nife badala yako.

Lakini halafu nasikia sauti inayotetemeka na ya umahututi ya Yesu Wangu Mtamu ikisema: “Baba, kama inawezekana, kikombe hiki kinipitie mbali, lakini isitendeke kadiri ya utashi wangu bali kadiri ya Utashi Wako”.

Tayari ni mara ya pili sasa kwangu kusikia hilo kutoka kwa Yesu Wangu Mtamu! Je nielewe nini na hicho asemacho ‘Baba, kama inawezekana, kikombe hiki kinipitie mbali’? Ee Yesu, mbele yako yanakujia maasi yote ya viumbe. Ile ‘Fiat Voluntas Tua’ ambayo ilibidi iwe ndiyo uhai wa kila kiumbe, Wewe unashuhudia ikisukumwa mbali na kugomewa karibu na wote, na kwa hiyo, badala ya wao kupata uhai sasa wanapata mauti. Na Wewe, kwa vile unataka kutoa uhai na kuwapa wote, na kwa kutaka kutoa fidia kuu na rasmi kwa Baba kwa ajili ya maasi ya viumbe, kwa mara tatu kamili unarudia kusema:

“Baba, kama inawezekana, kikombe hiki kinipitie mbali, yaani zile roho zinazojitenga na Utashi Wetu na zinaelekea kupotea. Kikombe hicho kwangu mimi ni kichachu mno, lakini isitendeke kadiri ya utashi wangu bali itendeke kadiri ya Utashi Wako”.

Lakini pindi unaponena hilo, machungu yako yanazidi kuwa makali na mengi hivi hata unajimaliza na kuingia katika hatua za mwisho, unatweta kwa maumivu na unaelekea hatua ya kukata pumzi ya mwisho.

Ee Yesu Wangu, Chema Changu, maadam upo sasa mikononi mwangu, natamani hata mimi niungane nawe. Napenda nikulipe fidia na niteswe pamoja nawe kwa ajili ya makosa na madhambi yote yanayotendeka dhidi ya Utashi Wako Mtukufu. Na ninapenda pia nikuombe ili katika yote niweze kutekeleza daima Utashi Wako Mtukufu. Utashi wako uwe ni pumzi yangu, uwe ni hewa yangu. Utashi Wako uwe pigo langu la moyo, uwe ni moyo wangu, uwe ni fikra yangu, uhai wangu na kifo changu.

Ah, lakini usife! Mimi nitakwenda wapi bila Wewe? Nitamwendea nani? Nani atanipa msaada zaidi? Mambo yote yatamalizikia kwangu. Ah, usiniache! Unishikilie kadiri uwezavyo, kadiri inavyokupendeza zaidi, ila tu unishikilie niwe Nawe, daima niwe Nawe. Na wala isitokee kamwe nikajitenga nawe hata kwa dakika. Uniruhusu angalau nikutulize, nikulipe fidia, na kukuhurumia kwa

niaba ya watu wote, kwani naona kuwa madhambi yote na ya aina mbalimbali yanakuelemea na kukukandamiza.

Kwa hoja hiyo, Pendo Langu, ninabusu Kichwa chako kitukufu. Kwani naona nini? Mawazo yote machafu. Na wewe unapata kichefuchefu kutokana nayo. Kila wazo chafu huwa ni mwiba unaokuchoma vikali sana katika Kichwa Chako kitukufu. Ah, taji la miiba watakalokuvika Wayahudi ni sawa na si kitu! Ni mataji mengi mangapi ya miiba ambayo mawazo machafu ya viumbe huweka juu ya Kichwa chako abudiwa kiasi kwamba Damu inachuruzika kila mahali, kwenye Panda la uso na kwenye nywele. Yesu, ninakuonea huruma sana na napenda nikuvalishe taji mbadala la utukufu. Na ili kukunogesha mimi nakutolea akili zote za kimalaika na akili yako mwenyewe ili kukupatia faraja na fidia kwa ajili ya wote.

Ee Yesu, nabusu Macho yako yenye huzuni. Ndani yake nayaona macho yote mabaya ya viumbe yanayosababisha machozi na Damu vitiririke juu ya Uso Wako. Naona huzuni kwa ajili yako. Ili kukuletea utamu kwenye Uso Wako, nataka nilete mbele yako matamano yote yanayoweza kupatikana mbinguni na duniani.

Yesu, Chema Changu, nabusu Masikio yako matukufu. Lakini nasikia nini? Katika masikio hayo nasikia mwangwi wa makufuru ya kutisha, makelele ya kulipa kisasi na maneno ya kuchafuana. Hakuna kelele yenye usafi kamili ambayo hugonga kwenye Masikio yako. Oh, Pendo Lisiloshibishwa, nakuhurumia! Nataka nikutulize kwa kuleta masikioni mwako melodia zote nzuri za mbinguni, sauti tamu kabisa ya Mama Mpendwa, sauti zenye upendo wa moto za Magdalena na za roho zinazokupenda!

Yesu, Uhai Wangu, nataka kugonga mhuri wa busu linalochemka juu ya Uso Wako ambao ni mzuri kupita kifani. Ah, huo ndio Uso ambao mbele yake Malaika hawathubutu hata kuinua macho yao ili kuutazama kwani uzuri wake ni juu kabisa na ni mkuu kabisa na huwa unawavuta na unawanasa. Hata hivyo viumbe huwa wanauchafua kwa kuutemea mate, wanaupiga makofi, na kuukanyaga chini ya miguu yao. Pendo Langu, uthubutu gani huu! Ningependa nipige kelele sana ili niwafukuze wakimbie. Nakuhurumia. Na ili kulipa fidia kwa madharau hayo, ninakwenda kwa Utatu Mtakatifu kuomba busu la Baba na la Roho Mtakatifu, na mapapaso mazuri yasiyoigika kamwe ya Mikono yao ya uumbaji. Nakwenda pia kwa Mama wa Mbinguni ili naye anipatie mabusu yake, mapapaso ya mikono yake ya kimama na usujudu wake wa unyenyekevu mkuu. Nitakwenda halafu kwa watu wote wa wakfu. Hayo yote nitakuletea na kukutolea ili kulipa fidia kwa makosa yanayofanyika dhidi ya Uso Wako Mtukufu.

Ewe Chema Changu Kitamu, nabusu sasa Mdomo Wako Mtamu uliyoumizwa na kusikitishwa sana na makufuru ya kutisha, na kichefuchefu cha ulevi na ulafi, na mazungumzo machafu, na sala mbovu, na mahubiri mabaya, na kila kitu kibaya anachotenda binadamu kwa ulimi wake. Yesu, nakuhurumia na natamani ninogeshe Mdomo wako kwa kukutolea sifa zote za kimalaika na kukutolea matumizi mema ya ulimi yanayofanywa na wakristu wengi sana.

Ewe Pendo Langu Linaloteseka, nabusu Shingo yako. Naiona shingoni mwako minyororo na kamba nyingi zinazotokana na dhambi za viumbe na pia kutoka na mafungamano yao na dhambi hizo. Nakusikitikia sana. Ili kukufariji ninakuletea muungano usioyeyuka wa Utatu Mtakatifu. Na mimi baada ya kuyeyukia katika muungano huo, ninakunyoshea mikono yangu, natengeneza mviringo wa minyororo mtamu shingoni mwako ili kuondolea mbali kamba na mafungamano ya dhambi ambayo yanakukaba vibaya, na ili kukutuliza, ninakubania kwa nguvu sana kwenye moyo wangu.

Ewe Nguvu ya Kimungu, nabusu sasa Mabega Yako matukufu. Nayatazama na kuona yamechanika vibaya. Na vipande vipande vya nyama yako vimeng'olewa kutokana na makwazo na mifano mibaya ya viumbe. Nakuonea huruma sana! Ili kukutuliza, ninakupatia mifano yako mitukufu, mifano ya Mama Malkia na ile ya Watakatifu wote. Kishapo mimi, Ee Yesu Wangu, nitapita nabusu kila moja ya madonda yako, kwani nataka nifungilie ndani ya kila donda roho zile, ambazo kutokana na makwazo ziling'olewa toka katika Moyo Wako. Hivyo vile vipande vya nyama yako vilivyotoka, nitavirejesha na kuviunganisha mahali pake katika Ubinadamu Wako mtukufu.

Ewe Yesu Wangu Uliyedharauliwa, nabusu Kifua chako ambacho nakiona kimeumizwa sana na viumbe vyenye ubaridi, utepetevu, visivyo wajibika, visivyojifananisha nawe, na visivyo na shukrani. Nakuhurumia sana. Ili kukutuliza, nakupatia upendo mbadala wa Baba na wa Roho Mtakatifu, na Ufanano timilifu wa Nafsi Tatu za Mungu. Na mimi, Ee Yesu Wangu, ninajitumbukiza ndani ya Pendo lako na ninataka nikulipe fidia kwa kusukumia mbali mapigo mapya yanayoelekezwa kwako kutoka kwa viumbe kwa njia ya dhambi zao. Na nitatwaa Pendo lako hilo na kwalo nitawapiga viumbe na kuwaumiza ili wasipende tena kukukosea Wewe na nitalimwaga Pendo hilo juu ya Kifua Chako, ili kukunogesha na kukuponya.

Yesu Wangu, ninabusu Mikono Yako miumbaji. Ninatambua kuwa, matendo yote mabaya ya viumbe, sawa na misumari, yanatoboa Mikono yako mitukufu. Ingawa kama hawakutoboi kwa misumari mitatu kama ilivyokuwa pale msalabani, hata hivyo unatobolewa bado kwa misumari mingi sana, inayosababishwa na matendo mengi sana mabaya wanayofanya viumbe. Ninakuonea huruma. Na kwa kukupa kitulizo, ninakutolea matendo yote mema na matakatifu, nakutolea pia ujasiri wa Mashahidi katika kumwaga damu yao na uhai wao kwa ajili ya Pendo lako. Kijumla, Ee Yesu Wangu, ningependa kukutolea matendo yote mema ili kukuondolea ile misumari mingi sana itokanayo na matendo mabaya.

Ee Yesu, ninabusu Miguu Yako mitukufu ambayo haijawahi kuchoka kamwe kuzitafuta roho. Ndani ya Miguu hii unafungilia hatua zote za viumbe, lakini vingi kati ya viumbe hivyo unavishuhudia vikikutoroka. Na Wewe ungependa kuvishikilia bado. Kwa kila hatua mbaya, unajisikia unapigwa msumari. Na Wewe unapenda kutumia misumari hiyo hiyo ya viumbe kwa ajili ya kuwapigilia hao viumbe kwenye Pendo lako. Unapowapigilia kwako, unapata maumivu mengi kabisa na makali sana, jinsi kwamba unaonja nguvu unayotumia hata unaingia hali ya kutetemeka mwili mzima. Ee Mungu Wangu na Chema Changu, ninakuonea huruma sana. Ili kukutuliza, ninakutolea hatua za watawa wema na hatua za watu waaminifu ambao wanatoa na kuhatarisha uhai wao kwa ajili ya kuokoa roho.

Ee Yesu, naubusu Moyo Wako. Unazidi kuingia katika maumivu makali sana. Siyo kutokana na Mateso yale yatakayoletwa na Wayahudi bali zaidi kutokana na maumivu yale utakayosababishiwa na makosa yote ya viumbe.

Katika saa hizi Wewe unataka kuweka kipaumbele cha kwanza kwa Pendo, kipaumbele cha pili ni kwa dhambi zile zote ambazo kwazo unalipa malipizi, unalipa fidia, unamtukuza Mungu, na unatuliza na kupoza Haki ya Mwenyezi Mungu. Na kipaumbele cha tatu ni kwa ajili ya Wayahudi. Kwa namna hiyo unadhihirisha kwamba Mateso yale watakayokusababishia hao Wayahudi siyo kitu kingine ila tu yanawakilisha yale Mateso makali kabisa unayosababishiwa na Pendo kwa upande mmoja, na unayosababishiwa na Dhambi kwa upande mwingine. Ni kwa hoja hiyo mimi naona kuwa hapa ndani ya Moyo Wako kumejaa Mateso hayo yote: Mkuki wa Upendo, mkuki wa dhambi, na ngoja ule wa tatu, mkuki wa Wayahudi. Na Moyo Wako, ukiwa umezibwa kabisa na Pendo, unateseka sana na vurumai za kikatili, misisimuko isiyo subira ya mapendo, matamania yanayokutafuna, mapigo motomoto ya moyo yanayotaka kugawia uhai kwa kila moyo wa kiumbe. Na kwa kweli ndiyo hasa ni hapa ndani ya Moyo ambapo unasikia Teso lote lililosababishwa na viumbe. Hawa, kwa matamania yao mabaya, misisimuko isiyo na mpangilio, mapigo ya moyo yaliyojaa makufuru, badala ya kutafuta Pendo lako, hutafuta wapenzi wengine.

Yesu, Ni jinsi gani unavyoteswa! Nakuona unazidi kuelemeza na kupoteza nguvu zako, unamezwa na kuzama katika dhoruba ya madhambi yetu. Nakuhurumia sana. Nataka basi kunogesha uchungu wa Moyo Wako uliochomwa mkuki mara tatu. Nanogesha kwa kukupatia utamu ule wa milele, upendo mtamu kabisa wa Mpendwa Mama Maria, na ule upendo wa watu wapendwa wako wa kweli.

Na sasa, Ee Yesu Wangu, fanyiza, ninakuomba, moyo wangu duni utwae uhai toka kwenye Moyo Wako ili nisiweze kuishi tena isipokuwa kwa nguvu ya Moyo Wako tu. Na kwa kila kosa utakalotendewa unifanye niwe daima tayari kukutolea kitulizo, faraja, fidia na tendo la upendo lisiloweza kakatishwa.

TAFAKARI NA ZOEZI

Katika Saa ya pili ya Getsemani, mbele ya Yesu yamekuja kuonekana madhambi yote ya nyakati zote, za kale, zilizopita, za sasa na za baadaye. Yeye anazibeba juu ya Nafsi yake dhambi hizo zote ili aweze kutoa kwa Baba Utukufu kamili. Kwa hiyo Yesu Kristo alilipa malipizi, aliombea, na alionja katika Moyo Wake hali zetu zote za moyo bila kuacha kamwe kutuombea. Na sisi, je huwa tunasali daima bila kujali hali zetu zote za moyo? Katika ubaridi wa moyo, katika moyo mgumu, katika vishawishi? Je tunadumu katika sala bila kulegea? Je tunampa Yesu maumivu ya moyo wetu yawe fidia na kitulizo ili baadaye tuweze kunakili tena hayo yote ndani yetu tukikumbuka kuwa kila hali ya moyo wetu ni Teso lake? Kama umivu la Yesu, budi tulilete na kulizungusha juu yake ili kumhurumia na kumtuliza. Na kama ingewezekana, ni budi tumwambie: Umeteseka kupita kiasi mno, sasa hebu pumzika kidogo, acha tuteseke sisi badala yako.

Je sisi tunapiga vifua vyetu, au je tunabaki tumesimama kwa ujasiri chini ya Miguu ya Yesu huku tukimtolea kila teso tunalopata ili Yesu aone ndani yetu ule Ubinadamu Wake Mwenyewe? Yaani, je sisi ni Ubinadamu wa Yesu? Ubinadamu wa Yesu ulikuwa unatenda nini? Ulikuwa unamtukuza Baba yake, ulilipa malipizi, ulikuwa unaomboleza kwa ajili ya wokovu wa roho. Na sisi je, katika mambo yote tutendayo, tunaunganisha ndani mwetu nia hizi zote tatu za Yesu, hata tuweze kusema kwamba ndani yetu tunaunganisha Ubinadamu wote wa Yesu Kristu?

Katika dakika za giza letu, je tunajiwekea nia ya kuruhusu nuru ya ukweli iangaze ndani ya wengine? Na tunaposali kwa bidii je tunajiwekea nia ya kuyeyusha barafu ya mioyo mingi sana iliyoshupaa katika makosa?

Yesu Wangu, ili niweze kukuhurumia na kukutuliza kutoka ulegevu wako mkubwa kabisa uliokupata, ninakwea hadi mbinguni juu na kutoka pale najitwalia Umungu Wako wenyewe na ninauzungusha kukufunika kabisa ili kufukuzia mbali nawe makosa yale yote ya viumbe. Ndivyo nataka kukuletea uzuri wako kamili kwa kuondolea mbali nawe uchafu wa dhambi; nikuletee utakatifu wako kwa kuondolea mbali nawe, machukizo yaletwayo na zile roho zote zinazokufanya upate kinyaa kabisa, kwa vile zimekufa kwa kuondokewa na neema. Nataka nikuletee amani yako, ili kuondolea mbali nawe magomvi, maasi, na ghasia na fujo za viumbe vyote. Nataka nikuletee muziki mzuri wa upatanisho wako, kwa ajili ya kutuliza masikio yako kutoka mawimbi ya masauti mengi machafu. Yesu Wangu, ninapenda nikupatie matendo ya kimungu, yenye kulipa fidia kwa ajili ya makosa mengi kabisa, yanayokushambulia hata kukaribia kukuletea mauti. Na mimi, kwa kutumia matendo yako yale yale, nataka nikupatie uhai. Halafu, Ee Yesu Wangu, napenda nichukue wimbi moja la Umungu wako na kulitupia juu ya viumbe wote, ili mara tu watakapogusana na Umungu, wasiweze tena kutamani kukukosea Wewe. Kwa njia hiyo tu, Ee Yesu, nitaweza kuonyesha huruma kwako, kwa matusi yote unayopata toka kwa viumbe.

Ee Yesu, Uhai Wangu Mtamu, Sala zangu na maumivu yangu nayapandisha daima juu mbinguni, ili nuru ya neema inyeshee juu ya wote, na ili mimi ninywe Uhai wako wenyewe hadi ndani yangu kabisa.

(Sala ya Kushukuru Baada ya Kila saa ya Mateso Makali.

Tazama Uk 27)

(Sala ya Kushukuru Baada ya Kila Saa.

Tazama Uk 2)



SAA YA SABA

(Kuanzia Saa Tano Usiku Hadi Saa Sita Usiku)

Saa ya Tatu ya Mateso Makali Sana Getsemani. Mateso Makali Sana Kutoka kwa Wayahudi

(Sala ya Kujiandaa Kabla ya Kila Saa.

(Sala ya Kujiandaa Kabla ya Kila Saa ya Mateso Makali.

Tazama Uk 1)

Tazama Uk 26)

Chema Changu Kitamu, moyo wangu hauwezi kustahimili tena: Nikikutazama nakuona unavyozidi kuteswa na kuhangaika. Kutoka kila sehemu ya Mwili wako kunatiririka Damu kama vijito. Na inatoka kwa wingi sana hivi kiasi kwamba Miguu yako dhaifu inaposhindwa kusimama umeangukia katika dimbwi la Damu. Ee Pendo Langu, moyo wangu unapasuka kwa kukuona umedhoofika na umekwisha namna hiyo! Uso wako mwabudiwa na Mikono yako ya uumbaji imelala ardhini na kuchafuka kwa Damu. Nafikiri ni kwa vile kulingana na mito mingi ya maovu wanayokutendea na kukutupia viumbe, na Wewe unataka hivyo hivyo kuwapatia mito ya Damu kiasi hicho hicho, ili maovu yao hayo yazamishwe ndani ya Damu hiyo, na hivyo uweze kumwandikia kila mkosefu hati na kauli ya msamaha wako. Ah, hebu inuka Ee Yesu Wangu! Mateso yako ni mno sasa! Mpaka hapo na itoshe kwa Pendo lako!

Na pindi mpendwa wangu Yesu anaelekea kuzimia katika Damu yake, Pendo linampa nguvu na uhai mpya. Namwona huyo! Anajitikisa polepole! Huyo! Anasimama! Na hivyo, ingawa akiwa amejaa madamu na matope, kwa vile anataka kutembea wakati hana nguvu, pole pole anaanza kujikokota.

Uhai Wangu Mtamu, hebu niahe mimi nikushikilie mikononi mwangu. Unaelekea wapi? Labda kwa Wafuasi wako wapenzi? Lakini, ni Teso gani katika Moyo Wako Mwabudiwa kuwaona wamelala tena usingizi! Nawe, kwa sauti inayotetemeka na dhaifu kabisa unawaita ukisema: “Wanangu, msilale! Ile saa imefika. Je hamnioni jinsi nilivyokonda? Ah, nisaidieni, msiniache katika saa hizi za mwishoni!”

Huku ukipepesuka, unaelekea kuanguka karibu nao, na hapo Yohane ananyosha mikono yake ili kukushika. Umedhoofika na karibu hutambulikani; isingekuwa uzuri na ulaini wa sauti yako tamu, wasingeweza kukutambua. Kishapo unawahimiza kukesha na kusali. Halafu unarejea tena bustanini huku ukiwa na donda la pili moyoni mwako. Katika donda hilo la pili ninagundua, Chema Changu, makosa yote ya roho zile ambazo katika usiku wa majaribu huwa zinasahau Pendo lako na fadhili zako, kwa vile huwa zinaelemewa na uchovu wa usingizi na ndoto na hivyo kupoteza roho ya kudumu katika sala na kukesha. Wanaingia katika hali hiyo licha ya upendeleo unaowaonyesha Wewe kwa fadhili, mabusu na mapapaso ya upenzi unayowaonyesha na kuwapa.

Yesu Wangu, kumbe ni kweli kabisa mtu akiisha kukuona Wewe, akiisha kuonja fadhili zako, atahitaji nguvu kubwa sana kuweza kukuacha na kukugomea. Unahitajika muujiza tu kwa roho kama hizo kusimama na kukataa ushawishi wako. Wakati huu ninakuonea huruma kwa ajili ya roho hizi, ambazo zinakusababishia maumivu makali kabisa moyoni mwako, kutokana na wao kutokujali, kuzembea, na kukutukana. Kwa hiyo, pamoja na kukuhurumia, ninakuomba, kwa mara zote watakapofanya hatua yoyote ya kukuudhi, Wewe uwazungushie neema kubwa kabisa itakayowanasa ili wasiweze kupoteza roho yao endelevu ya sala.

Yesu Wangu Mtamu, wakati huu unaporejea bustanini, yaelekea Wewe huna nguvu tena: inua mbinguni huo Uso Wako uliojaa madamu na madongo, na kwa mara ya tatu urudie maneno yale:

“Baba, ikiwezekana, kikombe hiki kinipitie mbali. Baba Mtakatifu, unisaidie! Ninahitaji kitulizo. Ni kweli kwamba kutokana na makosa ninayobeba juu ya Mwili wangu, ninaleta kichefuchefu, ninachukiza na ni takataka kati ya watu wote walio mbele ya Utukufu Wako wa Milele. Haki yako imechukizwa na Mimi. Lakini, hebu unitazame, Ee Baba, Mimi ni Mwanao daima, ninaunda kitu kimoja tu na Wewe. Ah, unipe msaada, unihurumie Ee Baba! Usiniache bila kitulizo!”

Halafu kama vile ninasikia, Ee Chema Changu Kitamu, kwamba unamwita Mama Mpenzi aje kukusaidia. Unasema:

“Mama Mpendwa, unikumbatie kwa nguvu mikononi mwako kama ulivyokuwa unanikumbatia nikiwa mtoto. Unipe yale maziwa niliyokuwa nanyonya kutoka kwako ili kuniburudisha na kunionjesha utamu katika machungu ya Mateso yangu. Unipe na moyo wako uliokuwa unaniandalia raha zangu zote. Ewe Mama yangu, ewe Magdalena, nanyi Mitume wapendwa, na ninyi nyote wapendwa, nisaaidieni, nitulizeni, na wala msiniache peke yangu katika dakika hizi kali za mwisho. Ninyi nyote tengenezeni duara la mviringo kunizunguka Mimi, na nipeni kitulizo cha uwepo wenu unaonisindikiza, nipeni na pendo lenu”.

Yesu, Pendo Langu, je ni nani awezaye kuvumilia anapokuona katika hali hii mbaya? Ni moyo gani huo utakaokuwa mgumu hata usipasuke unapokuona umefunikwa na madamu? Ni nani huyo asiyemwaga na kutiririka machozi ya uchungu anaposikia sauti yako ya mahangaiko na Mateso ikiomba msaada na faraja? Yesu Wangu, hebu tulia: Mara hii nakwenda kumwona Baba ili amtume Malaika kuja kwako ili akufariji na kukusaidia ili uweze kutoka katika hali hii ya Mateso makali na uweze kujisalimisha mikononi mwa Wayahudi. Na wakati utakapokuwa pamoja na Malaika mimi nitasafiri kuzunguka mbinguni na duniani. Wewe utaniruhusu nichukue hii Damu yako uliyomwaga ili nami niweze kuitoa na kuwapatia watu wote kama rehani ya wokovu kwa kila mmoja. Na kama kitulizo na mbadala, nitakuletea Wewe mapenzi yao, mapigo yao ya moyo, mawazo yao, hatua zao na matendo yao.

Mama yangu wa Mbinguni, ninakuja kwako kusudi nikuchukue twende pamoja kwa roho zote ili tukawapatie Damu ya Yesu. Mama Mtamu, Yesu anataka faraja, na faraja kubwa zaidi tunayoweza

kumpatia ni kumpelekea roho za watu. Magdalena, hebu nawe utangulizane nasi. Enyi Malaika wote, njoni muone jinsi Yesu alivyokondeana. Yeye anataka faraja kutoka kwa wote, kwani pigo alilopata ni kubwa hivi hata hawezi kumkatalia yeyote.

Yesu Wangu, unapokunywa kikombe cha Mateso machungu kabisa alichokuletea Baba wa Mbinguni, ninasikia unavyozidi kupumua kwa taabu, unavyolia, unavyohangaika na mauti, na kwa sauti inayokaukia shingoni unasema:

“Enyi roho, enyi roho, njoni mnitulize. Njoni mchukue nafasi na kukaa katika Ubinadamu Wangu: ninawatamani, na ninawapumua. Ah, msiwe viziwi kwa sauti zangu. Msiyapuuzwa matamano yangu makali, msidharau Damu yangu, upendo wangu, maumivu yangu! Njoo, enyi roho, njoo.

Yesu Unayehema na Kulia, kila kilio chako na pumzi yako ni kidonda kinachoingia moyoni mwangu, kinachonikosesha utulivu na amani. Kwa hiyo ninajitwalia Damu yako iwe yangu, Utashi wako uwe wangu, ari yako kali na upendo wako. Ninazunguka mbinguni na duniani kote, kwani nataka niziendee roho zote, ili nikawapatie Damu yako kama rehani kwa wokovu wao, na ndipo niwachukue na kuwaleta kwako ili kutuliza mihemko yako, kilio chako na kutamuisha machungu ya Mateso yako makali. Na nitakapokuwa natenda hilo Wewe unisindikize kwa macho yako.

Mama yangu, ninakuja kwako kwani Yesu anazitaka roho, anataka faraja. Haya basi nipe sasa mkono wako wa kimama ili tuende tuzunguke pamoja katika dunia yote tukazitafute roho. Hebu halafu ndani ya Damu yake tufungilie upenzi, matamano, mawazo, matendo na hatua za viumbe vyote, na badala ya hayo yote sisi tuchukue miali ya moto wa Moyo Wake na kuitupia ndani ya roho za viumbe hao. Hilo litawafanya wajitambue. Roho hizo zikiisha kufungiwa ndani ya Damu yake Yesu, na zikiwa zimegeuzwa kuwa miali ya moto wa Yesu, tutaweza kuzichukua na kuziongoza zisimame kumzunguka Yesu ili kutamuisha maumivu ya Mateso yake machungu kabisa.

Ewe Malaika mlinzi wangu, hebu ututangulie mbele, nenda uwaandae roho wanaotakiwa kupokea Damu hii, ili hata tone moja lisibaki bila kuleta matunda yake tele. Mama yangu, twende tuzunguke mara. Ninaona Macho ya Yesu yanatufuatilia, nasikia kutweta kwake kwa haraka kunakotusukuma tuende haraka kutekeleza zoezi letu.

Na tazama ee Mama, baada ya hatua za mwanzoni tu, tumefika tayari kwenye milango ya nyumba wanamolala wagonjwa. Ni idadi kubwa jinsi hii! Jinsi gani walivyoathirika na kuchakaa! Ni idadi kubwa gani ya wale wanaoelemewa na matatizo, wanaropoka makufuru na hata wanatafuta kujiua! Wengine wameachika na kila mtu na hakuna yeyote anayewapatia neno la faraja, hakuna wa kuwapa msaada kwa mahitaji yao ya lazima, na kwa hiyo wengi wao wanatukana tu na kulaani na kukata tamaa.

Ah Mama! Ninasikia kilio cha Yesu anapooa wema wake mkuu na upendeleo wake ulivyogeuzwa na kueleweka kuwa ni uonevu, wakati upendo huo unawafanya roho hao wateswe na hivyo wafikie

kufanana na Yesu. Ah! Hebu tuwapatie Damu Yake ili iwagawie watu hao misaada ya lazima na kwa nuru yake iwafanye waelewe vema faida iliyopo katika kuteswa na ufanano na Yesu watakaopata.

Na Wewe Mama yangu, hebu soge na usimame pamoja nao, na ukiwa ni Mama wa upendo, kwa mikono yako ya kimama gusa kila kiungo cha mwili wao kilicho na maumivu, poza mateso yao, uvishike viungo hivyo mikononi mwako na kutoka moyoni mwako umwagie wingi wa neema juu ya maumivu yao yote. Uwe pamoja na wale walioachika, uwafariji waliopondeka na kuumia, na kwa wale wanaokosa mahitaji muhimu uwaandalie na kuwaletea watu wakarimu wa kuwasaidia. Kwa yule anayeelemewa na maumivu makali ya mwili na mateso mengi umletee nafuu na pumziko ili baada ya kupata nguvu mpya, hao wote waweze kupokea kwa uvumilivu zaidi yale yote ambayo Yesu anawaletea.

Tuendeleo kuzunguka zaidi hata tuingie katika vyumba vya wale walio mahututi. Mama yangu, mbona inatisha! Ni roho nyingi ngapi zinakaribia tayari kudondokea motoni!. Ni roho ngapi, baada ya kipindi cha maisha ya dhambi, sasa wanapenda kutoa teso lao la mwisho kwa ule Moyo unaochomwa mkuki mara kwa mara, lakini katika pumzi yao ya mwisho wanamalizika kwa kukata tamaa! Maibilisi mengi wamewazunguka wakiwatia hofu moyoni mwao, fadhaa na vitisho juu ya hukumu za Mungu, ili hatimaye wawarukie katika dakika ya mwisho na kuwapeleka motoni. Maibilisi wanangojea kufungulia miali ya moto wa milele ili iwalipukie na kuwakumba na hivyo watu hao wasipate fursa yoyote ya matumaini. Na wengine bado wamefungwa na mambo ya dunia hii hata hawaelewi namna ya kujinasua ili waweze kuchukua hatua ya mwisho.

Ah, Ee Mama, hali yao ni mbaya mno na ni dakika yao ya mwisho! Wanahitaji sana msaada! Je huoni jinsi wanavyotetemeka, na katika maumivu makali kweli wameshikwa na kindendemizi²; ona wanavyoomboleza msaada na huruma. Kwa hawa, hata dunia yenyewe imefifia.

Mama Mtakatifu, weka mkono wako wa kimama juu ya panda la uso wao uliodhoofika na kwisha, pokea wewe pumzi zao za mwisho. Kwa kila mmoja wa hawa mahututi, tumpatie Damu ya Yesu, na kwa njia hiyo tunawafukuza mashetani wakimbie mbali, tunawaandaa watu wote hao wapokee Sakramenti za mwisho na hivyo pia tunawaandaa kwa kifo chema na kitakatifu. Kama kitulizo kwao tuwapatie Mateso makali ya Yesu, mabusu yake, machozi yake na madonda yake. Tuvunje mitego iliyowashikilia kama mateka. Tuwafanye waweze wote sasa kusikia neno la msamaha na tutie ndani ya moyo wao imani kubwa hivi hata waweze kujitupa wenyewe ndani ya Mikono ya Yesu. Yesu, katika saa ya kuwahukumu, atawaona wamefunikwa na Damu yake, wamejikabidhi tayari mikononi mwake. Kwa hiyo, ni wazi atawapa wote msamaha wake.

Hebu tuzunguke bado zaidi, ee Mama. Kwa jicho lako la kimama uiangalie kwa upendo dunia na uwahurumie masikini viumbe hawa wengi sana ambao wanahitaji kabisa Damu hii. Mama yangu wee, naonja kabisa kusukumwa na jicho la Yesu linalonidai niharakishe kuziendea roho kwani ndizo

2 'Kindendemizi' maana yake 'mtetemo' unaotokana na kitisho na hofu kubwa sana au homa kali au maumivu makali.

anazitafuta. Ndani ya moyo wangu ninasikia kilio chake akirudia kuniambia: “Binti yangu, nisaide, unipatie roho za watu”.

Lakini tazama ee Mama, jinsi dunia ilivyojaa roho za watu wanaokaribia kuangukia katika dhambi, na Yesu anaanguka katika kilio anapoona Damu yake inatendewa makufuru mengi. Ingehitajika patokee muujiza unaoweza kuzuia mwanguko huo. Kwa hiyo tuwapatie Damu ya Yesu ambayo kwayo watapata nguvu na neema ya kutoanguka katika dhambi.

Tuongeze hatua nyingine mbele ee Mama na hapo tunazona roho zilizokwisha kuangukia katika makosa na sasa wanatafuta msaada ili waweze kuamka. Yesu anazipenda, lakini anaziangalia akitishika na kufadhaika kwani zimechafuka kwa matope na zinafanya Teso lake kuwa kali kabisa. Hebu tuwape nao Damu ya Yesu itakayowapa msaada utakaowainua. Tazama ee Mama, hizi ni roho zinazohitaji sana Damu hii. Ni roho ambazo ndani yao neema imekwishakufa. Oh! Ona jinsi gani hali yao ilivyo mbaya na ya kutisha! Mbingu inawatazama na inalia kwa uchungu, hata dunia inawaangalia kwa sikitiko na kinyaa, nguvu zote za angani zinawapinga na kugombana nao na hata zingependa kuwaangamiza kwani ni maadui wa Muumbaji. Oh, ee Mama, Damu ya Yesu kumbe ina Uhai! Hebu basi tuwapatie, kwani mara watakapoigusa tu, roho hawa watazinduka, na watazindukia kuwa wazuri na kupendeza zaidi hata watafanya Mbingu yote na dunia yote vifurahi na kutabasamu.

Tuzunguke zaidi ee Mama. Ona kuna roho za wale watu wenye mhuri wa kuangamia, wale wanaotenda dhambi na kumtoroka Yesu, wanaomtukana na wanaokata tamaa ya kupata msamaha wake. Hao ni ma-Yuda wapya walioenea duniani na wanaotoboa ule Moyo wa Mateso mengi. Hebu tuwapatie nao Damu ya Yesu ili Damu hiyo ifutilie mbali mhuri ule wa angamizo na badala yake ibandike mhuri wa wokovu. Pia Damu hiyo imwagilie ndani ya moyo yao ile imani na upendo ambavyo, baada ya dhambi walizotenda, viwafanye wakimbilie chini ya Miguu ya Yesu, na waishikilie Miguu hiyo ya kimungu hata wasiweze kujibandua tena.

Tazama tena, ee Mama, kuna roho zile zinazokimbia kama vichaa kuelekea kwenye maangamizi na hakuna anayeweza kuzuia mbio zao. Oh, hebu tuweke Damu hii mbele ya miguu yao. Mara watakapoigusa tu, na watakapomulikwa na nuru yake, na watakaposikia sauti tamu inayowasihi na kuwahakikishia kuwa anapenda kuwaokoa, wataweza kushituka na kurudi nyuma ili waingie katika njia ya wokovu.

Ee Mama, tuendele kuzunguka. Tazama zipo roho zilizo njema na nzuri, roho zilizo bila waa ambamo Yesu anapendezwa na anapata raha akiwa kati ya viumbe. Lakini viumbe vingine vinazizunguka roho hizo na vimejaa vishawishi, njama na makwazo kwa lengo la kuchafua na kurarua usafi wao huo, na hivyo kuondoa raha na mapumziko ya Yesu, ili kumletea kilio na machungu badala yake. Ni kana kwamba viumbe hao hawana kusudio lingine isipokuwa lile la kuleta daima Mateso kwa huu Moyo wa kimungu. Hebu basi tuzibe na kuzungusha usafi wao katika Damu ya Yesu kama vile kwa ukuta wa kinga yao ili dhambi isiingie tena ndani yao. Kwa Damu hiyo atokomee mbali yeyote yule anayetaka kuzichafua roho hizo na hivyo tuzihifadhi katika usafi kamili bila kuchafuliwa, ili Yesu apate pumziko

lake katika viumbe vyake na apate yote yanayomfurahisha. Na kwa upendo wao hao, atavutwa kuwahurumia viumbe masikini wengine wengi. Mama yangu, hebu tuziweke roho hizo katika Damu ya Yesu. Hebu tuzifunge na tuzifunge tena kwa njia ya Utashi wa Mungu, tuzichukue na kuziweka ndani ya mikono yake na kwa minyororo mitamu ya upendo wake tuzifungilie kwenye Moyo Wake ili kutamuisha yale machungu ya Mateso yake yale yanayomsababishia kifo.

Hebu sikia, ee Mama, jinsi Damu hiyo inavyolalamika, kwani inataka roho nyingine zaidi. Tukazane kukimbia pamoja hadi tukawasili katika maeneo yale ya wazushi na wapagani. Kwani ni Mateso mengi mangapi asiyopata katika maeneo hayo! Yeye ambaye ndiye uhai wa wote, ajabu hapati hata tendo moja dogo la ishara ya upendo kwake! Hajulikani kabisa na viumbe vyake mwenyewe! Oh, ee Mama, hebu tuwapatie Damu hii ili giza ya ujinga na uzushi itokomee mbali, na badala yake, Damu ya Yesu iwawezeshe kuelewa, kuwa wanayo roho, na iwafungulie milango ya mbingu. Kishapo tuziweke roho hizo zote ndani ya Damu ya Yesu, tuziongoze kusimama katika duara kumzunguka Yesu, kama watoto wengi yatima na wakimbizi, wanaomkuta Baba yao, na hivyo Yesu ataonja raha sana katika Mateso yake makali na machungu.

Zaidi ya hilo, yaelekea Yesu hajaridhika bado, kwani anataka roho nyingine bado. Roho zilizokufani za sehemu hizi, unazisikia zikijirarua kutoka mikono yake Yesu, ili kwenda kutumbukia katika moto wa milele. Tayari roho hizo zipo katika kuzimia, na punde zitatumbukia katika handaki la moto wa milele. Hakuna aliye karibu nao aziokoe. Muda umekwisha, nukta ni za mwisho sasa, roho hizo zitapotea tu kwa uhakika! La hasha Mama, Damu hii haitamwagika bure mbele ya hawa! Kwa hiyo basi, twende mara kwao, tuwamwagilie Damu ya Yesu juu ya kila kichwa chao, ili iwe ndiyo ubatizo wao, tuingize ndani yao imani, matumaini na mapendo. Sogea Mama usimame karibu na kando yao, na uwasaide wapate kitu kinachokosekana kwao. Jioneshe Mama wakuone: Juu ya uso wako unang'aa uzuri wa Yesu, mitindo yako ya mwili ni sawa kabisa na ile ya Yesu, na kwa hiyo, wanapokuona wewe watafaulu kwa uhakika kumjua Yesu. Halafu zaidi, uwabanie hao kwenye moyo wako wa kimama. Uwajaze ndani yao Uhai wa Yesu ule ulio nao wewe, huku ukiwaeleza kwamba Wewe kama Mama yao, unawatakia wakapate furaha ya daima pamoja nawe mbinguni. Na kwa hiyo, wakati wanakata roho, uwapokee mikononi mwako, na kutoka mikononi mwako, uwapitishe hadi ndani ya Mikono ya Yesu. Na endapo Yesu, kulingana na utaratibu wa Haki, ataonyesha kutotaka kuwapokea, hapo umkumbushe lile pendo ambalo kwalo alizikabidhi roho hizo kwako pale chini ya Msalaba. Hapo umdai Haki zako za kimama kiasi kwamba kufuata pendo lako na kufuata maombi yako Yeye hataweza kugoma kamwe. Na katika kuuridhisha moyo wako, lazima atatimiza hata matamania makali ya moyo huo.

Na sasa, ee Mama, hebu tuchukue Damu hii na tuifikishe kwa wote: kwa wanaoteswa, ili wapate faraja, kwa fukara ili wapate uvumilivu katika ufukara wao, kwa wanaoshawishiwa ili wajaliwe ushindi, kwa wasioamini ili ndani yao itukuke fadhila ya imani, kwa wanaokufuru ili badala ya kutamka makufuru watamke baraka. Fikisha Damu hii kwa Mapadre ili wapate kuelewa fika utume wao na kuwa wahudumu stahiliki wa Yesu. Kwa Damu hii uguse midomo yao ili wasitamke maneno yasiyo ya

utukufu kwa Mungu, gusa miguu yao ili waiweke daima mbioni kwenda kutafuta roho za watu na kuziongoza kwa Yesu.

Hebu tutoe Damu hii kwa watawala wa mataifa ili wawe na umoja kati yao, wawe na unyofu, unyenyekevu na upendo kwa raia zao.

Sasa turuke hadi Tohorani tukawapatie Damu ya Yesu nao wale wanaotakaswa, kwani wanalia kweli na wanadai nao wapewe Damu hii kwa ajili ya ukombozi wao. Kwani husikii ee Mama sauti za vilio vyao? Kilio chao cha njaa ya upendo, mateso makali, kiu yao ya kutaka kuunganika na kile Chema Kikuu!!! Ona jinsi Yesu Mwenyewe anavyotamani awatakase haraka zaidi ili waje kuwa pamoja naye! Anawavutia kwake kwa pendo lake, lakini wao wanajibu kwa migomo inayoendelea dhidi yake. Na wakati wanapokaribia na kufika mbele yake, wanashindwa kustahimili usafi wa Macho ya Mungu na hivyo hulazimika kuchukua hatua nyuma na kutumbukia tena ndani ya miali ya moto.

Mama yangu, hebu tushuke kwenye gereza hili la kilindini, tuwamwagie Damu hii, tuwapelekee nuru, tuzime kelele za malalamiko yao ya upendo, tuzime ile miali ya moto unaowaunguza, tutakase madoa yao. Kwa njia hiyo, baada ya kuachiwa huru toka kila teso, wataweza kurukaruka kati ya mikono ya Chema Kikuu (Mungu). Hebu tutoe Damu hiyo kwa roho zile zilizoachika zaidi na kusahaulika kwani hapo watayapata maombi yote ambayo viumbe huwa wanawanyima. Ee Mama, kwa roho hizo zote tutoe Damu hii, tusimnyime hata mmoja, ili kwa nguvu yake, wote wapate kitulizo na ukombozi. Katika maeneo haya ya kilio na maombolezo uwe Malkia, nyosha mikono yako ya kimama, ili umtoe mmoja mmoja kutoka kwenye miali ile ya moto, na kishapo uwafanye wote waruke kuelekea mbinguni.

Na sasa hata sisi hebu turuke kwenda mbinguni. Tusimame penye malango ya milele na hapo acha mimi nikupatie Damu hii kwa ajili ya utukufu wako mkuu. Damu hii ikunyeshee nuru mpya na furaha mpya na uifanye nuru hiyo ishuke kwa ajili ya viumbe vyote ili iwalettee neema ya wokovu kwa wote.

Mama yangu, unipatie na mimi pia Damu hiyo. Unajua ni jinsi gani ninahitaji. Kwa hiyo hiyo mikono yako ya kimama, unipake mwili mzima kwa Damu hiyo, na unapofanya hivyo, utakase madoa yangu, uponye madonda yangu, na ufute umasikini wangu. Fanyiza Damu hiyo itiririke kuzunguka katika njia zangu zote za damu, na unirudishie tena Uhai wote wa Yesu. Damu hiyo iteremke ndani ya moyo wangu, ikaubadilishe uwe Moyo ule ule wa Yesu, Damu hiyo ikaupambe kabisa moyo wangu hata Yesu aweze kupata hapo raha zake zote ndani yangu.

Mwishowe, ee Mama, hebu tuingie hadi ndani ya maeneo ya mbinguni, ili tutoe Damu hiyo kwa Watakatifu wote na kwa Malaika wote. Hao wapate utukufu mkuu, waibuke kutoa shukrani kwa Yesu, na waibuke kutuombea ili kutokana na nguvu ya Damu hiyo hiyo, sisi tuweze hatimaye kuwafikia na wao pia.

Na baada ya kutoa Damu hiyo kwa wote hao, turudi tuende tena kwa Yesu. Malaika, Watakatifu, njoni nanyi pamoja nasi. Ah, Yeye anapumua na kuzipokea roho za watu! Anataka kuziingiza roho hizo zote

ndani ya Ubinadamu Wake, ili azigawie zote matunda ya Damu yake. Tuziweke roho hizo kuzunguka Mwili wote wa Yesu, hata aanze kuonja Uhai unaomrejea na fidia inayotolewa badala ya machungu ya Mateso yote aliyopata.

Na sasa, ee Mama Mtakatifu, tuite nguvu zote za angani ili nao wamsindikize Yesu na hivyo kumtolea heshima.

Ee nuru ya Jua, njoo uliangaze tena giza la usiku huu kwa ajili ya kutoa kitulizo kwa Yesu. Enyi nyota, pamoja na mionzi yenu hiyo inayomeremeta, shukeni toka huko angani na njoni hapa chini, njoni mkampatie Yesu kitulizo. Ninyi maua ya dunia, njoni hapa na harufu hizo nzuri; nanyi ndege njoni na sauti zenu hizo, nanyi vitu vyote vya dunia njoni mkampatie Yesu faraja. Njoo ewe bahari ukamburudishe na kumwosha Yesu. Yeye ndiye Muumba wetu, ni uhai wetu, ni kila kitu chetu. Njoni wote wote ili kumtuliza, kumtolea heshima, Yeye aliye Mkuu na Bwana wetu. Lakini, mbona Yesu hatafuti mwanga, wala nyota, wala maua, wala ndege! Yeye anataka roho, roho!

Haya, ona sasa ewe Chema Changu Kitamu, wote sasa wapo hapa pamoja nami. Hapa karibu nawe ni Mama mpendwa, hebu upumzike angalau katika mikono yake, hata yeye atapata faraja, umkumbatie na ujibane kwenye kifua chake, kwani kifua chake kimeshiriki sehemu kubwa sana ya Mateso yako makali. Yupo hapa pia Magdalena, yupo na Maria, na watu wote wakupendao wa kutoka katika karne zote. Oh, ee Yesu, uwapokee hao wote, na uwaambie wote kauli ya msamaha na ya upendo. Na uwafungilie wote hao ndani ya upendo ili hata roho moja isipate kupotea. Lakini, Aha! Nasikia kana kwamba unasema: “Ee binti, ni roho nyingi ngapi zinazoniponyoka kwa nguvu na zinatumbukia katika angamizo la milele! Teso langu litawezaje kutulia ikiwa itapotea hata roho moja tu ninayoipenda kabisa sawa sawa kama ninavyopenda roho zote kwa pamoja?”.

Mteseke Yesu, yaelekea unakaribia kukata roho: ninasikia kukoroma kwako kwa Mateso, rangi ya macho yako imebadilika sababu ya mauti yanayokaribia, viungo vyako mbalimbali havina nguvu yoyote na unazidi kupoteza pumzi yako. Nasikia Moyo Wako unavyopasuka kwa Teso kali. Ninakukumbatia na kuonja upo baridi kabisa, nakutikisa lakini hakuna ishara yoyote ya uhai. Yesu, umekufa? Mama Mteseke, Malaika wa mbinguni, njoni kumlilia Yesu na wala msikubali mimi niendeleo kuishi bila Yesu, kwani tayari nashindwa saa hii. Namkumbatia na najibana kwake kwa nguvu zaidi na ninamsikia akitoa pumzi nyingine na halafu anazimia tena bila ishara yoyote ya uhai. Ninamwita: “Yesu, Yesu, Uhai Wangu, usizimie!”

Mbona tayari nasikia nyayo na vishindo vya maadui wako wanaokuja kukushika. Ni nani atakayekutetea katika hali hii unayoikabili? Na Yeye, akiwa amekwisha kabisa, anaonekana akizinduka toka mautini na kuingia uzimani, ananitazama sana na kuniambia:

“Binti, upo hapa? Kumbe umekuwa unafuatilia maumivu yangu na vifo vyangu vingi hivyo vilivyokuwa vinanikabili. Sasa unaweza kujua, binti, ya kuwa katika saa hizo tatu za Mateso makali kabisa bustanini, nimefungilia ndani yangu maisha yote ya viumbe, na nimekabili maumivu yote yatokanayo nao, na hata kifo chao chenyewe. Lakini, kwa kila mmoja wao Mimi nimewapatia Uhai

wangu wenyewe. Mahangaiko yangu haya ya mateso yatabeba mahangaiko yao, machungu yangu na kifo changu vitageuka kwao kuwa chemchemi ya utamu na uzima. Ni jinsi gani roho za watu zinavyonigharimu! Laiti ningekuwa angalau nimepewa chochote nao! Umeona kuwa pengine nilikuwa nazimia na halafu mara nilirudi kupumua tena; hivyo vilikuwa ni vifo vya viumbe nilivyokuwa navionja ndani yangu”.

Mteswa Wangu Yesu, hata kama ulikuwa umetaka kufungilia pia uhai wangu ndani yako, na hivyo pia kufungilia kifo changu, ninakusihi, kwa nguvu ya Mateso yako haya makali kabisa, uje kunisaidia nitakapokuwa katika dakika ya kifo changu. Mimi nimekupati moyo wangu kuwa kimbilio na pumziko, nimekupa mikono yangu ikushikilie, na nimetoa kwako nafsi yangu yote iwe kwa ajili yako, na Oh, ni kwa hiari kabisa ya jinsi gani ningependa kujikabidhi mimi mwenyewe mikononi mwa maadui wako ili niweze kufa mimi badala ya Wewe!

Itakapofika dakika ile, njoo, ee Uhai wa moyo wangu, ili unirudishie mimi kile nilichokupatia Wewe: uwepo wako ili kunisindikiza, Moyo Wako kuwa kitanda na pumziko, Mikono yako kwa ajili ya kunishikilia, pumzi yako ya Mateso makali kwa ajili ya kupunguza mateso yangu, kiasi kwamba mimi nitakapokuwa napumua, niwe ninapumua kwa njia ya pumzi yako, ambayo ikiwa ndiyo hewa inayotakasa, itanitakasa na mimi kutokana na kila doa, na itaniandaa mimi kwa ajili ya kuingi katika heri ya milele.

Basi sasa, Yesu Wangu Mtamu, uujalie moyo wangu kuupata Ubinadamu Mtakatifu ule ule wa kwako, ili kwamba Wewe utakapokuwa unanitazama, uwe unanitazama kupitia Nafsi yako Wewe Mwenyewe, na utakapokuwa unajitazama Wewe Mwenyewe, usiweze kuona kitu chochote ambacho kwacho unaweza kunishitaki au kunihukumu mimi. Kishapo utaniosha mimi ndani ya Damu yako, utanivalisha vazi lile jeupe la Utashi Wako Mtukufu, utanishawishi kwa Pendo lako; na utakaponipatia busu lako la mwisho, utanifanya nijichomoze kuruka toka duniani hadi mbinguni.

Na kile ninachokitaka kwa ajili yangu mwenyewe, ukifanye hivyo hivyo kwa wote ambao wapo katika mateso makali; uwakumbatie wote kwa nguvu katika duara la Pendo lako. Na utakapowapa busu la kuungana nao, uwaokoe wote na wala usiruhusu hata mmoja wao apotee.

Chema Changu Kilichopigwa, ninakutolea saa hii kwa ajili ya kukumbuka Mateso yako na Kifo chako, kwa ajili ya kutegua ile hasira ya Haki ya Mungu juu ya dhambi nyingi mno, kwa ajili ya wongofu wa wadhambi wote, kwa ajili ya amani ya mataifa, kwa ajili ya kututakasa sisi na kwa ajili ya kuwaombea roho marehemu wanaotakaswa tohorani.

Lakini nawaona tayari maadui wako wamekaribia, na Wewe unataka kuniacha ili uende kukutana nao. Yesu, uniruhusu nikubusu mdomoni ambapo Yuda anatamani kuja kubusu kwa busu lile la moto wa milele. Uniruhusu nipanguse Uso ambao umelowana na Damu. Ni Uso ambao juu yake hivi punde kutateremka mvua ya makofi na utatemewa mvua ya mate. Unibanie kwenye Moyo Wako na usikubali mimi nitengane Nawe kamwe. Ninakufuata na Wewe unibariki.

TAFAKARI NA ZOEZI

Yesu katika saa hii ya tatu Bustanini Getsemani, aliomba msaada toka mbinguni kwani maumivu yake yalikuwa makali kabisa, kiasi kwamba aliomba faraja hata kutoka kwa Wafuasi wake. Je na sisi huwa tunaomba msaada wa mbinguni wakati tunapokuwa katika mazingira mbalimbali? Tunapokuwa katika mateso na katika shida? Na hata pale tunapoviendea viumbe, je tunaviendea kwa utaratibu, na tunawaendea wale wanaoweza kutupatia faraja ya kweli na inayofaa? Na je huwa tunaridhika na msaada mdogo tunaopata wakati tunashindwa kupata kiasi tulichotegemea na chenye kuturidhisha kama tulivyotarajia? Na je, watu wasipojali mambo yetu, tunatumia fursa hiyo kujikabidhi zaidi katika mikono ya Yesu?

Yesu alifarajiwa na Malaika. Je tunaweza tukasema kuwa na sisi ni Malaika wa Yesu kwa tendo la kuhiari kumsindikiza, kubaki naye, kumfariji, na kushiriki maumivu ya Mateso yake? Lakini, ili tuweze kuwa kweli Malaika wa kumtuliza Yesu, ni lazima kwanza kuyapokea mateso vile kama yanavyoletwa na Yesu kwetu, yaani tuyapokee kama mateso ya kimungu juu yetu; tukifanya hilo ndipo tutaweza kuthubutu kumfariji Mungu anayeteseka vikali namna hiyo. Kinyume chake, tukiyachukua mateso yetu kwa mtindo na hoja za kibinadamu tu, hatutaweza kuyatumia kwa ajili ya kumtuliza huyu Mtu-Mungu, na kwa hoja hiyo tutashindwa kuwa Malaika kwa Yesu. Katika maumivu ambayo Yesu anatuletea, yaelekea anatuletea pia kikombe ambamo sisi twatakiwa kutia matunda ya maumivu hayo; Na maumivu hayo, endapo tunayapokea kwa upendo na kwa hiari, yatageuka kuwa asali kwa ajili ya Yesu. Katika kila umivu tuseme: “Yesu anatuaita kuwa Malaika wanaomsindikiza na wanaokesha naye. Yesu anataka faraja yetu, na kwa hiyo anatushirikisha maumivu yake”.

Yesu, Pendo Langu, katika maumivu yangu natafuta Moyo Wako uwe pumziko langu na katika maumivu yako nataka nikutolee fidia kwa njia ya maumivu yangu ili tubadilishane kati yetu na kwa namna hiyo mimi niwe Malaika wako mfariji.

(Sala ya Kushukuru Baada ya Kila Saa ya Mateso Makali.

Tazama Uk 27)

(Sala ya Kushukuru Baada ya Kila Saa.

Tazama Uk 2)



SAA YA NANE

(Kuanzia Saa Sita Usiku Hadi Saa Saba Usiku)

Yesu Anakamatwa Bustanini

(Sala ya Kujiandaa.

Tazama Uk 1)

Ee Yesu Wangu, tayari ni saa sita usiku. Unasikia maadui hao wanakaribia, na Wewe, baada ya kutiwa nguvu na faraja ulizopata, unajisetiri vizuri na kujiweka sawa na unajipangusa Damu. Unatoka na kuelekea kwa mara nyingine kwa wale Wafuasi wako, unawaita, unawaonya, na unawachukua na pamoja nao unakwenda kukabiliana na maadui. Kwa uhiari huo wako unataka kulipa fidia ya uzembe wangu, ukaidi wangu, uvivu katika utendaji wangu na uvivu wangu dhidi ya kuteswa kwa ajili ya Pendo lako.

Usaliti Wa Yuda

Sasa basi, Ee Yesu Mtamu, Chema Changu, ni nini hiki ninachokiona cha kutisha hivi mbele yangu! Wa kwanza unayemkuta ni Yuda jeuri. Anakujongea kukufikia, anakutupia mikono yake shingoni mwako, anakusalimu na anakubusu. Na Wewe Pendo Linaloteseka Kabisa, pendo lisilo na kisirani chochote, huchukii kubusu midomo ile ya motoni, unamkumbatia, na unamvutia kwenye Moyo Wako huku ukitaka kumng'oa toka motoni kwa kumpatia hizo ishara za upendo mpya.

Yesu wangu, inawezekanaje asikupende? Mapenzi ya Pendo lako ni makubwa hivyo hata yanaweza kung'oa kwa lazima moyo wowote ule ili uanze kukupenda! Ajabu hata hivyo kuna mioyo ile isiyokupenda! Yesu Wangu, katika busu hilo la Yuda unalipa fidia ya kilausaliti, unafiki, kujisingizia, udanganyifu katika mapenzi ya kirafiki na udanganyifu katika matakatifu hasa udanganyifu wa Mapadre. Halafu, zaidi ya hilo, busu lako huonyesha kwamba Wewe hutamkatalia kamwe msamaha wako mdhambi yeyote Yule anayekuja kwa unyenyekevu.

Mpole kabisa Yesu Wangu, tayari unajikabidhi mikononi mwa maadui huku ukiwapa uwezo wa kukutesa kwa namna wanayotaka wao. Hata mimi, Ee Yesu Wangu, ninajikabidhi mikononi mwako, ili kwa uhuru wako uweze kunitendea chochote kikupendezacho zaidi na ninataka pamoja nawe nifuate Utashi Wako, fidia zako, na pia nipate maumivu yako. Nataka niwe daima kando yako na pamoja nawe hata pasiwepo na kosa ambalo kwalo mimi sitoi fidia, pasiwe na uchungu ambao mimi sinogeshi, pasitokee unatemewa mate au kupigwa makofi bila mimi kukubusu na kukupapasa mara. Kila utakapoanguka mikono yangu ipo daima tayari kukusaidia kuinuka.

Naam, ninataka nibaki nawe daima, Ee Yesu Wangu, sipendi kukuacha peke yako hata kwa dakika tu. Ili niwe na uhakika zaidi juu ya hilo, uniingize na kuniweka ndani yako na mimi nitakuwa katika akili

yako, katika Macho yako, katika Moyo Wako na katika Nafsi yako yote, ili itokee kwamba kila unachotenda Wewe hicho hicho niweze kutenda hata mimi. Kwa namna hiyo nitaweza kukesha nawe kwa uaminifu kabisa na hakuna hata moja la maumivu litakalonikosa. Hivyo nitakugawia pendo langu kwa ajili ya kila kitu unachonitendea. Kitamu Chema Changu, nitadumu daima kando yako ili kukutetea, ili kujifunza zaidi mifano yako, na ili kuhesabia maneno yako moja baada ya lingine.

Ah! Ona jinsi linavyoteremka moyoni mwangu neno lile ulilolisema kwa Yuda: “Amice, ad quid venisti?”, yaani “Rafiki, umekuja kutafuta nini?” Naonja unaelekeza neno hilo kwangu mimi, ila tu huniiti ‘rafiki’ bali unaniita kwa jina lile tamu la ‘Binti’ unaponiambia: “Filia ad quid venisti?”, yaani “Binti, umekuja kutafuta nini?”. Ni kwa vile unataka kusikia nikijibu: “Yesu, nakuja kukupenda”.

Ad quid venisti? Urudie kwangu tena ninapoamka asubuhi.

Ad quid venisti? Urudie kwangu ninaposali.

Ad quid venisti? Urudie kwangu kutoka katika Hostia Takatifu, ninapofanya kazi, ninapokula, ninapoteswa, na ninapolala. Ni neno zuri sana la kunikumbusha mimi na wengine wote!

Lakini ni wangapi wanaitikia swali lako hilo ‘Ad quid venisti?’ huku wakisema: “Nakuja kukutukana!”. Wengine, huku wakijisingizia kutokukusikia wanaendelea kujikabidhi kwenye kila aina ya dhambi na wanajibu ‘Ad quid venisti?’ yako kwa kuelekea motoni. Ni jinsi gani ninavyokuhurumia, Ee Yesu Wangu! Napenda nitwae kamba hizo hizo ambazo wameshika adui zako ili kukufunga na kwa kamba hizo nizifunge roho hizi zote ili nikupunguzie Mateso haya.

Kumbe kwa mara nyingine tena ninasikia sauti yako laini kabisa ukisema kwa maadui zako unaowaendea: “Mnamtafuta nani?” Na wao wanajibu: “Yesu Mnazareti”. Na Wewe unawajibu: “Ego sum”, yaani, “Ni mimi”. Kwa neno hilo peke yake Wewe unasema kila kitu hata kuwafanya wajue Wewe ni nani, na hivyo kuwapelekea adui zako waingie kindendemizi, kutetemeka na kuanguka chini ardhini kama wafu. Na Wewe, Ee Pendo Usiye Mfano, kwa kauli nyingine ya ‘Ego sum’ - Ni mimi – unazindua uhai uwarudie na kwa hiari yako Mwenyewe unajikabidhi chini ya nguvu na mamlaka ya adui zako.

Yesu Anafungwa Kamba na Minyororo

Oh! Ni chuki na ufedhuli!

Badala ya kukuangukia miguuni pako kwa unyenyekevu na kufadhaika na kuomba msamaha, wao wanakufuru wema wako, wanadharau neema zako na miujiza yako, wanakushika kwa mikono yao, wanakufunga kwa kamba na minyororo, wanakusukuma na kukuburuza ardhini, wanakukanyaga kwa miguu yao, wanavuta na kunyofoa nywele zako. Na Wewe, kwa uvumilivu usio na kifani unanyamaza, unateswa, unalipa fidia makosa ya wale wasiokumbuka wala kujali miujiza uliyowatendea; wanakataa neema yako na wanashupaa zaidi na kuwa sugu. Katika kamba na minyororo hiyo unamwomba Baba neema ya kuvunja minyororo ya makosa yetu na unatufunga kwa minyororo mtamu wa Pendo.

Halafu kwa upendo unamwonya Petro ambaye anataka kukutetea hata kwa kukata sikio la Malko. Hapo unataka kulipa malipizi kwa yale matendo mema yaliyofanyika bila busara takatifu ya kutosha au yaliyofanyika kwa hamaki kubwa hata kuangukia katika makosa.

Yesu Wangu Mvumilivu Kabisa, hizo kamba walizokufungia pamoja na minyororo huonekana kama kwamba vingekuwa ni mapambo yaliyowekwa juu yako ili kuongeza uzuri wa Nafsi yako ya kimungu: Panda lako la uso laonekana kuwa na utukufu zaidi hata kuweza kuvuta macho ya maadui wako wenyewe; Macho yako yanamulika kwa nuru zaidi; Uso wako wa kimungu unaonyesha amani na utulivu wa hali ya juu kabisa hata kuweza kuwavuta kwa upendo hata adui zako wauaji. Kwa njia ya ishara za upole za Uso wako na kwa kukazia macho yako, hata kama ni mara chache tu, unawafanya watetemeke. Na hata kama wanawaka hasira ya kukutesa, hii ni kwa vile tu Wewe Mwenyewe unaruhusu.

Ee Pendo Uliyefungwa kwa minyororo na kamba, itawezekanaje iwe Wewe uwe umefungwa kwa ajili yangu mimi, kwa kutaka tu kuonyesha upendo wako kwangu mimi, na mimi mwenyewe binti yako mdogo niwe nimebaki bila minyororo? Kamwe, kamwe!. Kwa hiyo sasa nifunge mimi kwa kamba hizo hizo zako na kwa minyororo hiyo hiyo, nifunge katika Mikono yako mitakatifu. Kwa hiyo nakuomba wakati huu ninapobusu Panda lako la uso wa kimungu unifunge mawazo yangu yote, macho yangu yote, masikio, ulimi, moyo wangu, upenzi wangu, nafsi yangu yote na pamoja nami ufungilie na viumbe vyote ili vinapoonja utamu wa minyororo yako ya mapenzi, wasiweze tena kuwa na hamu kukukosea.

Kitamu Chema Changu, tayari tumeingia saa saba ya usiku. Akili imeanza kuchoka na kuelemea na usingizi. Nitafanya lolote ili nidumu nikikisha macho. Lakini endapo usingizi utanielelea, mimi najikabidhi ndani yako kwa ajili ya kukufuata katika kila kitu unachofanya wewe; tangu sasa Wewe utafanya kila kitu kwa ajili yangu. Ndani yako nayaacha mawazo yangu ili yakutetee dhidi ya maadui wako, nakuachia pumzi yangu ili ikusindikize na ikeshe pamoja nawe, nakuachia mapigo yangu ya moyo ili yawe yanakuambia daima: 'Nakupenda' na hivyo yakupatie tena upendo ambao watu wengine wanakunyima. Matone ya damu yangu yatoe fidia kwako na yakurejeshee heshima na hadhi ambavyo viumbe vitakuwa vimekunyang'anya kwa njia ya madharau, mate na makofi.

Yesu Wangu, hebu unibusu, unikumbatie na unibariki; na kama unataka nilale kidogo basi unifanye nipate usingizi ndani ya Moyo Wako mwabudiwa. Kwa nguvu ya mapigo yako ya moyo yanayoharikishwa na upendo wako, mapigo yanayoteswa, mimi niweze kubaki nakesha macho daima, ili tusikatishe mkesha wetu wa pamoja. Ndivyo, Ee Yesu, tubaki na makubaliano hayo.

TAFAKARI NA ZOEZI

Yesu yupo tayari ameziandaa kujisalimisha mikononi mwa adui akitambua Utashi wa Mungu Baba ndani ya hao adui wake. Je sisi, katika udanganyifu wa viumbe, katika usaliti, tupo tayari kusamehe kama alivyosamehe Yesu? Je mabaya yote tunayotendewa na viumbe twayapokea yote kama kitu kitokacho mikononi mwa Mungu? Je sisi tupo tayari kutekeleza kila neno atakalo Yesu kutoka kwetu? Je katika misalaba, katika uchovu twaweza kusema kuwa uvumilivu wetu unaiga ule wa Yesu?

Yesu Wangu, uliyefungwa minyororo, naomba minyororo yako sasa ifunge moyo wangu, na iushikilie usimame imara bila kutikisika, hivyo kuuandaa uwe tayari na hiari kukabili na kupokea mateso kadiri unavyotaka wewe.

(Sala ya Kushukuru.

Tazama Uk 2)



SAA YA TISA

(Kuanzia Saa Saba Usiku Hadi Saa Nane Usiku)

Yesu Anajikwaa katika Kamba na Kutumbukia Ndani ya Mfereji wa Maji Machafu wa Kedron

(Sala ya Kujiandaa.

Tazama Uk 1)

Mpendwa Chema Changu, akili yangu masikini inakufuata huku nikiwa katika hali ya nusu macho na nusu usingizi. Nitawezaje kutekwa na usingizi wakati ninapoonwa watu wote wanakuacha na kukutoroka? Hata Mitume wenyewe, Petro yule wa kiherehere, ambaye punde kabla alisema anataka kutoa uhai wake kwa ajili yako, yule Mwanafunzi mpendwa, ambaye kwa upendo mkubwa ulimlaza juu ya Moyo wako, Ah, wote wote wanakuacha na wanakutoroka wakitishwa na adui zako wakatili!

Yesu Wangu, upo peke yako. Macho yako safi na ya kuangaza yanatazama huko na huko kuona kama kuna angalau mtu wako mmoja, kati ya wale waliofaidi mema yako, ambaye anakufuata sasa, ili kukuonyesha upendo wake na ili kukutetea. Unapogundua kuwa hayupo kabisa hata mmoja aliyebaki mwaminifu kwako, Moyo unakubana sana na unaanguka katika kilio na majonzi, huku ukionja maumivu zaidi kutokana na kuachika na wale uliowapenda zaidi. Hilo linakuumiza zaidi kuliko yale yote unayotendewa na hao adui zako. Yesu Wangu, usilie hivyo, au basi ufanye mimi nilie pamoja nawe. Na hapo namsikia Yesu Mpendwa kana kwamba ananiambia:

“Ah, Binti! Hebu kwa pamoja tulilie hatari inayokabili roho nyingi za watu wa maisha ya wakfu ambao katika majaribu madogo tu, katika matukio mbalimbali ya maisha, wanaacha kunithamini Mimi na badala yake wananiacha peke yangu. Tulie kwa ajili ya roho nyingine nyingi zilizojaa hofu na udhaifu, kwa kukosa ujasiri na kujiamini wananiacha. Tulie kwa ajili ya wengine wengi wengi tu ambao wanapokosa kuyaona malipo na faida katika mambo matakatifu wananidharau Mimi. Tulie kwa ajili ya Mapadre wengi wanohubiri, wanaoadhimisha Sakramenti, wanaoungamisha kwa lengo la mambo yao na utukufu wao. Hao wanajionyesha kuwa wapo pamoja na mimi kumbe kwa kweli Mimi ninaachwa nimebaki peke yangu. Ah, Binti, jinsi gani lilivyo gumu kwangu Teso hilo la kuachika! Siyo tu Macho yangu yanalia machozi, lakini Moyo Wangu unatoa damu. Ah! Naomba ulipe fidia Teso langu hili kali sana kwa kuniahidia kuwa hutaniacha kamwe peke yangu”. Ndiyo, ee Yesu Wangu, ninakuahidia nikitegemezwa na neema yako na pia na msimamo imara wa Utashi Wako wa kimungu.

Ni kweli Ee Yesu, unapolilia Mateso ya kuachika na wapendwa Wafuasi wako, adui zako hawakuachi wala hawakusamehe pigo lolote wanalothubutu kukutendea. Ee Chema Changu, umebanwa kabisa kwa kamba kiasi kwamba huwezi ukajimudu au kutembea hata hatua moja. Wao wanakukanyaga na

kukusukuma kwa miguu, wanakuvuta na kukukokota katika njia na uchochoro kulikojaa mawe na miiba. Hakuna hatua au mtikisiko usiopelekea kusuguliwa na kuchubuliwa na mawe na pia kukwaruzwa na kuchomwa na miiba.

Ah, Yesu Wangu! Naona kabisa pindi wanapokuburuza, Wewe unaachilia nyuma yako ile Damu yako azizi na hata nywele zako za dhahabu wanazonyofoa toka kichwani mwako. Uhai Wangu na Chote Changu, hebu uniruhusu niokote na kukusanya nywele hizo ili kwazo nifunge hatua zote za watu wale ambao mchana na hata usiku hawakuachi hivi hivi bali wanatumia saa za usiku kukuchukiza vibaya zaidi: kwenye mikutano ya maovu, kwenye zinaa, kwenye kumbi za michezo mibaya, kwenda kuiba mambo matakatifu. Yesu Wangu, naungana nawe ili kufidia makosa hayo yote.

Haya ona, Ee Yesu Wangu, tumekwisha kufika penye maji ya mfereji wa Kedron. Wayahudi hawa wakati wanakusukumiza na kukutumbukiza ndani ya maji ya mfereji huo kwa kukutupa kwanza juu ya mwamba uliopo pale. Mwanguko umekuwa mbaya sana hata kusababisha utoke Damu takatifu nyingi mdomoni, ambayo alama zake zinabaki juu ya mwamba ule. Kishapo wanakuvuta juu kidogo na kukuzamisha tena chini kwenye kina zaidi, kwenye majitaka yale machafu hata yanaingia masikioni, mdomoni, na puani. Oh, Pendo Lisiloweza Kufikiwa! Upo umelowana kabisa, na kama mtu uliyepakwa mwili wote hayo maji machafu ya takataka zinukazo, ziletazo kichefuchefu na ubaridi, Wewe sasa katika hali hiyo unanionyesha hali halisi na hai ya kusikitisha wanayokuwa nayo watu wanapotenda dhambi. Oh, ni jinsi gani huwa wanakuwa wamegubikwa ndani na nje kwa joho la uchafu unukao na unaochukiza Mbingu na kuchukiza kila mtu anayewaona hata kuweza kuvuta radi ya Haki ya Mungu na hukumu yake.

Oh, Uhai wa Uhai Wangu! Je inawezekana kweli kukawa na Upendo mkubwa zaidi ya huu? Ili sisi tuweze kujivua na joho hilo la uchafu, Wewe unakubali adui zako wakupeleke ndani ya mfereji huo. Unapokea Mateso hayo kwa ajili ya kulipa fidia ya makufuru na ubaridi wa roho za watu wale wanokupokea katika hali ya dhambi na hivyo wanakusukuma zaidi ya nguvu ya mkondo wa maji, ili uzame ndani zaidi ya mioyo yao hiyo michafu, kusudi ukapate kinyaa na kichefuchefu chote kitokanacho na hali hiyo. Zaidi, unaruhusu maji hayo machafu yaingie na hata kupenya matumboni mwako. Unaathirika hivi kiasi kwamba adui, kwa kuogopa kuwa utazama na kufa, na kwa kutaka wakupafadhi kwa ajili ya matendo ya ukatili mkubwa zaidi yanayokungoja, wanakuvutia juu na kukutoa. Lakini unaleta kinyaa kabisa hata wao wenyewe wanapata kichefuchefu sana wakati wanapokugusa.

Yesu Wangu Mnyonge na Laini, tayari upo nje ya mfereji ule wa maji machafu. Moyo wangu unashindwa kuvumilia kukuona umelowa namna hiyo kutokana na maji ya kinyaa. Nakuona unatetemeka kabisa kwa baridi toka kichwani hadi chini miguuni. Unachungulia huko na kule ukitafta kwa Macho kile unachoshindwa kukitafta kwa sauti: mtu mmoja walau aje kukukausha, kukusafisha na kukupasha joto, na hata zaidi ya hapo. Kumbe lakini hakuna hata mmoja anayeguswa na kukuhurumia: Maadui wanazidi kukudhalilisha na kukuchekelea, Wafuasi wako wamekuacha, Mama yako mpendwa yupo mbali kwa sasa kwani ndivyo anavyopanga Baba.

Nione mimi ee Yesu: Njoo mikononi mwangu. Nataka nilie sana hata nikuandalie bafu ili nikuoshe, nikusafishe na kwa mikono yangu nikuweke sawa nywele zako hizo zilizovurugika kabisa. Pendo Langu, nataka nikufungilie ndani ya moyo wangu ili nikupashe kwa joto la upenzi wangu, nikutie marashi ya matamania yangu matakatifu, na nataka kulipa fidia kwa makosa haya yote na hatimaye nitoe uhai wangu uwe pamoja na Uhai wako kwa ajili ya kuokoa roho zote. Nataka nikupatie moyo wangu kama mahali pa kupumzikia ili uweze kuburudika kidogo na kwa namna fulani baada ya maumivu makali uliyopata hadi kufikia dakika hii. Halafu kwa pamoja tutaanza kuendelea na njia ya Mateso yako.



TAFAKARI NA ZOEZI

Katika saa hii Yesu anajitoa achezewe na maadui wake hata wakafikia kumtumbukiza mferejini Kedron. Ajabu lakini, Yesu aliyejaa upendo alikuwa anawatazama wote kwa upendo akivumilia yote kwa ajili ya kuwapenda. Je sisi huwa tunajitoa ili tuchezewe na Utashi wa Mungu? Je katika udhaifu wetu na mianguko yetu tunakuwa tayari na hiari kuamka na kujikabidhi mikononi mwa Yesu?

Yesu Mteswa na Msulibiwa alitupwa ndani ya mfereji wa Kedron hata akakosa hewa, akapata kinyaa, kichefuchefu na sikitiko kali. Je sisi huwa tunaogopa na kukimbia kila aina ya doa na giza la dhambi? Je moyoni mwetu huwa sisi tu tayari kutoa lishe yoyote kwa Yesu itakayomkinga na kichefuchefu na kinyaa anachopata toka kwa roho nyingine wanapotenda dhambi? Na je tumempa chochote cha kumlipa badala ya mambo yale tunayomkosea mara nyingi sisi wenyewe?

Yesu Wangu Msumbuliwa, tafadhali usiniache hivi hivi, unifanye niweze kuwa mlengwa mojawapo wa mipango yako ya kimungu na ya upendo.

(Sala ya Kushukuru.

Tazama Uk 2)

SAA YA KUMI

(Kuanzia Saa Nane Hadi Saa Tisa Usiku)

Yesu Anapelekwa Mbele ya Annas

(Sala ya Kujiandaa.

Tazama Uk 1)

Yesu, uwe pamoja nami daima. Mama Mwema, hebu tumfuate Yesu pamoja.

Yesu Wangu, Mlinzi wangu Mtukufu, unaponiamsha rohoni mwangu, kwa vile hutaki kubaki mpweke bila mimi, unanishitua na kuniamsha hata niweze kuwa nawe katika nyumba ya Annas. Tumefikia dakika ile anapokuhoji juu ya mafundisho yako na juu ya Wafuasi wako wenyewe. Na Wewe Yesu, unapoanza kutetea Utukufu wa Baba, unafungua Mdomo wako Mtukufu na kwa sauti nyembamba na tamu na ya heshima unamjibu: “Mimi nimezungumza hadharani mbele ya watu na hawa wote waliosimama mbele yako walinisikia”.

Unapoinua Macho yako ya hadhi kuwatazama, wote wanatetemeka. Hata hivyo wamejaa chuki na uovu kabisa hata kijakazi mmoja, kwa kutaka kumpendeza Annas, anasogea kwako na kwa mkono wa uovu na ukatili anakuzaba kofi la hasira linalokupelekea kupepesuka na hata Uso Wako Mtukufu ukabadilika rangi na kuanza kuvimba.

Sasa naelewa, Uhai Wangu Mtamu, ni kwa nini ulinitaka nibaki nawe nisitoke: Ulikuwa na sababu! Ni nani angetakiwa kukushikilia dakika hii unapopigwa na kuyumba hata kukaribia kuanguka? Maadui wako wanaanguka katika kicheko cha kishetani, wanapiga miluzi na makofi kushangilia kitendo hiki kibaya cha uvunjaji wa haki namna hii. Na Wewe unapopepesuka na hupati mtu wa kukushikilia. Yesu Wangu, ninakukumbatia, kwa kweli nataka nafsi yangu iwe kama ukuta wako wa kuegemea na ninakutolea shavu langu kwa ujasiri wote, nikiwa tayari na hiari kuvumilia kila umivu kwa ajili ya kukupenda Wewe. Nakuonea huruma kwa kipigo hicho ulichopata, na pamoja nawe nalipa fidia kwa uoga wa roho nyingi sana za watu, ambao huwa wanakata tamaa kirahisi sana, fidia kwa ajili ya wale wasiosema ukweli kwa sababu ya hofu, na fidia kwa ajili ya tendo la kukosa kutoa heshima itakiwayo kwa Mapadre na kwa masengenyo mbalimbali.

Na sasa naona, Yesu Wangu Uliyepigika, ya kuwa Annas anakupeleka kwa Kaifa. Adui zako wanakusukumiza kwenye ngazi na kukuangusha na Wewe, Pendo Langu, katika anguko hilo baya, unalipa fidia kwa ajili ya wale wote ambao wakati wa usiku, wakifaidi giza lililopo, huwa wanaanguka katika dhambi. Na hapo hapo unawaita wazushi na wapagani waingie kwenye mwanga wa imani.

Na hata mimi nataka kukufuata katika matendo hayo ya fidia hata utakapofika kwa Kaifa, ninakuletea pumzi zangu, ili zikutetee mbele ya adui zako. Na pindi nitakapokuwa nalala, wewe uendele

kunitumia kama mlinzi wako ukinishitua na kuniamsha kila utakapohitaji. Kwa hiyo basi, hebu unibusu na unibariki. Na mimi ninakubusu Moyo Wako na ndanimu ninaendelea na usingizi wangu.



TAFAKARI NA ZOEZI

Yesu, baada ya kufikishwa mbele ya Annas anahojiwa naye juu ya mafundisho yake na juu ya Wafuasi wake; kwa ajili ya kumtukuza Baba, Yesu anajibu maswali yahusuyo mafundisho yake, lakini hagusi chochote kuhusu Wafuasi wake ili asije akakosea upendo.

Na sisi, inapotakiwa tumtukuze Bwana, je tunakuwa na hamu, ari na ujasiri wa kufanya hivyo au tunaona haya na woga kulinda heshima yetu ya kibinadamu? Inatupasa tuseme daima ukweli hata tukiwa mbele ya watu wenye mtazamo tofauti na wetu.

Je katika mazungumzo yetu huwa tunatafuta utukufu wa Mungu? Na kwa ajili ya kuongeza utukufu wa Mungu je huwa tunayapokea yote kwa uvumilivu kama alivyofanya Yesu? Je huwa tunaepuka kuzungumza mabaya juu ya wengine? Je huwa tunasamehe wakati tunaposikia juu ya masengenyo ya wengine?

Yesu, analinda moyo wetu. Na sisi je tunalinda Moyo wa Yesu ili usipate tusi lolote ambalo sisi tunashindwa kulitolea fidia? Je tunajilinda vema sisi wenyewe katika kila jambo ili kila wazo letu, jicho letu, neno letu, upenzi wetu, pigo la moyo wetu na tamania letu viwe daima ni walinzi wengi wanaomzunguka Yesu ili kuikinga Moyo Wake dhidi ya dhambi zote na ili kuulipia fidia Moyo huo kwa makosa hayo yote? Na ili sisi tufaulu kutekeleza hilo je tunamwomba Yesu alinde kila tendo letu na atusaidie Yeye Mwenyewe kulinda moyo wetu?

Kila tendo tunalotekeleza ndani ya Mungu linakuwa ni uhai wa kimungu tunaouchukua na kuubeba ndani yetu. Na kwa vile sisi tuna mipaka sana, tupo finyu sana, na Mungu ni Mkuu kabisa bila mpaka wowote, sisi hatuwezi kamwe kumfungilia Mungu katika tendo letu la kawaida la kibinadamu. Kwa msingi huo inabidi tuongeze au tuzidishe, turudufu matendo yetu kwa jinsi tuwezavyo hata tuweze walau kupanua uwezo wetu na nafasi yetu ya kuelewa na ya kupenda.

Na je, Yesu wetu anapotuita, tunakuwa tayari kumwitikia? Wito wa Mungu huwa unatujia katika mitindo mingi: katika uangazo, katika kusoma vitabu vifaavyo, katika mifano ya watu mbalimbali; tunaweza pia kuuonja wito huo kupitia njia za maarifa pale tunapopata mvuto wa neema na hata katika machafuko ya hewa na mazingira.

Yesu Wangu Mtamu, naomba sauti yako isikike daima moyoni mwangu; kila kitu kinachonigusa kunizunguka ndani na nje kiwe daima ni sauti endelevu inayoniita kukupenda daima. Na uzuri na utamu wa sauti yako hiyo ya kimungu unizuie mimi nisiwe nasikia sauti nyingine za kibinadamu zenye kunivuruga.

(Sala ya Kushukuru.

Tazama Uk 2)

SAA YA KUMI NA MOJA

(Kuanzia Saa Tisa Hadi Saa Kumi Alfajiri)

Yesu Katika Nyumba ya Kaifa

(Sala ya Kujiandaa.

Tazama Uk 1)

Chema Changu Mteseka na Mwachika, pindi mimi, katika udhaifu wa ubinadamu wangu, ninalala katika Moyo Wako wa Mateso, usingizi wangu huvurugwa mara nyingi na ukali wa mapendo yako na Mateso ya Moyo Wako wa kimungu. Kati ya mkesho na usingizi ninasikia makelele ya kulalama na kulia kwako kutokana na kipigo unachopata na hapo nashituka na ninaamka na kusema:

“Masikini Yesu Wangu, umeachwa na wote na hakuna wa kukutetea. Lakini kutoka ndani ya Moyo Wako mimi nakutolea uhai wangu uwe ni tegemezo lako katika kila pigo linalokufanya ulalame”.

Halafu naelemewa tena na usingizi; mara nashituka tena na kuamshwa kutokana na Teso kali la Moyo Wako wa kimungu. Hapo naonja masikio yangu yanazibika na kuwa ziwi kutokana na matusi yao, mazomeo, makelele, na harakati za watu wanaokimbiakimbia. Ewe Pendo Langu, kwa nini wote hawa wawe wanakuchukia Wewe? Kwa nini wanataka kukuparurana kama kundi la mbwa mwitu wenye hasira? Naonja damu yangu ikiganda kwa ubaridi hapo ninaposikia mipango ya maandalizi ya hao adui zako. Natetemeka na kufadhaika nikiwaza ni namna gani naweza kukutetea.

Lakini Yesu Wangu wa Mateso, huku akinishikilia bado ndani ya Moyo Wake ananibana na kunisukumiza kwa nguvu zaidi akisema:

“Ewe Binti yangu, mimi sijatenda baya lolote bali nimetenda kila jema: Mimi nimetenda ‘jinai’ la Upendo unaobeba sadaka zote; Upendo wa gharama kuu kabisa. Hivi sasa tupo bado mwanzoni kabisa. Wewe kaa kimya hapo moyoni pangu, fuatilia yote, unipende mimi, kaa na tulia kimya na ukajifunze. Damu yako hiyo iliyopata ubaridi ifanye itiririke ndani ya mishipa yangu ili kupoza Damu yangu inayowaka moto sana. ‘Kindendemizi’ chako hicho acha kiingie ndani ya viungo vyangu ili wewe ukiisha kugeuka kuwa ni Mimi, upate nguvu tena na uwezo na joto tena hata uweze kushiriki Mateso yangu, na upate nguvu ya kuwa nami, na nguvu ya kunishuhudia nikiteswa sana: hiyo itakuwa ndiyo namna yako bora ya kunitetea mimi. Uwe mwaminifu kwangu na ukeshe nami”.

Ee Pendo Langu Tamu, ukatili wa adui zako ni mkubwa hivi na jinsi ya kinyama hivi hata siwezi tena kupata usingizi. Kilio na kulalama kwako vinazidi kuwa vikali zaidi; ninasikia sauti za minyororo ikigongagonga, ni ile minyororo waliyokufungia, na imekubana sana hivi hata inasababisha Damu hai itoke katika viwiko vyako, na Damu hiyo hudondoka katika njia zote unamopita. Kumbuka kuwa damu yangu ipo ndani ya Damu yako, na Wewe kila unapodondosha, damu yangu inabusu Damu yako,

inaiabudu Damu yako na inalipa fidia kwa Damu yako. Damu yako iwe nuru kwa wale wote ambao wanakukosea wakati wa usiku na Damu ikawe sumaku itakayovuta mioyo yote ikujie Wewe.

Ewe Pendo Langu na Hazina Yangu, pindi wanapokuburuza na kukusukuma, hewa yote imechafuka kwa makelele na miruzi. Na ndivyo sasa unafika mbele ya Kaifa. Upo katika hali ya upole kabisa, utulivu na unyenyekevu; wema na upole wako kama vile pia uvumilivu wako huo unawashitua na kuwatisha hata adui zako wenyewe; na Kaifa, aliyejaa hasira na chuki, angetamani akutafune na kukumaliza. Ona ni jinsi gani wema unavyokinza kabisa na dhambi!

Pendo Langu, unasimama mbele ya Kaifa kama mkosefu mkuu kupita wote ukingojea kuhukumiwa. Kaifa ameanza kuwahoji mashahidi juu ya makosa yako. Ah, kumbe kwa kweli ilitakiwa awahoji ni lipi lilikuwa ndilo pendo lako! Na ona jinsi wanavyogongana na kupingana: huyu anatoa shitaka hili, yule anatoa lingine kabisa wakigongana, kubishana na kupingana kati yao. Na wakati wanapokushitaki maaskari walio kando yako wanavuta nywele zako, wanakuchapa makofi usoni mwako hata mwangwi wake unasikika kujaza ukumbi wote. Wanakufinya na kukuvuta midomo yako, wanakupigapiga na Wewe unanyamaza tu na unateseka. Na kama unainua Macho na kuwatazama, nuru ya Macho yako inaingia ndani ya mioyo yao, nao kwa kushindwa kuivumilia nuru hiyo wanakutoroka na kukuacha. Lakini hata hivyo wanaingia maaskari wakatili wengine wapya kuja kukufanyia dhihaka zaidi na kukudhalilisha zaidi.

Kukana Kwa Petro

Katika mashitaka hayo yote na katika kipigo hicho, ninakuangalia na kukuona unaelekeza sikio lako kwao, Moyo Wako unapiga kwa nguvu kabisa hata unakaribia kupasuka kwa maumivu. Hebu niambie Ewe Chema Changu, kuna nini tena zaidi na kipya? Kwani ninaona kuwa kwa kile wanachokutendea adui zako, Pendo lako linazidi kuwa kubwa kabisa hata unalingojea Teso lako kwa hamu zaidi na unalitolea kwa ajili ya wokovu wetu. Na Moyo Wako, kwa utulivu mkubwa wote, unalipa fidia kwa mazingizio, uonevu, chuki, ushahidi wa uwongo, maovu yanayotendeka waziwazi kimkakati dhidi ya watu wasio na hatia. Moyo Wako unatoa fidia pia kwa makosa yale ya kuchochea viongozi na kwa makosa ya viongozi wa Kanisa.

Nami nikiwa nimeungana nawe napenda kufuata zoezi hilo hilo la kulipa fidia. Ndani yako naona kuna badiliko, kwani umepata Teso lingine jipya ambalo halikutokea kuwepo kabla ya hapo. Niambie kuna nini? Niambie tu! Unifanye mshiriki wako katika kila kitu, Ee Yesu.

“Binti, unataka ulijue na hilo? Ninasikia kabisa sauti ya Petro anayesema kuwa hanijui mimi, kishapo ameapa, na akaapa tena na akajiapiza kuwa hanijui mimi.

Ewe Petro, kuna nini! Hunifahamu mimi? Je hukumbuki ni mema mangapi niliyokutendea? Ah, iwapo wengine wananiua kwa maumivu, wewe unaniua kwa Teso! Ah, umenitesa jinsi gani kwa tendo lako la kunifuata kwa mbali na kwa siri; halafu katika nafasi fulani fulani umejitokeza”.

Chema Changu Uliye kanwa, ni jinsi gani unayaonja mara moja makosa ya wapendwa wako! Ee Yesu, nataka mapigo yangu ya moyo yatiririke ndani ya mapigo yako ili kunogesha hilo pigo kali linalokutesa. Hilo pigo la moyo wangu litoe kiapo cha uaminifu, kiapo cha upendo na lirudie na kuapa tena mara elfu na elfu kuwa linakufahamu. Hata hivyo, Moyo Wako hautulii bado. Unatafuta na kutaka kumwona Petro. Anapona Macho yako ya upendo, yaliyojaa machozi yaliyosababishwa na ukano wake, Petro analegea, anaona aibu, analia na anatoweka. Na Wewe, baada ya kumwoko, unatulia moyoni na unalipa fidia kwa makosa ya Mapapa na ya wakubwa wa Kanisa na hasa yale yanayojitokeza katika nafasi fulani fulani za pekee.

Kishapo, adui zako wanaendelea kukushitaki, na Kaifa anapona kuwa hujibu lolote la mashitaka yao, anakuambia: “Nakuapisha mbele ya Mungu aliye hai, hebu niambie: Je Wewe ni kweli Mwana wa Mungu?”.

Na Wewe Pendo Langu, uliye daima na neno la ukweli juu ya Mdomo wako, huku ukijiweka katika hadhi na hali ya mtu mwenye mamlaka ya juu kabisa unamjibu kwa sauti nzuri na laini: “Wewe ndiye unayesema. Ndiyo Mimi ni kweli Mwana wa Mungu na siku moja nitashuka katika mawingu ya juu kuja kuhukumu mataifa yote”. Wanaposikia maneno yako hayo ya uumbaji watu wote wananyamaza; wote wanaanza kuhofu na kuogopa. Lakini Kaifa, baada ya kutishika kwa kitambo tu, anasisimka tena akiwaka hasira kali zaidi ya mnyama pori na anatamka kwa watu wote: “Je twahitaji ushahidi zaidi ya hapo? Amekwisha kusema kufuru kubwa kabisa! Tungoje nini zaidi hata tumhukumu kufa? Hilo tayari ni kosa la jinai la kifo! Na hapo, ili kuwasha moto zaidi ya maneno yake, Kaifa anachana mavazi yake kwa hasira na chuki kiasi kwamba watu wote kwa pamoja wanalipa kisasi juu yako Wewe Chema Changu. Yuko anayekupiga ngumi usoni, yule anayevuta nywele zako, yuko anayekupiga makofi, yule anayekutemea mate usoni, yule anayekupiga mateke na kukukanyaga kwa miguu yake: Na madhulumu na Mateso wanayokutendea ni mengi hivi na ya aina zote hata yanasababisha dunia na mbingu zitetemeke!

Pendo Langu na Uhai Wangu, kama jinsi hawa wanavyokutesa Wewe, ndivyo na moyo wangu mnyonge unatobolewa na kuchubuka kwa mateso. Ah, hebu uniruhusu nitoke nje ya Moyo Wako Mteseka, ili mimi niyakabili Mateso hayo yote badala yako. Ah, kama ingewezekana, ningependa nikutoroshe toka mikononi mwa adui zako, lakini kumbe Wewe hutaki hilo, kwani hayo yote yanatakiwa kwa ajili ya wokovu wa watu wote. Mimi napasika kukubali na kulipokea.

Lakini, Pendo Langu Tamu, basi uniache nikuweke sawa kidogo, nirekebishe nywele zako, nikupanguse hayo mate waliyokutemea, nikuoshe kidogo angalau Damu hiyo na hatimaye nijifungilie ndani ya Moyo Wako kwani namwona Kaifa, akiwa amechoka, anataka kurudi nyumbani kwake na hivyo anakukabidhi Wewe mikononi mwa maaskari.

Kwa hiyo basi, ninakubariki, na Wewe unibariki na unibusu kwa Pendo lako; nami sasa najifungilia ndani ya jokovu la Moyo Wako Mtukufu ili nipate kulala. Naweka mdomo wangu juu ya Moyo Wako ili wakati ninapopumua, mdomo wangu uwe unakubusu ili unaposikia mapigo ya Moyo Wako

yanavyobadilika katika Mateso yako yanayoongezeka au kupunguka, mdomo wangu huu utaweza kugundua kama Wewe unapata maumivu au unapata unafuu kidogo. Hatimaye basi, kwa kunyosha na kupanua mikono yangu sasa, ninakuinga na kukutetea, ninakukumbatia, ninajibana kwenye Moyo Wako, na hivyo naanza kulala.



TAFAKARI NA ZOEZI

Yesu alipofikishwa mbele ya Kaifa anashitakiwa bila haki na anatendewa Mateso yasiyowahi kusikika. Kila alipoulizwa Yeye alisema daima ukweli. Na sisi je, pale ambapo Bwana anaruhusu watu watusingizie mabaya na kutuonea au kutushitaki bila haki, huwa tunamtafuta Mungu peke yake anayejua uadilifu wetu au huwa tunaomboleza tupate heshima na hadhi na utetezi wa watu? Je penye mdomo wetu hutoka daima ukweli? Je sisi huwa tunapinga na kupigana dhidi ya kila aina ya umbea na uwongo? Je huwa tunavumilia kwa saburi kila aina ya vurugu na fujo wanazotutendea watu? Je tunakuwa hiari na tayari kutoa uhai wetu kwa ajili ya wokovu wao?

Oh, Yesu Wangu Mtamu, ni jinsi gani mimi nilivyo tofauti na Wewe! La! Ufanyize kwamba mdomo wangu uwe unasema daima ukweli hata kuweza kuchoma na kuumiza moyo wa yule anayenisikiliza ili hatimaye niwaongoze wote kwako.

(Sala ya Kushukuru.

Tazama Uk 2)

SAA YA KUMI NA MBILI

(Kuanzia Saa Kumi Hadi Saa Kumi na Moja Asubuhi)

Yesu Akiwa Kati ya Maaskari

(Sala ya Kujiandaa.

Tazama Uk 1)

Uhai Wangu Mtamu, Yesu, pindi nilipolala nimejinyosha juu ya Moyo Wako, mara kwa mara nilikuwa naonja ninachomwa na miiba ile inayochoma na kutoboa Moyo Wako Mtukufu. Ninapotamani kuamka ili Wewe umpate angalau mtu mmoja tu anayekesha na kuonja mumivu yako yote na anayekuonea huruma na kuteswa pamoja nawe, mimi najisogeza na kujibana kabisa kwenye Moyo Wako na hivyo naweza kusikia hai kabisa michomo ya miiba na matobo unayopata. Hapo ninashituka na ninaamka. Nini hiki ninachokiona? Nini hicho ninachokisikia? Natamani nikufiche ndani ya moyo wangu ili mimi ndiye nijitokeze na kujitoa badala yako kupata maumivu na mapigo hayo makali, matusi hayo, madhalilisho hayo yasiyosemekana. Lakini kumbe ni Pendo lako tu lililoweza kuyavumilia mapigo hayo yote. Yesu Wangu Mvumilivu Kabisa, je ni kitu ulichoweza kutegemea kupata toka kwa watu wakatili namna hiyo?

Naona tayari wanaanza sasa kukudhihaki. Wanakutemea mate mengi hata kufunika Uso wako wote hata mwanga wa yale Macho yako mazuri umezibwa na mate. Na Wewe ukimwaga mito ya machozi kwa ajili ya wokovu wetu, kwayo unasafishia mbali yale mate toka machoni mwako. Na hao adui zako, kwa kuwa mioyo yao haina tena uwezo wa kuona mwanga wa macho yako, kwa mara nyingine tena wanarudia kukutemea mate yanayoziba Macho yako tena.

Wengine kati ya adui zako, wakijidai kuwa hodari zaidi katika uovu, wanafungua kwa lazima Mdomo wako, na wanatemea humo makohozi yao yanayonuka, ambayo yanawaletea na wao wenyewe kichefuchefu. Kwa vile mate hayo yanapoteremka na kudondoka huacha alama zikionekana wazi sehemu za Uso Wako, hapo huonekana mara nyingine utukufu wa Uso Wako na uzuri wake wa kupendeza upitao ubinadamu wote. Hapo adui zako wanafadhaika na kupata aibu kweli juu ya matendo yao wenyewe. Na kwa vile wanataka kutekeleza ukatili wao kwa uhuru zaidi, wanachukua kitambaa kichafu kabisa na kufunga Macho yako, na ndivyo wanamwaga hasira zao zote juu ya Mwili Wako mtukufu mwabudiwa. Ndipo sasa wanaongeza ukatili na kuendelea kukupiga bila huruma, wanakusukuma na kukuvuta, wanakuangusha chini miguuni, wanakukanyaga, wanarudia kukupiga kwa ngumi na makofi usoni na kichwani, wanakuburuza ardhini kwa kuvuta nywele zako na hivyo wanakuyumbisha na kukutupa huko na kule!

Yesu Pendo Langu, moyo wangu hauwezi kuvumilia ninapoyashuhudia hayo Mateso yako! Wewe unataka niyashuhudie hayo yote lakini mimi natamani nifunike macho yangu yasione matukio hayo ya Mateso makali yanayorarua moyo kutoka kifua chochote. Lakini kwa sababu ya kukupenda Wewe,

ninajilazimisha kuendelea kutazama kile kinachotokea kwako. Nikikutazama naona hupumui tena kwa nguvu, husemi neno lolote la kujitetea. Upo umeshikiliwa mikononi mwa maaskari hawa kama vile kiraka kichafu wanachoweza kukitendea chochote watakacho. Ninapowaona wakikurukia, napata kuogopa kuwa utakufa chini ya miguu yao.

Chema Changu na Chote Changu, mimi inaniuma mno kutokana na Mateso yako hayo. Natamani nilie kwa sauti kabisa hata nisikike Mbinguni nikimwita Baba, Roho Mtakatifu na Malaika wote na nisikike hapa duniani toka kila kona nikimwita kwanza Mama Mtamu na kisha nikiziita roho zote wanaokupenda. Nataka tuunde duara la wigo kukuzunguka Wewe ili kuwazuia hawa maaskari wadhalimu wasikukaribie kuja kukutusi na kukutesa zaidi. Na pamoja nawe tunataka tulipe fidia kwa dhambi zile zote za usiku hasa zile zinazotendwa na vikundi vya dini za shetani na Freemasoni, dhambi dhidi ya uwepo wako wa kisakramenti na kwa makosa ya roho zote zinazovunja uaminifu wao wanapoingia katika giza la majaribu ya kiroho.

Chema Changu Mdharaulika, tazama naona bado, maaskari wakiwa wamechoka na wamelewa wanataka wapumzike. Na moyo wangu masikini na mnyonge, ukiwa umeelemewa na kuchubuliwa kwa maumivu yako mengi, hautaki ubaki peke yake kukesha na Wewe, bali unatamani usindikizwe na wengine.

Oh, Mama yangu Mtamu, uwe wewe mwenzi wangu asiyeweza kujitenga nami. Kwa pamoja tumkumbatie Yesu ili kumfariji. Ee Yesu, nikiwa pamoja na Mama ninakubusu, ninakubariki. Na nikiwa naye nitalala sasa usingizi wa upendo juu ya Moyo Wako mwabudiwa.



TAFAKARI NA ZOEZI

Katika saa hii Yesu yupo kati ya maaskari akiwa na Moyo mtulivu usiohangaika na mwenye msimamo imara. Wakati Yeye ni Mungu, anatendewa madharau yale yote wanayomfanyia maaskari. Yeye anawatazama kwa upendo wote, hata yaelekea anawaalika waendele kumtesa zaidi.

Na sisi, tunapopata mateso yanayorudia mara kwa mara, je huwa tunakuwa imara na wavumilivu? Au huwa tunalalamika? Huwa tunachoka kuvumilia? Huwa tunapoteza amani na utulivu? Ile amani na utulivu wa roho ambavyo ni vya lazima ili kumwezesha Yesu apate makao mazuri ndani yetu?

Utulivu na msimamo thabiti ni ile fadhila inayotufanya tutambue na kujua fika kuwa Mungu anatawala kweli ndani yetu. Tukiwa na fadhila hiyo kweli kweli tutakuwa daima imara wakati wa majaribu, kila wakati, na siyo katika vipindi fulani fulani tu, na imara yetu itakuwa ni ya kiwango sawa na kile kile. Ni msimamo thabiti huo tu unaoweza kutupatia amani moyoni. Kwa jinsi tunavyozidi kujipatia msimamo thabiti katika mambo mema, katika mateso, na katika matendo, ndivyo tunavyofikia kuweza kupanua uwanja unaotuzunguka ambamo Yesu atazidi kumwaga na kujaza neema zake. Endapo sisi tunakosa fadhila ya msimamo thabiti, uwanja wetu utakuwa mdogo kiasi kwamba Yesu atajimudu kujipanua kidogo sana au hatajipanua kamwe. Lakini iwapo tutakuwa na msimamo thabiti na tukidumu katika fadhila hiyo, Yesu anapouona huo uwanja mpana sana, atajikuta anapata kuungwa mkono na sisi na atajikuta anasaidiwa na kutegemezwa nasi. Atajikuta anapata mahali pa kusambaza neema zake.

Iwapo tunataka Mpenzi Wetu Yesu apumzike ndani yetu, basi tumjengee uzio wa msimamo thabiti sawa na ule aliokuwa nao Yeye wakati alipotekeleza wokovu wa roho zetu. Kama atakuwa amelindwa na kukingwa kwa njia hiyo, Yeye atabaki katika pumziko tamu ndani ya moyo wetu.

Yesu alikuwa anawaangalia wadhulumu wake kwa upendo. Na sisi je huwa tunawatazama wakoaji wetu kwa upendo sawa na huo? Na kama tunawaonyesha upendo, je upendo wetu huo ni mkubwa kutosha hata ukawa ni sauti yenye nguvu ya kuweza kuvuta mioyo yao ikamwongokea Yesu?

Yesu Wangu, Pendo Lisilo na Kikomo, unijalie nami pendo hilo na fanyiza kila Teso liweze kuita roho zije kwako.

(Sala ya Kushukuru.

Tazama Uk 2)

SAA YA KUMI NA TATU

(Kuanzi Saa Kumi na Moja Hadi Saa Kumi na Mbili Asubuhi)

Yesu Katika Mahabusu

(Sala ya Kujiandaa.

Tazama Uk 1)

Mfungwa Wangu Yesu, mimi nimeamka, lakini mbona sikuoni? Moyo wangu unanigongagonga kwa nguvu, mahangaiko makali ya upendo. Niambie upo wapi? Malaika wangu nichukue kanipeleke nyumbani kwa Kaifa. Hata hivyo nazunguka na kuzunguka tena, nakutafuta popote na wala sikuoni. Pendo Langu, haraka, kwa mikono yako ondoa hii minyororo uliyofungia moyo wangu kwa Moyo Wako, nivute mimi nje kwako ili niweze kuruka na kujitupa ndani ya mikono yako. Na Wewe, Pendo Langu, ukiwa umechomwa na sauti ya kilio changu, na kwa vile unataka niambatane na kukesha nawe, tayari unanivutia kwako, na hivyo naona kumbe wamekutia katika mahabusu. Moyo wangu, ingawa kama unashangilia kwa furaha kukuona, papo hapo unachomwa kwa huzuni kuona hali yako ya unyonge na Mateso iliyokupata, mbaya kuliko ya awali. Nakuona wamekufunga Mikono mgongoni, umefungwa kwenye nguzo, Miguu yako imefungwa na kubanwa pamoja. Uso wako mtukufu umechubuliwa na umevimbavimba na unachuruzika madamu kutokana na kipigo cha kikatili ulichopata; Macho yako matukufu nayo yamevimba, Mboni ya jicho lako imechoka na imelegea kabisa sababu ya kukosa usingizi, nywele zako zote zimevurugika, Mwili wako mtukufu wote umepigika na kukanyagwa, na mbaya zaidi, huwezi kabisa kujisaidia wala kujisafisha kwani umefungwa minyororo. Na mimi hapa ee Yesu Wangu, nikikoroma kwa kilio, nikikumbatia miguu yako, ninakuambia: “Ah, ona jinsi ulivyokwisha, Ee Yesu!”.

Na Yesu ananitazama na kunijibu: “Njoo ewe Binti yangu, endelea kuangalia na kuona kila kitu kinachofanywa na mimi na kinachotokea kwangu! Na wewe pia ufanye hivyo hivyo pamoja nami ili uweze kuendeleza Uhai wangu ndani yako.”

Na tazama basi, kwa mshangao wangu naona kuwa Wewe, badala ya kufadhaikia maumivu yako, Wewe kwa upendo usioelezeka unafikiria tu kumtukuza Baba, kwa kurudia kumtendea kile ambacho sisi tulipasika kumfanyia. Unaita roho zote zije kukuzunguka kusudi Wewe utwae uovu wao wote na kuubeba, na badala yake uwagawie wao mema yote. Kwa vile kunakaribia kupambazuka, nasikia sauti yako nzuri ikisema:

“Baba Mtakatifu, ninakutolea Wewe shukrani zangu kwa yale yote niliyoteswa na kwa yale nitakayopata kuteswa bado. Kama vile alfajiri hii inavyoita siku mpya, na siku inavyoliita jua lichomoze, ndivyo pambazuko la neema lichomoze ndani ya mioyo yote, na inapojitokeza siku, Mimi niliye ni Jua la Mungu, niweze kupambazuka ndani ya mioyo yote na niweze kuitawala mioyo hiyo yote. Je Baba, unazona roho hizi? Na Mimi natamani niwe wakili wao na kuwajibia mbele yako kwa

kila kitu: mawazo yao, maneno yao, kazi zao, hatua zao. Nataka niwawakilishe kwa gharama ya Damu yangu na kifo changu”.

Yesu Wangu, Pendo Lisilokoma, nami naungana nawe na ninataka kukushukuru kwa mateso yote na namna zote uliponifanya niteswe na kwa yale mateso nitakayoyapata bado. Nakuomba ufanye jua la neema lipambazuke ndani ya mioyo yote ili Wewe Jua la Mungu uweze kupambazuka ndani ya mioyo yote na utawale juu ya yote.

Yesu Wangu Mtamu, natambua bado kuwa unarekebisha bado mawazo yote ya awali, upenzi wa awali, na maneno ya awali ambayo mwanzoni mwa siku hayakukabidhiwa kwako kwa ajili ya kukuheshimu. Pia unaita tena na tena ndani yako, kama mahali pake pa kufikia, mawazo, upenzi na maneno ya viumbe ili urekebishe hayo yote na ili utoe heshima kwa Baba, heshima ile ambayo alitakiwa aipate toka kwa viumbe.

Yesu Wangu, Mwalimu Wangu Mtukufu, kwa vile hapa katika seli ya mahabusu yako tuko peke yetu na tupo huru kabisa kwa saa moja, natamani na mimi nitende siyo tu kile unachotenda wewe bali nitumie nafasi hii kukusafisha, kurekebisha hali ya nywele zako, na kujiyeyusha nafsi yangu ndani yako. Basi sasa najisogeza kwenye Kichwa chako kitukufu, nachanua nywele zako na kuziweka sawa. Nataka nirekebishe akili za wale wengi ambao kichwani wamevurugika na wamejaa matope, na hivyo hawana wazo lolote juu yako. Na mimi ninapojiyeyusha ndani ya akili yako, natamani nikusanye mawazo yote ya viumbe na kuyaunganisha ndani yako, kuyayeyusha ndani ya mawazo yako. Kwa njia hiyo nifanikiwe kupata marekebisho ya kutosha juu ya mawazo mabovu, na nilipe fidia kwa nuru yote na uangazo wote uliozibwa na kuzuilika na ubaya wa viumbe. Natamani niunganishe mawazo yote ili yaunde wazo moja tu pamoja na mawazo yako. Hayo yatakuwa ni marekebisho ya kweli na yatakupatia utukufu ulio timilifu.

Yesu Wangu Mteseka, nabusu Macho yako yaliyoharibika na yaliyojaa machozi. Kwa vile Mikono yako imefungiliwa kwenye nguzo, huwezi kamwe kukausha Macho hayo. Na wala huwezi kupangusa na kusafisha mate waliyokutemea kuchafua Uso na Macho haya. Na kwa vile wamekufunga kikatili kabisa huku ukiwa umesimama, huwezi hata kufunga macho yako ili usinzie kidogo. Pendo Langu, ni jinsi gani ningependa niwe kitanda chako hapa ndani ya mikono yangu ili upate pumziko kidogo; na napenda nikaushe macho yako ili nikuombe radhi na kukulipa fidia kwa kila nafasi ile ambapo tulikosa kukufurahisha au kukuridhisha au kukutazama ili kutambua kile ulichotaka tufanye, na kutambua kule ulikotaka tuelekee. Natamani niyeyushe macho yangu na yale ya viumbe vyote katika Macho yako ili kwa njia ya Macho yako hayo tulipe fidia kwa maovu yote tuliyotenda kupitia makosa ya macho yetu.

Yesu Wangu Mwenye Huruma na Upendo, ninayabusu sasa Masikio yako matakatifu sana yaliyochoka kabisa kutokana na matusi ya usiku kucha, na zaidi pia kutokana na mwangwi wa makosa yote ya viumbe yanayosikika yakigonga kwenye Masikio Yako. Nakuomba msamaha na fidia kwa nafasi zile zote ambapo ulituita, na sisi lakini tukawa viziwi au tulijisingizia kutosikia kitu toka kwako. Wewe lakini Chema Changu Uliyechoka, umeendelea kurudia kutuita tena na tena. Yote yakawa ni bure.

Natamani niyeyushe masikio yangu na ya viumbe vyote ndani ya Masikio yako ili nifanye urekebisho kamili na endelevu.

Mpenzi Yesu Wangu, nibusu sasa Uso wako mtakatifu, Uso uliovimbavimba kutokana na makofi. Nakuomba radhi sana na ninaomba fidia kwa mara zote zile ambapo Wewe ulituita tuwe wahanga wako kwa kulipa fidia, na sisi lakini tuliungana na kushirikiana na adui zako tukakuchapa makofi na kukutemea mate. Yesu Wangu, nataka kuyeyusha uso wangu ndani ya Uso wako ili nikurejeshee ule uzuri wa Uso wako wa tangu kuzaliwa, na ili nifanye marekebisho timilifu juu ya makosa yote ya udhalilishaji yanayofanywa juu ya Utukufu wako wa kimungu.

Chema Changu Uliychukizwa sana, nabusu Mdomo wako uliopata Mateso ya kichapo kibaya na uliokaukiwa upendo. Nataka kuyeyusha ulimi wangu na ndimi za viumbe vyote ndani ya Ulimi wako, ili kwa njia ya huo Ulimi wako wenyewe nilipe fidia kwa dhambi zote na mazungumzo machafu tunayofanya. Ee Yesu uliyekaukiwa na kiu nataka niunganishe sauti zote ziwe sauti moja ndani ya Sauti yako, ili wakati wanapotaka kukutukana, Sauti yako iingie mara ndani ya sauti ya viumbe na kuzima mara moja sauti ya dhambi na igeuze sauti za viumbe kuwa sauti za sifa na upendo.

Yesu uliye ndani ya minyororo, nabusu Shingo yako inayoelemewa na minyororo mizito na kamba zilizofungwa shingoni, zinateremka kifuani na zinafika hadi nyuma ya Mabega yako na halafu zinateremka na kuzunguka Mikono yako na hatimaye zinakubana na kukufunga kwa nguvu sana sana kwenye nguzo. Tayari Mikono yako imevimba na imechubuka kutokana na kubanwa na kamba hizo na tayari Damu inatoka katika sehemu kadhaa zinazominywa na kamba hizo. Yesu Wangu, uliyefungwa kwa minyororo na kamba, uniruhusu mimi nikufungulie. Na kama Wewe unapenda kubaki umefungwa, basi uniruhusu mimi nikufunge kwa minyororo ya upendo ambayo kwa vile ina utamu, hiyo itakunogesha badala ya kukuletea maumivu. Na pindi ninapokufungulia nataka nijiyeyushie ndani ya Shingo yako ili mradi pamoja Nawe niweze kurekebisha maelekeo yetu na vifungo vyetu vyote vibaya na badala yake niweze kuwapatia watu minyororo ya Pendo lako.

Natamani nijiyeyushie ndani ya Kifua chako kusudi niweze kulipa fidia kwa makosa na hali ya ubaridi wa watu. Badala yake nataka kujaza kila kifua cha viumbe vyote kwa huo moto wako, ninaouona kuwa ni mwingi na mkali, hata unashindwa kuuzuia usitoke. Nataka nijiyeyushe ndani ya Mabega yako ili kulipa fidia kwa matamania yote haramu na kwa makosa ya kupendelea maisha ya raha. Napenda niwapatie watu wote roho ya sadaka na pendo la kukubalia na kupokea mateso. Napenda nijiyeyushie ndani ya Mikono yako ili kulipa fidia kwa matendo yote maovu na kwa yale matendo mema ambayo niliyatekeleza vibaya na kwa majigambo. Badala yake nataka nipeleke kwa wote hiyo harufu nzuri ya manukato ya matendo yako. Ninapojiyeyushia katika Miguu yako, napenda kufungilia ndani yake hatua zote za viumbe ili kuwalipia fidia na ili kuwapatia wote hatua zako Wewe ili kuwawezesha watembee kitakatifu.

Na sasa, Uhai Wangu Mtamu, uniruhusu nijiyeyushie mimi mwenyewe ndani ya Moyo Wako na ndipo nifungilie humo kila aina ya upenzi, mapigo yote ya moyo na matamania yote, ili pamoja Nawe,

niweze kuyarekebisha na kishapo niwapatie wote upenzi wako, mapigo yako, na matamano yako ili hata moja wao asiweze kukukosea tena.

Pia tazama masikioni mwangu nasikia mkerezo wa funguo mlangoni, yaani adui zako ndiyo wanakuja kukutoa katika mahabusu. Yesu, mimi natetemeka, mimi naingiliwa na ubaridi moyoni. Yaani Wewe utaingia tena mikononi mwa adui zako! Kitakupata kitu gani sasa?

Yaelekea ninasikia pia mikerezo ya funguo za tabernakulo mbalimbali. Ni mikono mingapi ya makufuru inayojongea kufungua tabernakulo hizo! Tena wanakulazimisha utoke na ukaingie katika mioyo inayokufuru! Ni katika mikono mingi mingapi isiyostahili unalazimika kushikwa na kutua? Yesu Mfungwa Wangu, natamani niwepo na mimi katika mahabusu yako yote ya Moyo Wako ili niwe shuhuda katika nafasi zote ambapo wahudumu wako wanapokufungulia toka gereza lako na ili mimi nikeshe pamoja nawe na kukusindikiza kwa lengo la kulipa fidia kwa kila kosa wanaloweza kukutendea.

Nawaona adui zako wale wanakukaribia, na wewe unapoliona jua linalopambazuka, unalifurahia na kulisalimu; hii ni siku ya mwisho. Wao wanapokufungulia wanakuona una Uso uliotulia kabisa na wenye Utukufu, na unawatazama kwa upendo kabisa. Wao lakini wanakulipa kwa kukuchapa makofi usoni, makofi ya nguvu sana hata uso wako unakuwa mwekundu kwa Damu yako tukufu.

Pendo langu, kabla hujatoka hapa mahabusu, nakuomba unibariki ili nipate nguvu za kuendelea kukufuata katika Mateso yako yote yaliyobaki.



TAFAKARI NA ZOEZI

Yesu akiwa gerezani, amefungwa na kubanwa kwenye nguzo na wala hawezi kujimudu kabisa. Anachafuliwa kwa mate na madongo. Anatafuta roho yetu ili iweze kukesha pamoja naye. Je na sisi kwa upande wetu tunaridhika kubaki pekee yetu pamoja na Yesu au huwa tunatafuta kukesha na kusindikizwa na viumbe? Je ni kweli kwamba pumzi yetu ya pekee na pigo letu la pekee la moyo wetu ni Yesu tu?

Yesu Mpenzi Wetu, anapotaka tufanane naye huwa anazifunga roho zetu kwa kamba za ukavu, mashambulizi mbalimbali, kwa maumivu na mateso na kwa matatizo mengi mengine. Je na sisi huwa tunakubali na kuridhika Yesu atufunge katika gereza hilo ambamo tunaingizwa na Pendo lake? Yaani tunaridhika na gereza la giza na uonevu na mengineyo? Yesu yupo ndani ya gereza. Je sisi tunayo nguvu ndani yetu na uhiari wa kujipeleka wenyewe na kujifungilia ndani ya Yesu kwa ajili ya kumpenda?

Yesu aliyenyanyaswa alikuwa anatamani sana na kutazamia daima roho yetu iende kumfungulia minyororo na ije kumuimarisha katika hali yake ya Mateso aliyokuwa nayo. Je na sisi huwa tunamtafuta na kumtarajia Yesu tu aje kukesha nasi na aje kutufungulia minyororo ya tamaa mbalimbali ili hatimaye atufungilie ndani ya Moyo Wake kwa minyororo yake yenye nguvu zaidi? Je huwa tunachukua maumivu yetu na kuyazungusha nje ya Mwili wa Yesu mteseka ili kumkinga na mate wanayomtemea na madongo wanayomtupia wadhambi mbalimbali? Yesu, pale gerezani, anasali. Je sala yetu sisi ni endelevu na imeunganika na Yesu daima?

Yesu uliyefungwa minyororo, Wewe ulikubali kuwekwa mahabusu kwa ajili ya kunipenda mimi, nami leo nakuomba, ufungilie akili yangu ndani yako, fungilia ulimi wangu, moyo wangu, na nafsi yangu yote hata nisiwe tena na uhuru wowote, ila badala yake Wewe unimiliki mimi kikamilifu kabisa.

(Sala ya Kushukuru.

Tazama Uk 2)

SAA YA KUMI NA NNE

(Kuanzia Saa Kumi na Mbili Hadi Saa Moja Asubuhi)

Yesu Mbele ya Kaifa Kwa Mara Nyingine Na Kishapo Anapelekwa kwa Pilato

(Sala ya Kujiandaa.

Tazama Uk 1)

Yesu Wangu Mwenye Mateso na Uchungu, tayari wamekutoa nje ya mahabusu, umechoka na kudhoofu mno hata unayumba na kupepesuka katika kila hatua. Natamani nije kando yako, ili nikutegemeze kila ninapooa unaelekea kudondoka.

Naona maaskari wanakupeleka kwa Kaifa, na Wewe, Ee Yesu Wangu, unajitokeza kati yao kama jua, na ingawa umbo lako limeharibika, hata hivyo unasambaza mwanga wako kila mahali. Ona Kaifa anafurahia tayari kukukejeli anapokuona umedhoofika kiasi hicho. Akiwa amemulikwa na nuru yako anapata kupofuka vibaya sana rohoni mwake na katika hasira yake anakuja tena kukuhoji: “Hivi Wewe ulivyo hivi ndiyo ni kweli Mwana wa Mungu?”

Na Wewe, Pendo Langu, katika Utukufu Mkuu, kwa Neema ya kauli yako, na kama kawaida yako ya kusisitiza kwa upole na kwa nguvu yako ya kuvuta mioyo, unamjibu ukisema: “Ndiyo, Mimi ni kweli Mwana wa Mungu”.

Na hapo, adui zako, hata kama moyoni mwao wanaguswa na nguvu yote ya neno lako, wao wanaziba masikio yote na kugoma kabisa kusikia chochote zaidi. Kwa kauli yao ya pamoja wanapiga kelele: “Ni jinai la kifo, ni jinai la kifo”.

Kaifa anathibitisha hukumu ya kifo na anaagiza wakupeleke kwa Pilato. Na Wewe, Yesu Wangu Mhukumiwa, unaipokea hukumu hiyo kwa upendo mkubwa na kwa utulivu. Ungependa kurarua hukumu hiyo toka kwa huyu Kuhani mkuu mbaya, na badala yake kulipa fidia kwa dhambi zote zinazotendeka kwa utashi kamili, na kwa nia chafu kabisa, na pia kulipa fidia kwa ajili ya watu wale ambao, badala ya kuumizwa na kusikitishwa na uovu, wao hufurahia na kushangilia dhambi hizo na hivyo wanaingia katika giza la upofu na kupinga na kuziba kila nuru na kila neema inayowajia. Ewe Uhai Wangu, fidia unayotoa na sala zako zinagonga hadi moyoni mwangu na kwa hiyo hata mimi nalipa fidia na kusali pamoja nawe.

Pendo Langu Tamu, nawaona maaskari wakatili na waovu, bila adabu na heshima kabisa kwako, kishajua kuwa umehukumiwa kufa, wanakuchukua, wanaongeza minyororo na kamba, na kukufunga

na kukukaba zaidi hata huwezi kujimudu kwa lolote katika mwili wako wote. Wanakusukuma, wanakuburuza, na kukutoa nje ya Ikulu ya Kaifa.

Makundi ya watu wanakungoja nje lakini siyo kwa ajili ya kukutetea. Nawe, Jua Langu Tukufu, unajitokeza mbele yao, kwani unataka kuwaangaza wote kwa nuru yako.

Na unapoanza kufanya hatua za kwanza tu, unapenda kuzifunga hatua zote za viumbe ndani ya hatua zako. Unasali na kulipa fidia kwa ajili ya wale wote wanaofanya hatua za kwanza katika kutenda mambo kwa malengo mabaya: wale wanaolenga kulipa kisasi, wale wanaopanga kuua, kusaliti, kuiba au maovu mengine. Oh! Ni kwa jinsi gani makosa haya yanaumiza Moyo Wako! Na ili uweze kuzuia maovu hayo yote, unasali, unalipa fidia na unajitoa sadaka Wewe Mwenyewe.

Lakini, pindi ninapokufuata, nakuona Wewe Jua Langu Yesu, unapoteremka tu toka kwenye Ikulu ya Kaifa, unamkuta Maria mzuri, Mama yetu mtamu. Macho yenu yanapogongana, yanaleta uchungu kwa kila mmoja wenu. Ingawa kama kwa kuonana hivyo ni faraja fulani kwenu, hata hivyo macho yenu yanaficha bado maumivu mapya: Kwako Yesu, unamwona Mama mzuri alivyochomwa moyo wake, amefadhaika mno, amedhoofu na amejaa simanzi za maombolezo. Na kwa Mama mpendwa, anapokutazama Wewe Jua Tukufu, anaona umegubikwa na kujaa madonda na uvimbe, unalia na umejaa Damu popote. Wala hamuwezi mkafurahia kwa kitambo kirefu hiyo fursa ya kutazamana. Zaidi, mna uchungu wa kutoweza kuzungumza hata neno. Ni mioyo yenu tu inayozungumza yote; na kwa vile mioyo yenu imeungana, mnaacha kutazamana zaidi kwa vile maaskari wanakusukuma Wewe. Na ndivyo, baada ya kupigwa mateke, kukanyagwa na kuburuzwa, unafikishwa mbele ya Pilato.

Yesu Wangu, nami najiunga na Mama aliyechomwa moyo kwa ajili ya kukufuata ili hatimaye nijiyeyushie ndani yako pamoja naye Mama. Na Wewe, unaponitazama mimi kwa Jicho lako la upendo, unanibariki.

TAFAKARI NA ZOEZI

Yesu anapojitokeza kwenye mwanga wa asubuhi, huku akifikishwa kwa Kaifa, akiwa na Moyo thabiti, anatoa kauli akithibitisha kuwa Yeye ni Mwana wa Mungu. Na sisi je, tunapotoka nje tunahiari kuongozwa na Yesu? Na je, mwenendo wetu huwa ni wa mfano mzuri kwa wengine? Na hatua zetu, je huwa ni sumaku inayowavuta na kuwaalika wengine kuja kwa Yesu? Maisha yote ya Yesu ni mwito na mwaliko endelevu wa roho za watu. Iwapo sisi tutaungana na kujilinganisha na Utashi wa Yesu basi: miguu yetu inapotembea inaita roho za watu, mapigo yetu ya moyo yanapokuwa ni mwangwi wa mapigo ya kimungu huunganika na kuoanishwa katika kuombea roho za watu. Na ndivyo inavyokuwa katika mambo yetu yote: Sisi, kadiri tunavyotenda chochote chema tunakuwa tukitengeneza ndani yetu Ubinadamu ule ule wa Yesu. Na kama ni hivyo, kila mwito mpya tunaotoa kwa roho za watu, wito huo unakuwa ni mhuri mpya tunaopata toka kwa Yesu wetu. Je Uhai wetu hubakia ule ule, ama la tunaubadilisha kuwa mbovu zaidi kadiri ya watu tunaokutana nao?

Yesu Wangu, Utakatifu usio kifani, uniongoze Wewe na fanyiza hata mwenendo wangu wa nje utangaze Uhai Wako wote wa kimungu.

(Sala ya Kushukuru.

Tazama Uk 2)



SAA YA KUMI NA TANO

(Kuanzia Saa Moja Hadi Saa Mbili Asubuhi)

Yesu Mbele ya Pilato na Anapelekwa kwa Herode

(Sala ya Kujiandaa.

Tazama Uk 1)

Chema Changu Uliyefungwa, adui zako, wakiungana na Makuhani wanakufikisha mbele ya Pilato. Wakijidai utakatifu na kujisingizia udini, wakitajia kula sikukuu ya pasaka, wao wanabaki nje kwenye uwanja. Na wewe, Pendo Langu, huku ukitambua kilindi cha uovu wao, unalipa fidia kwa unafiki wote wa watu wa dini. Nami nalipa pia fidia hiyo pamoja nawe.

Katika wakati ambapo Wewe unahangaikia nafuu yao, wao lakini wanaanza kukushitaki mbele ya Pilato huku wakitapika kila aina ya sumu waliyo nayo dhidi yako. Pilato, akionyesha kutoridhika na mashitaka wanayokutolea, huku akitaka akuhukumu kwa kufuata hoja, anakuita kando ili akuchunguze ukiwa peke yako, na hapo anakuhoji: “Wewe ni Mfalme wa Wayahudi?”

Na Wewe Yesu Mfalme Wangu wa Kweli, unajibu: “Ufalme wangu siyo wa dunia hii, vinginevyo maelfu ya majeshi ya Malaika wangekuwa wananitetea”. Na Pilato akiguswa sana na upole wako, na heshima na hadhi ya majibu yako, anakuambia: “Lakini je, Wewe ni Mfalme?”

Na Wewe unamjibu: “Wewe ndiye unayesema. Mimi ni Mfalme na nimekuja ulimwenguni kufundisha ukweli”. Pilato, bila kutaka kujua zaidi, akiamini kuwa huna hatia, anatoka nje uwanjani na kuwaambia: “Mimi sioni kosa lolote kwa mtu huyu”.

Wayahudi wanakasirika. Wanaanza kukushitaki mambo mengine mengi. Na Wewe unanyamaza tu na hakuna kujitetea. Unalipa fidia kwa ajili ya udhaifu wa mahakimu wakati wanapokuwa mbele ya watu wenye vyeo, na kwa makosa yao ya kutotenda haki. Pia unawaomba watu wote wasio na hatia, wanaoonea na wanaoachwa katika upweke bila msaada wowote. Na hapo Pilato, anapooni hasira ya adui zako, na kwa kutaka kukufanyia dhahira, anaagiza wakupeleke kwa Herode.

Yesu Mbele ya Herode

Ee Mfalme Wangu Mtukufu, natamani nirejee sala zako, na fidia zako, na pia nataka kufuatana nawe hadi kwa Herode. Nawaona adui zako, wakiwa wamecharuka, wangetaka kukumaliza. Wanakupeleka katika mazingira na hewa ya matusi, madharau, na udhalilishaji. Ndivyo wanakufikisha mbele ya Herode ambaye, anapokuona tu, anajivuna na kujigamba na kukuhoji maswali mbalimbali. Wewe humjibu lolote na wala humtazami kamwe. Na Herode, akiwa amekasirishwa kwa kukosa kupata jibu linaloridhisha utundu wake na matamanio yake, na akiwa amenyenyekeshwa sana na ukimya wako

mrefu, anachukua hatua ya kuwatangazia watu wote kuwa Wewe ni kichaa na huna akili, na kwa hiyo anaagiza wakutendee kama mtu kichaa. Na ili waweze kukudhihaki na kukuchezea na kukudhalilisha, wanakuvalisha vazi jeupe, na anakukabidhi mikononi mwa maaskari, ili wakutendee ukatili wowote wanaoweza kuufanya.

Ee Yesu Wangu Usiye na Hatia Yeyote, hakuna mtu anayeona kosa dhidi yako, isipokuwa Wayahudi peke yao, kwa vile roho yao ya kidini iliyoharibika haihitaji kitu kingine, isipokuwa inatakiwa tu nuru ya ukweli iangaze akilini mwao.

Yesu Wangu, Hekima Kuu Kabisa, ni jinsi gani inavyokugharimu kwa kuitwa na kutangazwa kuwa Wewe ni kichaa! Ili wakudhalilishe na kukukufuru, hao askari wanakutupa chini, wanakukanyaga, wanakuchafua kwa kukutemea mate, wanakubeza, wanakupiga kwa fimbo mapigo mengi hivi, hata unaonja unakaribia kufa. Maumivu unayopata ni mengi na makali hivi, mateso na manyanyaso wanayokutendea ni mabaya hivi, hata Malaika wanalia na kufunika nyuso zao kwa mabawa yao, kwani wanashindwa kukuangalia.

Yesu Wangu Kichaa, hata mimi nataka nikuite hivyo hivyo ‘kichaa’, kwani Wewe ni ‘kichaa wa Upendo’. Wewe, badala ya kukasirika na kusikitika, unasali na kulipa fidia kwa tamaa za madaraka ya wafalme, kwa ajili ya wafalme wanaotamani kumiliki dola kwa hasara ya watu wao, na kwa ajili ya kuwamaliza watu. Unalipa fidia kwa ajili ya mauaji wanayosababisha, unalipa fidia kwa damu nyingi wanayosababisha kumwagika kwa njia ya mipango yao ya kijinga, unalipa fidia kwa ajili ya dhambi za utundu, na kwa makosa yanayotendeka mahakamani na katika majeshi.

Yesu Wangu, inapendeza jinsi gani kukuona Wewe unasali na kulipa fidia wakati upo katikati ya Mateso mengi namna hiyo. Sauti zako zinanigonga moyoni mwangu, na zinanifanya mimi nifuatilie kila unachofanya. Basi hebu sasa uniache nikusogelea na niwe kando yako, nishiriki maumivu yako, nikufariji kwa pendo langu, niwaondoe na kuwafukuzia mbali adui zako, nikuchukue kati ya mikono yangu ili nikufariji na kubusu Panda la Uso wako.

Yesu Wangu Mtamu, nawaona adui zako hawakuachi upate pumziko hata kidogo, kwani Herode naye anakupeleka kwa Pilato. Iwapo safari ya kuja ilikuwa ni ya Mateso, safari ya kurudi itakuwa mbaya zaidi kwani naona kuwa Wayahudi wamepatwa na hasira zaidi sasa kuliko pale mwanzoni. Na kwa lolote linaloweza kutokea, wao wamekata tayari kauli ya kukuua.

Kwa hiyo basi, kabla hujatoka nje ya Ikulu ya Herode, mimi nataka kukubusu, ili kuonyesha upendo wangu kwako wakati huu wa Mateso makali hayo. Nawe, uniimarishe mimi kwa busu lako, na kwa njia ya Baraka yako. Mimi nitakufuata hata mbele ya Pilato.

TAFAKARI NA ZOEZI

Yesu, pindi anapoletwa mbele ya Pilato, mbele ya matusi na madharau na udhalilishwaji, Yeye yupo daima mtulivu na mpole. Hamchukii mtu yeyote, na katika yote anatafuta kupitisha na kuonyesha na kufanya nuru ya ukweli iangaze daima. Je na sisi tunayafanya hayo yote? Je huwa tunajaribu kuthibiti na kushinda silika yetu ya maumbile tunapona mtu fulani hakubaliani na mambo yetu? Je tunapojihusisha na watu huwa tunajaribu kuwasaidia wamjue Yesu? Je huwa tunawasaidia ili nuru ya ukweli iangaze ndani yao?

Ee Yesu Uhai Wangu Mtamu, hebu uweke neno lako juu ya mdomo wangu, na unifanye mdomo wangu uzungumze daima kwa Ulimi wako!

Yesu akiwa mbele ya Herode ananyamaza kimya. Anavalishwa kama kichaa na anatendewa ukatili wa maumivu yasiyoelezeka. Je sisi tunapokabiliwa na uonevu, kuzingiziwa, kudharauliwa, kudhihakiwa, kuchekwa na kuchekelewa, je inafika akilini mwetu kwamba Bwana anatuletea hayo ili kutufanya tupate ufanano wa kimungu? Na kadhalika tunapopata kuumizwa, katika madharau na katika magumu yale yote ambayo moyo wetu duni hukabili? Je tunapata wazo kwamba Yesu anapotugusa kwa teso fulani huwa anatugusa ili kutubadilisha na kutugeuza tuwe sawa na Yeye na anatupatia ufanano naye? Na teso fulani linapoturudia kwa mara nyingine, je tunapata wazo kwamba hapo Yesu anatufikiria, haridhiki bado na sisi na kwa hiyo anarudia kutuingiza katika shida nyingine ili kutupa bado fursa ya kufanana naye? Kwa kuiga mfano wa Yesu, je twaweza kusema kuwa tumejipatia tayari uwezo wa kujitawala sisi wenyewe, kiasi kwamba tunafikia kuweza kupendelea kunyamaza na kutulia, badala ya kujibizana bila hoja muhimu? Je huwa tunafaulu kujizuia ili tuweze kushinda maelekeo na tama za utundu?

Katika kila umivu linalotupata, budi kujiwekea nia hii kwamba teso hilo ni uhai tunaoutoa kwa Yesu ili kuomba roho za watu. Tunapoziweka roho hizo ndani ya Utashi wa Mungu, lile umivu letu hutengeneza mviringo unaozunguka kuwafungilia ndani yake, Mungu pamoja na roho, kwa lengo la kuziunganisha roho hizo kwa Yesu.

Pendo Langu na Changu Chote, twaa Wewe peke yako miliki ya moyo wangu huu na uushike mikononi mwako ili kila tunapokutana, niweze kunakili ndani yangu uvumilivu wako mkuu.

(Sala ya Kushukuru.

Tazama Uk 2)

SAA YA KUMI NA SITA

(Kuanzia Saa Mbili Hadi Saa Tatu Asubuhi)

Yesu Tena Mbele ya Pilato, Awa Mbadala wa Barabba. Apigwa Mijeledi Tena

(Sala ya Kujiandaa.

Tazama Uk 1)

Yesu Wangu Mteseka mno, moyo wangu mnyonge ukikabiliwa na hofu kuu na maumivu makali unakufuata. Ninakuona ukiwa umevalishwa kama mtu kichaa. Nikijua fika Wewe ni nani, Wewe uliye Hekima ya milele na uliye asili ya hekima za watu wote, naanguka kilio na ninasema: Inawezekanaje! Yesu awe kichaa? Yesu awe jambazi? Na tazama sasa utachukuliwa kuwa mbadala kwa jambazi mkuu Barabba!

Yesu Wangu, Utakatifu usio kifani, tayari umefikishwa mbele ya Pilato kwa mara nyingine. Naye huyu Pilato anapokuona katika hali mbaya hii, anapokuona umepigwa vibaya hivyo, umevalishwa kama kichaa, na anapona kuwa hata Herodi hajakutia katika hatia yoyote ile, anazidi kuwakasirikia Wayahudi, na akazidi kuamini kabisa kwamba Wewe huna kosa, na kwa hiyo hataki kukutia hatiani. Hata hivyo, akitaka kuwaridhisha kidogo Wayahudi, na ili kupoza hasira yao kali, chuki yao na kiu chao kikali cha kutamani kumwaga damu, anaamuru Wewe uletwe na usimame mbele yake, ili aliweke shitaka lako sambamba na lile la Barabba. Hapo Wayahudi wanapiga makelele wakisema: “Hatutaki aachiliwe Yesu, bali Barabba!”. Na kwa hiyo Pilato, akiduwa nini afanye ili kuwatuliza, anatoa hukumu ya kukutia mikononi mwao ili wakupige mijeledi.

Yesu Wangu uliyewekwa mbadala, moyo wangu unapasuka ninapokutazama na kuona kuwa, pindi Wayahudi wanapokazana ili waweze kukuua, Wewe kwa upande wako unajifungilia moyoni mwako na unaazimia kutoa Uhai wako kwa ajili ya wote. Ninapoinamisha na kusogeza sikio langu ninakusikia ukisema:

“Baba Mtakatifu, mtazame Mwana wako aliyevalishwa kama kichaa. Hii ni kulipa fidia kwa kichaa cha viumbe wengi kabisa ambao wameangukia katika dhambi. Hili vazi jeupe na liwe mbele yako ni ishara ya kufuta makosa ya roho nyingi ambazo zimefunikwa vazi chafu la dhambi. Tazama, Ee Baba, chuki, hasira-kichaa chao dhidi yangu, kitu kinachowafanya wapoteze nuru ya hoja ya akili kutokana na kiu chao cha kumwaga damu yangu. Na mimi napenda sasa nilipe fidia kwa chuki zote, visirani vyote, hasira zote na mauaji yote. Nitapenda kuwaombea hawa wote wajaliwe nuru ya hoja ya akili.

Baba yangu, uendele kunitazama bado: Wanazidi kunidhalilisha zaidi? Wananiweka mimi kuwa mbadala wa jambazi mkubwa kabisa. Nami napenda nikulipe fidia kwa madharau yote ya kuniweka

Mimi sambamba na waovu. Ah, ulimwengu wote umejaa makosa hayo ya kuniweka mbadala kwa maovu mbalimbali! Wako wanaotuweka Mimi, Wewe na Roho, kuwa mbadala kwa mambo yao binafsi, hutuweka mbadala kwa heshima wanazotafuta, mbadala kwa anasa na umaridadi, mbadala kwa matamano, kwa matakwa yao, kwa hadhi zao, kwa vishawishi mbalimbali na hata mbadala kwa dhambi yenyewe. Na viumbe vyote, kwa mshikamano mmoja, wanatuweka mbadala kwa mambo yao mengi ya upuuzi na ukorofi. Mimi nipo tayari na hiari kukubalia nifanywe mbadala wa Barabba, ili nilipe fidia kwa dhambi hizo zote za viumbe za kutuweka sisi, Baba na Mwana na Roho, kuwa mbadala kwa mambo ya tamaa zao”.

Yesu Wangu, mimi naonja ninakufa kwa maumivu, na kwa kuvurugika akilini, ninapona Pendo lako kuu likiwa katika maumivu mengi sana, na papo hapo ninapona ujasiri wa fadhila zako, wakati wa Mateso haya na matusi haya mengi. Maneno yako na fidia unazotoa, na pia madonda yako mengi, vyote hivyo huchoma katika moyo wangu mnyonge. Nami, nikiwa katika teso hilo, narudia sala zako na fidia zako. Sitaki kutengana nawe hata kwa dakika, ili kila kitu unachotenda Wewe kisipate kupotea kamwe.

Tazama, ni nini hicho ninachokiona! Maaskari wanakuvuta kukupeleka kwenye nguzo moja kwa ajili ya kukupiga mijeledi. Pendo Langu, mimi ninakufuata. Na Wewe uniangelie kwa Jicho lako la upendo na unipe nguvu za kustahimili kushuhudia ukatili unaotendewa katika Mateso yako.

Yesu Anapigwa Mijeledi

Yesu Wangu Usiye na Doa, upo tayari pale penye nguzo. Maaskari waliocharua kwa hasira wanakufungua minyororo ili wakufunge vizuri kwenye nguzo hizo. Hilo peke yake halitoshi: Wanakuvua nguo zako zote ili watekeleze unyama wao juu ya Mwili wako Mtukufu. Pendo langu, Uhai wangu, naonja nguvu zangu zinapungua kwa teso la kukuona upo uchi. Unatetemeka Mwili wako mzima toka kichwani hadi chini miguuni na Uso wako wenye ubikira umepata rangi nyekundu kutokana na kuona soni. Mwili Wako umevurugwa sana, umelegea na umedhoofu sana hata huwezi kubaki umesimama kwani badala yake unaangukia chini ya hiyo nguzo. Maaskari hata hivyo wanakushikilia usidondoke, siyo kwa lengo la kukusaidia, bali kwa lengo la kutaka wakufunge. Tayari wanatwaa kamba, wanakufunga Mikono yako, wanakubana sana kwenye nguzo. Mikono inaanza mara kuvimba sana na mtu anapogusa tu na vidole, Damu inaanza kutoka. Kishapo, wanaingiza kamba na minyororo katika pete ya chuma iliyopo kwenye nguzo, na toka hapo wanazizungusha kamba hizo juu ya Mwili wako wote, na kukubana sana hadi miguuni kiasi kwamba huwezi kujimudu kwa lolote ili kujilegeza kidogo.

Yesu Wangu uliyevuliwa nguo zako, uniruhusu nizungumze kidogo, kwani vinginevyo sitaweza kuendelea kukutazama wakati unapoteswa namna hiyo. Inawezekanaje na inakuwaje? Wewe unayevalisha vitu vyote vilivyoubwa: Unavalisha jua kwa mwanga, unavalisha anga kwa nyota, mimea kwa majani, ndege wa angani kwa manyoya, sasa inakuwaje Wewe umevuliwa nguo! Je sasa unatamani nini! Yesu Wangu Mpenda watu, kwa mwanga unaoutoa katika macho yako unaniambia:

“Nyamaza ee Binti yangu! Ilinipasa nivuliwe nguo, ili nilipe fidia kwa wale wengi wanaovua soni zao zote, wanaovua usafi wao, na uzuri wao. Nilipe fidia kwa wale wanaovua kila wema na kila fadhila na neema yangu, na badala yake wanatwaa na kuvaa kila aina ya uchafu na ubaya, na hivyo kuishi kwa mtindo mbovu. Katika soni zangu za kibikira, natamani nilipe fidia kwa dhambi nyingi za kukosa uaminifu, za zinaa na za tamaa chafu. Kwa hiyo angalia sana kile ninachofanya ili usali na kulipa fidia pamoja nami, na hivyo ukae kimya na kutulia”.

Ee Yesu Uliyepigwa mijeledi, Pendo lako linazidi kupita mipaka na kipimo. Ninawaona hawa wanyama wakatili, wakichukua kamba kamba na kukuchapa bila huruma yoyote, wanakupiga hata kuvimbisha Mwili wako mtakatifu wote. Wanakupiga kwa ukatili wa kinyama na kwa hasira hivi kiasi kwamba wao wenyewe tayari wamechoka. Hata hivyo wanabadilishana na wengine wawili. Hao wanatwaa fimbo zenye miiba miiba na kwazo wanakupiga sana hata Mwili wako unaanza kuvuja vijito vinavyotiririka vya Damu nyingi. Wanaupiga sana Mwili wako wote, wanakuchubuachubua na hivyo kuongeza madonda mwilini. Hilo halitoshi: wanabadilishana tena kwa kuwaleta bado wawili wengine. Wamefika na minyororo ya chuma yenye menomeno na hao wanaendeleza ukatili wao wa kinyama wa kukutesa. Katika mapigo yale ya kwanza tu nyama zile zilizopigwa pigwa na zilizochubuliwa sasa zinapasuka na kuchanika vipande vipande zaidi vinavyoangukia na kutawanyika chini ardhini. Mifupa sasa imeachwa ikionekana wazi. Damu inatiririka kweli na kujaa kama bwawa chini kuzunguka ile nguzo alipofungwa Yesu.

Yesu Wangu, Pendo Langu, uliyevuliwa nguo zote pindi unaposhambuliwa kwa vipigo vingi hivyo, mimi nakumbatia Miguu yako ili nishiriki maumivu yako na niweze kufunikwa kabisa kwa Damu yako Azizi. Kila pigo unalopata, linakuwa ni kidonda juu ya moyo wangu. Zaidi ya hilo, kila ninaposogeza sikio langu, ninasikia vilio vyako vingi ambavyo vinakuwa havisikiliki kwa vile mfululizo wa mvua ya mapigo yanayotua juu yako huziwisha hewa yote inayokuzunguka. Katika vilio vyako hivyo Wewe unasema:

“Enyi ninyi wote mnaonipenda, njooni mjifunze ujasiri wa Pendo la kweli. Njooni kutuliza kiu cha tamaa zenu katika Damu yangu, kiu ya matarajio yenu mengi, kiu ya majivuno yenu na matamania yenu, na kiu ya tamaa zenu nyingi za mwili. Katika Damu yangu hii mtajipatia dawa ya maovu yenu yote”. Vilio vyako vinaendelea kusema:

“Ee Baba, unitazame jinsi nilivyochubuliwa kwa vipigo hivi nilivyonyeshewa. Si hivyo tu: Nataka nitengeneze madonda mengi katika Mwili wangu ili nitoe vyumba vingi kutosha kwa roho za watu wote katika Mbingu ya Ubinadamu Wangu. Kwa njia hiyo nitakuwa natengeneza wokovu wao ndani Yangu Mwenyewe na hatimaye nitawawezesha wapite na kuingia katika Mbingu ya Umungu. Baba yangu, kila pigo la mijeledi ninalopata liwe mbele yako ni fidia ya kila aina ya dhambi ya kila mtu mmoja mmoja. Na kwa jinsi ile wanayonichapa Mimi, ndivyo asamehewe kila mtu anayetenda dhambi hizo. Mapigo hayo yaumize mioyo ya viumbe, na yawasimulie juu ya Pendo Langu, hata waweze kusukumwa kuniongokea Mimi.”

Na pindi unapoyasema hayo, Pendo lako ni kubwa sana hivyo kiasi kwamba, ingawa kama limejaa Mateso kabisa, Wewe unawatia chuki hao wakatili wako wazidi kukupiga zaidi. Yesu Wangu Uliyechubuliwa kabisa, Pendo lako linaniponda kabisa, na ninaonja linanitia kichaa. Pendo lako halichoki wakati hao wadhulumu wako wamechoka, na nguvu zao zimepunguka, hata hawawezi kuendelea na vitendo vyao vya kinyama. Tayari wanazikata zile kamba walizokufungia, na Wewe unadondoka nusu maiti na kuangukia juu ya Damu yako Mwenyewe. Unapoviona vile vipande vipande vya Nyama zako, unajihisi unakufa kwa Mateso. Ndani ya vipande hivyo vya nyama yako vilivyotenganishwa, Wewe unazona roho za watu zilizojaribiwa. Mateso yako ni makali mno hata unazirai ndani ya Damu yako Mwenyewe. Yesu Wangu, uniache nikuchukue mikononi mwangu, ili nikufaraji kidogo kwa pendu langu. Nakubusu, na kwa busu langu hilo, nafungilia roho zote ndani yako, ili hata mmoja wao asipotee. Na wewe unibariki!



TAFAKARI NA ZOEZI

Kuanzia saa mbili hadi saa tatu Yesu amekuwa amevuliwa nguo na kuachwa uchi akiwekwa chini ya vipigo vya kikatili kabisa. Je sisi tumejivua kila kitu? Yesu kafungwa kwenye nguzo. Je sisi huwa tunajifunga katika upendo? Yesu amefungwa kwenye nguzo, kumbe sisi, kwa dhambi zetu na makandokando yetu, pengine hata kwa mambo yasiyoegemea upande wowote au hata kwa mambo yaliyo mazuri kwa yenyewe, huwa tunaongeza au kuzidisha kamba zetu kumfunga Yesu kwa kutokuridhika na kamba zile walizotumia Wayahudi. Muda huo Yesu, kwa jicho lake la huruma anatuita na kutuomba tumfungulie. Je katika macho ya Yesu anayetutazama hatuoni kuwa ana neno la kutuonya kwa vile hata sisi tumechangia katika kumfunga? Ili tuweze kumtuliza Yesu Mteseka, ni lazima kwanza tufungue minyororo yetu ili tuweze kwenda na kufika kufungua minyororo ya viumbe wengine. Minyororo hii yetu midogo mara nyingi si kitu kingine isipokuwa ni makandokando yetu na kufungamana kwetu na utashi wetu, kufungamana na upendo wa ubinafsi wetu, majivuno yetu madogo madogo, na kupenda anasa. Hayo yote yanatengeneza kambakamba ambazo zinamfunga Mpendwa Yesu kwa Mateso.

Mara kadhaa, Yesu, akishikwa na Upendo kwa ajili ya roho yetu nyonge, anapendelea Yeye Mwenyewe kutufungulia sisi minyororo hiyo ili isitokee tukarudia tena kufungamana na mambo yetu ya kusikitisha. Ah! Ni jinsi gani na ni mara ngapi sisi tunalalamika kwa vile hatutaki kubaki na kuendelea kufungamana na Yesu peke yake! Tunamlazimisha pengine, huku tukisikitika sana, ili turejee nyuma kwenye mambo yetu!

Yesu Wetu aliyepigwa sana, pindi anapopata Mateso, analipa fidia kwa makosa yote dhidi ya usafi na adabu na heshima ya mwili. Je sisi tupo safi akilini? Machoni? Katika maneno? Katika upenzi? Tu safi hata tusiweze kuongeza mapigo mengine zaidi juu ya ule Mwili usio na hatia wa Yesu? Je tumefungamana naye kiasi cha kuwa hiari na tayari kumtetea wakati viumbe wanapomchapa kwa mijeledi ya makosa yao?

Yesu Wangu, uliyefungwa minyororo, minyororo yako hiyo sasa iwe ni yangu kiasi kwamba nionje Wewe u ndani yangu na Wewe uonje mimi ni ndani yako.

(Sala ya Kushukuru.

Tazama Uk 2)

SAA YA KUMI NA SABA

(Kuanzia Saa Tatu Hadi Saa Nne Asubuhi)

Yesu Anavishwa Taji la Miiba. Anatambulishwa Kama Ecce Homo. Anahukumwa Kufa

(Sala ya Kujiandaa.

Tazama Uk 1)

Yesu Wangu, Pendo Lisilokoma, kadiri ninavyozidi kukutazama ndivyo ninavyoelewa ni jinsi gani unavyoteseka. Tayari umechubuliwa kila mahali na wala hakuna sehemu ya Mwili wako iliyo salama. Wauaji wako wanachukia kabisa wanapooona kuwa hata katika maumivu yako hayo mengi Wewe unawatazama kwa upendo kabisa. Wanaona kuwa Jicho lako la mapendo linapowatazama, linaamsha ndani yao sauti nyingi zinazoomba na kusihwa waongeze maumivu zaidi, na hata walete maumivu mengine mapya, siyo tu kwa hoja ya ukatili wao wa kinyama, bali kwa vile wanalazimishwa na Pendo lako. Hapo wanakunyanyua. Wewe, kwa kukosa nguvu za kuweza kubaki umesimama, unadondoka tena chini juu ya bwawa la Damu yako. Hawa, wanapata hasira kabisa, na kwa mateke na kwa kukusukuma wanakufikisha mahali pale watakapokuvalisha taji la miiba kwa kulipigilia kichwani pako.

Yesu Anavalishwa Taji la Miiba

Pendo Langu, kama Wewe usiponitegemeza kwa Jicho lako la upendo, mimi sitaweza kuendelea kukutazama unavyoteswa. Sasa hivi tayari nasikia ubaridi na mtetemo katika mifupa yangu, moyo wangu unagonga na najionja ninakufa. Yesu, Yesu, unisaidie! Yesu Wangu Mpendevu ananiambia:

“Binti yangu, jipe moyo! Kamwe usipoteze chochote cha Mateso niliyopata, hebu sikiliza mafundisho yangu. Mimi lazima nimtengeneze binadamu tena katika vipengee vyake vyote. Dhambi imemwondolea mbali taji lake, na badala yake dhambi imemvika uchafu na vurugu, na kwa hoja hiyo hawezi kamwe kujitokeza mbele ya Utukufu na Ukuu Wangu. Dhambi imemdhalilisha na hivyo kumfanya apoteze kila haki yake ya kupata heshima na utukufu. Ni kwa hoja hiyo nataka Mimi nivalishwe taji la miiba ili niweke tena taji juu ya panda la uso wa binadamu na hivyo nimrejeshee haki zake zote za kupata kila aina ya heshima na utukufu. Miiba yangu Mimi iwe, mbele ya Baba Yangu, fidia na sauti za kufuta makosa ya dhambi nyingi za mawazo kama vile zile za majivuno. Na kwa kila akili iliyoubwa, miiba yangu hiyo itakuwa ni sauti mbalimbali, na nuru na maombolezo kwamba hawatanitendea tena mabaya. Kwa hiyo Wewe uunganike nami na usali na kulipa fidia pamoja na mimi”.

Yesu Mwenye Taji la Miiba, maadui wako wakatili wanakukalisha chini, wanakuvalisha kajoho laini ka rangi ya machungwa, wanatwaa taji la miiba, na kwa hasira chafu na ya kishetani, wanaliweka taji hilo

juu ya Kichwa chako kiabudiwa. Wanagonga kwa fimbo na hivyo kufanya miiba hiyo ipenye na kuzama ndani ya Panda lako la uso na miiba mingine inaingia na inafika hadi ndani ya Macho, Masikioni na hata ndani ya Fuu la Kichwa na hata nyuma kwenye kisogo cha Kichwa.

Pendo Langu, usumbufu gani, maumivu makali gani! Ni mauti mangapi ya kikatili unayopaswa kuyapokea! Tayari Damu yako inatiririka juu ya Uso wako kiasi kwamba mtu haoni tofauti kati ya Damu na miiba na hata hivyo mtu anaona Uso Wako Mtukufu unang'aa, anaona uzuri, amani na upendo. Watesi wako wakatili, kwa vile wanataka kukamilisha mauaji, wanaweka mwanzi mkononi mwako iwe fimbo ya kifalme na ndivyo wanaanza kukudhihaki. Wanakusalimu “Mfalme wa Wayahudi!”. Wanakugonga juu ya taji lako, wanakupiga makofi huku wakisema “Hebu buni ni nani aliyekupiga?” Nawe unanyamaza tu na kujibu kwa kulipa fidia kwa makosa ya tamaa za kutawala na ufalme, tamaa za makuu na heshima. Unalipa fidia kwa ajili ya wale ambao wanapokuwa katika nafasi za kutawala na za madaraka, wanakuwa na roho mbaya, wanawaharibu watu, na roho za wale waliokabidhiwa. Mifano yao mibaya husababisha ongezeko la maovu na upotevu wa roho za watu.

Kwa fimbo hiyo ya mwanzi unayofumbatia mkononi unalipa fidia kwa ajili ya matendo yale mazuri yaliyofanyika bila roho njema yoyote au yaliyofanyika moja kwa moja kwa nia mbaya. Kwa matusi unayopata, na kwa kufungwa kitambaa usoni Wewe unalipa fidia kwa ajili ya wale wanaodhihaki na kudharau mambo matakatifu kabisa, kwa kutoyajali na kuyakufuru, na unalipa fidia kwa ajili ya wale wanaoziba macho ya akili yao, ili wasione nuru ya ukweli. Kwa kitambaa hicho walichokufungia Macho unatuomba sisi, ili tufunguliwe kamba za vishawishi na tamaa mbalimbali, za utajiri na za matamano.

Yesu Mfalme Wangu, maadui wako wanaendelea kukutolea matusi na madharau. Damu inayotiririka kutoka Kichwa chako Kitukufu ni nyingi sana sana, hata inafika midomoni mwako, na hata inanzuia mimi nisiweze kusikia vema sauti yako nzuri, na kwa hiyo siwezi kutekeleza kile unachotekeleza Wewe. Basi, ninakuja mikononi mwako, nataka niinue Kichwa chako kilichoumizwa na chenye Mateso makali, nataka niweke kichwa changu chini ya miiba hiyo ili nionje jinsi inavyokuchoma na kuzama ndani. Pindi ninapozungumza maneno hayo, Yesu Wangu ananiita kwa jicho lake la upendo na mimi namkimbilia mara, naukumbatia Moyo Wake, na ninajaribu kuinua Kichwa Chake. Ona jinsi ilivyo nzuri kuwa pamoja na Yesu hata akiwa katikati ya maelfu ya maumivu makali sana.

Na Yeye ananijibu: “Binti yangu, miiba hii inaniambia kuwa nataka nisimikwe kuwa Mfalme wa kila moyo. Kila miliki inatakiwa iwe chini yangu. Wewe chukua miiba hii na uhome moyo wako na ufanye kitoke nje kila kitu ambacho hakinihusu mimi. Achia mwiba mmoja ndani ya moyo wako huo kama mhuri unaonyesha kuwa Mimi ndiye Mfalme Wako na mwiba huo uzuie pasiingie kitu chochote kingine ndani yako. Halafu tembea kuzunguka kwenye mioyo yote, ukaichome na kufanya itoke mioshi yote ya majivuno na uchafu uliopo ndani yao na unisimike Mimi kuwa Mfalme wa wote”.

Pendo langu, moyo wangu unanibana mno kila ninapotaka kukuacha. Kwa hiyo ninakuomba uzibe masikio yangu kwa miiba yako ili niwe nasikia sauti yako tu; funika macho yangu kwa miiba yako ili niwe ninakutazama Wewe tu. Jaza miiba yako ndani ya midomo yangu ili ulimi wangu ufungwe niwe bubu kwa kila neno linaloweza kukukosea Wewe, bali ulimi huo uwe huru tu katika kukusifu na

kukutukuza ndani ya watu wote. Ee Mfalme Wangu Yesu, unizungushie miiba, ili hiyo inilinde mimi, inikinge na kunishika niwe makini kwako. Na sasa nataka nikupanguse Damu na kukubusu, kwani naona adui zako wanakupeleka kwa Pilato atakayekuhukumu kufa. Pendo Langu, unisaidie niendele kuiga na kufuata njia yako ya Mateso. Na unibariki.

Yesu Mbele ya Pilato kwa Mara Nyingine

Yesu Wangu Uliyevaa Taji, moyo wangu mnyonge ulioumizwa kwa Pendo lako na uliochomwa kwa maumivu yako, hauwezi kuendelea kuishi bila Wewe na kwa hiyo ninakutafuta na ninakuona tena ukiwa mbele ya Pilato. Mbona ni kichokoo kinachotisha na kusikitisha! Hata Mbingu zinatishika na kusikitika na Jehenam hutetemeka kwa hofu na kwa hasira. Uhai wa moyo wangu! Jicho langu haliwezi kuendelea kutazama umbo lako bila kujisikia vibaya kuwa nakufa. Lakini nguvu ya mvuto wa Pendo lako hunilazimisha niendele kukutazama ili niyaelewe zaidi maumivu yako. Na mimi kwa upande wangu, nikiwa katika machozi na kuhema, ninakutafakari: Yesu Wangu, upo uchi, na badala ya mavazi nakuona umevaa Damu, naona nyama zako zilizoraruliwa, mifupa iliyoachwa ikionekana wazi na Uso wako Mtukufu hautambulikani. Miiba iliyopigiliwa katika Kichwa chako Kitukufu, imeingia hadi ndani ya Macho, Usoni, na mimi sioni kitu kingine isipokuwa Damu inayotiririka hadi aridhini na kutengeneza kijito cha damu nyuma ya Miguu yako.

Yesu Wangu, sikutambui tena. Ni jinsi gani ulivyochakaa! Hali yako uliyofikia imepita mipaka ya kina kabisa ya kunyenyekeshwa na ya madonda. Ah! Siwezi tena kukutazama umbo lako la Mateso namna hiyo, nasikia ninakufa. Napenda nikurarue na kukutorosha kutoka mbele ya Pilato, ili nikufungilie moyoni mwangu kukufariji na kukupumzisha. Napenda niponye madonda yako kwa Pendo lako. Katika Damu yako, napenda kuizamisha dunia yote ili ndanimo nifungilie roho zote na kuziongoza kwako kama mateka ya ushindi wa maumivu yako. Na Wewe, Yesu Mvumilivu, ghafla inaonekana kana kwamba unaniangalia kupitia miiba yako huku ukiniambia:

“Binti yangu, njoo ndani ya Mikono yangu hii iliyofungwa, egesha kichwa chako juu ya Kifua changu, na utayaona maumivu makali zaidi na machachu zaidi, kwa vile kile unachokiona nje ya Ubinadamu Wangu, si kitu kingine isipokuwa ni ishara tu ya maumivu yangu ya ndani. Sikiliza mapigo ya Moyo Wangu na hapo utasikia kuwa ninalipa fidia kwa makosa ya wale wanaotawala na kuamrisha bila kuzingatia haki. Nalipa fidia kwa ajili ya maonevu dhidi ya watu fukara, fidia kwa makosa ya kuwaonea watu wasio na hatia kama mbadala wa wahalifu. Nalipa fidia kwa ajili ya majivuno ya wale ambao hawajali kuhujumu kila sheria na taratibu kwa ajili ya kulinda hadhi yao, vyeo vyao, utajiri wao. Kwa ajili ya wale ambao wanawatendea maovu majirani zao huku wanafunga macho ili wasione nuru yeyote ya ukweli.

Kwa kutumia miiba hii napenda kubomoa roho ya majivuno iliyopo katika watawala na wote wenye vyeo. Na matobo yaliyopo katika kichwa changu napenda yawe ni njia yangu ya kupitia ili niingie katika akili zao ili nikaweke mpangilio na taratibu katika mambo yao kulingana na nuru ya ukweli. Kwa tendo langu hili la kunyenyekeshwa na kudhalilishwa mbele ya hakimu mdhalimu nataka

niwaeleweshe watu wote kwamba nguvu na mamlaka ya kweli na pekee ya mtu ni yale yanayomwezesha kutawala nafsi yake mwenyewe. Pia namfundisha yule anayetawala kwamba nguvu pekee na mamlaka ya kweli ni yale yanayounganika na ufahamu sahihi. Mamlaka hayo ndiyo pekee yake yanastahili na yanaweza kutawala na kusimamia wengine. Kinyume chake, heshima na vyeo vingine vinavyokosa fadhila hiyo, ni vitu ambavyo ni vya hatari, vya kuogopa na kuvikwepa. Binti yangu, endeleza kusambaza fidia ninazotoa na uendeleo kunifuata ili uyaelewe na kuyazingatia maumivu yangu”.

Pendo Langu, ninamwona Pilato, anapokuona umechakaa vibaya sana, anaguswa na kushituka akisema kwa mshangao: “Inawezekana kweli kuwa na ukatili namna hii katika mioyo ya binadamu? Ah, mimi sikuwazia wala sikupenda hilo pale nilipoagiza waende kumpiga kidogo!”. Huku akipenda kukuachilia huru kutoka mikono ya maadui wako, akitaka apate hoja nyingine zilizo na uzito zaidi, Pilato aliyaacha makundi, aliacha kukutazama kwa vile hakuweza kuvumilia hilo umbo lako la Mateso, alirudi ndani na kuanza kukuhoji tena: “Lakini hebu unieleze, umetenda nini? Hawa watu wako wamekutoa mikoni mwangu. Je, Wewe ni Mfalme? Ufalme wako ni upi?” Maswali hayo yote ya mfululizo ya Pilato, Wewe Ee Yesu Wangu, hukuyajibu kamwe, ulifunga Mdomo wako na Moyo wako ukiwazia tu kuokoa roho yangu nyonge kwa gharama ya maumivu mengi sana. Na Pilato alipoona hujibu, akaongeza kusema: “Je hujui kuwa ipo chini ya mamlaka yangu au kukuachilia au kukutia hatiani?” Basi Wewe Pendo Langu, huku ukitaka nuru ya ukweli iangaze ndani ya akili ya Pilato, unamjibu kwa kusema: “Usingeweza kuwa na mamlaka yeyote juu yangu kama usingalipewa toka juu. Hata hivyo lakini, wale walionitoa Mimi mikononi mwako hao wametenda dhambi kubwa zaidi kuliko yako”.

Yesu Analetwa Kama ‘Ecce Homo –Tazameni Mtu Huyu’

Basi Pilato, akiguswa rohoni na uzuri na wema wa sauti yako, akiwa anakosa msimamo katika kauli, huku akiwa na moyo wa hasira, akitegemea kuwa mioyo ya Wayahudi itakuwa na huruma zaidi, akaamua kukutoa na kwenda kukuonyesha hadharani ukumbini, akifikiri kwamba wao Wayahudi watashituka na kukuhurumia watakapoona jinsi ulivyochakazwa vile, na hivyo kwa njia hiyo alitaka aweze kukuachilia huru.

Yesu Mteseka, moyo wangu unashindwa kuvumilia ninapokuona ukimfuata Pilato. Kwa taabu kweli unatembea, huku ukiwa umepindika sana chini ya lile taji la miiba. Damu inayodondoka inapita kuchora hatua zako katika njia yote unayopita. Unapozidi kujitokeza nje unasikia makelele ya makundi ya watu wanaongojea kwa hamu utiwe hatiani na kuhukumiwa. Pilato, anawaamuru wanyamaze, anawataka wote wamsikie na kumsikiliza kwa makini. Kwa kutetemeka na kusikitika sana anafunua vipande vile viwili vya kajoho kadogo vilivyokufunika kifuani pako na mabegani pako, anaviinua juu ili wote wakuone wazi jinsi ulivyochakaa na kuchubuka, na hapo anaita kwa sauti kubwa:

“Ecce Homo! Tazameni Mtu huyu! Mtazameni, hana tena umbo la binadamu; tazameni haya madonda yake, na mtu hawezi kumtambua tena. Kama kweli ametenda kosa lolote, basi amekwisha kuteseka kutosha kabisa, na kwa kweli ameteseka mno. Mimi tayari najutia kosa langu la kuruhusu ateswe kiasi hiki. Kwa hiyo tumfungulie awe huru!”.

Yesu, Pendo Langu, uniache nikushikilie na kukutegemeza kidogo kwani nakuona Miguu yako imelegea na kuishiwa nguvu kutokana na kuelemeza na maumivu mengi, unapepesuka. Ah, katika dakika hii rasmi ya kimamlaka, uamuzi unachukuliwa juu ya hatima yako. Mbele ya maneno ya Pilato kinatua kimya kizito na cha kina popote, iwe mbinguni, duniani na hata kule kuzimuni. Halafu mara nasikia kama sauti moja ya mlilo mkali wa kelele: “Msulibishe! Msulibishe! Sisi tunataka kwa vyovyote vile huyo afe!”.

Uhai Wangu, Yesu, nakuona unatetemeka. Kelele hiyo ya kifo inaingia katika Moyo Wako na papo hapo katika sauti hizo unatambua na kusikia sauti ya Baba Yako Mpenzi inayosema:

“Mwanangu, nakutaka ufe, na ufe kwa kusulibiwa” Na unamsikia pia Mama yako ambaye naye, ingawa kama ameumizwa moyo, ameachika katika mateso, anasikia pamoja na Baba yako mpenzi: “Mwanangu, nakutaka ufe”. Malaika, Watakatifu, na wale wa kuzimuni wote kwa sauti ya pamoja wanalia: “Msulibishe! Msulibishe!”. Kwa hiyo, hakuna roho hata mmoja inayopenda ubaki hai. Na ahii! ahii! Kwa uchungu na sikitiko sana, kwa kuteseka sana na kusunoneka, hata mimi najisikia kulazimishwa na nguvu fulani ya mbinguni nilie kwa sauti: “Msulibishe!”. Yesu Wangu, unisamehe na mimi pia niliye roho nyonge yenye dhambi, ninayetaka ufe! Lakini nakuomba unifanye mimi nife pamoja Nawe. Na Wewe, Ee Yesu Uliyepigwa na Kuchubuliwa, unapoguswa na teso langu yaelekea unaniambia:

“Binti yangu, jibane kwenye Moyo Wangu, shiriki maumivu yangu na matendo yangu ya fidia. Dakika hii ni kuu na rasmi: Ni lazima kuamua au kifo changu au kifo cha viumbe vyote. Dakika hii kuna mikondo miwili inayomiminda maji katika Moyo Wangu. Katika mkondo mmoja zimo roho zile zinazotaka mimi nife kwa vile wanataka wapate uhai ndani yangu. Na kwa hiyo, iwapo mimi napokea kifo kwa ajili yao, wao wataachiwa huru kutoka ile hukumu na hatia ya tangu milele. Milango ya mbingu inafunguliwa ili kuwakaribisha. Katika mkondo ule wa pili kuna roho zile zinazotaka mimi nife kwa hoja yao ya kunichukia na kuthibitisha hukumu iliyowatia wao hatiani. Hapo Moyo Wangu unachanika, na unaonja kifo cha kila mmoja wao, na unaonja pia yale maumivu yenyewe ya motoni! Ah! Moyo Wangu hauwezi kabisa kuyavumilia maumivu haya machungu na makali! Kwa kila pigo la Moyo nasikia kifo, kwa kila pumzi pia, na hivyo kuna sauti inayorudiarudia: ‘Kwa nini Damu nyingi hiyo iliyomwagika ije kupotea bure? Kwa nini maumivu yangu yaje kupotea bila kuwafaidia watu wengi?’ Ah, Binti! Haya nishikilie na kuninyanyua kwa vile nashindwa, siwezi tena. Hebu ushiriki maumivu yangu haya: maisha yako na yawe ni majitoleo endelevu yatakayookoa roho mbalimbali na hivyo kupoza maumivu yangu haya yanayonimaliza”.

Moyo Wangu Yesu, maumivu yako ni maumivu yangu na napenda kutangaza na kueneza fidia unazotoa Wewe.

Sasa namwona Pilato amebaki amevurugika na anaharakisha kuwaambia: “Je nilazimike kumsulibisha Mfalme wenu? Mimi sioni kosa kwake la kumtia hatiani!”. Hapo Wayahudi wanapiga makelele ya juu zaidi yanayoumiza masikio na kuchafua hewa: “Hatuna mfalme mwingine isipokuwa Kaisari na kama wewe hutamtia huyu hatiani afe, basi wewe siyo rafiki ya Kaisari! Mtoe, mtoe! Msulibishe, Msulibishe!”

Yesu Anahukumiwa Kufa

Pilato hakujua nini zaidi cha kufanya. Kwa hofu ya kuchukuliwa hatua na serikali ya kuondolewa madarakani aliagiza bakuli ya maji na kunawa mikono yake akisema: “Mimi sina hatia na Damu ya Huyu Mtu Mwadilifu”. Na kishapo anakuhukumu kifo, Ee Yesu.

Lakini Wayahudi wanapiga kelele “Damu yake na iwe juu yetu na juu ya watoto wetu”. Na wanapoona amehukumiwa tayari, wanashangilia na kufanya sherehe kwa kupiga makofi, kupiga miluzi na kupiga vigelegele. Wakati huo Wewe unalipa fidia kwa ajili ya wale wote wenye madaraka na vyeo ambao wanavunja sheria muhimu kabisa na tunu zake kwa ajili tu ya kuogopa watu na kuogopa kupoteza vyeo vyao. Hawajali hata kama wanawaumiza na kuathiri watu wote wa nchi zao huku wakiwapendelea na kuwalinda wale walio wahalifu na kuwatia hatiani wale walio wema. Wewe unalipa pia fidia kwa ajili ya wale ambao baada ya kukosa, wanachokoza na kupandisha hasira ya Mungu ya kuwaadhibu.

Wakati huo unapolipa fidia, Moyo Wako unatoka Damu, kutokana na Teso la kuwaona watu uliowateua wikipigwa radi kwa apizo la mbinguni, ambalo wao wenyewe, kwa utashi wao timamu, wamelitaka pale walipolitilia muhuri kwa Damu ambayo wameikufuru. Ah, Moyo wako unazidi kutetereka! Hebu uniruhusu niushikilie mimi katika mikono yangu. Wakati huo mimi nitachukua maumivu yako na fidia unazotoa Wewe na kufanya yawe ni maumivu ya kwangu na ziwe ni fidia za kwangu. Kwa vile Pendo lako linakusukuma kwenye jambo la juu zaidi, nakuona unakosa raha, na tayari unachunguza na unatafuta Msalaba uliko.



TAFAKARI NA ZOEZI

Yesu aliyetiwa taji la miiba, anayedhihakiwa kama mfalme kichokoo, chini ya matusi na maumivu yasiyopata kusikika, ndiye analipa kwa namna ya pekee fidia ya dhambi za majivuno. Na je, sisi huwa tunaepuka tabia za majivuno na kiburi? Na tunapofanikisha kitu chochote, huwa tunamrudishia Mungu heshima? Je mbele ya wenzetu huwa tunajishusha? Je akili yetu huwa daima imeondoa mawazo yasiyofaa, ili kujaza nafasi hiyo na neema ya Mungu? Mara nyingi huwa hatutoi nafasi kwa neema, kwani tunaiacha akili yetu iwe imejaa tena na tena na mawazo yasiyotakiwa. Na kwa hiyo, akili yetu inapokuwa haikujaa Mungu kabisa, ni sisi wenyewe tunaosababisha ibilisi atushambulie, na mara nyingi ni sisi wenyewe tunaochokoza vishawishi. Kutokana na hali hiyo basi, wakati akili yetu imejaa Mungu, ibilisi anapotujongea anashindwa kuona na kupata nafasi na mahali pakupenyeza vishawishi vyake. Anavurugika na anatoroka, kwa vile mawazo matakatifu yana nguvu sana dhidi ya ibilisi. Wakati ibilisi anapojaribu kusogea, mawazo hayo matakatifu yanamchoma na kumwumiza kama mapanga, au mikuki ambayo mwishowe inamfanya atoroke.

Kwa hiyo ni kwa kupitiwa tu huwa pengine tinalalamika na kulaumu tunapoona akili yetu inasumbuliwa na kujaribiwa na adui. Kwa kweli ni kosa letu la kutokuwa makini ndilo linalomvuta adui atushambulie. Yeye huwa anangoja na kuvizia na kupeleleza hali ya akili yetu ili aweze kugundua mashimo na matundu ya kuingilia akilini mwetu na kutushambulia. Kumbe badala ya sisi kumfariji Yesu kwa mawazo yetu matakatifu, na badala ya sisi kumwondolea miiba, sisi bila shukrani yeyote tunakanyaga kichwa chake, tunashindilia miiba na kusababisha aonje kuchomwa vikali kabisa. Kwa hiyo neema inavurugwa na inazuiwa kufanya kazi yake ya kutuangaza kwa mawazo matakatifu.

Mara nyingi huwa tunafanya mambo mabaya zaidi: pindi tunaposhambuliwa sana na vishawishi, badala ya kuvifunga pamoja na kuvipeleka kwa Yesu aviunguze kwa moto wa Pendo lake, sisi huwa tunaviendeleza akilini, tunavinung'unikia tu, na tunaviacha vigongane na vimalizane vyenyewe. Katika hali hiyo, akili yetu duni huendelea kujaa mawazo mabaya, na hata nafsi yetu yote huwa imebanwa na kudhoofishwa kabisa. Hapo huhitajika muujiza tu wa Yesu kuweza kuifungulia akili yetu na kutuacha huru. Na Yesu, kwa njia ya miiba ile, anatuangalia na kutuita kana kwamba anasema:

“Ah, mwanangu, ni wewe mwenyewe ambaye unagoma kukesha karibu na Mimi! Kama wewe ungekuja mara kwangu, Mimi ningekusaidia kujifungulia na kujiweka huru kutoka usumbufu ambao adui ameleta akilini mwako, na wala usingesababisha Mimi niwe nahangaika kungojea kiasi hicho kurudia kwako. Nimekuwa natafuta toka kwako msaada wa Mimi kujikomboa na miiba hii inayonichoma kweli; Lakini yote ikawa bure kwani wewe uliendelea kuzama katika shughuli ambazo adui yako alikuwa amekuletea. Oh, Ni jinsi gani ungeepuka kujaribiwa mno iwapo ungekuja mara ndani ya mikono yangu! Kumbe hapo, adui angetishwa siyo na Wewe bali na Mimi na hapo angekuacha mara moja.

Yesu Wangu, miiba yako ifungilie mawazo yangu ndani ya akili yako, na imzuie adui asilete aina yoyote ya kishawishi.

Je, sauti ya Yesu anaposikika ndani ya akili yetu na katika moyo wetu, sisi tunaitikia maelekezo na maagizo yake au tunayatupilia mbali? Yesu anadhihakiwa kama mfalme kichokoo, Je sisi huwa tunaheshimu na kujali mbambo matakatifu? Je huwa tunatoa heshima na uchaji vile inavyodaiwa kama tungemgusa Yesu Kristo Mwenyewe?

Yesu uliyevikwa taji, unijalie mimi nionje miiba yako, ili kutoka michomo yake niweze kuelewa ni jinsi gani unavyoteswa, na ili nikuweke na kukusimika Wewe kuwa Mfalme wa nafsi yangu yote.

Yesu anayeletwa na kusimamishwa hadharani ukumbini amehukumiwa kufa, amehukumiwa na watu aliowapenda sana na aliowasaidia sana. Yesu mpenda watu anapokea kifo ili atupatie sisi uzima. Na sisi huwa tupo tayari kupokea maumivu yoyote yale ili Yesu asitendewe ubaya na kuteseka? Teso letu budi lipokelewe na kukubalika ili tusimfanye Yesu ateswe. Na kwa vile katika Ubinadamu Wake Yesu aliteswa bila kukoma, sisi, kwa vile tunapaswa kuendeleza Uhai wake hapa duniani, hatuna budi kubadilisha mateso yetu yawe ni yale ya Ubinadamu wa Yesu Kristo.

Ni kwa namna gani tunapata huruma juu ya maumivu anayopata Yesu pale anapoziona roho nyingi zilizojibandua na kutoka katika Moyo Wake? Je Mateso yake hayo tunayapokea na kugeuza yawe ya kwetu, ili kumtuliza Yesu kutoka maumivu anayopata? Wayahudi wanamtaka asulubiwe ili kuhakikisha anakufa amedhalilika na ili jina lake lififie toka uso wa dunia hii. Je sisi tunajitahidi kumfanya Yesu aishi hapa duniani? Sisi, kwa matendo yetu, kwa mifano yetu, kwa mwenendo wetu lazima tuweke mhuri wa kimungu katika ulimwengu, ili kufanya Yesu ajulikane na watu wote. Kwa kazi zetu, maisha ya Yesu yapate mwangwi wa kimungu unaosikika toka pande zote za dunia. Je tupo tayari kutoa uhai wetu ili kumfanya Yesu mpendwa aburudike baada ya udhalilishi na matusi yote hayo? Au na sisi tunawaiga Wayahudi, Taifa lililopendelewa mno, na tunapiga kelele kama wao “Crucifigatur! – Asulubiwe!”? Roho yetu duni karibu inafanana na Wayahudi kwani inapendwa mno na Yesu.

Yesu Wangu Uliyehukumiwa, hukumu uliyopata na iwe ni hukumu juu yangu. Ninaipokea hukumu hiyo kwa kukupenda Wewe. Na kwa ajili ya kukufariji nitakuwa nakurudia na nitajimwaga mara kwa mara ndani yako ili nikuchukue na kukupeleka katika mioyo ya viumbe wote na kukufanya ujulikane kwa wote na utoe uzima wako kwao wote.

SAA YA KUMI NA NANE

(Kuanzia Saa Nne hadi Saa Tano Asubuhi)

Yesu Anachukua Msalaba na Anaelekea Kalvari. Anavuliwa Nguo Zake

(Sala ya Kujianda.

Tazama Uk 1)

Yesu Wangu, Pendo Lisilozimika, nakuona unahangaika, huna amani. Nayasikia maumivu yako ya upendo, nayasikia Mateso yako. Moyo Wako unagonga kwa nguvu, na katika kila pigo la Moyo nasikia mpasuko, madhulumu, na mashambulizi ya mapendo. Na Wewe, kwa kushindwa kuvumilia na kuuthibiti moto unaokuteketeza, unahangaika, unalia, unahema, na kila unapotoa sauti ya kulia nakusikia ukisema: “Msalaba!”. Na pia maumivu yako yote, ambayo ndiyo ndanimu unaogelea kama vile ndani ya bahari isiyo na mipaka, yanarudia kati yao mlilo huo huo: ‘Msalaba!’ Ndipo na Wewe unaita ukisema: “Ewe Msalaba niupendao na ninautamani, Wewe pekee ndiye utawakomboa wana wangu, na Mimi natoa upendo wangu wote na kuutia ndani yako”.

Yesu Anatiwa Taji la Miiba Kwa Mara ya Pili

Muda huo maadui wako wanakuingiza ndani ya Praitorio. Wanakuvua kale kajoho ili wakuvalishe nguo zako tena. Ah, ni Mateso gani unayopata! Kwangu mimi ingekuwa tamu na afadhali ningekufa kulikoni kukuona ukiteswa namna hiyo! Kajoho hako kananata kwenye taji, na kwa hiyo wanashindwa kuendelea kukavutia juu zaidi. Basi kwa ukatili wote wanararua vyote kwa pamoja, kajoho na taji. Wanaporaru hivyo kwa ukatili, miiba mingi inakatika na vipande vyake vinabaki vimezama katika Kichwa chako Kitukufu. Damu inatoka kama mvua na inatiririka katika vijito. Ni maumivu ya kutisha hata unalia. Lakini maadui, bila kujali Mateso yako, wanakuvalisha kajoho kale tena, wanarudia kuweka taji kichwani pako tena, wanashindilia kwa nguvu juu ya Kichwa chako, miiba inashindiliwa hadi kugusa machoni na masikioni. Hakuna hata sehemu ya Kichwa chako ambayo haikutoboka na ambayo haipati maumivu hayo makali. Maumivu ni makali mno hata unapepesuka chini ya mikono ile ya wakatili, unatetemeka toka kichwani hadi miguuni, na unahema kwa maumivu kiasi cha kufa. Kwa macho yako yaliyolegea na yaliyojaa Damu unajaribu kubahatisha kunitazama ukiniomba msaada katika Mateso yako hayo mengi.

Yesu Wangu, Bwana wa Mateso, uniruhusu nikushikilie na nikukumbatie kwenye moyo wangu. Natamani nitwae moto huo unaokuunguza Wewe ili nichome na kuteketeza maadui wako na kukuokoa Wewe. Kumbema Wewe hupendi hilo kwani hamu yako ya Msalaba inazidi kuwa kali, na unatamani kujitoa kafara mara moja kwa ajili ya watu, na hata kwa ajili ya maadui wako pia. Mimi ninapokukumbatia kwenye moyo wangu, na Wewe unaponikumbatia kwako, unaniambia maneno haya:

“Binti yangu, uniruhusu nimwage mapendo yangu, na pamoja nami ulipe fidia kwa ajili ya wale wanaotenda mema huku wakinidharau mimi. Wayahudi hawa wananivalisha nguo zangu kwa lengo tu la kunidhalilisha mbele ya watu wakitaka kuwasadikisha kuwa mimi ni mhalifu. Kwa nje, tendo la kunivalisha laonekana ni tendo jema kumbe ndani yake kuna hila mbaya. Ah, ni watu wangapi hufanya matendo mema: wanaadhimisha Sakramenti na wanashiriki Sakramenti wakiwa na malengo ya kibinadamu tu na hata malengo mabaya. Lakini tendo jema likifanywa kwa lengo baya, huleta ushupavu na usugu katika ubaya. Mimi nataka nivikwe taji kwa mara ya pili, kwa maumivu makali zaidi, kuliko yale ya kwanza ili nibomoe ule ushupavu na usugu. Kwa tendo hilo nitawavutia kwangu kwa njia ya miiba yangu. Ah, Binti yangu! Taji la safari hii ya pili huniletea kweli maumivu zaidi. Naonja Kichwa changu kinaogelea ndani ya miiba. Kila ninapojitikisa au hata kujimudu kidogo tu, au kila wanaponizomea huwa ninaingia katika mauti makali kweli. Kwa njia hiyo nalipa fidia kwa ubaya wa yote wanayonikosea. Nalipa pia fidia kwa ajili ya wale wote ambao katika hali yao yoyote, badala ya kufikiria juu ya utakatifu wao, wao wanatupilia mbali na kuigomea neema yangu. Wao wanarudi kunipigilia miiba inayochoma zaidi hata kufanya nilalamike na kulia machozi ya damu huku nikitamani wokovu wa roho zao. Ah, Mimi nafanya kila kitu kiwezekanacho kwa ajili ya kuwapenda, lakini viumbe wanafanya kila kitu cha kuniudhi. Angalau basi wewe usiniache peke yangu katika maumivu yangu haya na katika matendo yangu ya fidia.

Yesu Anachukua Msalaba

Chema Changu Uliyechakarika, pamoja nawe nalipa malipizi, pamoja nawe nateseka. Nawaona maadui zako wanateremka haraka haraka katika ngazi na kundi kubwa la watu linakusubiri katika hasira sana na kwa hamu kubwa. Tayari wamekuandalia Msalaba ambao Wewe unautafuta kwa hamu kabisa. Wewe unautazama huo Msalaba kwa upendo na hatua kwa hatua unauendea na kuujongea kwa hiari kabisa ili hatimaye ukumbatie. Lakini, unaanza kuubusu, halafu unashikwa na msisimko wa furaha ya pekee. Katika Ubinadamu wako Mtukufu unarudia kuutazama tena kwa raha kabisa na unauchunguza na kukadiria urefu wake na upana wake. Hapo tayari unakadiria kiwango kile watakachofaidi viumbe wote. Unapima fidia utakazotoa kutosheleza kuzifungilia roho za watu kwa Mungu katika vifungo vya uchumba ili uweze kuwawezesha na kuwastahilisha kuwa warithi wa Ufalme wa Mbingu. Unashikwa na Pendo kali kwa viumbe, Pendo usiloweza kulizua na kwa hiyo unarudia tena kuubusu Msalaba huku ukiuambia:

“Msalaba Mwabudiwa, hatimaye sasa ninakukumbatia! Wewe umekuwa tamaa na tarajio la Moyo Wangu, Wewe umekuwa kifo cha kishahidi cha Pendo langu. Ewe Msalaba, kwa nini lakini umekuwa unachelewa namna hiyo hadi sasa? Mbona Mimi muda wote huu nilikuwa nakujongea hatua kwa hatua? Msalaba Mtakatifu, Wewe ulikuwa ndiye lengo la matamania yangu, Wewe umekuwa ndiye hatima ya uwepo wangu hapa duniani. Mimi sasa najaza ndani yako nafsi yangu yote; ndani yako nawaweka wana wangu wote. Tangu sasa Wewe utakuwa ni uhai wao na nuru yao, utakuwa ni kinga yao, ulinzi wao na nguvu yao. Wewe utawasaidia katika kila kitu na mwishowe utawaongoza kuja kwangu Mbinguni wakiwa katika utukufu. Ee Msalaba, Kiti cha kifalme cha hekima! Ni Wewe pekee utafundisha utakatifu wa kweli. Ni Wewe pekee utawaunda mashujaa, wanariadha, mashahidi, na

watakatifu. Ewe Msalaba Mzuri, Wewe ni Kiti changu cha utawala, na nitakapopasika kuiaga dunia hii Wewe utabaki kuwa badala yangu. Nazitoa roho zote na ninakupa Wewe kama mali ya posa. Ninazikabidhi kwako ili unitunzie roho hizi na uziokoe kwa ajili yangu”.

Unaposema maneno hayo, huku ukiwa unafadhaika sana, unauweka Msalaba juu ya Mabega yako. Ah, Yesu Wangu, Msalaba wenyewe mbele ya Pendo lako ni kitu chepesi mno, lakini kwa vile zaidi ya uzito wa Msalaba unaongezeka ule uzito wa makosa yetu, uzito ambao ni mkubwa mno na mpana mno kupita hata upana wa anga zote. Na Wewe, Mteseka Chema Changu, unaonja unakanyagwa na kushindiliwa na uzito wa makosa hayo mengi mno. Roho yako inatishika inapouona na inaonja maumivu yanayoletwa na kila kosa. Utakatifu wako unashituka na kuduwa mbele ya ukatili wa kinyama, na kwa hiyo unapoinua na kuubeba Msalaba mabegani pako unapepesuka, unahangaika, na katika Ubinadamu wako Mtukufu, unatoa michirizi ya jasho la kifo.

Ah, Pendo langu, roho yangu inakataa kukuacha peke yako, bali natamani tugawane kati yetu wawili uzito wa Msalaba. Ninakumbatia miguu yako ili kukusaidia kupunguza uzito wa makosa. Kwa jina la viumbe vyote natamani nikupatie pendo badala ya yule ambaye hakupendi, natamani nikutolee sifa badala ya yule anayekudharau, nikutolee utukufu, shukrani na utii badala ya watu wote. Ninatamka wazi kwamba kwa kila tusi na uovu utakaopata, mimi naazimia kukutolea nafsi yangu yote, kwa ajili ya kukulipa fidia na kwa ajili ya kukutendea Wewe kile kilicho kinyume cha maovu wanayokutendea viumbe, na ninaazimia pia kukufariji kwa mabusu yangu na kwa matendo endelevu ya upendo.

Ni kweli, naona mimi ni duni mno. Ninakuhitaji Wewe unisaidie niweze kukulipa fidia kwa namna ifaayo na inayostahilika. Kwa hiyo basi, najiunganisha na Ubinadamu wako Mtukufu, na pamoja Nawe, naunganisha mawazo yangu kwenye mawazo yako, ili kulipa fidia kwa mawazo yangu mabaya na mawazo mabaya ya watu wote. Naunganisha macho yangu kwenye Macho yako kulipa fidia kwa mabaya wanayotazama watu. Naunganisha mdomo wangu kwenye Mdomo wako ili kulipa fidia kwa makufuru na mazungumzo machafu. Naunganisha moyo wangu kwenye Moyo wako ili kulipa fidia kwa maelekeo, tamaa na mahusiano mabaya. Yaani natamani kutoa fidia kwa yale yote ambayo yanafidiwa na Ubinadamu wako Mtukufu. Nafanya hilo kwa kujiunganisha kwenye Ukuu wote wa Pendo lako kwa ajili ya watu wote na kwenye Wema wako Mkuu unaowatendea watu wote.

Hata hivyo sijaridhika bado. Natamani nijiunganishe kwenye Umungu Wako. Nafsi yangu ambayo sawa na si kitu, nataka ipotelee ndani ya Umungu Wako ili kwa njia hiyo niweze kukupatia chote, vyote na yote. Ninakupa Pendo lako kwa ajili ya kurekebisha na kuponya machungu yako. Nakupa na Moyo Wako ili kukuponya na ubaridi wetu, ukimya wetu wa kiburi, ukosefu wetu wa shukrani na uhaba wa pendo toka kwa viumbe. Ninakupa pia Muziki wako mtamu ili kukuburudisha masikioni dhidi ya makelele mengi ya sauti za makufuru. Ninakupatia Uzuri wako ili kukufurahisha dhidi ya uchafu na uharibifu wa roho zetu uliosababishwa na kuanguka kwetu katika matope ya dhambi. Ninakupatia Usafi wako ili kukuburudisha dhidi ya makosa ya kuwa na nia mbaya na dhidi ya matope na uozo uliopo katika roho za watu wengi sana. Ninakupa Ukuu wako ili kukuburudisha dhidi ya mazingira mabovu ambamo roho za watu hujiingiza kwa uzembe wao. Ninakupa Motomoto wako ili

uunguze dhambi zote na uwashe mioyo yote ili watu wote wakupende na pasiwepo na yeyote mwenye kukuchukiza. Yaani basi, ninakupa kila kitu kilicho ni Wewe, ili kukutolea fidia timilifu, kukupatia Pendo la milele, Pendo Kuu na lisilo na ukomo.

Kupanda Kuelekea Kalvario

Yesu Wangu Mvumilivu sana, nakuona ukitembea hatua za kwanza chini ya uzito mkubwa sana wa Msalaba. Mimi naunganisha hatua zangu kwenye hatua zako. Pindi Wewe ukiwa umedhoofika, umechoka na unapepesuka na unaelekea kuanguka, mimi nitakuwa kando yako ili nikutegemeze. Ninatoa mabega yangu na kuyaweka chini ya Msalaba ili Wewe na mimi tugawane uzito wake. Usinikatalie kwa vile sikufai bali unikubalie niwe mwenzi wako mwaminifu wa kukusindikiza.

Ee Yesu, unaniangalia; ninatambua kuwa unalipa fidia kwa ajili ya wale ambao hawachukui msalaba wao kwa hiari, bali badala yake wananung'unika, wanakasirika, wanajiua na wanawaua watu wengine; Wewe lakini unawaomba na kuwasihi waonyeshe upendo, ukubalio na kuupokea msalaba wao.

Yesu Anaanguka Kwa Mara ya Kwanza

Maumivu unayopata ni makali kweli kiasi kwamba unaonja kugaagaa chini ya Msalaba. Ni hatua za mwanzoni kabisa unazotembea. Na kumbe tayari unaanguka chini ya Msalaba na unapoanguka unajiburuza katika mawe: miiba inashindiliwa ndani zaidi ya Kichwa chako, madonda yako yanazidi kuleta maumivu makali zaidi na yanatoa damu nyingine zaidi. Kwa vile huna nguvu tena za kujiinua, maadui zako, katika hasira wanajaribu kukulazimisha kusimama kwa mateke na kwa kukusukuma. Pendo Langu Uliyeanguka chini, niache nami nikusaidie kusimama, nikubusu na nikupanguse damu; na pamoja nawe uniache nilipe fidia kwa ajili ya wale wanaotenda dhambi bila kujitambua, katika udhaifu na ulegevu. Nakuomba uzisaidie roho za watu hao.

Yesu Anakutana na Mama Yake Mtakatifu

Yesu, Uhai Wangu, maadui zako wanakusababishia Mateso na uchungu usioelezeka. Wamefanikiwa kukusimamisha, na wakati unatembea kwa kupepesuka, ninasikia pumzi yako ya kuhema kwa maumivu makali. Moyo wako unapiga kwa nguvu kweli, na Mateso makali zaidi yanazidi kukukabili. Unatikisa Kichwa chako ili kujaribu kuondoa damu iliyojaa usoni na masikioni na hatimaye unajaribu kuangalia kwa uchungu.

Ah, Yesu Wangu! Nimepata kuelewa yote sasa: Mama yako, kama njiwa aliyeshikwa na huzuni anakutafuta, anataka akuambie neno la mwisho na Wewe uweze kumtazama kwa mara ya mwisho. Wewe unaonja maumivu yake Mama. Moyo wake umepanda madonda ndani ya Moyo wako. Moyo wake umepondeka na kuumizwa kwa pendo lake na kwa pendo lako. Sasa unamwona anapita akijipenyeza kati ya makundi. Kwa gharama yeyote ile anatamani akuone, akukumbatie na kuagana

nawe kwa mara ya mwisho. Wewe unaumia zaidi unapoona jinsi anavyohuzunika na alivyokwisha na kuwa mahututi: Kutokana na nguvu ya upendo, maumivu yako yote yameota ndani ya moyo wake. Ni tu kwa muujiza wa uwezo wako mkuu kwamba Mama yu bado hai mpaka hivi sasa. Sasa unaanza kujikokota hatua kwa hatua ukielekea kwake ili ukutane naye. Na mara hii mnafaulu kutazamana uso kwa uso. Oh! Ni jinsi gani mioyo yenu inapondeka! Maaskari wanagundua kuwa mnatazamana. Wanawakemea na kuwasukuma na hivyo wanawazuia ninyi Mama na Mwana msiweze kuagana!

Yesu Anaanguka Mara ya Pili

Ninyi wawili mnashirikishana sana na kugawana Mateso kati yenu. Mama yako anazirahi kwa maumivu anayopata hata anatetereka na anataka kuanguka. Yohane mwaminifu na wale wanawake wachaji wanamshika na kumtegemeza, na wakati huo na Wewe unaanguka tena chini ya Msalaba. Basi Mama yako, kile anachoshindwa kukitekeleza kwa mwili, kwa vile anazuiliwa, sasa anakitekeleza kwa roho yake: Anaingia ndani yako, anaufanya Utashi wa Umilele kuwa Utashi wake na hivyo anajiingiza na kujishirikisha katika maumivu yako yote, na anatenda wajibu wake wa kimama: anakubusu, anakulipa fidia, anakupangusa na kukulainisha katika madonda yako yote kwa kukutilia mafuta na manukato ya upendo wake wa kimateso.

Yesu Wangu Unayeelemewa na maumivu, mimi pia najiunganisha na Mama aliyepigwa na mateso. Maumivu yako yote nayafanya kuwa maumivu yangu, na natamani nikutendee kimama katika kila tone la Damu yako na katika kila donda lako. Nikishirikiana pamoja Nawe na pamoja naye ninalipa fidia kwa ajili ya nafasi zile zote hatarishi za watu wanapokutana, na nalipa fidia kwa ajili ya wale wote wanaojitia katika nafasi za kutenda dhambi au wanaolazimishwa kuingia katika mazingira hayo na hivyo kunaswa katika dhambi. Wewe, ukiwa umedondoka chini ya msalaba, unalia sana. Maaskari wanahofu kuwa labda utakufa kwa kuelemea na madhulumu hayo na kwa kumwagika Damu nyingi namna hiyo. Licha ya hali hiyo, kwa kutumia kamba na viatu wanafanikiwa pole pole kukuinua na kukusimamisha. Kwa njia hiyo unalipa fidia kwa ajili ya mianguko ya mara kwa mara katika dhambi, kwa ajili ya dhambi kubwa zinazotendwa na matabaka yote ya watu. Kwa namna hiyo unawaombea wadhambi wakaidi na sugu na unalia kwa machozi ya Damu kwa ajili ya wongofu wao.

Lile Donda Lililochimbika Katika Bega la Yesu

Pendo Langu Uliyevunjika, wakati ninakufuata katika hatua za kulipa fidia, nagundua kuwa unazidi kuelemea na uzito mkali kabisa wa Msalaba. Unatetemeka mwili wote. Kutokana na makaripio na makameo unayozidi kuyapata miiba inazidi kupenyeza zaidi na zaidi ndani ya Kichwa chako Kitukufu. Msalaba, kwa uzito wake mkubwa, unajichimbua na kudidimia ndani ya Bega na kutengeneza donda la kina hadi kuonekana mifupa. Kwa kila hatua unayofanya naonja kama unakufa na kushindwa kabisa kusonga mbele zaidi. Hata hivyo, Pendo lako liwezalo yote, ndilo linakupa nguvu. Kwa jinsi unavyoonya Msalaba unavyopenyeza ndani ya Bega lako, ndivyo unavyolipa fidia kwa ajili ya dhambi zilizofichikana ambazo kwa kutokulipiwa fidia, zinazidi kuongeza uchachu wa maumivu yako. Yesu

Wangu, uniruhusu niweke bega langu chini ya Msalaba ili kukusaidia na ili pamoja nawe niweze kulipa fidia kwa dhambi zote zilizofichikana.

Mkirene Alazimishwa Kuchukua Msalaba wa Yesu

Maadui wako, kwa hofu kuwa utakufa chini ya Msalaba, wanamlazimisha Mkirene akusaidie kuuchukua. Huyo, huku akichukia na kulalamika na kulaumu, anakusaidia siyo kwa hiari na upendo bali kwa kulazimishwa. Ndani ya Moyo wako husikika tena sauti za malalamiko yote ya kila anayeteseka, unasikia sauti za wale wanaokataa kuyapokea mateso, sauti ya wale wanaoasi baada ya kuyapokea kwa muda, sauti ya hasira na madharau katika nyakati za kuteseka. Unaumia na kuchomwa Moyo zaidi sana unapoonwa watu wa wakfu wakikutoroka, wao uliowaita wokusindikiza na kukusaidia katika Mateso yako. Na pale unapowabania kwako kwa nguvu ya Mateso yako, tazama wao wanajitoa wenyewe toka mikononi mwako na kutoroka kwenda kutafuta anasa na hivyo wanakuacha Wewe uteseke peke yako.

Yesu Wangu, pindi ninapotoa fidia pamoja nawe, nakuomba unibane kati ya mikono yako, unibane kwa nguvu kabisa hata pasiwepe na umivu lako lolote unalolipata ambalo hata mimi silishiriki ili nijigeuze mimi mwenyewe kuwa maumivu hayo na kwa ajili ya kulipa fidia kwa tendo la kuachika lililosababishwa na viumbe wote.

Veronika Anapangusa Uso wa Yesu

Yesu Wangu Uliyevunjika Moyo, kwa taabu sana unatembea huku ukiwa umepinda Mgongo. Mara nakuona unasimama na kujaribu kuangalia. Moyo Wangu, kuna nini? Unataka nini? Ah, Ni Veronica ambaye anakujia bila woga wowote. Kwa ujasiri mkubwa, anakupangusa kwa kitambaa Uso wako uliofunikwa kabisa na Damu, na Wewe unamwachia picha ya Uso wako imechorwa juu ya kile kitambaa, ikiwa ni alama ya shukrani. Yesu Wangu Mkarimu, hata mimi nataka nikupanguse, siyo kwa kitambaa, bali nataka nikuonyeshe nafsi yangu yote ili kukutuliza. Nataka niingie ndani yako kabisa ili nikupatie, Ee Yesu, mapigo yangu ya moyo, moja baada ya lingine, nikupe pumzi zangu moja baada ya nyingine, upenzi wangu moja baada ya mwingine, matamania yangu moja baada ya lingine. Nataka nijitumbukize ndani ya Akili yako takatifu na pale, ndani ya Ukuu wa Utashi wako, ninapitisha hayo yote – mapigo ya moyo, pumzi, matamania na upenzi- na ninatamani hapo niweze kuyarudufu na kuyaongeza wakati wote bila kukoma. Natamani, Ee Yesu Wangu, nitengeneze mawimbi ya mapigo ya moyo, ili pasitokee na pigo lolote baya likagonga ndani ya Moyo wako. Kwa jinsi hiyo nitalainisha machungu na maumivu yote yaliyopo ndani ya Moyo huo. Natamani nitengeneze mawimbi ya upenzi na mapenzi na ya matamania yatakayofukuzia mbali upenzi na mapenzi na matamania mabaya yawezayo kuusikitisha Moyo wako kwa namna yoyote ile. Natamani bado Yesu Wangu, nitengeneze mawimbi ya pumzi na ya mawazo, ili kufukuzia mbali wazo lolote lile na pumzi yeyote ile, ambayo huweza kwa namna fulani kukuchukiza au kukusikitisha. Nitakuwa daima macho na kuchunga sana, Ee Yesu, ili jambo lolote lisikumize na kukuongezea machungu mengine zaidi ya maumivu yaliyopo

ndani yako. Ee Yesu Wangu, dah! Fanyiza kuwa nafsi yangu yote ya ndani iogele ndani ya Ukuu wako. Kwa njia hiyo nitaweza kuyapata tena mapendo ya kutosha na utashi wa kutosha, ili kuzuia kabisa mapendo mabaya yasiingie katika undani wako na wala pasitokee utashi unaoweza kukusikitisha. Muda huo, maadui wako, wanapolitazama tendo la Veronika kwa jicho baya, wanakuvuta kwa kamba, wanakusukuma na kukulazimisha uendele kutembea.

Yesu Anawatuliza Wanawake

Baada ya kwenda hatua chache unasimama tena. Pendo lako, chini ya uzito wa maumivu mengi sana, halikomi unapowaona wanawake wachaji wanaolia juu ya maumivu yako. Wewe unajisahau Mwenyewe, na unawatuliza kwa kuwaambia: “Mabinti, msilie juu ya maumivu yangu bali leni juu ya dhambi zenu na juu ya watoto wenu”. Ni kisomo gani hicho cha kiwango cha juu sana! Jinsi lilivyo tamu Neno lako! Ee Yesu, pamoja nawe nalipa fidia kwa dhambi za kukosa upendo na ninakuomba neema ya kuniwezesha kujisahau mimi mwenyewe ili nisiwe nakumbuka kitu chochote isipokuwa Wewe pekee.

Yesu Anaanguka Mara ya Tatu

Maadui wako, wanapona na kusikia ukizungumza, wanapata hasira mno: wanakuvuta kwa kamba, wanakusukuma kwa hasira sana hata kukuangusha chini na unapoanguka unachubuliwa na mawe. Uzito wa Msalaba unakuumiza kabisa na unajisikia kuzimia. Uniruhusu nikutegemeze na uniruhusu nitoe fidia kwa njia ya mikono yangu kwa kupangusa Uso wako Mtukufu. Nakuona umelala ardhini na unaogelea katika dimbwi la Damu. Lakini maadui wako wanataka wakusimamisha: Wanakuvuta kwa kamba, wanashika nywele zako na kukuvutia juu na kukuinua na wanakupiga mateke kwa viatu vyao. Yote ni bure. Wewe upo kufani Yesu Wangu! Ni Mateso gani hayo! Yanapasua moyo wangu kwa maumivu! Huku wakikuburuza wanakupeleka mlimani Kalvario. Pindi wanapokuburuza na kukukokota, naonja kuwa unalipa fidia kwa ajili ya makosa yote ya watu wa maisha ya wakfu ambayo yanakusababishia uzito mkubwa sana, ambao kila unapojaribu kuinuka, uzito huo unakuvutia na kukushindilia chini hata kushindwa kabisa. Katika hali hiyo ya kukokotwa na kupigwa mateke unafika mlimani Kalvario huku ukiacha madoa mekundu ya Damu yako azizi popote unapopita.

Kwa Mara ya Tatu Yesu Anavuliwa Nguo Zake na Kuvishwa Taji La Miiba

Ni wazi sasa yanakusubiri Mateso mapya! Kwa mara nyingine wanakuvua nguo zako kwa kuzirarua na wanang’oa taji la miiba toka kichwani mwako. Ah! Wanapokung’oa miiba unaonja kabisa maumivu makali toka ndani ya Kichwa chako. Na wanaporarua nguo zako, wanararua pia nyama na ngozi zilizochanwa na kugandamana na nguo. Madonda yanauma na kuchoma sana. Damu inazidi kutoka ikitiririka kama vijito hadi aridhini na maumivu ni makali hivyo hata unaanguka chini.

Lakini hapatikani hata mtu mmoja anayeshituka kwa kukuonea huruma Wewe Chema Changu. Badala yake, maadui wako, katika hasira mbovu ya kinyama, wanachomeka tena lile taji la miiba juu ya Kichwa chako, huku wakilishindilia kwa kugongagonga. Umbo lako limechakaa kabisa sababu ya kuchubuliwa na sababu ya nywele zako walizovuta na kuzing'oa kwani zilikuwa zimeshikamana katika Damu iliyoganda. Ni Malaika peke yao wanaweza wakaelewa na kueleza kile kinachokupata katika Mateso haya. Hata nao, wanatishika na kushituka, wanashindwa kuendelea kukutazama, wanapindua macho yao ya kimbingu na wanalia. Yesu Wangu Uliyevuliwa nguo, uniruhusu nikukumbatie na kukubana kwenye moyo wangu ili kukupasha joto kwani nakuona unatetemeka na jasho baridi la kuganda la mauti linakukabili na kuenea katika Ubinadamu Wako wote. Ni kwa jinsi gani ningependa nikupatie uhai wangu; nakupa pia na damu yangu iwe badala ya Damu yako ile uliyopoteza kwa ajili ya kunipa mimi uzima.

Yesu, muda huo, huku akiniangalia mimi kwa Macho yake yaliyochoka sana na yenye umahututi, yaelekea anataka kuniambia haya:

“Binti yangu, ona ni jinsi gani zinavyonigharimu roho za watu! Hapa ndipo mahali ninapowasubiri watu wote ili niwaokoe, hapa ndipo ninapotamani kulipa fidia kwa ajili ya dhambi za wale wanaojidhalilisha hadi kuwa chini ya hali ya wanyama; wanakuwa wakaidi sugu katika kunikosea na kunidharau kiasi kwamba wanafikia kushindwa kabisa kuishi bila kutenda dhambi. Akili yao hupata na kubaki katika upofu na wanatenda madhambi kama vichaa! Ndiyo maana kwa mara ya tatu wamenitia taji la miiba! Kwa tendo la kuvuliwa nguo zangu, nalipa fidia kwa ajili ya wale wanaovaa nguo za maridadi na za anasa zisizo na heshima wala adabu, kwa ajili ya dhambi dhidi ya usafi wa moyo, na kwa ajili ya wale waliofungamana sana na utajiri, heshima, tamaa, ambavyo huwa ndiyo mungu wa mioyo yao. Ah! Ndiyo! Kila moja ya madhambi hayo limekuwa kwangu ni Kifo kimojawapo ninachoonja sasa. Kama sifikii kuzimia ni tu kwa vile Utashi wa Baba Yangu wa Milele haujatoa bado kauli ya uamuzi na kutangaza dakika ya Kifo changu”. Chema Changu, Uliye sasa uchi mtupu, wakati huu ninapolipa fidia pamoja nawe, ninaomba univue mimi nguo zote kwa Mikono yako mitukufu na usiruhusu kamwe upenzi wowote mchafu uingie ndani ya moyo wangu. Wewe unilinde, unizungushie maumivu yako na unijaze kwa Pendo lako. Uhai wangu usiwe kitu kingine isipokuwa ni marudio tu ya Uhai wako. Kwa baraka yako uthibitishe tena tendo la mimi kuvuliwa nguo! Unibariki kwa Moyo Wako na unipe nguvu ya kuendelea kuhudhuria na kushuhudia tukio lote la Mateso ya kusulibiwa kwako. Unipe na nguvu ya kubaki nimesulibiwa pamoja Nawe!



TAFAKARI NA ZOEZI

Yesu anajitwika Msalaba. Pendo la Yesu kwa Msalaba, ari na dukuduku yake ya kutaka kufa juu ya Msalaba huo, ili kuwakomboa watu, ni mambo makuu na ya ajabu. Je na sisi huwa tunayapenda Mateso kama alivyofanya Yesu? Je tunaweza tukasema na sisi kuwa mapigo ya moyo wetu yanaiga na kurudia mapigo ya kimungu ya Moyo wake Yesu? Je na sisi huwa tunaomba tupewe Msalaba wetu?

Na pale tunapopata mateso, je huwa tunajiwekea nia na azimio la kuwa wenzi na wasindikizi wa Yesu ili kumpunguzia uzito wa Msalaba wake? Na huwa tunamsindikiza kwa mtindo na kwa kiwango gani? Na katika matusi anayoyapata, je tunakuwa tayari na hiari kumtolea mateso yetu madogo madogo ili yawe kitulizo kwa maumivu yake?

Katika kazi zetu, katika sala na pale tunapojikuta tunaelemewa na uzito wa maumivu ya ndani na tunapoonja kuwa na dakika hiyo ya mateso yetu je huwa tunarusua teso letu kwa Yesu ili liwe kama kitambaa kitakachopangusa jasho lake, na kitakachomburudisha kidogo, na hivyo sisi kupata fursa ya kuchukua dakika yake ya mateso?

Ee Yesu Wangu, uwe unaniita mimi daima kuja kuwa karibu nawe, na Wewe uwe daima pamoja nami, ili nikufariji daima kwa maumivu yangu.

(Sala ya Kushukuru.

Tazama Uk 2)



SAA YA KUMI NA TISA

(Kuanzia Saa Tano Hadi Saa Sita)

Kusulibiwa

(Sala ya Kujiandaa.

Tazama Uk 1)

Yesu, Pendo Langu, tayari umevuliwa nguo zako zote. Mwili wako umechubuliwa sana na kujaa madonda, utadhani ni mwanakondoo aliyechinjwa akiandaliwa kubanikwa penye moto kama ndafu. Nakuona ukitetemeka mwili wote. Muda huo maadui wanauandaa Msalaba kwa ajili ya kukusulibisha. Kwa vile umeishiwa nguvu na unashindwa kusimama, unadondoka chini juu ya kilima hiki cha Kalvario. Chema Changu na Chote Changu, moyo wangu unanibana kwa mateso ninapokuangalia Wewe. Ninaona jinsi Damu inavyomwagika toka kila sehemu ya Mwili wako mtukufu ulioenea madonda toka kichwani hadi miguuni.

Kwa Mara ya Tatu Yesu Anavikwa Taji la Miiba

Maadui wako, wakiwa nao wamechoka, lakini wakiwa bado hawajatosheka, wakati wanakuvua nguo zako wamelilarua taji lako la miiba toka kichwani wakisababisha maumivu makali kweli. Kishapo wamelichomeka tena kichwani na kusababisha maumivu yasiyosemekana. Wanatoboa Kichwa chako Kitukufu na matundu mapya na hivyo kuongeza madonda mengine. Ah! Wewe unalipa fidia kwa jeuri na ukatili wa binadamu na kwa kiburi cha dhambi hasa zile za majivuno.

Yesu, naona kuwa kama Pendo lisingekusukuma na kukuinua juu, hakika ungekuwa tayari umekwisha kufa kutokana na ukali wa Mateso unayopata katika dakika hii unapovishwa taji la miiba kwa mara ya tatu. Ninaona kuwa huwezi kuvumilia tena Mateso haya; kwa Macho yako yenye kufunikwa damu unatazama huko na kule kama kuna mmoja anayekukaribia ili kukusaidia na kukufariji katika Mateso mengi hayo na katika hali yako ya kuvurugika.

Chema Changu Mtamu, Uhai Wangu Mpenzi, hapa hupo peke yako kama ilivyokuwa katika usiku ule wa Mateso: Yupo Mama mteswa ambaye, akiwa amechomwa mikuki mingi moyoni, anakabiliwa na vifo vingi, kutokana na maumivu mengi yakutesayo Wewe. Yupo na Magdalena akupendaye, ambaye karibu amepata kichaa mbele ya maumivu yako. Yupo pia na Yohane amini aliyeingiwa na ububu kutokana na ukali wa maumivu unayopata katika Mateso yako. Hiki ni kilima cha wale wanokupenda. Huwezi ukabaki mpweke. Hebu niambie, Pendo Langu, ni nani ungependa akushikilie katika maumivu yako makali haya? Deh, tafadhali uniruhusu mimi nije kukushikilia. Ni mimi niliye na shida zaidi kuliko wengine.

Mama Mpenzi na hawa wengine wananiachia nafasi mimi. Haya basi, Ee Yesu, mimi najongea kukukaribia. Ninakukumbatia na ninakuomba uegemeze Kichwa chako juu ya bega langu, ili niweze kugusa na kuonja miiba yako ndani ya mabega yangu. Nataka nisogeze kichwa changu mpaka kigusane na Kichwa chako, siyo tu kuonja miiba yako, bali pia kwa ajili ya kuosha, kwa Damu yako azizi inayotiririka toka kichwani, mawazo yangu yote ili yawe katika hali ya kukulipa fidia kwa ajili ya kila dhambi watendayo viumbe kwa njia ya mawazo yao. Deh! Pendo Langu, ujibane kwangu. Nataka nibusu kila moja moja la matone ya Damu yako inayotiririka juu ya Uso wako mtukufu na ninakuomba, pindi ninapoyaabudu matone haya, kila tone na liwe nuru kwa kila mtu, ili hata mmoja wao asikukosee kwa mawazo yake mabaya.

Pindi ninapokubania kwangu, na ninapokushikilia, ninakuangalia, Ee Yesu, na ninaona unauangalia Msalaba wanaokuandalia maadui. Unasikia wanavyogonga kwa nguvu kutoboa matundu ambamo watakupigilia Wewe, Ee Yesu Wangu. Naonja kabisa jinsi Moyo Wako unavyopiga kwa nguvu nguvu na unavyoshitukashituka kwa maumivu ya kitanda hicho. Lakini ndicho unachokitamani kabisa kupita chochote kile, ingawa kama ni kwa Mateso yasiyosemekana, kwani juu ya kitanda hicho unatia mihuri wa wokovu wa roho zetu ndani yako. Ninakusikia hapo ukisema:

“Pendo Langu, Msalaba Mpenzi, kitanda changu azizi, Wewe umekuwa ni kifodini changu katika maisha, na sasa Wewe ni pumziko langu. Deh, Ewe Msalaba! Unipokee upesi mikononi mwako. Mimi siwezi tena kuvumilia kungojea. Msalaba Mtakatifu, juu yako na ndani yako nitakamilisha mambo yote. Njoo haraka Msalaba! Timiza matarajio ya tamaa yangu yanayonimaliza, matarajio ya kutoa uhai kwa ajili ya roho za watu, na uhai huo utatiwa muhuri na Wewe ee Msalaba. Oh, acha kuchelewa zaidi! Ni kwa hamu sana ninasubiri kupanua Mikono yangu na kujilaza juu yako ili kuifungua Mbingu kwa wanangu wote na hivyo kuziba milango ya motoni. Ee Msalaba, ni kweli Wewe ndiyo mapigano yangu, lakini Wewe ni pia ushindi wangu na nishani yangu timilifu, na ndani yako nitatoa urithi mkuu, ushindi mwingi, nishani nyingi, mataji mengi kwa wana wangu”.

Lakini, nani awezaye kusema hayo yote ambayo Yesu Wangu Mtamu anauambia Msalaba? Wakati Yesu analiwaza na Msalaba, maadui wanamwamrisha kujilaza juu yake na Yeye anatii mara moja utashi wao ili kulipa fidia kwa dhambi zetu za ukaidi. Pendo Langu, kabla ya kujilaza juu ya Msalaba uniruhusu nikubane kwa nguvu zaidi kwenye moyo wangu na nikubusu. Nawe unipe busu. Hebu sikia Ee Yesu, mimi sitaki kukuacha: ninataka nije nijilaze hapo juu ya Msalaba pamoja nawe, na nataka nibaki nimepigiliwa misumari pamoja nawe. Pendo la kweli haliruhusu kamwe patokee utengano. Unisamehe kwa tamaa ya pendo langu na unikubalie nibaki nimesulibiwa pamoja Nawe.

Hebu tazama, Pendo Langu laini, siyo mimi peke yangu ninayeomba hilo bali pia hata Mama Mteswa, Magdalena asiyetenganishwa toka kwako na mpendwa wako Yohane. Wote wanasema itaweza kuvumilika zaidi kubaki tumesulibiwa nawe kulikoni kuendelea kushuhudia na kukuona Wewe ukisulibiwa peke yako. Kwa hiyo basi, mimi, pamoja nawe, najitoa mwenyewe kwa Baba wa Milele, huku nikijifunganisha kuwa kitu kimoja na fidia zako, na pia kitu kimoja na Moyo wako wenyewe na kitu kimoja na maumivu yako yote.

Ah! Inaelekea kana kwamba Yesu Wangu Mteseka ananiambia: “Binti yangu, wewe umeliwahi Pendo langu: Huo ndio Utashi Wangu: yaani wote wale wanaonipenda wabaki wamesulibiwa pamoja nami. Ah! Ndiyo! Haya basi, njoo sasa ujilaze pamoja nami juu ya Msalaba: Nitakufanya kuwa Uhai wa uhai wangu na nitakushika kama kipenzi cha kwanza cha Moyo wangu”.

Yesu Anasulibishwa Msalabani

Na ndiyo ona, Chema Changu Kitamu, sasa unajilaza juu ya Msalaba. Kwa Pendo kuu na kwa urafiki sana unawaangalia wauaji wakatili. Ni wao ambao tayari mikononi mwao wameshika misumari na nyundo ili kukupigilia Wewe. Unapowatazama hivyo, unawapa mwaliko wa kirafiki wa kukusulibisha upesi. Na hao wenyewe, ingawa kama wanashikwa na simanzi, katika ukatili wao wa kinyama, wanatwaa mkono wako wa kulia, wanasimika msumari, na wanaugonga kwa nyundo hata kuufanya msumari utoboe mkono na kujitokeza upande wa pili wa ubao wa Msalaba. Maumivu na Mateso ni makali na mengi vile hata unatetemeka Ee Yesu Wangu. Nuru ya Macho yako mazuri inaingia kiza, na Uso wako mtukufu unanyauka na kuanza kuwa katika umahututi.

Mkono wa kulia uliobarikiwa wa Yesu Wangu, ninakubusu, ninakuhurumia, ninakuabudu, ninakushukuru kwa niaba yangu mwenyewe na kwa niaba ya wengine wote. Kwa mapigo yote uliyopata wakati wanakupigilia, naomba uwafungulie dakika hii roho zile nyingi kabisa zilizokuwa zinahukumiwa kwenda motoni. Kwa yale matone mengi kabisa ya Damu uliyomwaga, nakuomba uzioshe roho hizo ndani ya Damu yako hiyo azizi. Na kwa maumivu machungu uliyoyapata pale walipogonga misumari ili kupigilia Mkono wako Msalabani na kwa maumivu uliyopata wakati zilipokaza neva za Mikono yako, nakuomba uwafungulie watu wote milango ya Mbingu na uwabariki. Baraka yako iweze sasa kuwaita wakosefu kwenye uongofu, waasi na wasioamini kwenye nuru ya imani.

Ee Yesu, Uhai Wangu Mtamu, mara baada ya kuupigilia Mkono wa kulia, kwa ukatili maadui wanautwaa Mkono wa kushoto, na ili kuweza kuufikisha penye shimo waliloandaa, wanauvuta sana, hata unaonja Mkono unanyofoka toka mabegani. Na kwa ukali wa maumivu, Miguu inajikunyata. Kishapo, kwa hasira na ukatili usiolekea kamwe, wanaupigilia msalabani kama walivyofanya kwa Mkono ule mwingine.

Mkono wa Kushoto wa Yesu Wangu, ninakubusu, ninakuhurumia, ninakuabudu na ninakushukuru. Kwa mapigo na maumivu uliyopata pindi wakikupigilia msalabani, nakuomba unikubalie dakika hii, ufanye roho za watu zitoke toharani na zirukie mbinguni. Na kwa Damu uliyoimwaga, nakuomba uzime ile miali ya moto inayozuunguza roho hizo. Ufanye kuwa kwa wote kupatikane kiyoyozi na bafu ya wokovu inayowatakasa toka kila aina ya doa na inayowaandaa kuingia kuiona heri ya milele.

Pendo Langu na Changu Chote, kwa maumivu makali ya mkuki uliopata wakati wakipigilia Mkono wako wa kushoto, nakuomba ufunge milango ya moto wa milele kwa roho zote na uzuie isitue radi ya Haki ya Mungu ambayo tumeichokoza kwa dhambi zetu. Ufanyizie, Ee Yesu, kwamba msumari huo

katika Mkono wako uliobarikiwa wa kushoto, uwe ni ufunguo utakaofunga Haki ya Mungu hata isiweze kuleta mvua ya viboko juu ya dunia na ufungue pia hazina za Huruma ya Mungu kwa manufaa ya wote.

Ni tayari yaonekana kana kwamba Wewe umebaki umetulia bila kutikisika kwa lolote, na kana kwamba na sisi tupo huru kukutendea lolote. Kwa hali hiyo, mikononi mwako naiweka dunia yote na vizazi vyote vya binadamu. Pia ninakuomba, Pendo Langu, kwa njia ya sauti mbalimbali za Damu yako yenyewe, usiwanyime yeyote msamaha. Na kwa mastahili ya hiyo Damu yako Tukufu, nanakuomba wokovu na neema kwa ajili ya watu wote. Ee Yesu Wangu, usimwache na kumnyima yeyote.

Pendo Langu Yesu, maadui wako hawaridhiki bado. Katika ukatili wao wa kishetani, wanaitwaa Miguu yako Mitukufu, ambayo kamwe haijachoka kutafuta roho za watu. Kwa vile ilikuwa imekunjamana kutokana na ukali wa maumivu ya mikononi, wanaivuta kwa nguvu kabisa hata karibu kuinyofoa toka kwenye magoti, kwenye mbavu na kutoka mifupa yote ya kifuani. Chema Changu, moyo wangu hauna nguvu tena ya kuvumilia. Ninaona Macho yako yenye uzuri wa kupendeza, yakiwa yamefifia kwa sababu ya ukali wa Teso lako, na yakiwa yamefunikwa na Damu, yanatoa nuru. Midomo yako iliyovimba na kudhoofika kwa kipigo cha ngumi, inaharibika na kupindapinda, Mashavu yako ni legelege, Meno yako yanagongana na Kifua chako kinapata maumivu sana na Moyo wako umepigika sana na kupata udhaifu sana wakati Mikono na Miguu ilipovutwa na kunyoshwa. Pendo Langu, ni kwa hiari gani ningetamani mimi nichukue nafasi yako ili kukupunguzia maumivu hayo! Natamani nijilaze mimi juu ya viungo vyako hivyo vyote vya Mwili ili nilainishe maumivu yako, ili nikubusu, nikutulize, na nikulipe fidia badala ya watu wote.

Yesu Wangu, naona sasa wanatwaa Miguu yako na kuisogeza moja juu ya mwingine, wanaipigilia kwa msumari, ni msumari uliochongoka sana. Deh! Ee Yesu Wangu! Pindi msumari unapochoma na kutoboa Miguu yako uniruhusu mimi niingize Mapadre wote katika Mguu wako wa kulia ili wawe nuru kwa watu, hususan kwa wale wanaoishi maisha mabaya na ya dhambi. Na katika Mguu wa kushoto naweka watu wote ili wapokee nuru itokayo kwa Mapadre, wawaheshimu na wawatii. Jinsi msumari unavyopenya na kutoboa Miguu yako, ndivyo iwapenye na kuwatoboa Mapadre na watu ili hata mmoja wa hao asiweze kujitenga nawe.

Miguu Mibarikiwa ya Yesu Wangu, nawabusu, nawahurumia, nawaabudu na ninawashukuru. Ee Yesu, kwa hayo maumivu makali sana uliyopata kwa Mateso ya kuvutwavutwa Miguu yako, kwa kulegezwa na kugongwa mifupa yako yote, na kwa Damu uliyoimwaga, ninakuomba ufungilie ndani ya madonda yako roho zote za watu na wala usiikatae wala kuiacha roho yeyote.

Misumari yako ipigilie nguvu na maweza yetu ndani yako ili yasitengane nawe na kuelekea pengine. Misumari yako ikomelee moyo wetu ili ushikiliwe daima ndani yako tu. Vionjo vyetu vyote na hisia zetu zibaki zimekomelewa kwa misumari yako ili zisipokee utamu wowote usiotokea kwako.

Ee Yesu Wangu Msulibiwa, ninakuona umejaa Damu popote na unaogelea ndani ya Damu. Matone yote hayo ya Damu hayaelezi kitu kingine isipokuwa roho za watu. Katika kila tone naona zimejaa na kufurika ndanimu roho za karne zote kwa vile Wewe Ee Yesu ulituchukua sisi sote ndani yako. Kwa nguvu na uwezo wa Damu hiyo, nakuomba, uzuie roho yoyote isitoroke toka kwako.

Ee Yesu Wangu, wadhalimu wauaji wanahitimisha tendo la kupigilia Miguu yako msalabani kwa misumari, na mimi sasa najongea penye Moyo Wako. Nakuona huwezi chochote tena ila tu Pendo linalia kwa nguvu zaidi: “Maumivu zaidi tena!”.

Yesu Wangu, ninakukumbatia na kujibana penye Moyo Wako, ninakubusu, ninakuonea huruma, ninakuabudu na ninakushukuru kwa ajili yangu mwenyewe na kwa ajili ya wote. Ee Yesu, ninatamani kulaza kichwa changu juu ya Moyo Wako ili nisikilize maumivu unayoyapata katika Mateso haya ya kusulibishwa. Ah! Ninasikia kila pigo la nyundo likitoa sauti ya kugonga katika Moyo Wako. Moyo Wako ni kituo mama cha kila teso: Toka hapo yanachimbuka maumivu na hapo ndipo yanapomalizikia. Ni kwa vile tu unangojea bado mkuki ukuchome na ukutoboe vinginevyo miali ya moto wa Upendo na Damu yako inayochuruzika kwa ndani vingejitokeza nje na kupasua Moyo Wako. Damu hii na miali hii ya moto vinaita roho za watu wale wanaokupenda wapende kufanya makao ya furaha ndani ya Moyo Wako. Na mimi, kwa ajili ya Pendo la Moyo Wako na la Damu yako azizi, nakuomba Ee Yesu, neema ya utakatifu wa roho za wale wakupendao. Ee Yesu, usikubali kamwe roho hizo zikatoka kwenye Moyo Wako na kwa neema yako. Uongeze miito ya roho kafara ambazo zitaendeleza Uhai wako duniani. Wewe umependa kutoa nafasi ya pekee ya upendeleo katika Moyo Wako kwa roho zile zikupendazo, ufanyize wasipoteze kamwe nafasi hiyo waliyopata. Ee Yesu, miali ya moto wa Moyo Wako iniunguze na kunimaliza, Damu yako initakase na iwe marashi yangu, na pendo lako linishikilie nibaki nimepigiliwa misumari kwenye Pendo lenye Mateso na lenye kulipa fidia.

Ee Yesu Wangu, wauaji wamemaliza kupigilia misumari mikononi na miguuni mwako juu ya Msalaba na wanaugeuza ili wagonge misumari toka upande wa nyuma. Wanaulazimisha Uso wako mwabudiwa uguse ardhi iliyokwisha kulowa kwa Damu yako Mwenyewe. Na Wewe, kwa Mdomo wako wa kimungu, unaibusu hiyo ardhi. Kwa busu hilo, Ee Pendo Langu Tamu, unamaanisha kubusu roho zote, na kuzifungia kwenye Pendo Lako, na hivyo kutia muhuri wa wokovu wao. Ee Yesu, uniruhusu nishike nafasi yako ili wauaji wako wanapogonga misumari kwa mara nyingine, mapigo hayo yaniumize mimi pia na yanipigilie nafsi yangu yote kwenye Pendo Lako.

Yesu Wangu, nakiweka kichwa changu ndani ya Kichwa chako. Kama vile miiba inavyozidi kuzama ndani ya Kichwa Chako, nataka kukutolea, Ee Chema Changu Mtamu, mawazo yangu yote ili, kama mabusu ya upendo, yakuletee faraja na yalainishe machungu ya miiba yako.

Ee Yesu, nayaweka na macho yangu ndani ya Macho yako, na ninatambua kuwa maadui wako hawajatosheka bado kukutukana na kukudhalilisha. Nami, unaponiangalia kwa Macho yako ya kimungu, natamani nikufariji kwa kukutazama kwa macho yangu ya upendo.

Nauweka sasa na mdomo wangu ndani ya Mdomo wako, Ee Yesu. Ulimi wako karibu umenata ukingoni mwa Mdomo kwa sababu ya uchachu wa nyongo na sababu ya kuungua kwa kiu kikali. Ili kukupoza kiu chako, Ee Yesu Wangu, ungependa uipate mioyo yote ya viumbe inayofurika upendo. Lakini kwa kukosa kuipata hiyo mioyo, unazidi kuungulia kwa ajili yao. Pendo Langu Mtamu, natamani kukuletea mito ya upendo kusudi kwa namna fulani niweze kupunguza uchachu wa nyongo na uchachu wa kiu chako kikali.

Ee Yesu, naiweka mikono yangu ndani ya Mikono yako. Katika mtikisiko wowote wa Mwili wako, madonda ya Mikono yako hupasuka zaidi na maumivu huwa makali na machungu zaidi na zaidi. Ewe Mpenzi Chema Changu, ninakutolea matendo matakatifu ya viumbe vyote kwa ajili ya kukutuliza na kunogesha Teso lako hilo.

Ee Yesu, ndani ya Miguu yako ninaingiza na miguu yangu. Ni Mateso gani hayo unayopata katika Miguu yako mitukufu! Mitikisiko yote ya Kiwiliwili chako kitukufu hurudia kugonga maumivu kwenye Miguu yako. Hakuna mtu aliye jirani nawe ili kukushikilia na kulainisha kidogo uchungu wa maumivu yako. Ewe Uhai Wangu Mtamu, natamani niunganishe tena hatua na miondoko ya viumbe vya vizazi vyote vilivyopita, vya sasa na vya baadaye, na nitaelekeza hatua hizo zije kwako kwa lengo la kukufariji katika maumivu yako makali.

Yesu Wangu, naingiza moyo wangu ndani ya Moyo Wako masikini. Ona jinsi ulivyoumia na kuchoka hoi hai! Ukitikisa Miguu tu, neva za kona ya chini kabisa ya Moyo zinashituka sana. Ikitikisika Mikono tu, neva za kuta zote za Moyo zinajivuta na kukaza zaidi ya kupigiliwa na misumari. Kichwa kinapotikisika, kidomo cha Moyo hutoa Damu na kupata maumivu ya usulibisho wote! Ee Yesu Wangu, nitulize namna gani maumivu hayo? Hebu mimi sasa niyeyukie ndani yako, niweke moyo wangu ndani ya Moyo Wako, matamania yangu makali ndani ya matamania yako kusudi tamania lolote baya lipate kuteketezwa.

Nitayeyushia na pendo langu ndani ya Pendo Lako kusudi, kwa moto wako, iunguzwe mioyo ya viumbe vyote na yateketezwe mapendopendo potovu ya kidunia. Ndipo Moyo Wako Mtukufu utabaki umefarijika. Mimi tangu sasa ninaahidi, Ee Yesu, kubaki nimepigiliwa kwa misumari kwenye Moyo huu wa mapendo kabisa. Nipigiliwe kwa misumari ya Matamania yako, ya Pendo Lako na ya Utashi wako.

Ee Yesu Wangu, unasulibiwa Wewe, mimi ninasulibiwa ndani yako. Usiruhusu misumari iondolewe kwa namna yoyote ile ili nisitengane na Wewe, bali nibaki daima nimepigiliwa kwako, ili niweze kukupenda na kukulipa fidia kwa ajili ya watu wote na nilainishe maumivu, ambayo yanasababishwa na viumbe kwa makosa yao.

Yesu Anainuliwa Msalabani

Yesu Wangu Mwema, ninaangalia jinsi maadui wako wanavyoinua huo mti mzito wa Msalaba na halafu wanavyoachilia utumbukie wenyewe ndani ya shimo waliloliandaa. Wewe, Pendo Langu Tamu, sasa unaning'inia kati ya Mbingu na dunia. Katika dakika hii kuu unamwelekea Baba na kwa sauti laini na dhaifu sana unamwambia:

“Baba Mtakatifu, nitazame nipo hapa, nimebebishwa dhambi zote za dunia. Hakuna kosa hata moja ambalo halijatupwa juu yangu. Kwa hiyo usitwishe tena mapigo ya Haki yako Tukufu ya kimungu juu ya binadamu bali utwishe juu yangu Mimi Mwanao. Ee Baba, uniruhusu nifungilie roho zote kwenye Msalaba huu, kwa ajili yao niwaombe radhi katika sauti ya Damu yangu na ya madonda yangu. Ee Baba, je hunioni jinsi nilivyochakaa hata kwisha? Kwa njia ya Msalaba huu, kwa nguvu ya Mateso haya, uwajalie wote uongofu wa dhati, amani, msamaha, na utakatifu.

Sala Kwa Ajili Ya Kutegua Hukumu ya Haki Ya Mungu

Yesu, wakati upo umepigiliwa Msalabani, roho yako haipo tena duniani, bali ipo Mbinguni pamoja na Mungu Baba yako. Iko pale kwa ajili ya kutetea na kuombea kesi za roho zetu.

Pendo Langu Msulibiwa, na mimi natamani nikufuate pale kwenye Kiti cha Mungu wa Milele kusudi pamoja nawe niweze kutegua Hukumu ya Haki ya Mungu. Ubinadamu wako Mtukufu nautwaa mimi na kufanya kuwa wangu kabisa. Hapo nikiwa nimeunganika na Utashi wako na nikiwa pamoja Nawe nataka nitende kile kile unachotenda Wewe. Uruhusu Ewe Uhai Wangu, kwamba mawazo yangu yatiririkie ndani ya mawazo yako. Pendo langu, utashi wangu, na matamano yangu yaingie ndani ya yale ya kwako, na mapigo ya moyo wangu yatiririkie ndani ya Moyo Wako na nafsi yangu yote iingie ndani ya Nafsi yako. Iwe hivyo kusudi pasiwe na kitu kinachoweza kunitoroka na kusudi niweze daima kurudia, tendo kwa tendo, neno kwa neno, kila kitu unachofanya Wewe.

Naona, Msulibiwa Chema Changu, unapona Baba Yako Mtukufu amesikitishwa mno mno na viumbe, Wewe unajilaza mbele yake na unaficha viumbe vyote ndani ya Ubinadamu wako mtukufu. Na hivyo unatuweka katika usalama kamili ili Baba anapotuangalia huku tukiwa ndani yako, kwa ajili ya upendo kwako, asiweze kamwe kukifukuza kiumbe mbele yake. Na kama Baba anakiangalia kiumbe kwa sikitiko na hasira ni kwa hoja kwamba roho nyingi zimevuruga na kuchafua ile sura nzuri iliyoubwa Naye na zinayo mawazo tu ya kumkosea. Na akili yao ambayo ilitakiwa ijishughulishe kumjua Mungu wao, wanaigeuza iwe ni kichaka yanapofichama madhambi yote. Na Wewe, Ee Yesu Wangu, kwa ajili ya kumtuliza, unamwita Baba Mtukufu akuelekee na kutazama Kichwa chako kitukufu kilichotobolewa na miiba na chenye uvimbe mwingi ulioja maumivu makali sana. Kwa njia hiyo unazishikilia akili za viumbe vyote zikiwa zimepigiliwa misumari kwenye akili yako. Kwa ajili ya kila moja ya akili hizo Wewe unalipa malipizi ya kutuliza na kufidia Haki ya Mungu. Oh! Ona jinsi miiba hii inavyoleta msamaha kwa mawazo yote mabaya ya viumbe ikitoa sauti za huruma mbele ya Utukufu wa Mungu!

Yesu Wangu, mawazo yangu sasa ni kitu kimoja na mawazo yako. Kwa hiyo, pamoja nawe ninaomba, ninaomboleza, ninaomba radhi na ninalipa fidia mbele ya Utukufu wa Mungu kwa ajili ya mabaya yote yaliyotendeka na viumbe kupitia akili yao. Uniruhusu nitwae miiba yako na akili yako yenyewe ili niende pamoja Nawe kwa viumbe vyote nikachomeke akili yako kwenye akili yao. Natamani niwarejeshee akili ile uliyoiumba hapo mwanzoni, yaani akili yenye utakatifu wa akili Yako. Kwa utakatifu wa mawazo yako nataka nipange upya mawazo yote ya viumbe ndani yako. Nataka kwa miiba yako, nitoboe akili zote za viumbe ili nikurejeshee mamlaka yako, himaya yako na ufalme wako juu ya watu wote. Ee Yesu, Wewe peke yako uwe mtawala wa kila wazo, wa kila upenzi na wa mataifa yote. Tawala Wewe kila kitu. Kwa namna hiyo tu, uso wa dunia unaotisha na kuogofya utaweza kubadilika.

Yesu Msulibiwa, unaendelea kuona kwamba Mungu Baba, akiwa amekasirika, anaviangalia viumbe masikini na anaviona vyote vimejaa na kuchafuka kwa madhambi na vimefunikwa na mavazi machafu yanayoleta kinyaa Mbinguni pote. Oh, ni jinsi gani uzuri wa Macho ya Mungu ulivyoshituka kwa vile karibu angeshindwa kukitambua kile kiumbe masikini kilichokuwa ni kazi ya Mikono yake mitukufu! Kwa kweli yaonekana kuwa kuna viumbe vingi vya kutisha vilivyojaa duniani ambavyo vinachokoza hasira ya jicho la Mungu Baba.

Wewe Ee Yesu Wangu, ili kutuliza hasira yake, unajaribu kunogesha. Unabadilisha Macho yake na Macho yako na hivyo kumfanya aone Macho yako yamezibwa na Damu na yamevimba kwa machozi. Mbele ya Utukufu wa Mungu unalia ili kuushitua uanze kuonea huruma mkasa wa Viumbe vingi sana masikini. Na ninasikia sauti yako inayosema:

“Baba yangu, ni kweli kwamba kiumbe kisicho na shukrani kinazidi kuongeza dhambi hata kutoweza kustahili tena kutazamwa kwa Macho yako ya kibaba. Lakini sasa unitazame mimi, ee Baba, mbele yako natamani kulia sana hata patokee bwawa la machozi na damu ili nioshe uchafu huo uliowafunika viumbe. Baba yangu, je labda unataka kunikana Mimi? La hasha, huwezi kunikana kabisa, Mimi ni Mwanao. Na pindi Mimi ni Mwanao, papo hapo mimi ni Kichwa cha viumbe hawa wote na wao ni viungo vya Mwili wangu. Hebu tuwaokoe Ee Baba, hebu tuwaokoe!”

Yesu Wangu, Pendo Uliyeonewa ningependa nipate Macho yako ili nilie mbele ya Utukufu Mkuu kwa ajili ya kuangamia kwa viumbe vingi sana masikini na kwa ajili ya nyakati hizi za kusikitisha sana. Uniruhusu nitwae machozi yako na hata Macho yako yenyewe ili kuwa kitu kimoja na ya kwangu. Halafu nakwenda kwa viumbe vyote. Ili kuwashitua na kuwafanya roho zao zishikwe na huruma kwa Pendo Lako, nitawafanya waone kuwa Wewe unawalilia wao. Na wakati wao wanaendelea kujichafua kwa dhambi Wewe umeandaa machozi yako na Damu yako kwa ajili ya kuwaosha. Watakapokuona unalia, watashituka na kuguswa na watajitambua. Ndiyo, uniruhusu, kwa njia ya machozi haya, nioshe uchafu wote wa viumbe: Machozi hayo yashuke ndani ya mioyo yao, yakalainishe roho zile nyingi zilizoshupaa na zilizo sugu katika dhambi na yakaushinde ukaidi na kiburi cha mioyo yote.

Kwa mtazamo wa Macho yako, uniruhusu niweze kupenya ndani ya viumbe hata viinue vyote macho yao mbinguni ili kukupenda badala ya kupotea hapa duniani kwa ajili ya kutenda makosa dhidi yako. Kwa namna hiyo Baba Mtukufu hatakuwa na hasira tena wakati atakapouangalia Ubinadamu masikini.

Yesu Msulibiwa, ninaona kwamba Baba Mtukufu bado hapoi katika hasira yake. Ni kwa vile wakati Mungu ameshikwa na upendo mkubwa kabisa kwa kiumbe masikini, hata wakati wema wa kibaba umejaza mbinguni na duniani mambo mengi yanayoshuhudia upendo wake na fadhili zake kwa viumbe, na wakati katika kila hatua ya binadamu, na katika kila tendo lake, anashuhudia upendo na neema mbalimbali za Moyo wa kibaba wa Mungu zikimtiririkia, hata hivyo kiumbe huyo anakosa shukrani daima, anadharau Pendo hilo, na hataki kabisa kulitambua. Kinyume chake kiumbe anatenda yale yanayopingana na Pendo hilo: Anajaza matusi Mbinguni na duniani, anajaza madharau, makosa ya udhalilishaji, analikanyaga Pendo hilo kwa miguu yake michafu, anataka kulibomoa na kuliangamiza, anataka kujiabudu yeye mwenyewe. Ah! Makosa hayo yote yanapenya hadi mbinguni na yanafika mbele ya Utukufu wa Mungu! Oh! Jinsi gani Mungu anavyokasirika anapoona kuwa kiumbe dhaifu anathubutu kulidharau na kulikana Pendo kwa mitindo na njia mbalimbali! Lakini Wewe, Ee Yesu Wangu, unayedhamiria dama kututetea kwa nguvu ya sumaku ya Pendo Lako, unamlazimisha Mungu Baba aangalie kwenye Uso wako Mtukufu uliojaa na kufunikwa na matusi hayo yote na madharau hayo. Unasema:

“Baba Yangu, usiwakasirikie viumbe hawa masikini. Kama unawakasirikia hao, basi unikasirikie mimi. Da! Hebu tulia! Makosa hayo yote nimeyabeba mimi juu ya Uso wangu ambao sasa unakuitikia kwa ajili ya wote. Baba Yangu, thibiti hiyo hasira yako dhidi ya hawa binadamu masikini: wote ni vipofu na hawajui walitendalo. Kwa hiyo uniangalie mimi jinsi nilivyochakaa hoi hai, yote kwa ajili yao. Kama huguswi na kuona huruma kwa ajili ya binadamu hawa masikini basi ukulainishe na kukutuliza huu Uso wangu uliochafuliwa na mate waliyonitemea, uliofunikwa na Damu, uliochubuliwa na kuvimba kutokana na makofi waliyonipiga na ngumi nilizopata. Huruma, Baba Yangu! Ni Mimi niliyekuwa mzuri kupita wote, lakini sasa nimechafuka, nimeharibika, na sina sura hata hawanitambui tena. Nimekuwa ni chukizo kwa watu wote. Kwa hiyo, kwa gharama yoyote ile natamani kumkomboa kiumbe masikini huyu!”

Yesu Wangu, je ni kweli Wewe unatupendana sana? Pendo lako linavuruga na kusumbua moyo wangu masikini. Kwa kuwa natamani kukufuata na kukuiga katika kila kitu, uniruhusu nitwae Uso wako Mtukufu na kuuweka chini ya mamlaka yangu: Nitautwaa Uso wako huu uliochafuka na kuuonyesha kwa mfululizo kwa Mungu Baba ili kumshitua aguswe na kukihurumia kizazi chote masikini cha binadamu ambacho kinakabiliwa na hukumu kali ya Haki ya Mungu kiasi kwamba kimeanguka chini kukaribia kufa. Halafu basi uniruhusu niende kuzunguka kati ya viumbe vyote ili nikawaonyeshe pia huo Uso wako ulioharibika kiasi hicho kwa ajili yao. Nataka nikawashitue waguswe kuona uchungu juu ya roho zao na waone huruma juu ya Pendo lako. Na kwa nguvu ya nuru itokayo katika Uso wako huo na kwa nguvu ya sumaku ya Pendo Lako, uwajalie watu wafikie kujua na kuelewa Wewe ni Nani na wao wenyewe ni nani hata wanadiriki kukutendea mabaya hayo: Uwajalie pia roho zao zizinduke kutoka katika mauti ya makosa yao mengi na wafufuke katika neema. Uwajalie hatimaye wote waanguke magotini mbele yako katika tendo la kukuabudu na kukutukuza.

Yesu Wangu, Msulibiwa Mwabudiwa, kiumbe anaendelea daima kuchokoza na kukasirisha Haki ya Mungu. Kutoka mdomoni mwake kunasikilika bado sauti za makufuru makubwa, sauti za matusi na kuapa katika Jina la Mungu, mazungumzo machafu, njama za kutekeleza mauaji na namna ya kutesa watu. Ah! Masauti hayo yote yanajaza na kuziwisha dunia na yanapenya hadi Mbinguni na kuziwisha hata masikio ya Mungu. Yeye Mungu anachoshwa na mwangwi huo wenye sumu unaoletwa na viumbe. Angependa basi aangamizie mbali kiumbe kwa kukifukuzia mbali kutoka usoni pake. Anataka kutekeleza hilo kwa vile masauti hayo yote yenye sumu yanamtukana na kwa hiyo yanaita na kuchokoza kisasi na haki dhidi ya kiumbe chenyewe. Oh! Ni jinsi gani basi Haki ya Mungu inaonja kusukumwa na kulazimika kuteremsha kipigo cha mijeledi! Oh! Ni jinsi gani hali hiyo ya makufuru mengi na ya kutisha inawasha hasira ya Mungu dhidi ya kiumbe! Lakini Wewe, Ee Yesu Wangu, kwa vile unatupenda kwa Pendo Kuu, unayakabili masauti hayo yote machafu na ya machukizo kwa kupambanisha na Sauti yako yenye enzi na uwezo mkuu, uwezo wa kuumba. Ndanimo unayakusanya masauti hayo yote na unamfanya Mungu Baba asikie Sauti yako hiyo tamu kabisa. Hiyo inamburudisha na kumtuliza dhidi ya matusi yatolewayo na viumbe. Badala yake Baba anasikia sauti za kutukuza, za kusifu na anasikia pia kilio cha huruma, cha neema, cha Upendo kwa ajili ya kiumbe masikini. Na ili kumtuliza Baba zaidi, unafungua na kumwonyesha Mdomo wako na unasema:

“Baba Yangu, hebu rudia kuniangalia mimi. Usisikilize hizo sauti za viumbe bali sikiliza Sauti yangu. Ni mimi mwenye kulipa fidia kwa yote hayo na kwa ajili ya hao wote. Kwa hiyo nakuomba ukiangalie kiumbe na ukiangalie kikiwa ni ndani yangu. Ukikiangalia wakati kipo nje yangu kutatokea nini kwake? Kiumbe ni kidhaifu, kijinga, kina uwezo tu wa kutenda mabaya, kimejaa matatizo na uharibifu. Huruma, hurumia kiumbe masikini! Mimi ninajibu kwako kwa niaba ya kiumbe, ninakujibu kwa ulimi wangu huu uliochomeka kwa nyongo, uliokaukiwa kwa kiu, uliunguzwa tena na tena kutokana na Pendo”.

Yesu Wangu Uliyesikitishwa, sauti yangu inapokuwa ndani ya Sauti yako, inataka kukabiliana na makosa hayo yote. Uniruhusu nitwae Ulimi wako, na Midomo yako, ili niwazungukie viumbe wote na kugusisha Ulimi wako juu ya ulimi wa kila mmoja wao kila wakati wanapokukosea au kukutukana. Watakapoonja tu uchungu wa ulimi wako, hakika watakoma kukufuru tena, kama siyo kwa hoja ya kukupenda, basi walau kwa hoja ya uchachu na uchungu watakaokuwa wanauonja. Uniruhusu nigusishe midomo yao kwenye Midomo yako. Watakapoonja moto wa dhambi juu ya midomo yao wote, na watakaposikia tena Sauti yako kuu ya enzi na ya mamlaka ikilia kifuni mwao, nitaweza kusimamisha na kuzuia mkondo wa sauti zote chafu na nitageuza sauti zote za kibinadamu ziwe ni sauti za utukufu na sifa kwa Mungu.

Yesu Wangu Msulibiwa, kiumbe, hata mbele ya mapendo yako makubwa na mbele ya Mateso yako, hashituki na wala hajali kabisa. Ajabu, anaendelea kukudharau, anazidi kuongeza kosa juu ya kosa, anazidi kutenda makufuru makubwa ya ajabu, mauaji ya watu, kujiua, kupigana na kugombana, kudanganya, ujanja, kusema uongo, ukatili na usaliti. Ah! Matendo hayo yote mabaya huongeza uzito unaoielemea na kutesa Mikono ya Mungu Baba! Na Mungu Baba, kwa kukosa nguvu za kushikilia uzito huo, anaelekea kuteremsha mikono na kumwaga hasira yake na maangamizi juu ya dunia. Na Wewe, Ee Yesu Wangu, ili uweze kukinyakua kiumbe ili kukiokoa na hasira ya Mungu, ukihofu kushuhudia maangamizi yake, unamnyoshea Baba Mikono yako kusudi asiiteremshe kwa ajili ya

kukiangamiza kiumbe. Wakati unapomsaidia Baba kushikilia uzito kwa Mikono yake, papo hapo unatekeleza zoezi la kutegua na kuzuia Haki isichukue mkondo wake. Na kwa ajili ya kumvuta Baba awe na huruma kwa kizazi masikini cha binadamu na kwa ajili ya kumlainisha unamwambia Baba kwa sauti laini na nzuri inayogusa Moyo:

“Baba Yangu, tazama Mikono yangu hii iliyotobolewa na kuchubuliwa, tazama na misumari hii inayotoboa Mikono yangu na niliyopigiliwa pamoja na matendo haya yote mabaya. Ah! Ni katika Mikono yangu hii ninamosikia maumivu makali yote yanayotokana na matendo mabaya! Je, Ee Baba Yangu, hujaridhika bado na Mateso yangu? Je, labda hayatoshelezi bado kuweza kulipa malipizi? Ni kweli kabisa, Mikono yangu hii, iliyolegezwa toka mabegani itakuwa daima ni minyororo inayoshika na kuvibana viumbe masikini ili visiweze kamwe kunitoroka isipokuwa viumbe vile ambavyo vilitaka kujitoa kwa mabavu yao. Na Mikono hii yangu itakuwa ni minyororo ya upendo itakayokufunga Wewe Baba yangu ili kukuzuia usiangamize kiumbe masikini. Kwa kweli nitakuwa nakuvutia karibu na kiumbe kusudi ukimwagie neema zako na huruma”.

Yesu Wangu, Pendo lako ni ushawishi mkali na mtamu kwa ajili yangu. Linanisukuma nitende lile unalotenda Wewe. Basi kwa hiyo unipatie Mikono yako, kwani pamoja nawe nataka kuzuia kwa gharama iwe yoyote ile ya Mateso, kwamba Haki ya Mungu isichukue mkondo wake dhidi ya kizazi masikini cha binadamu. Na ili kumsukuma Baba awe na huruma juu ya viumbe, uniruhusu niweke mikononi mwako watu wale wote wanaoteseka, machozi ya wale wengi masikini walioumizwa na mambo mbalimbali, na mioyo mingi yenye mateso na inayodhulumiwa. Uniruhusu niviendee viumbe vyote na niviingize na kuvibana ndani ya Mikono yako kusudi viumbe wote warejee kwenye Moyo wako. Uniruhusu kwa nguvu ya Mikono yako ya uumbaji nizuie na kusimamisha mkondo wote wa matendo mengi maovu na nizuie watu wote wasiweze kutenda mabaya.

Mpendwa Wangu Yesu Msulibiwa, kiumbe bado hajafikia kuridhika na kutenda makosa dhidi yako. Anataka anywe machicha yote ya makosa hadi yale yaliyo chini kilindini. Anakimbia huko na huko kama kichaa katika njia ya mabaya. Anajitumbukiza kutoka kosa hili hadi lingine, anakaidi kutii sheria na taratibu zako. Anagoma kukutambua, anakuasi, na kwa lengo la kukudharau anatamani kwenda motoni. Oh! Ni hasira gani anayopata Yeye aliye Utukufu Mkuu na wa Juu! Na Wewe, Ee Yesu Wangu, Wewe Mshindi katika yote, unayeshinda hata kiburi cha viumbe, kwa ajili ya kumtuliza Mungu Baba, unamwonyesha Ubinadamu wako mtukufu wote. Unamwonyesha jinsi ulivyochubuka, jinsi ulivyolegea katika viungo vyote na sehemu zote, jinsi ulivyoharibika na kuchakazwa kwa namna ya kutisha. Unamwonyesha Miguu yako mitukufu iliyotobolewa na ambayo ndanimo zipo hatua zote na miondoko yote ya viumbe. Unamwonyesha jinsi inavyokuletea Mateso ya kufani na jinsi ilivyovimba na kupindapinda kutokana na maumivu unayopata. Ninasikia Sauti yako nzuri na ya kuvutia sana kama ya mtu anayevuta hewa na kupumua, ni sauti ya mtu anayetaka kukishinda na kukiteka kiumbe kwa nguvu ya upendo na Mateso. Ni sauti ya kutaka kujipatia ushindi na mafanikio juu ya Moyo wa Baba. Unasema:

“Baba Yangu, nitazame kuanzia kichwani hadi miguuni: hakuna sehemu iliyo nzuri, nzima na salama. Hakuna mahali pa kuongeza madonda mengine ili nipate Mateso zaidi. Kama hutulii na kusamehe

mbele ya hali hii ya Pendo na Mateso, je ni nani mwingine ataweza kuja kukutuliza? Ee viumbe, kama hamshituki na kuguswa na Pendo Kuu hili, je kuna tumaini gani lingine linabaki kwa ajili ya uongofu wenu? Madonda yangu haya na Damu yangu hii vitakuwa daima ndiyo sauti zinazoita toka mbinguni ili kushusha duniani neema za majuto, msamaha na huruma kwa ajili ya kizazi masikini cha binadamu”.

Yesu Wangu, nakuona umeingia katika hali ya mapambano kwa ajili ya kumtuliza Baba na kwa ajili ya kukishinda kiumbe masikini. Uniruhusu nitwae Miguu yako mitukufu nipate kuvizungukia viumbe vyote. Nitafunga hatua na miondoko yao kwenye Miguu yako. Na kwa hiyo, kama watataka kutembea katika njia ya maovu, watakuwa wanaonja na kusikia minyororo uliyofungia miguu yao kwenye Miguu yako. Watashindwa kutembea! Deh! Kwa nguvu ya hii Miguu yako uwajalie warejee kutoka njia ya maovu na uwaingize katika njia ya wema na uwafanye wawe wasikivu zaidi kwa sheria zako. Na kwa nguvu ya misumari yako ufunge na kuziba mlango wa jehamu ili pasiwepo na mtu tena anayeangukia huko.

Yesu Wangu, Msulibiwa Unayependa, nakuona unaishiwa nguvu na huwezi tena: pale msalabani unaonja mvuto wa Mwili kuelemea chini, unaonja mgongano na msugungano, hata ule mdogo kabisa unaoendelea wa mifupa yako, mgongano na msugungano unaosababishwa na kila mtikisiko wa Mwili. Nyama za mwilini zinazidi kupasuka, kuchanika na kukatika. Matusi yanaendelea kuelekezwa kwako bila kukoma, na hivyo kukuongezea maumivu na kukuletea Kifo chenye Mateso zaidi. Kiu kikali sana kinachokumaliza ni maumivu ya ndani yanayojaza Moyo wako kwa machungu na Mateso ya Upendo. Pia ufedhuli wa binadamu wa kukosa shukrani unaoukabili katika Mateso yako yote. Ni Teso linalopenya Moyo wako uliotobolewa, na hupenya kama vile mkondo mkali wenye mawimbi. Maumivu hayo yote yanakudidimiza sana, kiasi kwamba Mwili wako mtukufu unashindwa kustahimili kutokana na uzito unaoelemea chini. Ubinadamu wako mtukufu unaelekea kumalizika. Unalia kwa upendo, na kwa kuteseka, na unaomba msaada na huruma.

Yesu Msulibiwa, inawezekana hilo? Wewe unayetawala vyote, Wewe mtoa uhai kwa wote, ni kweli sasa unaomba msaada kwa viumbe? Ah! Jinsi gani natamani nipenyeze ndani ya kila tone la Damu yako na nikumwagie damu yangu ili kukunogeshea kila donda lako. Nataka pia kuondoa maumivu yatokanayo na kila mwiba. Nitapunguza ukali wa ncha ya kila mwiba ili isilete maumivu mno. Nataka pia kunogesha maumivu ya ndani ya Moyo wako na kupunguza ukali wa machungu yaliyomo. Nataka nikupatie uhai kwa uhai. Na kama ningekuwa na uwezo, ningekufungua toka msalabani na badala yake nichukue nafasi yako. Lakini najitambua kuwa mimi si kitu na wala siwezi kitu. Mimi ni duni mno, sina bei yeyote, sitambuliki. Kwa hiyo basi unipe Nafsi yako Mwenyewe. Nitachukua Uhai ndani yako na hapo ndani nitakutoa Wewe kwako Wewe Mwenyewe. Hapo lazima utaridhika na maombi yangu na kilio changu. Yesu Uliyechakaa na kuchakarika, ninaona Ubinadamu wako mtukufu unakwisha siyo kwa ajili yako, bali kwa ajili ya kutimiza na kukamilisha ukombozi wetu katika kila kitu. Unahitaji msaada wa kimungu na kwa hiyo unajitupa mikononi mwa Baba ukiomba kwake msaada na tulizo. Oh! Ni jinsi gani Mungu Baba anavyojilainisha anapoangalia majeraha na Mateso ya kutisha ya Ubinadamu wako Mtukufu! Mambo ya kutisha yaliyosababishwa na dhambi juu ya sehemu za Mwili wako! Na kwa ajili ya kuridhisha njaa zako za upendo, unajisogeza na kujibana kwenye Moyo wa Baba na Yeye

anakupatia misaada itakiwayo kwa ajili ya kukamilisha ukombozi wetu. Wakati unapojibana unasikia moyoni mwako yakijirudia kwa nguvu zaidi yale mapigo ya nyundo juu ya misumari, ukali wa mijeledi, kupasuka kwa madonda yako na matobo ya miiba. Oh! Na hapo hebu ona jinsi Baba anavyoguswa moyoni! Ni jinsi gani anavyosikitika, anapoon kuwa maumivu haya yote yanafika hadi ndani ya Moyo wako yakisababishwa pia hata na watu wako wa wakfu! Na katika Teso lake Baba anakuambia:

“Kweli inawezekana hayo Mwanangu? Kwamba hata wale uliowachagua wamekuacha? Yaani inaelekea kwamba roho hizi zinaomba kukimbilia na kufichama ndani ya Moyo wako kwa lengo la kukusababishia machungu na kukuletea kifo cha Mateso zaidi? Zaidi ya hilo, Mateso haya yote wanayokusababishia yamefichikana na yamefunikwa na unafiki. Ah, Mwanangu! Siwezi kuendelea kuhimili hasira na uchungu kwa ufedhuli wa kukosa shukrani kutoka kwa roho hizi, ambazo zinanitesa hata Mimi zaidi kulikoni viumbe vingine vyote katika ujumla wao”. Wewe, Ee Yesu Wangu, Mshinda katika yote, unatetea roho hizi. Pia kwa upendo mkuu wa Moyo wako Wewe unazilipia malipizi kwa wimbi la machungu na majeraha unayoletewa na roho hizi. Na ili kumtuliza Baba, Wewe unamwambia:

“Baba Yangu, angalia Moyo wangu huu: Mateso haya yote yakutulize. Kadiri yanavyozidi kuwa makali, ndivyo yawe na nguvu zaidi na uwezo juu ya Moyo wako wa kibaba, kwa ajili ya kuomba neema, nuru na msamaha kwa ajili ya roho hizi. Baba Yangu, usiwakane. Hawa watakuwa watetezi wangu na ndio watakaoendeleza Uhai wangu duniani. Ee Baba wa upenzi, hebu fikiria: Kwamba Ubinadamu wangu umefikia sasa ukomo wa uchungu wake, na kama na Moyo wangu huu pia unapasuka kutokana na machungu, maumivu ya ndani, na Mateso mengi yasiyopata kusikika niliyoyapata katika kipindi hiki cha miaka thelathini na miinne (34), yaani kuanzia dakika ile ya kwanza ya Umwilisho wangu. Wewe unajua, Ee Baba, ukali wa machungu haya yaliyo ndani yangu, ambayo kwa yenyewe yangetosha kunifanya nife wakati wowote wa Mateso, kama isingekuwa ni uwezo wetu mkuu unaonishikilia na kunitegemeza ili mradi niongeze muda wa kuteswa hadi kufikia Teso hili kali kabisa la umahututi. Ah! Mpaka sasa nimekuwa ninakutolea maumivu yote ya Ubinadamu wangu mtukufu kwa lengo la kutuliza Haki Yako (Hukumu yako) inayowakabili wote na pia kwa lengo la kuvutia huruma yako ishindayo juu ya wote. Sasa nakuletea huu Moyo wangu uliojeruhiwa vibaya. Moyo uliokamuliwa na kupondeka katika kinu cha dakika zote za maisha haya yanayopita, hasa hasa kutokana na kuvunjwa kwa amri zako kunakotendeka na roho zilizojiweka wakfu kwetu.

Angalia Baba Yangu: Huu ndio Moyo ambao umekuwa unakupenda kwa pendo lisilokoma, ni Moyo ulioundulia upendo kwa ajili ya ndugu zangu, wana wako ndani yangu mimi. Huu ndio Moyo mkarimu ambao kwa nguvu ya Pendo lake nimekuwa natamani kuteswa ili niweze kukulipa malipizi timilifu kwa dhambi zote za binadamu. Uuhurumie Moyo huu katika upweke wake, katika mahangaiko na machungu yake yasiyokoma, katika Mateso yake makali, katika machovu yake na katika uchungu wake mkali mbele ya Kifo!

Ee Baba Yangu, Je labda kumewahi kutokea pigo la Moyo Wangu hata moja tu ambalo halikutafuta Utukufu wako kwa gharama ya maumivu na Damu? Na je, kuna pigo la Moyo ambalo halikutafuta

wokovu wa ndugu zangu? Je si kweli kwamba kutoka katika Moyo huu uliodhulumiwa daima na Mateso kumetoka sala na maombi makali kwa machozi, kwa pumzi, kwa vilio na kwa miito ya nguvu, ambayo kwayo nimekulilia na kukuita kuomba huruma mbele ya Uso wako? Wewe umekuwa unanisikiliza, Ee Baba Yangu, katika nafasi nyingi na kwa ajili ya roho nyingi bila kikomo. Kwa hilo ninakushukuru bila kikomo. Lakini, hebu angalia Ee Baba Yangu, jinsi Moyo wangu huu usivyoweza kamwe kutulia katika Mateso yake endapo hata roho moja tu ikipotea! Ni kwa vile Sisi tunapenda kabisa roho moja kwa jinsi ile ile tunavyopenda roho zote kwa pamoja. Je si kweli kusema imenipasa nitoe pumzi yangu ya mwisho juu ya gogo hili la Mateso kwa vile ninashuhudia hata roho za watu wangu wa wakfu zikipotea bila msaada wowote? Mimi ninakufa katika bahari ya manyanyaso na maumivu kwa ajili ya ubaya na upotevu wa milele wa Yuda msaliti. Alikuwa mgumu mno, mtu fedhuli bila shukrani, aliyenigomea kila ishara na ushawishi wa kimapenzi na laini nilioelekeza kwake. Ni mtu niliyemtendea fadhili sana hata nilimfanya Padre na Askofu sawa kama Mitume wangu wengine. Ah! Baba Yangu, yatosha janga hili la maumivu! Ni roho ngapi ninazoziona, ambazo zilichaguliwa Nasi kwa ajili ya ufuasi mtakatifu wa aina mbili, ambazo zinapenda kumwiga Yuda, baadhi wanamwiga sana na baadhi wanamwiga kidogo!

Baba Yangu, unisaidie, unisaidie! Siwezi kuvumilia Mateso haya yote. Angalia kama kuna mshipa hata moja katika Moyo wangu ambao hauteseki na kuumia zaidi ya sehemu zote za Mwili wangu Mtukufu. Angalia kama Damu yote ninayomwaga haitiririki zaidi kutoka katika Moyo wangu kuliko ile itokayo katika madonda yangu; hata Moyo unakufa kwa ajili ya Pendo na Mateso. Unihurumie, Baba Yangu, Unihurumie! Huruma, siyo hasa kwa ajili yangu ninayetamani kuteswa hadi mwisho kwa ajili ya roho masikini, bali uwahurumie roho zote zaidi hasa zile za wale, wake kwa waume, walioitwa kwa utumishi wangu mtakatifu na kwa uchumba wa mapendo. Usikilize, Ee Baba, Moyo Wangu ambao unapokaribia sasa kumaliza Uhai, unaongeza kudunda mapigo yake yanayowaka moto na Moyo huo unalia ukisema: “Kwa ajili ya maumivu yangu haya mengi kabisa, ninakuomba, neema zenye nguvu ya majuto na ya wongofu wa kweli, nakuomba kwa ajili ya roho hizi zisizo na furaha ya kweli! Kamwe, roho hata moja tu ya hizi isitutoroke! Naona kiu Baba Yangu, naona kiu kwa ajili ya roho zote, hasa hasa roho hizi. Nina kiu cha kuteswa zaidi kwa ajili ya kila moja ya roho hizi. Baba Yangu, Mimi nimetenda daima Utashi Wako. Sasa Utashi wangu huu, ambao ni pia Utashi wako, Deh! Jalia utimizwe kitimilifu na kikamilifu kwa ajili ya Pendo Lako kwangu Mimi Mwanao mpendwa kabisa ambaye ndanimu umepata raha zote!”.

Ee Yesu Wangu, nashindwa kuvumilia. Najiunganisha kwenye maombi na sala zako, kwenye uchungu wako na maumivu yako na Pendo Lako linaloteswa. Unipe Moyo Wako kusudi mimi nionje kiu kile kile cha kwako kwa ajili ya roho za watu wa wakfu. Na kwa mapigo ya moyo wangu mimi nakurejeshea upendo na mapenzi ya watu wote. Uniruhusu niende kwa wote nikawawekee Moyo wako ndani yao. Watakapougusa tu Moyo huo, wale wenye ubaridi watapashwa joto, walio tepetevu watasimama, waliopotoka njia watarejea, na ndani yao zitarudi tena neema zile nyingi walizozikataa. Moyo Wako umefurika Mateso na machungu unapogundua kuwa mipango yako mingi uliyokuwa nayo juu ya roho nyingi imekwisha bila kuzaa matunda. Ni kutokana na wao kutoitikia. Unagundua pia roho nyingine ambazo zilitakiwa zipate uhai na wokovu kwa njia ya zile za kwanza, sasa zinaonja matokeo

ya kusikitisha. Mimi nitawaonyesha Moyo wako uliounizwa na kusikitishwa sana kwa ajili yao. Nitawatupia ndimi za moto kutoka katika Moyo wako, nitawaonyesha sala na maombi yako na uchungu wako juu yao: Haiwezekani kabisa wasishituke na kukugeukia Wewe. Hivyo basi watarejea wakiwa wametubu, watakuangukia miguuni pako, na hivyo mipango yako ya upenzi ya awali juu yao itaanza kutekelezwa tena. Watakuwa ndani yako na kando yako kukuzunguka, sasa siyo kwa ajili ya kukukosea, bali kwa ajili ya kulipa fidia, kukufaraji, na kukutetea.

Uhai wangu, Yesu Msulibiwa, nakuona unahangaka na kuteseka sana hapo juu msalabani kwa vile Pendo lako halijajiridhisha na kazi ya kukamilisha mambo yote. Hata mimi, ndiyo nahangaika na mateso pamoja nawe, na ninawaita sasa wote: Malaika, Watakatifu, njoni juu ya kilima cha Kalvario mkastaajabie upendo wa huyu Mungu unaopita mipaka yote, mkastaajabie na wazimu wake! Njoni tubusu madonda yake yenye kutoa Damu, tumwabudu, tushikilie sehemu zake za mwili zilizochubuliwa na kuchanika, tumshukuru Yesu kwa ukombozi alioleta. Hebu tumwangalie na Mama aliyechemwa moyo, ambaye anasikia maumivu mengi sana na anasikia mauti katika moyo wake Immakulata anapoona Mateso ya Mwanee Mungu. Hata mavazi yake mwenyewe yana madoa ya Damu kwani kilimani Kalvario kumeenea matone ya Damu ya Yesu.

Kwa hoja hiyo sisi sote kwa pamoja tutwae hiyo Damu, tumwombe Mama Mteseka aungane nasi, tujigawe katika makundi ili tuende popote ulimwenguni ili tukawasaidie watu wote. Tuwasaidie wale walio hatarini ili wasipotee, walioanguka ili waamke, wanaoelekea kuanguka ili wabaki imara wasianguke. Tutoe Damu hii kwa wale masikini vipofu, ili nuru ya ukweli iangaze ndani yao. Na kwa namna ya pekee tuende kati ya masikini watu wanaopigana vita. Tuende tukawe walinzi kwa wao wanaokesha. Endapo wanaanguka kwa kupigwa na risasi za adui, sisi tuwapokee katika mikono yetu ili tuwafaraji. Kama wanaachwa peke yao kwa kutorokewa na watu wote, endapo wanakata tamaa katika mkasa wao wa uchungu, sisi tuwapatie Damu hii ili watulie na ili kulainisha ukali wa maumivu ya mateso yao. Endapo tutaona kuna roho zinazokaribia kuangukia motoni, sisi tuwapatie hao Damu hii tukufu ambayo ndanimo imo bei ya gharama za ukombozi na ndivyo tutawaokoa toka mikononi mwa shetani. Pindi nitakapokuwa namshikilia Yesu nikimbana kwenye moyo wangu ili kumtetea na kulipa fidia dhidi ya watu wote, nitawabana watu wote kwenye Moyo huu kusudi wote wapate neema yenye uwezo wa kuleta uongofu, nguvu na wokovu.

Ee Yesu, naona Damu inabubujika kama vijito kutoka mikononi mwako na miguuni mwako. Malaika wanaolia, wamekuzunguka wakistaajabia nguvu kubwa ya ajabu ya Pendo lako kuu. Namwona Mama yako Mtamu akiwa chini ya Msalaba, ameumizwa kabisa kwa Mateso, namwona Magdalena mpenzi wako, namwona Yohane mpendelewa wako, wote wameshikwa na mshangao mkubwa wa kustaajabia, wa upendo na wa Mateso. Ee Yesu, mimi najiunganisha nawe nikijibana kabisa kwenye Msalaba. Natwaa matone yote ya Damu yako na kuyatia ndani ya moyo wangu. Nitakapona Haki Yako imeghadhibika dhidi ya wadhambi, mimi kwa lengo la kukutuliza nitakuonyesha mara Damu hii. Nitakapotaka uongofu wa roho zilizoshupaa na zilizo sugu katika dhambi, mimi nitakuonyesha Damu hii na kwa nguvu na uwezo wake, Wewe hutaweza kunigomea sala na ombi langu kwani nitakuwa ninayo rehani mikononi mwangu. Na sasa, Msulibiwa Chema Changu, kwa jina la vizazi vyote vya

binadamu, vilivyopita, vilivyopo na vya baadaye. Pamoja na Mama yako na pamoja na Malaika, najilaza mbele yako na ninakuambia: Tunakuabudu Ee Kristo na tunakuheshimu kwani kwa Msalaba wako Mtakatifu umeukomboa ulimwengu.



TAFAKARI NA ZOEZI

Yesu Msulibiwa anawatii wadhalimu wake na anapokea kwa upendo madharau yote na maumivu wanayomtendea. Kwa hoja ya Pendo kubwa aliloonja Yesu kwa ajili ya roho yetu masikini, Yeye aliuona Msalaba kuwa ni kitanda chake cha kupumzikia. Na sisi je, katika maumivu yote tunapumzika ndani yake? Je tunaweza tukasema kuwa kwa uvumilivu wetu na kwa upendo wetu tunamwandalia Yesu kitanda katika moyo wetu?

Pindi Yesu amesulubiwa, hakuna kiungo cha mwili cha ndani wala cha nje ambacho hakikuonja na kusikia maumivu ya pekee. Je sisi huwa tunajisulibisha sote kwake Yesu walau kupitia njia zetu tano za maarifa? Tunapokuwa katika mazungumzo ya ovyo ovyo au tukiwa katika nafasi nyingine ya kustarehe kama hiyo hapo Yesu huwa anabaki amepigiliwa misumari peke yake msalabani. Kumbe lakini endapo raha hiyo hiyo tukaitolea kama sadaka ya upendo kwake, basi hapo huwa tunaondoa misumari ya Yesu na tunajipigilia sisi wenyewe kwa misumari hiyo. Je, katika akili yetu, moyo wetu na katika nafsi yetu yote, huwa tunabaki tumepigiliwa kwa misumari ya Utashi wake Mtukufu? Yesu, pindi amesulubiwa anawaangalia kwa upendo wauaji wake. Na sisi je, kwa ajili ya pendo kwake huwa tunafaulu kuwaangalia kwa upendo wale wanaotukosea?

Yesu wangu Msulibiwa, misumari yako ijae kabisa kabisa ndani ya moyo wangu kusudi pasiwepo na pigo la moyo, pasiwepo upenzi, pasiwepo matamania ambayo hayaonji jinsi ncha za hiyo misumari zinavyochoma. Na Damu itakayotoka katika huo moyo wangu iwe ni manukato yatakayolainisha majeraha yako yote.

(Sala ya Kushukuru.

Tazama Uk 2



SAA YA ISHIRINI

(Kuanzia Saa Sita hadi Saa Saba Mchana)

Saa ya Kwanza ya Mahangaiko Pale Juu Msalabani

(Sala ya Kujiandaa.

Tazama Uk 1)

Neno la Kwanza:

Baba, Uwasamehe kwa Kuwa Hawajui Watendalo. Lk 23:34

Ewe Msulibiwa Chema Changu, ninakuona pale juu msalabani kama vile pale juu ya kiti chako cha ushindi na cha enzi, ukiwa katika zoezi la kushinda yote, kuzipata roho zote na kuziinua kwako ili wote waonje uwezo wako ulio juu ya binadamu yeyote. Vyote vilivyoumbwa, baada ya kuchafuka, kutishwa na kuhofishwa kwa maovu mengi kabisa, vinaangukia kifudifudi mbele yako na katika ukimya vinasubiri kauli yako. Vinataka kukutolea heshima na kutangaza utawala wako. Jua linalia na linajivuta nyuma na kuficha nuru yake kwani linashindwa kuendelea kutazama Uso wako wa Mateso; ni Mateso makali kupita kiasi; kule kuzimuni kunasikika mtikisiko wa kutisha; nao wanangojea katika ukimya. Mpaka hapo kila kitu ni kweli kipo kimya kabisa. Mama yako aliyechomwa mkuki, wapenzi wako, wote sasa ni bubu na wamekufa ganzi kwa kuona Mateso yako, ah! kwa kuona Ubinadamu wako uliochakazwa, uliolegea kabisa na unaoning'inia juu. Leo unatia uchungu mno! Wote katika ukimya wao wanangojea neno lako moja. Ubinadamu wako huo huo, unaolala katika bahari ya Mateso yanayokuja katika kila pumzi ya maumivu, upo kimya kabisa kiasi kwamba tunahofu kuwa Wewe utakufa nukta yoyote katikati ya pumzi hizo. Tuseme nini cha zaidi? Hao hao Wayahudi wabaya, hao hao wauaji ambao punde tu kabla walikutesa, walikudhihaki, walikuita mhaini na mhalifu, hao hao wevi waliokuwa wanakukufuru, sasa wote hao wanakaa kimya, wanakuwa mabubu. Wanaingiwa na hisia za majuto na dhamiri zinawashitaki. Wale wanaojaribu kukutolea dharau sasa wananyamazishwa mara moja mdomoni pao.

Ninapopenya na kuingia ndani yako kabisa naona kwamba Pendo lako linagongagonga, linakubana pumzi na unashindwa kulizuia. Ukisukumwa na Pendo hilo lako linalokutesa zaidi kuliko maumivu yote, kwa sauti kubwa na ya kushangaza Wewe sasa unazungumza. Kwa jinsi Wewe ulivyo ni Mungu, unayainua juu mbinguni hayo Macho yako mahututi na kutamka: “Baba, uwasamehe kwa kuwa hawajui walitendalo”. Kishapo unajifungia tena katika ukimya ukiwa unaelemewa na maumivu kweli yasiyopata kusikika.

Msulibiwa Yesu, inawezekana kweli kuwa na Pendo kuu jinsi hiyo? Ah! Baada ya maumivu na madharau mengi vile, neno lako la kwanza ni ‘**msamaha**’ na hivi ndivyo unavyotutetea sisi mbele ya

Baba kwa dhambi zetu nyingi! Ah! Neno hili unaliingiza ndani ya kila moyo baada ya kila kosa, na hivyo Wewe unatangulia kutoa msamaha. Bahati mbaya lakini, wengi wangapi wanagoma na hawalipokei! Ndivyo Pendo lako linapotea bure kwa sababu Wewe unatamani daima kutoa kwa wote msamaha na busu la amani.

Kwa neno lako hilo, wale wa kuzimuni wanatetemeka na kukukiri kuwa Wewe ni Mungu. Vitu vilivyombwa na watu wote wameshikwa na bumbuwazi huku wakikiri Umungu wako na Pendo lako lisilozimika. Na wote wanaingia katika ukimya wakisubiri kuona Pendo hilo litafika wapi. Baada ya dhambi, wala siyo Sauti yako tu, bali hata Damu yako, Madonda yako, vyote vinatoa kilio cha nguvu kwa kila moyo vikisema: “Njoo, ingia katika Mikono yangu, kwani ninakusamehe, na mhuri wa msamaha huo ni gharama yote ya Damu yangu”.

Ewe Mpendwa wangu Yesu, nakuomba urudie tena neno hilo kwa wale wadhambi wote waliopo duniani. Kwa ajili ya wote hao, omba huruma. Kwao wote hao uwashushie mastahili yasiyo ukomo ya Damu yako tukufu. Ee Yesu mwema, kwa ajili ya hao wote uendelee kupoza hukumu ya Haki ya Mungu na ujalie neema kwa yeyote yule ambaye anajionja kukosa nguvu ya kusamehe wakati anapasika kufanya hivyo.

Yesu Wangu, Msulibiwa Mwabudiwa, katika saa hizi tatu za umahututi wa Mateso makali kabisa, Wewe unataka kukamilisha kila kitu. Wakati ukiwa upo juu ya Msalaba huu, huku ukiwa kimya kabisa, natambua kwamba katika undani wako unataka kulipa fidia kwa Baba juu ya mambo yote. Umshukuru kwa niaba ya wote wote. Wewe ulipe malipizi kwa ajili ya wote, uombe radhi kwa niaba ya wote, na uombe neema kwa ajili ya wote, ili wasikukosee kamwe tena. Na unapoomba hilo toka kwa Baba, urudie maisha yako yote tangia nukta ile ya kwanza Wewe ulipotungwa mimba hadi ulipotoa pumzi ya mwisho. Yesu Wangu, Pendo lisilokoma, uniruhusu hata mimi nirudie maisha yako pamoja nawe, pamoja na Mama asiyetulizika, pamoja na Mtakatifu Yohane na pamoja na wale wanawake wachaji.

Yesu Wangu Mtamu, ninakushukuru kwa hiyo miiba mingi sana iliyotoboa na kuingia katika Kichwa chako kiabudiwa. Nakushukuru kwa matone ya Damu yaliyodondoka toka Kichwa hiki, kwa mapigo uliyopata juu ya Kichwa hiki, na kwa nywele walizonyofoa toka Kichwa hiki. Ninakushukuru kwa mema mengi kabisa uliyotutendea na uliyoomba kwa ajili ya wote, kwa mwanga na uangazo mzuri uliotujalia. Na ni mara nyingi gani umekuwa unasamehe dhambi zetu zote za mawazo, za kiburi, za majivuno na za kujikuza wenyewe!

Nakuomba radhi kwa jina la wote, Ee Yesu Wangu, kwa mara zote tulipokuvika taji la miiba, kwa yale matone mengi ya Damu tuliyosababisha yadondoke toka Kichwa chako Kitukufu, na naomba radhi kwa mara zote tulipokaidi kuitikia na kuzingatia uangazo wako. Kwa maumivu yote hayo uliyoyakabili, nakuomba, Ee Yesu mwema, utuombee neema ili tusitende kamwe tena dhambi za mawazo. Nataka bado kukutolea Mateso yale yote uliyopata katika Kichwa chako kitakatifu sana, nakutolea ili kukupatia utukufu ule wote ambao viumbe walitakiwa wakutolee iwapo wangetumia vema akili yao.

Ee Yesu Wangu, ninayaabudu Macho yako matukufu na ninakushukuru kwa ajili ya machozi mengi yaliyotoka na kwa Damu iliyodondoka, kwa ajili ya matobo makali ya miiba, kwa ajili ya madharau, mabezo na udhalilishaji uliovumilia wakati wote wa Mateso yako. Ninakuomba radhi kwa ajili ya wale wote waliokukosea na kukudharau kwa kutumia vibaya macho yao. Ninakuomba, kwa ajili ya Mateso uliyopata katika Macho yako matukufu, utugawie neema hii kwamba pasiwe tena na mtu anayekukosea kwa njia ya kuangalia vibaya. Ninataka bado kukutolea maumivu yale yote uliyopata katika Macho yako matukufu, kwa ajili ya kukutolea utukufu wote ule ambao viumbe walipasika kukupa kama wangekaza macho yao juu mbinguni tu, yaani kama wangekaza kutazama kwa Mungu na kwako Wewe Yesu Wangu.

Nayaabudu Masikio yako matukufu. Ninakushukuru kwa maumivu yale mengi uliyopata wakati wale wakati wa pale Kalvario walipopasua masikio yako kwa makelele na madharau. Kwa jina la wote naomba msamaha kwa mazungumzo machafu yaliyosikika. Ninakuomba masikio ya watu wote yafunguke kupokea kweli za milele, kupokea sauti za neema na pasiwepo na yeyote tena anayekukosea kwa kusikiliza mabaya. Natamani bado kukutolea Mateso yote uliyopata katika Masikio yako matukufu kwa ajili ya kukupa utukufu wote ambao viumbe walipasika kukupatia kama wangetumia kiungo hicho cha mwili katika mambo matakatifu.

Ee Yesu, ninauabudu na kuubusu Uso wako mtukufu. Na ninakushukuru kwa Mateso mengi uliyopata kutokana na kutemewa mate, kutokana na makofi uliyopigwa hadharani, na kwa mateke uliyopigwa na kukanyagwa na maadui wako. Ninakuomba radhi kwa jina la wote, kwa mara zote walipopata hamu na furaha ya kukukosea. Ninakuomba, kwa makofi hayo uliyopigwa na kwa mate uliyotemewa ujalie kwamba kutokana na hayo yote, Umungu wako ujulikane, upate sifa na utukufu. Yaani, Ee Yesu Wangu, ninataka mimi mwenyewe niende ulimwenguni kote, toka mashariki hadi magharibi, kusini hadi kaskazini, nikaunganishe sauti zote za viumbe na kuzibadilisha ili zipokezane zoezi la kutoa sifa, ya upendo na ya uabudu. Ninataka bado, Ee Yesu Wangu, kuleta kwako mioyo yote ya viumbe ili Wewe uweze kuitupia mwanga, ukweli, pendo na hisia za kushiriki na kufanana na Nafsi yako ya Umungu. Na wakati Wewe utawasamehe wote, mimi ninakuomba usimruhusu yeyote akukosee tena. Ikiwezekana, iwe hivyo hata kwa gharama ya damu yangu. Mwishowe nataka kukutolea maumivu yote uliyopata katika Uso wako mtukufu kwa ajili ya kukutolea utukufu wote ambao viumbe wangetakiwa wakupatie iwapo wasingetamani kamwe kukukosea.

Ninauabudu Mdomo wako mtukufu na ninakushukuru kwa sauti zako zile ulizotoa mwanzoni ulipozaliwa, kwa maziwa yale uliyonyonya, kwa maneno uliyoyasema, kwa mabusu yako motomoto kwa Mama yako Mtakatifu, kwa chakula ulichokula, kwa uchungu wa siki waliyokunywesha, na kwa kiu kikali ulichopata pale msalabani na kwa maombi ulioelekeza kwa Baba. Nakuomba radhi kwa umbea na mazungumzo mabaya na ya kidunia, na kwa makufuru yatokayo mdomoni mwa viumbe. Ninataka kutolea mazungumzo yako matakatifu ili kulipa fidia kwa mazungumzo yao hayo mabaya, na natolea uchungu wako wa kukosa ladha nzuri mdomoni ili kulipa fidia kwa ulafi wao, na kwa makosa yote waliyokutendea kwa kutumia vibaya ulimi. Nataka kukutolea yale yote yaliyokutesa katika Mdomo wako mtukufu ili mimi nikupatie utukufu wote ambao viumbe walitakiwa wakupatie kama

hata mmoja wao asingethubutu kukukosea kwa tamaa za kuonjaonja vitu na matumizi mabovu ya ulimi.

Ee Yesu, kwa yote kabisa ninakushukuru kwa jina la wote. Nakuinulia utenzi wa shukrani ya milele, isiyo na mipaka. Ninataka, Ee Yesu Wangu, kukutolea yale yote uliyoteseka katika Nafsi yako Tukufu ili kukupatia utukufu wote ambao viumbe vyote vingepasika kukupa kama wangefananisha na kulinganisha maisha yao na yale ya kwako.

Ninakushukuru Ee Yesu, kwa Mateso yote uliyopata katika Mabega yako matukufu, kwa mapigo yote uliyopata, kwa madonda mengi uliyocha yatoboke katika Mwili wako mtukufu na kwa matone mengi ya Damu uliyomwaga. Ninaomba msamaha kwa jina la wote, kwa ajili ya mara zote walipokukosea kwa tamaa zisizo halali na mbaya kwa vile tu walipenda mambo ya raha. Nakutolea maumivu yako ya mijeledi ili kufidia dhambi zote zilizotendeka kwa njia zote za maarifa, kupendelea vionjo vyao, tamaa za mwili, kupendelea ubinafsi wao na kupenda kujituliza katika maumbile. Na ninapenda pia kukutolea Mateso yote uliyopata mabegani mwako ili kukupa utukufu wote ambao viumbe walipasika kukupatia kama katika mambo yote wangelitafuta kukupendeza Wewe tu na kukimbilia katika kivuli cha ulinzi wako wa kimungu.

Yesu Wangu, ninabusu Mguu wako wa kushoto. Ninakutolea shukrani kwa hatua zote ulizotembea wakati wa Uhai wako hapa duniani na kwa mara zote zile ulipochosha viungo vyako vya mwili kwa ajili ya kwenda kutafuta roho ili uzifikishe kwenye Moyo wako. Kwa hiyo, Ee Yesu Wangu, ninakutolea matendo yangu yote, hatua zangu na kujimudu kwangu, kwa lengo la kukupa fidia kwa kila kitu na kwa kila mtu. Ninakuomba radhi kwa ajili ya wale wasiotenda mambo kwa nia sahihi. Naunganisha vitendo vyangu na vyako ili kuvifanya viwe vitendo vya kimungu, na kisha kuviunganisha, ninavitolea, vikiwa vimeungana, kwa kazi zile ulizokuwa unatenda kwa Ubinadamu wako Mtukufu. Nafanya hivyo ili nikupatie utukufu wote ambao viumbe vilitakiwa vikupatie kama wangukuwa wanatenda kitakatifu na kwa malengo sahihi.

Ninakubusu Ee Yesu katika Mguu wako wa kuume na ninakushukuru kwa Mateso uliyopata na unayoyapata kwa ajili yangu, hasa unayopata saa hii unaponing'inia msalabani. Ninakushukuru kwa maumivu makali ya kutisha yanayoletwa na misumari ndani ya madonda yako, madonda ambayo yanaendelea kupasuka kutokana na uzito wa Mwili wako mtukufu. Ninakuomba radhi kwa uasi wote na ukaidi unaotendeka na viumbe. Ninakutolea Mateso hayo ya Miguu yako mitukufu ili kulipa fidia kwa makosa hayo ili kukupatia utukufu wote, ambao viumbe walipasika kukupa iwapo katika mambo yao yote wangejiweka chini ya mamlaka yako.

Ee Yesu Wangu, ninabusu Mkono wako wa kushoto. Ninakushukuru kwa yale yote uliyoteseka kwa ajili yangu na kwa mara zote ulipotuliza hukumu ya Haki ya Mungu ukilipa malipizi kwa ajili ya wote. Ninabusu Mkono wako wa kuume na ninakushukuru kwa mema yale mengi uliyowatendea na unayowatendea bado watu wote. Kwa namna ya pekee kabisa nakushukuru kwa kazi ya uumbaji, ya ukombozi na ya utakatifuaji. Ninakuomba radhi kwa niaba ya wote kwa mara zile zote tulipokosa

shukrani kwa mema yako, na kwa yale matendo yetu mengi sana tuliyotekeleza bila nia sahihi. Ili kulipa fidia kwa makosa yote hayo, ninataka nikutolee ukamilifu wote na utakatifu wa kazi zako ili nikupatie utukufu ule wote ambao viumbe wangetakiwa kukupatia kama wangetenda kulingana na mema hayo yote.

Ee Yesu Wangu, ninabusu Moyo Wako mtukufu na ninakushukuru kwa yote uliyoteseka, kwa yote uliyotamani na kuyashughulikia kwa ajili ya upendo kwa wote na kwa kila mmoja kwa nafsi yake. Ninakuomba radhi kwa tamaa nyingi sana mbaya, hisia na maelekeo yasiyo mazuri. Nakuomba msamaha, Ee Yesu, kwa ajili ya wale wengi wanaotanguliza pendo la viumbe kabla ya Pendo lako. Na ili kukupa utukufu wote ambao hao wengi wamekunyima, ninakutolea yote yale ambayo Moyo Wako mwabudiwa umeyatenda na unaendelea kuyatenda.



TAFAKARI NA ZOEZI

Yesu, kisha pandishwa juu msalabani anabaki ananing'inia pale juu bila kugusa ardhi tena. Je, sisi tunajaribu kuishi huku tukiwa tumejitenga na ulimwengu, na viumbe na mambo yale mengi tuyajuayo ya dunia hii? Mambo yetu yote budi yasaidie kututengenezea msalaba ambao juu yake budi tulale na tukabaki tunaning'inia hapo kama Yesu, tukiwa mbali na chochote kilicho cha dunia ili viumbe visipate kunata kwetu.

Yesu Mteswa hana kitanda chochote isipokuwa Msalaba, hana kitulizo chochote isipokuwa madonda na matusi. Je kwa upande wetu sisi, pendo letu kwa Yesu linafikia kiwango hicho? Je tunafikia kupata pumziko katika kuteswa? Chochote tunachotenda, sala, mateso, na mengineyo, hebu tuyafungilie ndani ya madonda yale, hebu tuyatumbukize na kuyalowesha katika Damu ya Yesu. Na hapo hatutapata faraja isipokuwa katika maumivu yake Yesu, kwani madonda ya Yesu yatakuwa ni yetu, Damu yake itatenda kazi muda wote ndani yetu ili kutuosha na kututakasa. Kwa namna hiyo basi tutaifikia kila neema kwa ajili yetu wenyewe na kwa ajili ya wokovu wa roho za watu. Wakati tukiwa na hazina ya Damu ya Yesu moyoni mwetu, endapo tutatenda kosa lolote, tutamwomba Yesu asitushike mateka mbele yake bali kwa Damu yake atuoshe na atuweke tuwe pamoja naye. Endapo tutajionja kuwa wadhaifu, tutamwomba Yesu atoe tone la Damu yake na aingize katika roho yetu ili kutupatia nguvu.

Yesu Mtamu anawaombea wauaji wake, na zaidi, anawatetea. Na sisi je, tunakubaliana na sala hiyo ya Yesu, ili kuwatetea daima wadhambi mbele ya Baba, na ili kuwaombea huruma hata wale ambao huwa wametukosea?

Wakati tunaposali, tunapofanya kazi, tunapotembea, tusingahau roho zile masikini zinazokuwa mahututi na zinazotoa pumzi ya mwisho. Kwa ajili ya kuwasaidia. Hebu tuwapelekee sala na mabusu ya Yesu ili Damu yake tukufu iwatakase na iwawezeshe kurukia mbinguni.

Yesu Wangu, kutoka katika madonda yako, kutoka katika Damu yako, ninataka nichote nguvu ya kuweza kurudia ndani yangu maisha yako yenyewe na hivyo nitaweza kuwafikishia watu wote ule wema uliokuwa unautenda Wewe Mwenyewe.

(Sala ya Kushukuru.

Tazama Uk 2)

SAA YA ISHIRINI NA MOJA

(Kuanzia Saa Saba Hadi Saa Nane Mchana)

Saa ya Pili ya Mahangaiko Pale Juu Msalabani

(Sala ya Kujiandaa.

Tazama Uk 1)

Neno la Pili:

Leo Hii Utakuwa Pamoja Nami Peponi

Pendo Langu Lililopondeka, pindi ninaposali na Wewe, nguvu ya mvuto wa Pendo lako na ule wa maumivu yako inavuta macho yangu yaendeleo kukaza kukutazama, lakini moyo wangu unapasuka kuona unavyoteseka namna hiyo. Unahema kwa upendo na Mateso na miali ya moto inayochoma Moyo wako inazidi kupanda juu mno hata karibu inakuunguza kuwa majivu. Pendo lako lililopo ndanimo lina nguvu zaidi ya kifo chenyewe. Na Wewe, kwa kutaka kulimwaga pendo hilo, unamwangalia yule mwizi wa kuume kwako na mara hiyo unamteka toka kuzimuni. Kwa neema yako unamgusa moyoni mwake na yeye anabadilika kabisa. Anakujua sasa, anakuungama kuwa Wewe ni Mungu na katika toba anasema:

“Ee Bwana, nikumbuke utakapoingia katika ufalme wako”. Na Wewe husiti kumjibu: “Leo hivi utakuwa pamoja nami peponi”. Na ndivyo unatekeleza tendo la ushindi wa kwanza wa Pendo lako. Lakini katika Pendo lako naona kuwa unateka siyo tu moyo wa mwizi huyu, bali hata unateka mioyo ya wengi walio kufani. Ahaaa! Unawatolea Damu yako, Pendo lako, mastahili yako, na unatumia zana zote na mbinu za kimungu ili kugusa mioyo yao na kuiteka ije kwako. Ajabu lakini, hata hapo, Pendo lako linapingwa. Wangapi wanasukumia mbali, wangapi hawataki kuliadini, wangapi wamekata tamaa! Ni uchungu mkali sana unaokurudisha na kukulazimisha unyamaze tena.

Ee Yesu Wangu, ninataka kulipa fidia kwa ajili ya wale wanaokata tamaa ya Huruma ya Mungu katika dakika yao ya kifo. Pendo Langu Tamu, washa ndani yao wote matumaini kwako na imani isiyokoma, hasa ndani ya wale wanaojikuta katika mahangaiko ya mahututi. Kwa nguvu ya neno lako hilo, uwajalie nuru, nguvu na msaada wa kuwawezesha kufa kitakatifu na kuruka toka dunia hii na kutua mbinguni. Ee Yesu, uchukue na uziweke roho zote zote ndani ya Mwili Wako mtukufu, ndani ya Damu yako na ndani ya Madonda yako. Kwa hiyo, kwa mastahili ya hiyo Damu yako azizi, usikubali kamwe roho hata moja tu ikapotea. Damu yako ilie kwa ajili ya roho zote katika sauti isemayo: ‘Leo hivi mtakuwa pamoja nami peponi’.

Neno la Tatu:

**Kwa Mama Maria: “Bibi, Mtazame Mwanao”
Na kwa Yohane: “Tazama Mama Yako”**

Ewe Yesu Wangu, Msulibiwa Uliyedharaulika, maumivu yako yazidi kuongezeka sana. Juu ya Msalaba huu kweli Wewe ni Mfalme kweli wa Mateso! Katika Mateso hayo mengi hakuna roho inayoachwa nje, bali unawapatia kila mmoja Uhai wako. Lakini tunaona Pendo lako likigomewa na viumbe, likidharauliwa, halizingatiwi. Kwa vile unashindwa kulimwaga nje, Pendo linazidi kuwaka na kukuunguza zaidi. Mateso yasiyosemekana. Unapoumizwa na Teso hilo unajiuliza: ni kitu gani zaidi nitoe kwa binadamu ili nimpate?. Na hapo unafikia kusema: “Tazama, ewe roho, jinsi gani nilivyokupenda! Kama wewe hutaki kujionea huruma wewe mwenyewe, basi ulionee huruma Pendo langu Mimi”.

Na hapo, wakati umekwisha kutoa kila kitu, na unapooni kwamba hakuna namna nyingine ya kufanya ili uweze kumpata binadamu, unamgeukia Mama yako. Na hata Yeye yupo hoi mpaka kufani kwa sababu ya kuona Mateso yako. Hata kwa yeye, ni hasa pendo ndilo limtesalo na linalomfanya awe ni msulibiwa sawa na Wewe. Ndipo Mama na Mtoto mnatazamana na kuelewana. Na Wewe unapumua kwa kuridhika na unajifariji unapooni kwamba bado unaweza kumtoa Mama yako kwa binadamu. Ndipo unapooni kizazi chote cha binadamu ndani ya Yohane na kwa Sauti laini inayoweza kugusa na kulegeza mioyo yote unatamka! “Bibi, mtazame Mwanao”, na kwa Yohane unatamka: “Tazama Mama yako”. Sauti yako inaingia ndani ya moyo wake wa kimama na Sauti hiyo inapounganika na zile Sauti za Damu yako inaendelea kusema: “Mama yangu, nakukabidhi wana wangu wote; Pendo lote unalolionja juu yangu ulielekeze sasa kwao. Mahangaiko yako yote na upenzi wako wa kimama sasa viwe kwa ajili ya wana wangu. Wewe sasa utanitunzia hao wote”. Mama yako anakubali. Muda huo Mateso yanazidi kuwa makali hivi kwamba yanakurudisha katika ukimya tena.

Napenda, Ee Yesu Wangu, kutoa fidia kwa makosa yanayotendeka dhidi ya Bikira Mtukufu, makufuru na kutoshukuru kwa wale wengi ambao hawataki kutambua mema uliyowatendea wote kwa njia ya kuwapatia huyu kuwa Mama yao.

Tutawezaje sisi kukushukuru kwa mema mengi hayo? Tunakimbilia, Ee Yesu, kwenye chemchemi yako ile ile na tunakutolea Damu yako, madonda yako, na Pendo lisilo na mipaka la Moyo wako. Ewe Bikira Mtukufu, ni jinsi gani ulivyoguswa na kufurahi moyoni unaposikia Sauti ya Yesu Mwema ambaye anakukabidhi wewe kwetu sisi sote kama Mama.

Tunakushukuru Ewe Bikira Mbarikiwa, na ili kukushukuru kama unavyostahili, tunakutolea shukrani zilezile za Yesu wako. Ee Mama Mtamu, uwe wewe Mama yetu, ututunze na kutuangualia na wala usikubali kamwe tukukosee hata kidogo. Utubane kabisa kwa Yesu, utufunge sisi sote kwa mikono yako, sisi sote tubanwe kwake kwa jinsi isitokee kamwe tukamtoroka tena. Kulingana na zile zile nia

zako, nataka kwa niaba ya wote kulipa fidia kwa makosa tunayomtendea Yesu wako na tunayokutendea Wewe Mama yangu mtamu.

Ee Yesu Wangu, pindi unaelemewa na maumivu mengi kabisa, Wewe unaombolezea zaidi suala la wokovu wa roho za watu. Mimi nami kwa upande wangu sitakaa kimya bali nataka kupaa juu kama njiwa nitue juu ya madonda yako, niyabusu, niyapanguse na niyapoze na pia nizame ndani ya Damu yake ili niweze kutamka pamoja nawe nikisema: Roho nyie, roho nyie!

Nataka nishikilie Mwili wako Mwabudiwa uliochubuliwa ili kukulipa fidia na kukuomba huruma, upendo na msamaha kwa ajili ya wote.

Utawale katika akili yangu, Ee Yesu Wangu, na uiponye kwa nguvu ya miiba inayotoboa Kichwa chako na wala usikubali paingie vurugu zozote ndani yangu. Uso wa hadhi kuu wa Yesu Wangu nakubusu: uvute kwako mawazo yangu yote yakutafakari Wewe na kukuelewa.

Macho mapendevu kabisa ya Chema Changu, hata kama mmegubikwa na Damu nitazameni mimi: tazameni unyonge wangu, oneni udhaifu wangu, oneni moyo wangu masikini, na fanyeni moyo huo uonje matokeo ya ajabu ya tendo lenu la kutazama kimungu.

Masikio ya Yesu Wangu, ingawa kama mmepeka uziwi kwa madharau, dhihaka na makufuru ya waovu, hata hivyo mpo tayari kutusikiliza! Lo, sikilizeni maombi yangu na msibeze fidia zangu. Ndiyo, sikiliza Ee Yesu, kilio cha moyo wangu. Hapo utatulia wakati utakapokuwa umenijaza Pendo lako.

Uso mzuri kabisa wa Yesu Wangu, jionyeshe, fanyiza mimi nikuone hata niweze kubandua moyo wangu masikini kutoka kwa watu wote na vitu vyote. Uzuri wako univute nikupende daima na unishikilie mateka ndani yako daima. Mdomo laini wa Yesu Wangu, hebu zungumza kwangu. Ingiza Sauti yako ndani yangu na uwezo wa neno lako ubomoe chochote kile kisichokuwa ni Utashi wa Mungu, kisichokuwa ni pendo.

Ee Yesu, nanyosha mikono yangu shingoni kwako ili nikukumbatie, na Wewe ninyoshee ya kwako ili unikumbatie. Ah! Ee Chema Changu, fanyiza kwamba kumbatio hilo liwe la nguvu hata pasiwe na nguvu yoyote ya kibinadamu inayoweza kututenganisha. Na tukiwa tumekumbatiana hivyo, mimi nitalaza uso wangu juu ya Moyo wako, na halafu, kwa imani nitabusu midomo yako na Wewe utanipa busu la upendo. Hivyo utanifanya nipumue pumzi yako tamu, Pendo lako, Utashi wako, maumivu yako na Uhai wako wote wa kimungu.

Mabega Matukufu ya Yesu Wangu, daima imara na dumivu katika kuteswa kwa ajili ya kunipenda mimi, mnipe mimi nguvu, udumivu, na ujasiri katika kuteswa kwa ajili yake. Ee Yesu, usiruhusu mimi niwe mlegevu, mzembe, kigeugeu na mbahatishaji katika upendo. Badala yake unifanye niwe sehemu yako isiyo na mabadiliko yoyote.

Kifua cha Yesu Wangu chenye moto wa upendo, nipe miali yako ya Moyo; Wewe huwezi tena kuifungilia ndanimu wakati moyo wangu unaitafuta kwa mahangaiko kupitia kwenye Damu ile na madonda yale. Ni miali ya upendo wako Ee Yesu ambayo ndiyo inakutesa zaidi. Ee Chema changu, hebu unifanye niwe mshiriki. Je roho iliyo baridi namna hii na yenye umasikini wa Pendo lako, haikuvuti kuionea huruma?

Mikono Mitukufu ya Yesu Wangu, ninyi mlioumba Mbingu na Dunia, sasa mmekwisha poteza nguvu hata msiweze kujimudu tena. Ee Yesu Wangu, endeleza uumbaji wako, uumbaji wa upendo. Umba ndani ya nafsi yangu yote uzima mpya, uzima wa kimungu. Tamka maneno yako juu ya moyo wangu masikini na ugeuze wote kuwa Moyo Wako.

Miguu Mitukufu ya Yesu Wangu, msiniache kamwe peke yangu. Fanyizeni mimi nikimbie pamoja nanyi na wala nisifanye hatua hata moja tu mbali na ninyi. Yesu, kwa pendo langu na kwa fidia zangu, nataka kukutuliza na kukupumzisha na maumivu unayoyapata katika Miguu yako mitukufu.

Ee Yesu Wangu Msulibiwa, ninaiabudu Damu yako azizi. Nabusu kila moja ya madonda yako nikiwa na nia ya kuingiza ndani yao upendo wangu wote, uabudu wangu na fidia zilizo bora. Kwa ajili ya roho zote, Damu yako iwe ni nuru wakati wa giza, kitulizo katika maumivu, nguvu katika udhaifu, msamaha katika kosa, msaada katika vishawishi, kinga katika hatari, tegemeo katika mauti, na mabawa ya kuzichukua roho hizo toka dunia hii hadi mbinguni.

Ee Yesu, nakuja kwako na ndani ya Moyo Wako naweka kiota changu na makazi yangu. Toka ndani ya Moyo Wako, Ee Pendo Langu Tamu, nitaita watu wote waje kwako. Na endapo mtu atataka kusogelea kwa ajli ya kukukosea, mimi nitatoa mbele yake kifua changu na wala sitaruhusu akutukane, badala yake nitamfungilia ndani ya Moyo wako, nitamwelezea Pendo lako na nitamfanya abadilishe matusi yake kuwa Pendo.

Ee Yesu, usiniruhusu kutoka ndani ya Moyo Wako, unilishe kwa miali ya Pendo lako, unipe uzima kwa njia ya Uhai wako, ili niweze kukupenda kama Wewe Mwenyewe unavyotamani upendwe.

Neno la Nne:

Mungu Wangu, Mungu Wangu, Mbona Umeniacha?

Mteseka Yesu, wakati bado nimebanana na Moyo wako, mimi tayari nipo nimeachika; nikiyahesabu maumivu yako, naona mtetemo unaosambaa katika Ubinadamu wako Mtukufu; viungo vyako vya mwili vinagongana kana kwamba kila kimoja kinataka kung'oka na kudondoka. Na katika kuhema na kupigana na mauti unalia kwa sauti na kwa nguvu: “Mungu Wangu, Mungu Wangu, Mbona Umeniacha”.

Iliposikika Sauti hiyo watu wote wanatetemeka, giza inazidi kuwa nene, Mama aliyekuwa amesimama ameganda bila kutikisika, anabadilika rangi yake na anapoteza nguvu na akili. Uhai Wangu, Ewe Yote Yangu, Yesu Wangu, naona nini? Ah! Karibu kufa! Na hata maumivu yale yote yaliyokuwa daima nawe yanaanza kukuacha. Na dakika hiyo ikiwa ni baada ya kuteseka kabisa, ukiwa na maumivu makubwa, unaona baadhi ya roho za watu wasiunganika nawe, na kweli unatambua kuwa wengi wa hao watapotea, na unaonja Teso hilo la kutengana nao wakati wanadondoka toka katika viungo vyako vya mwili. Na kwa vile unapasika kulipa malipizi ya Hukumu na Haki ya Mungu hata kwa ajili ya hao wote, unaonja kifo cha kila mmoja wao na maumivu yaleyale watakayopata motoni. Hapo unaita kwa nguvu ukisema kwa mioyo hiyo yote:

“Msiniache; kama mnataka Mateso zaidi mimi nipo tayari, lakini msijitenge na Ubinadamu wangu. Hilo ndilo Teso kuu kupita yote, Teso la Mateso, ni kifo cha vifo. Mengine yote yanayobaki yasingekuwa ni kitu kwangu iwapo nisingepata Teso hili la ninyi kujitenga na Mimi. Lo, huruma juu ya Damu yangu, juu ya madonda yangu, juu ya kifo changu. Kilio hiki kitaendelea katika mioyo yenu. Lo! Msiniache!!!!”

Pendo Langu, jinsi gani nalia na kusikitika pamoja nawe! Unaelemewa, unafadhaika na kuzidiwa, Kichwa chako kitukufu kinadondokea juu ya Kifua chako, Uhai unakutoka. Pendo Langu, najisikia kufa. Hata mimi nataka nilie pamoja nawe; roho nyie, roho nyie! Mimi sitatengana na Msalaba huu, sitatengana na madonda haya ili nikuombe unipe roho, na kama unakubali, nitaingia ndani ya mioyo ya viumbe, nitaizingira na maumivu yako ili mioyo hiyo isiweze kunitoroka. Na kama inawezekana, nitakwenda na kusimama penye lango la jehanam ili nizizuie roho hizo zilizolaaniwa zisiingie humo na badala yake nitaziongoza kwenye Moyo wako.

Ajabu, Wewe upo mahututi, lakini u kimya kabisa na mimi nalilia kifo chako kinachokaribia. Ee Yesu Wangu, nakuhurumia, nabana kwa nguvu Moyo wako kwenye moyo wangu, naubusu na ninauangalia kwa upendo wote niwezavyo. Na kwa ajili ya kukupa kitulizo kikubwa zaidi nachukua mapendo ya kimungu na kuyafanya ya kwangu na kwa mapendo hayo nataka nikuhurumie, nigeuze moyo wangu uwe mto mkubwa wa utamu na nimwage mto huo ndani ya Moyo wako ili ninogeshe hayo machungu unayoonja sasa kutokana na kupotewa na roho za watu. Kwa kweli kilio chako hicho kinaleta uchungu kabisa, Ee Yesu Wangu. Kupotewa na roho za watu wanaokutoroka kunasababisha lalamiko hilo kali la Mateso toka moyoni mwako, ni kali zaidi kuliko Teso la kuachika na Baba. Ee Yesu Wangu, uongeze neema ndani ya wote ili hata mmoja wao asipotee. Na fidia yangu iwafae roho zile ambazo zilikuwa tayari njiani kupotea ili sasa zisipotee tena. Na zaidi ninakuomba Ee Yesu Wangu, katika Teso hili kuu la kuachika, utoe msaada kwa roho zile nyingi sana zikupendazo ambazo Wewe unawanyima kionjo cha kukuona Wewe na badala yake unawaacha kwa makusudi katika giza. Unawafanyia yote hayo sababu tu unataka wawe wenzi wako katika Teso la kuachika. Mateso ya roho hizo yawe ni sala zinazoita roho mbalimbali zikukaribie na hivyo zikuletee kitulizo katika Teso lako.



TAFAKARI NA ZOEZI

Yesu anamsamehe yule mwizi mwema na kwa upendo mkubwa anamwahidia kumchukua kwenda naye peponi. Je sisi huwa tunasali daima kwa ajili ya roho za wale wengi walio kufani ambao wanahitaji angalau sala moja ili mlango wa jehenam ufungwe na milango ya mbinguni ifunguliwe kwa ajili yao?

Mahangaiko ya Yesu pale juu msalabani yanaongezeka, hata hivyo Yesu, huku akijisahau Yeye Mwenyewe, anatuomba sisi. Yesu haachi chochote kwa ajili yake mwenyewe, anatoa vyote kwetu hata anamtoa Mama yake Mtukufu awe zawadi, zawadi pekee iliyokuwa ya thamani kuu ya Moyo wake. Je sisi tunatoa yote na vyote kwa Yesu?

Katika yote tufanyayo, sala, matendo na mengineyo, je tunajiwekea nia ya kuzidisha upendo ndani yetu ili baadaye tuweze kutoa yote kwake? Ni budi tuongeze upendo zaidi kwa ajili ya kutoa upendo huo tena ili chochote tufanyacho kipate tabia ya matendo ya Yesu.

Je wakati Bwana anapotujalia nguvu motomoto na hamu ya kutenda chochote, anapotujalia nuru, upendo, je tunayatumia hayo kwa manufaa ya wengine? Je huwa tunajaribu kuziingiza roho za watu katika hiyo nuru na katika hiyo nguvu na hamu ya kutenda ili kuuchokoza Moyo wa Yesu uwaongoe? Je si kwamba katika ubinafsi wetu tunazikumbatia hizo neema kwa manufaa ya sisi peke yetu?

Ee Yesu Wangu, naomba, ishara yoyote ndogo ya upendo nionjaye moyoni mwangu iwe ni moto unaoungua mioyo ya viumbe ili kuvifungilia katika Moyo wako.

Je tunatumiaje ile zawadi kuu ya Mama ambayo Yesu alitujalia? Je tunaiga na kuchukua ule upendo wa Yesu, huruma ya Yesu, na matendo yale yote aliyotekeleza Yesu kwa ajili ya kumfurahisha Mama yake? Je twaweza kusema kwamba Mama yetu na Mama wa Mungu anapata furaha juu yetu kama ile aliyopata katika Yesu? Je tupo daima karibu na Mama kama watoto amini, je tunamtii? Tunamwiga katika fadhila zake? Je tunajitahidi kwa namna yeyote ile tusitoroke jicho la kimama linalotuangalia ili kutushikilia ndani ya Yesu? Katika yote yale tufanyayo, je huwa tunamwita Mama wa Mbinguni atuangalie na atuongoze ili tutende kwa utakatifu kama wana kweli chini ya jicho lake lenye huruma?

Ili tuweze kumpa Mama furaha na raha ile ambayo Mwanee Yesu alikuwa anampa, tuombe kwa Yesu ule upendo wote aliokuwa nao kwa Mama yake Mtukufu, ule utukufu aliokuwa anampa daima, ule upenzi na ule usafi na uzuri wa pendo. Tuchukue hayo yote yawe ni ya kwetu na tuyamiliki sisi na hatimaye tuseme kwa Mama wa Mbinguni:

“Sisi tuna Yesu ndani yetu na ili kukufurahisha na ili upate toka kwetu kila kitu ulichokuwa unapata toka kwa Yesu, tunatoa sasa kila kitu na kukupatia wewe. Zaidi ya hilo Mama Mzuri, sisi tunataka kutoa kwa Yesu zile raha zote alizokuwa anapata ndani yako; kwa hiyo basi, tunataka tuingie ndani ya moyo wako ili tuchukue pendo lako, raha zako zote, upenzi wako wote na mahangaiko yako ya kimama na kutoa hayo yote na kumpatia Yesu. Mama yetu, mikono yako ya kimama iwe ni minyororo mitamu inayotufunga sisi kwako na kwa Yesu”.

Yesu hajihurumii hata kidogo. Kwa sababu ya kutupenda kwa Pendo kuu kabisa, angependa kutuokoa sisi sote, na ingekuwa inawezekana, angependa kunyakua toka motoni roho zote hata kama angepasika apate tena Mateso yote. Hilo lakini halioni kwa vile roho hizo, kwa nguvu zao, wanataka kujitoa toka mikononi mwake na kwa hiyo, akishindwa kuvumilia Teso hilo analia kwa sauti: ‘Mungu Wangu, Mungu Wangu, mbona umeniacha?’

Na sisi, je twaweza kusema kwamba upendo wetu kwa roho za watu ni sawa na ule upendo wa Yesu? Je sala zetu, mateso yetu, kazi zetu ndogo ndogo vimeunganika na sala za Yesu kwa ajili ya kunyakua roho zilizopo motoni? Je ni namna gani tunamhurumia Yesu katika Teso lake hilo kali? Hata kama tungemaliza uhai wetu kama sadaka ya kuteketeza ya daima, hiyo isingetosha kuonyesha huruma yetu kwa Yesu kwa Teso hilo. Kila kitendo kidogo, Teso, wazo tunalounganisha na Yesu, huweza kusaidia kunyakua roho ili zisiangukie motoni. Tukiwa tumeunganika na Yesu, tutakuwa mikononi mwetu na ile nguvu na uwezo ule ule wake. Kinyume chake, endapo hatutaunganisha matendo yetu na Yesu, hayo matendo hayatasaidia kuzuia roho hata moja kwenda motoni.

Pendo Langu na Chote Changu, unishikilie mimi moyoni mwako ili nionje upesi jinsi gani mdhambi anavyokutesa anapokutoroka na kujitenga nawe na hivyo niweze kutekeleza mara wajibu wangu.

Ee Yesu Wangu, pendo lako lifunge moyo wangu ili, ukiunguzwa na moto wako, uweze kuonja Pendo lile ulilokuwa nalo Wewe kwa ajili ya roho za watu.

Ninapougua mateso, maumivu, uchungu, basi Ee Yesu, mwaga Hukumu ya Haki yako juu ya mimi, na chukua fidia unayotaka, lakini mdhambi, Ee Yesu, aokoke na maumivu yangu hayo yawe ni kamba inayokufunga Wewe na huyo mdhambi, na roho yangu ipate faraja ya kuona Hukumu ya Haki yako imelipwa fidia yake.

(Sala ya Kushukuru.

Tazama Uk 2)

SAA YA ISHIRINI NA MBILI

(Kuanzia Saa Nane Hadi Saa Tisa Mchana)

Saa ya Tatu ya Mahangaiko Pale Juu Msalabani

(Sala ya Kujiandaa.

Tazama Uk 1)

Neno la Tano:

“Naona Kiu”

Ewe Msulibiwa Wangu Mahututi, nikiwa nimekumbatia Msalaba, naonja moto unaochoma Nafsi yako Tukufu yote; Moyo Wako unapiga kwa nguvu hivi kiasi kwamba mbavu zako zinainuka, unakuumiza vikali hivi karibu kupasuka na inatisha. Hali yote ya Ubinadamu Wako Mtukufu inapata kubadilika mno hata mtu hawezi tena kukutambua. Lile Pendo lililoteka Moyo wako wote sasa linakukausha na kukuunguza. Nawe, kwa vile huwezi tena kulizuia Pendo hilo, unaonja Teso Kuu, siyo tu la kiu cha mwilini kitokanacho na kumwagika kwa Damu yako yote, lakini zaidi Teso litokanalo na kiu kali zaidi cha wokovu wa roho zetu. Wewe, ukiwa ni maji, ungependa utunyweshe ili utuweke sisi sote katika usalama ndani yako. Kwa hiyo, unakusanya nguvu zako za udhoofu wa mwisho na unalia: “Naona kiu!”. Ah! Sauti hiyo ya kilio unairudia kwa kila moyo:

“Nina kiu ya utashi wako, ya hisia zako za upenzi, ya tamaa zako, ya pendo lako; huwezi ukanipa maji mazuri na matamu zaidi kuliko roho yako. Lo, usinifanye niungue moto! Nina kiu kikali sana. Na kwa sababu hiyo najisikia kuungua siyo tu ulimi na koo na hata siwezi tena kutamka neno lolote, bali naonja kukaukiwa pia Moyo na Matumbo. Unionee huruma kwa kiu changu, unihurumie!”.

Unapoanza kuweweseka sababu ya kiu kikuu, unajikabidhi katika Utashi wa Baba. Ah! Moyo wangu unashindwa kuishi zaidi unapoona udhalimu wa maadui wako ambao, badala ya kukuletea maji, wao wanakupatia nyongo na siki na Wewe hukatai. Ah! Naelewa: Wanachokupatia ni nyongo ya makosa mengi sana, ni siki ya tamaa zetu zisizotawalika. Badala ya kukuburudisha, wanakuunguza zaidi.

Ee Yesu Wangu, hapa nakupa moyo wangu, mawazo yangu, upenzi wangu, nafsi yangu yote, ili vitulize kiu yako na viburudishe mdomo wako unaoungua na unaoteseka. Chote nilicho nacho, chote nilicho mimi, yote yawe ni yako Wewe Yesu Wangu. Iwapo mateso yangu yangekuwa ni ya lazima kwa ajili ya kuweza kuokoa hata iwe roho moja tu, mimi nipo hapa tayari kwa mateso yoyote: najitoa kwako kitimilifu kabisa. Nitendee mimi kile kinachokupendeza Wewe zaidi.

Ninataka kufidia Teso lile unalopata kwa ajili ya roho zile zote zinazopotea na kufidia maumivu unayopata kutokana na roho zile ambazo wakati unawatolea uchungu na kuachika, wao, badala ya

kujitoa kwako kama kitulizo kwa kiu chako cha moto kinachokumaliza, wanajitoa kwao wenyewe na hivyo wanasababisha maumivu makali zaidi na zaidi.

Neno la Sita:

“Yametimia”

Chema Changu Uliye Kufani, bahari ya maumivu yako, moto unaokumaliza, na zaidi ya yote Utashi Mkuu wa Baba anayetaka Wewe ufe, havituachii tena tutumaini kuwa utaweza kuendelea kuishi. Na mimi, nitawezaje kuishi bila Wewe? Nguvu zako tayari zinapotea, Macho yako yanajigubika, Uso wako unabadilika na unageuka kuwa na rangi ya mauti, Mdomo wako umefunguka nusu, Pumzi yako hukatikakatika hata hakuna tena tumaini kuwa roho yako itarudi tena. Badala ya ule moto uliokuchoma, unaingia ubaridi na jasho baridi linalowesha Paji la Uso wako. Musuli na neva zako zinazidi kusinyaa kutokana na ukali wa maumivu na pia kutokana na matobo yaliyosababishwa na misumari, Madonda yako yanapasuka zaidi. Mimi natetemeka, najiona kufariki. Ninakuangalia Wewe Chema Changu, ninaona Machozi ya mwisho yakidondoka toka machoni mwako. Hivyo ni viashiria vya kifo kinachokaribia. Na mara, bila kutegemea, tunasikia bado neno lako: “Yametimia”.

Ee Yesu Wangu, tayari umetimiza yote hadi mwisho. Hakuna kingine tena kilichobaki. Pendo limefikia hitimisho lake. Na mimi, je nimemalizika kutumiwa na Pendo lako? Je, ni shukrani gani ambayo sipasiki kukutolea? Ni kitu gani ambacho hakiwezi kuwa shukrani yangu wa ajili yako?

Ee Yesu Wangu, nataka kulipa fidia kwa ajili ya wote, kulipa fidia kwa kutofanana na Pendo lako; nataka pia kukutuliza kwa yale unayoyakabili toka kwa viumbe pindi unapojimaliza kwa Pendo hapo msalabani.

Neno la Saba: “Mikononi Mwako Ee Baba Naiweka Roho Yangu”

Msulibiwa Wangu, Yesu Unayekata roho, ndivyo upo unatoa ishara za mwisho za Maisha yapitayo, Ubinadamu Wako Mtukufu tayari umepata ganzi na Moyo hauonyeshi ishara tena ya mapigo yake. S Pamoja na Magdalena ninaikumbatia Miguu yako na ningetamani, ikiwezekana, nitoe uzima wa kwangu ili kuhuisha uzima wako.

Halafu, Ee Yesu, nakuona ukifungua Macho yako ya umahututi na unaangalia pande zote za msalaba kana kwamba ungependa kutoa **‘kwaheri’** ya mwisho kwa watu wote. Unamwangalia Mama yako aliye mahututi pia kwani hajimudu tena na wala hana sauti kwa vile mateso ni makali mno. Hapo unasema: “Kwaheri Mama, Mimi naondoka, lakini nitakuweka katika Moyo Wangu. Tunza wana wangu na wana wako”. Unamwangalia na Magdalena anayelia, Yohane unayempenda, na unapoendelea kuwatazama unasema: “Kwaheri”.

Kwa upendo unawaangalia hata maadui wako wenyewe na unapoendelea kuwatazama unasema: “Mimi ninawasamehe, ninawapa busu la amani”. Katika jicho lako, hakuna kitu kinaweza kufichama,

unawaaga wote na unawasamehe wote. Kishapo unakusanya nguvu zako za mwisho na unalia kwa sauti kuu: “Baba, mikononi mwako naiweka roho yangu!”. Na kisha kuinamisha Kichwa chako unakata roho.....

Kifo cha Yesu

Yesu Wangu, kwa kilio hicho, ulimwengu wote unatikisika na kulilia Kifo chako, Kifo cha Muumba Wake. Dunia inatetemeka kwa nguvu na kwa mtetemo wake huo, dunia inalia na inataka kuzitikisa na kuziamsha roho zikutambue na kukukiri kuwa Wewe ni Mungu kweli. Pazia la hekalu linapasuka, wafu wanafufuka, jua nalo lilikuwa hadi punde linayaomboleza Mateso yako sasa linazama na kuondoa mwanga wake kwa sababu ya kutishwa. Maadui wako wanaposikia kilio chako hicho wanaanguka na kupiga magoti, wanajipiga kifua na wanasema: “Hakika Huyu ni Mwana wa Mungu!”. Na Mama yako, katika ganzi na umahututi anapata maumivu makali zaidi kuliko kifo.

Yesu Wangu Uliyekufa, kwa kilio chako hicho Wewe unatukabidhi hata sisi wote katika Mikono ya Baba ili asitukatae. Kwa hiyo, ulie kwa nguvu siyo kwa sauti tu bali hata kwa maumivu yako yote na kwa sauti za Damu yako: “Baba, mikononi mwako naiweka roho yangu na roho zote!”. Yesu Wangu, hata mimi najitoa kwako; unipe neema ya kufa kitimilifu katika Pendo lako na katika Utashi wako. Ninakuomba usiruhusu kamwe nitoke katika Utashi wako Mtukufu, kamwe wakati wa uhai wangu, na kamwe katika kifo changu.

Zaidi ya hilo, ninanua kulipa fidia kwa ajili ya wote wale ambao hawajitoi kikamilifu kwa Utashi wako Mtukufu, na kwa njia hiyo wanapoteza au kudhoofisha kwa namna fulani tunda azizi la Ukombozi wako. Ni Teso gani la moyoni mwako, Ee Yesu Wangu, unapona viumbe wengi wanaotoroka toka mikononi mwako na wanakimbilia ndani yao wenyewe! Uwahurumie wote, Ee Yesu Wangu, unihurumie na mimi.

Ninakibusu Kichwa chako ambacho kimevishwa taji la miiba, na ninaomba radhi kwa mawazo yangu mengi ya majivuno, ya kutamani makuu na ya kutafuta heshima na sifa yangu. Ninakuahidia kuwa kila nitakapofikiwa na wazo lolote lisilo kwa ajili yako, Ee Yesu, na kila ninapojikuta katika nafasi ya kukukosea, nitalia mara moja: “Yesu na Maria! Nawakabidhi roho yangu!”.

Ee Yesu, nayabusu Macho yako mazuri ambayo bado yamelowa machozi na yamegubikwa na Damu iliyoganda, na ninakuomba radhi sana kwa mara zote zile nilipokukosea kwa mtazamo mbaya na mchafu. Ninakuahidia kwamba kila mara pale macho yangu yatakapochukuliwa kuangalia vitu vya dunia, nitapiga kelele mara moja: “Yesu na Maria, ninawakabidhi roho yangu!”.

Ee Yesu Wangu, ninayabusu Masikio yako matukufu, ambayo yamezibwa hadi dakika za mwisho kwa madharau na makufuru machafu na ninakuomba radhi kwa mara zile niliposikiliza au nilipowafanya wengine wasikilize mazungumzo yanayotutenga nawe. Naomba radhi kwa mazungumzo mabaya

yanayofanyika na viumbe. Ninakuahidia kuwa kila nitakapojikuta katika nafasi ya kusikiliza mazungumzo yasiyo mazuri nitalia mara moja: “Yesu na Maria, nawakabidhi roho yangu!”.

Ee Yesu Wangu, naubusu Uso wako mtukufu uliopauka rangi yake, uliovimba na unaotoka Damu. Ninakuomba radhi kwa udhalilishaji mwingi, makemeo na madharau unayoyapata toka kwetu sisi viumbe tuliochafuka sana kwa dhambi zetu. Ninakuahidia kuwa kila nitakapopata kishawishi cha kutokukupatia utukufu wote, pendo na uabudu unaostahili, nitapiga kelele mara nikisema: “Yesu na Maria, nawakabidhi roho yangu!”.

Ee Yesu Wangu, nanauabudu Mdomo wako mtukufu uliungua na kuumizwa sana. Ninakuomba radhi kwa mara zile nilipokukosea kwa mazungumzo yangu mabaya, kwa mara zote nilipokubali kukuchukiza na kukuza ukali wa kiu chako. Ninakuahidia kuwa kila litakaponijia wazo la kufanya mazungumzo yanayoweza kukuudhi, nitalia kwa sauti mara: “Yesu na Maria! Nawakabidhi roho yangu!”.

Ee Yesu Wangu, ninaibusu Shingo yako tukufu; ninaona bado alama za minyororo na kamba zilizokuwa zimekubana. Ninakuomba radhi kwa mahusiano mengi na mapatano mengi ya viumbe wale walioongeza na kukaza kamba na minyororo katika Shingo yako tukufu. Na ninakuahidia kwamba kila nitakapoonja ninasumbuliwa na mahusiano, tamaa na upenzi ambavyo si kwa ajili yako, nitalia kwa sauti: “Yesu na Maria! Nawakabidhi roho yangu!”:

Yesu Wangu, ninayabusu Mabega yako matukufu na ninakuomba radhi kwa vitulizo na furaha nyingi zisizo halali, naomba radhi kwa dhambi nyingi sana tulizotenda kwa milango yote mitano ya maarifa ya mwili wetu. Ninaahidi kuwa kila litakaponijia wazo la kujipatia tamaa fulani au raha isiyokuwa kwa ajili ya utukufu wako nitalia mara: “Yesu na Maria! Nawakabidhi roho yangu!”.

Yesu Wangu, nabusu Kifua Chako kitukufu na ninakuomba radhi kwa ubaridi mwingi, kujitenga na kutoshiriki, utepetevu na kukosa shukrani kwa ajabu unaopata Wewe kutoka kwa viumbe. Ninaahidi kuwa kila nitakapoonja hali ya ubaridi ndani katika Pendo lako, nitalia mara: “Yesu na Maria! Nawakabidhi roho yangu!”.

Yesu Wangu, ninaibusu Mikono yako mitukufu. Ninakuomba radhi kwa kazi zote mbaya na zinazokosa ushirikiano, kwa vitendo vingi vilivyochafuliwa na mapendo ya ubinafsi na heshima binafsi. Ninakuahidia kwamba kila litakaponijia wazo la kugoma kutenda kwa hoja ya Pendo lako tu, nitalia mara moja: “Yesu na Maria! Nawakabidhi roho yangu!”.

Ee Yesu Wangu, naibusu Miguu yako mitukufu na ninakuomba radhi kwa hatua nyingi, kwa njia nyingi nilizokanyaga bila lengo sahihi, na kwa ajili ya wale wengi wanaokutoroka kwa ajili ya kwenda kutafuta raha za dunia. Ninakuahidia kuwa kila litakaponijia wazo la kujitenga mbali na Wewe, nitalia kwa sauti: “Yesu na Maria! Nawakabidhi roho yangu!”.

Ee Yesu, naubusu Moyo Wako mtukufu. Ndani yake natamani kujifungilia, pamoja na roho yangu, roho zile zote zilizokombolewa nawe, ili zote ziwe salama, na hata moja isiachwe nje. Ee Yesu, nifungilie ndani ya Moyo wako na kwa namna fulani unifungie hata milango ili mimi nisiweze kuona kingine chochote isipokuwa Wewe. Ninakuahidia kuwa kila litakapokuja wazo la kutaka kutoroka toka katika Moyo wako, nitalia kwa sauti mara moja: “Yesu na Maria! Kwenu nawapa moyo na roho yangu!”.





TAFAKARI NA ZOEZI

Yesu anaungua na kiu. Je sisi tunaungua kwa upendo kwa ajili ya Yesu? Je mawazo yetu, hisia zetu za upenzi, zinakuwa daima na lengo la kutuliza kiu chake kikali?

*Yesu aliyekaukiwa, anaposhindwa kuvumilia kiu hicho kinachowaka, anasema: “Yametimia!”. Kumbe Yesu ametimiza yote kwa ajili yetu sisi. Je sisi, katika kila kitu, tunajaribu kujibidisha kuwa kafara inayojiteketeza kwa pendo kwa ajili ya Yesu? Kila tendo, neno na wazo vilikuwa vinamchukua Yesu na kumfikisha kwenye ‘**kujiteketeza**’. Na sisi je, kila tendo letu, neno na wazo letu, vinatusukuma tujimalize na tujiteketeze kwa ajili ya pendo kwa Yesu?*

Ee Yesu, Uhai Wangu Mtamu, pumzi yako iliyoteketea, iingie ndani ya moyo wangu mnyonge ili uniwezeshe kupata mhuri wa kujiteketeza kwako.

Yesu juu ya Msalaba anatimiza Utashi wa Baba katika mambo yote, na anapumua kwa tendo timilifu la kuachika katika Utashi wake Mtukufu. Na sisi je tunatimiza Utashi wa Mungu katika mambo yote? Je tunajitoa na kujikabidhi kitimilifu katika Utashi wake? Bila kutazama kama itatuwia vizuri au vibaya? Je tunaridhika tu kujikuta tumeachika katika Mikono yake Mitukufu? Je kule kujifia sisi wenyewe ni dhana ya kuendelea kwa ajili ya pendo kwa Yesu? Je, tunaweza tukasema kuwa ingawa tupo tunaishi lakini hatuishi, na kwamba tumevifia vitu vyote ili tuishi, siyo tu kwa ajili ya uhai wetu, bali ili tuishi kwa ajili ya Uhai wa Yesu? Yaani, kila tunachofanya, tunachowaza, tunachotamani, tunachopenda, kinatukumbusha ndani yetu dhana ya kuishi kwa ajili ya Yesu, kwa ajili ya kuua neno letu, hatua yetu, tamaa yetu, wazo letu na kila kitu ndani ya Yesu?

Ee Yesu Wangu, kifo changu kiwe ni kifo endelevu kwa ajili ya pendo lako, na kila kifo ninachopata kiwe ni uzima ninaonua kuutoa kwa ajili ya roho zote.

(Sala ya Kushukuru.

Tazama Uk 2)

SAA YA ISHIRINI NA TATU

(Kuanzia Saa Tisa Hadi Saa Kumi Mchana)

Yesu Amekufa, Anatobolewa Ubavu, Na Anateremshwa Msalabani

(Sala ya Kujiandaa.

Tazama Uk 1)

Ee Yesu Wangu, tayari umekufa. Na mimi niliye moyoni mwako tayari ninaanza kufurahia matunda mengi lukuki ya Ukombozi wako. Wale wengi waliokuwa hawasadiki lolote sasa wanapiga magoti mbele yako, wanapiga vifua, na lile ambalo hawakuwahi kufanya mbele ya Mwili wako ulipokuwa hai, wanalifanya sasa mbele ya maiti ya Mwili wako. Dunia inatikisika, jua linaingia giza, ardhi inatetemeka, nguvu za angani zinapotea, utadhani na zenyewe zinashiriki Kifo chako cha Mateso makali.

Malaika, wakishikwa na mshangao na upendo, kwa maelfu na maelfu wanashuka toka Mbinguni, wanakuabudu, wanatoa heshima ya kukukiri na wanathibitisha kuwa Wewe ni kweli Mungu wetu. Ee Yesu Wangu, hata mie naunganisha uabudu wangu na wao, ninakutolea shukrani zangu na pendo lote la moyo wangu fukara. Naona kwamba pendo lako bado halijajiridhisha na kwa hiyo, ili kutupatia ishara ya uhakika zaidi, unaruhusu askari akukaribie na kwa mkuki atoboe Moyo wako na hivyo kukuwezesha kumwaga matone ya mwisho ya Damu na Maji yaliyokuwa yamebaki ndani pale. Ee Yesu Wangu, Je hutaruhusu mkuki huo uniumize pia moyo wangu? Oh! Ndiyo! Huo uwe ndio mkuki unaochana tamaa zangu, mawazo yangu, mapigo yangu ya moyo, utashi wangu; unipe Utashi wako, mawazo yako, na maisha yako yote ya upendo na ya kujisadaka.

Moyo wa Yesu Wangu, uliotobolewa na mkuki huu, uwe Wewe ndiyo josh la roho zote, uwe kimbilio la mioyo yote, na uwe pumziko la wote waliopondeka. kutoka kidonda hiki unafanya litoke Kanisa, mchumba wako mpendwa, humo zinatoka na Sakramenti na humo hutoka uzima wa roho za watu. Na mimi, pamoja na Mama yako Mtukufu, aliyeumizwa kikatili katika moyo, nakusudia kulipa fidia kwa makosa, madhalilisho, na makufuru yanayofanyika dhidi ya Kanisa lako. Kwa nguvu itokayo katika kidonda hiki, na kwa nguvu ya Maria Mtukufu, Mama yetu Mtamu kabisa, ninakuomba uwafungilie viongozi wote wa Kanisa lako katika Moyo wako wa upendo. Uwalinde, uwakinge na uwaangaze.

Ee Yesu Wangu, baada ya Kifo chako cha kutisha na cha Mateso kabisa, yaelekea mimi siwezi kuwa tena na uhai wangu mwenyewe, kwani uhai wangu lazima niukute na kuuona ndani ya Moyo huo uliochomwa mkuki. Kwa hoja hiyo, chochote nitakachotaka kutenda nitakichota daima toka katika Moyo huo wa kimungu. Sitatoa uhai tena kwa mawazo yangu bali yakinitaka uhai nitayachukua mawazo ya kwako. Utashi wangu hautakuwa na uhai tena bali ukitaka uhai nitatwaa Utashi Mtukufu wa kwako. Pendo langu halitapata kamwe uhai bali likitaka kuwa hai nitatwaa Pendo la kwako. Ee

Yesu Wangu, Utashi Wako wote ni wangu; huu wa kwangu ni Utashi wako na huo wa kwako ndio utashi wangu.

Yesu Anashushwa Msalabani

Yesu Wangu, umetupatia uthibitisho wa mwisho wa Pendo lako: Moyo wako umepasuka. Huna tena la kufanya kwa ajili yetu. Tazama tayari wanaweka utaratibu wa kukushusha toka msalabani. Na mimi, kwa vile nimekwisha kuyaweka yote ndani yako, ninatoka nje, na nikiwa pamoja na Wafuasi wako wapendwa, nataka niondoe misumari ya kwenye Miguu yako mitukufu na kutoka Mikono yako. Ninapotoa misumari hiyo, kwa misumari hiyo hiyo unipigilie nafsi yangu yote ndani yako. Ee Yesu Wangu, baada ya kuteremshwa toka msalabani, mtu wa kwanza kukupokea kifuani pake ni Mama yako mteseka. Kichwa chako kilicho na madonda mengi sana, sasa kinapumzika kwa raha sana mikononi mwake.

Ee Mama mpendevu, usichukie kunipokea mimi kama mwenzi wako ili pamoja nawe, hata mimi niweze kutoa huduma za mwisho kwa mpendwa wangu Yesu. Mama yangu mtamu kabisa, ni kweli kwamba Wewe unanizidi katika upendo na umakini wa kumgusa na kumpapasa Yesu wangu, lakini mimi nitajitahidi kukuiga wewe kadiri niwezavyo, ili katika mambo yote, nimfurahishe Yesu mwabudiwa. Kwa hoja hiyo naiweka mikono yangu, pamoja na mikono yako mitakatifu, na kuanza kutoa miiba yote inayozunguka Kichwa chake kiabudiwa; hiyo ni kwa nia ya kuunganisha uabudu wangu na uabudu wako. Mama wa mbinguni, tayari unasogeza mikono yako kwenye Macho ya Yesu Wangu kwa ajili ya kusafisha Damu iliyoganda. Macho haya ni yale yaliyokuwa yanatoa nuru kwa ulimwengu wote, lakini sasa yamepata kiza na yameziba. Ee Mama, naungana nawe ili tuyabusu pamoja na tuyaabudu kwa dhati kabisa. Ninayaona na Masikio ya Yesu Wangu yakiwa yamezibika na Damu, yamebanana na Kichwa kutokana na makofi, na yamechanika kutokana na miiba. Ee Mama, tuzidishe uabudu wetu juu ya Masikio hayo ambayo sasa hayasikii tena, lakini ndiyo yaliyoteswa sana kwa ajili ya kuita roho zile zilizokuwa na uziwi na zilizokaidi sauti za neema.

Ee Mama mpendevu, ninauona uso wako wenye mateso na machozi unapoushangaa Uso wa Yesu Mwabudiwa. Naunganisha teso langu na teso lako. Ebu tutoe na kusafisha madongo na mate yanayouchafua sana Uso wake. Ebu sasa tuuabudu Uso huu wa utukufu wa Mungu, Uso uliokuwa unaipenda Mbingu na dunia na ambao sasa lakini hauna dalili yoyote ya uhai. Ee Mama mtamu, ebu tubusu pamoja Mdomo wake, ule Mdomo wa kimungu ambao kwa utamu wa Neno lake ulivutia roho nyingi sana kwenye Moyo wake. Ee Mama, kwa njia ya mdomo wako mwenyewe nataka nibusu ile Midomo iliyovimba na yenye Damu, na ninaiabudu kwa dhati kabisa. Ee Mama yangu mtamu, pamoja nawe nataka kubusu na kubusu tena Mwili mwabudiwa wa Yesu Wangu, Mwili ambao sasa umegeuka kuwa ni donda moja. Naweka mikono yangu ndani ya mikono ya kwako ili tuunganishe tena vipande vipande vya nyama vinavyoning'inia hapa na pale na tuuabudu kwa uchaji mkuu. Ee Mama, tubusu Mikono ya uumbaji iliyotenda makuu mengi sana kwa ajili yetu, mikono iliyotobolewa, iliyopindapinda na ambayo imekufa ganzi kutokana na kifo. Ndani ya Madonda haya matakatifu tuweke na kufungia mashauri ya roho zote. Yesu atakapofufuka ataziona roho hizo tayari zimewekwa hapo na wewe na hivyo hakuna roho itakayoweza kupotea. Ee Mama, ebu tuabudu kwa pamoja Madonda haya, tufanye hivyo kwa jina la wote na pamoja na wote. Ee Mama wa mbinguni, nakuona

unajisogeza ili kubusu Miguu ya masikini Yesu. Ona ni jinsi gani yanavyotisha Madonda haya! Misumari imerarua vipande vipande vya nyama na ngozi, na uzito wa Mwili Mtukufu umeipindisha hiyo misumari vibaya sana. Hebu tuibusu kwa pamoja, na tuiabudu kwa uchaji kabisa. Ndani ya Madonda haya tuingize na kufungilia hatua zote za wadhambi ili wanapotembea waonje hatua za Yesu anayewafuata kwa karibu na wasishupae katika kumkosea. Nakuona sasa, ee Mama, unageuka kuutazama Moyo wa Yesu mwabudiwa. Je tutafanya nini ndani ya Moyo huu? Wewe Mama utanifundisha nini nifanye. Unizike ndani yake, unifungilie ndani na kuziba mlango kwa jiwe. Nitauweka moyo wangu na uhai wangu ndani hapa, na nitabaki nimejificha hapo mpaka milele. Unipe pendo lako ee Mama kwa ajili ya kumpenda Yesu, unipe teso lako ili niweze kuomboleza kwa ajili ya wote na ili nitoe fidia kwa kila kosa linalotendeka dhidi ya Moyo huu. Ukumbuke ee Mama, jinsi utakavyomzika Yesu kwa mikono yako mwenyewe, nataka na mimi nizekwe pamoja naye ili niweze kufufuka pamoja naye na pamoja na chochote kilicho cha kwake.

Na sasa, nina neno kwa ajili yako Mama yangu mtamu. Napata maumivu sana pamoja nawe na kwa moyo wangu wote nashiriki teso lako. Ili kutekeleza tendo la nia ya dhati kabisa la kukuliwaza na la upendo, ningependa niunganishe mapigo yote ya mioyo ya viumbe wote, matamano yao yote na uhai wao wote na hatimaye niyaleta na kuyalaza hayo yote ndani yako wewe. Ninakuonea uchungu sana katika teso lako kuu ulilopata pale ulipomwona Yesu aliyekufa, aliyetiwa taji la miiba, aliyechubuka kwa pigo la mijeledi, na kwa kutobolewa na misumari. Pia teso lako la kuona Macho yale ambayo hayawezi kukutazama tena, Masikio yale ambayo hayasikii tena sauti yako, Mdomo ule ambao hauzungumzi nawe tena, Mikono ile ambayo haikukumbatii tena, Miguu ile ambayo kamwe haikuwa inakuacha bali hata kutoka mbali ilikuwa inafuata daima hatua zako. Nataka kukutolea wewe Moyo wa Yesu mwenyewe, Moyo unaofurika upendo, ili kukuhurumia wewe kama unavyostahili na ili kukutuliza katika mateso yako makali kabisa.



TAFAKARI NA ZOEZI

Yesu, baada ya kifo chake, anataka achomwe mkuki kwa ajili ya kutupenda sisi. Je sisi tunakubali kuumizwa na kuteseka katika yote kwa ajili ya kumpenda Yesu? Au tunakubali tuumizwe na tuteseke kwa pendo la viumbe? Kwa tamaa na kwa kupenda mambo yetu sisi wenyewe?

Hata hali za ubaridi, za giza, udhalilishwaji wa ndani na wa nje ni maumivu ambayo Yesu huleta kwa mtu. Kama hatuyapokei hayo toka mikononi mwa Mungu, basi tunajiumiza na kujitesa sisi wenyewe na hayo yanakuza tamaa, udhaifu, tamaa ya heshima, na kwa kifupi, huongeza kila ubaya. Lakini pale tunapoyapokea kama maumivu au mateso yaliyoletwa na Yesu, ndani ya mateso hayo Yeye ataweka Pendo lake, fadhila zake na ufanano naye. Hayo yatafanya tustahili kupata mabusu yake, upenzi wake na mbinu zote za Pendo la kimungu. Maumivu hayo yatakuwa ni sauti endelevu zitakazomwita na kumsukuma aendelee kukaa nasi daima.

Ee Yesu Wangu, mkuki wako uwe kwangu silaha ya kunilinda, inayonikinga na kila aina ya maumivu yanayoletwa na viumbe.

Yesu anashushwa msalabani na kuwekwa mikononi mwa Mama. Je sisi tunaweka mikononi mwa Mama yetu hofu zetu, mashaka yetu, wasiwasi wetu na mahangaiko yetu? Yesu alipumzika kifuani pa Mama wa Mungu. Je na sisi huwa tunampa Yesu pumziko kwa kuondoa hofu zetu na mahangaiko yetu?

Mama yangu, kwa njia ya mikono yako ya kimama, ondoa toka moyoni mwangu chochote kile kinachoweza kumzuia Yesu asipumzike ndani yangu.

(Sala ya Kushukuru.

Tazama Uk 2)

SAA YA ISHIRINI NA NNE

(Kuanzia Saa Kumi hadi Saa Kumi na Moja Jioni)

Yesu Anazikwa, Mama Maria Anaachika

(Sala ya Kujiandaa.

Tazama Uk 1)

Mama yangu Mteseka, naona unajiandaa kwa ajili ya sadaka ya mwisho ya kupasika kumzika Mwana wako Yesu aliyefariki. Katika utiifu mkuu kwa Utashi wa Mbingu unamsindikiza na kwa mikono yako mwenyewe na unamlaza kaburini. Lakini, wakati unaponyosha na kuweka sawa Mikono na Miguu yake, na unapotoa heshima ya mwisho na kumwaga, na kumbusu kwa mara ya mwisho, unapata uchungu na kujisikia moyo wako unang'oka toka kifuani. Upendo wako unakupigilia kwa misumari juu ya viungo hivyo unavyoshika na kwa nguvu ya upendo na mateso uhai wako upo hatarini kuzimika pamoja na Mwana wako aliyezimia.

Masikini Mama, utafanyaje bila Yesu? Yeye ndiye uhai wako, Yeye ni yote yako. Hata hivyo, ndivyo ulivyo Utashi wa Yule wa Milele anayetaka iwe hivyo. Itakupasa ukabiliane na nguvu za aina mbili zisizovumilika: Upendo na Utashi wa Mungu. Upendo unakufunga kwa misumari kiasi kwamba huwezi kujitenganisha. Utashi wa Mungu unakudai na unataka sadaka. Masikini Mama, utafanyaje? Ni jinsi gani ninakuonea sana uchungu! Ah! Enyi Malaika wa Mbingu, njoni mumwinue Mama toka viungo vya Yesu vilivyokauka, vinginevyo atakufa. Oh, tukio la ajabu ! Pindi alipoonekana kama amezimia pamoja na Yesu, nasikia sauti yake nyembamba inayotetemeka na yenye kukatikakatika kutokana na makohozi. Sauti hiyo inasema:

“Mwanangu, Mpendwa Mwanangu, ilikuwa kitu kimoja kilichobaki kama kitulizo na faraja yangu na kilikuwa kinapunguza maumivu yangu: Ubinadamu wako Mtukufu. Juu ya Madonda haya nilijimwagia machozi yangu, nilikuwa nayaabudu, nilikuwa nayabusu. Lakini sasa hata hiki kitulizo ninanyang'anywa kwa sababu Utashi wa Mungu unataka hivyo na mimi nakubali kimyakimya. Lakini ujue Ewe Mwana, kuwa nalitaka neno hilo, lakini siliwezi. Linapofika wazo tu la kutenda, nguvu zote zinanitoka na uhai unatoroka. Ah! Uniruhusu, Ewe Mwana, kwamba kila kitu kibaki kimezikwa ndani yako, na kwamba mimi nichukue uhai wako, maumivu yako yote, fidia zako na kila kitu kilicho ni Wewe. Likitimia hilo, mimi nitaweza kuwa na uhai na nguvu ya kujitenganisha. Ah! Ni mabadilishano tu ya uhai kati Yako na mimi. Na ndilo litanipa mimi nguvu ya kutekeleza sadaka hii ya kujitenganisha nawe”.

Baada ya kuamua hilo, Mama yangu Mteseka, nakuona unaanza kupita juu ya viungo mbalimbali, huku unaweka kichwa chako juu ya Kichwa cha Yesu. Unapokibusu unafungilia mawazo yako ndani yake na badala yake wewe unachukua miiba yake, mapigo yake, mawazo yake yaliyoundhiwa na kila Teso

alilolipata katika Kichwa chake Kitukufu. Oh, ni jinsi gani ungependa kuzindua uhai wa akili ya Yesu kwa nguvu ya akili yako ili kubadilisha uhai kwa uhai. Tayari unajionja kuanza kuishi uhai mpya baada ya kuwa umechukua akilini mwako mawazo na miiba ya Yesu.

Mama wa Mateso, nakuona unabusu Macho yaliyozimia ya Yesu na mimi inanichoma sana kuona Yesu hakutazami tena. Ni mara ngapi Macho hayo ya kimungu, yalipokuwa yanakutazama, yalikupa kionjo na picha ya paradisini na pia yalikufanya uonje kufufuka toka mauti na kuingia katika uzima! Na sasa unapoona hayakutazami tena, unapata uchungu wa kufa. Kwa hiyo basi, weka macho yako ndani ya Macho ya Yesu, na wewe utwae ya kwake yawe yako, twaa machozi yake na uchungu wake anapoona makosa ya viumbe, madharau mengi sana na udhalilishaji.

Lakini nakuona Mama yangu mteseka unabusu Masikio yake Matukufu huku ukimwitamwita ukisema:

“Mwanangu, inawezekana kweli hunisikii tena Wewe ambaye ulikuwa unanisikia katika kila ishara yangu hata ndogo? Na sasa tazama ninalia, ninakuita na Wewe hunisikii? Ah, Upendo ni kweli ukatili mbaya kupita mwingine wowote!! Kwangu mimi Wewe ulikuwa ni zaidi ya uhai wenyewe wa kwangu na sasa itanipasa niendeleo kuishi katika mateso makubwa hivi? Kwa hiyo basi, Ee Mwanangu, nakuachia ndani yako uwezo wangu wote wa kusikia na badala yake najichukulia chochote kile kilichoyatesa Masikio yako matukufu, mwangwi wa makosa yote uliokuwa unalia ndani yake. Ni hicho tu kitaweza kunipa mimi uhai: maumivu yako na Mateso yako”.

Na wakati unasema hilo, Teso linakuwa kali kabisa moyoni pamoja na moyo kukubana sana. Sauti yako inakatika na unabaki ganzi bila kujimudu. Masikini Mama yangu, Masikini Mama yangu! Ni jinsi gani mimi ninakuhurumia! Ni vifo vingapi vya kikatili unavipitia!

Mama Mteseka, Utashi wa Mungu unatoa amri kukulazimisha na wewe unaanza kujimudu. Unatazama Uso wake Mtukufu, unaubusu huku unalia:

“Mwana Mwabudiwa, ni jinsi gani ulivyochafuliwa! Ah! Kama pendo lisingeniambia kuwa Wewe ndiye Mwanangu, ni Uhai wangu, Chote Changu, nisingeweza kabisa kukutambua kwa jinsi hutambulikani tena! Ule uzuri wako wa kuzaliwa kabadilika kwa kuharibiwa, yale mashavu yako angavu kama dhahabu yamebadilika kuwa uvimbevimbe na machubuko. Ee Mwana Mpendwa, Uso wako mzuri ulikuwa unaangaza kwa mwanga na neema kiasi kwamba kukuona Wewe ilikuwa ni sawa na kudumu katika hali ya heri. Sasa, Ee Mwana Mpendwa, mwanga ule umefifia na kubadilika kuwa rangi ya kifo. Mwanangu, umebadilika na kukonda namna hiyo! Ni uchafuzi gani huu ulioletwa na dhambi juu ya viungo vyako vitakatifu vya mwili. Ah, ni jinsi gani Mama yako asiwegawanyika angependa kukurejeshea ule uzuri wako wa awali! Mimi nataka niyeyushie uso wangu ndani ya Uso wako, nitwae Uso wako uwe wangu, nitwae na makofi uliyopata, mate uliyotemewa, madharau na kila Teso ulilopata katika Uso wako Mtukufu. Ah, Mwanangu, kama unataka kuniona nikiwa hai basi unipe Mateso yako hayo, vinginevyo mimi ninakufa”.

Na maumivu yako Mama ni makali sana. Yanakuziba na koo, sauti inakatika, na unabaki kama umezimia juu ya Uso wa Yesu. Masikini Mama, ni jinsi gani mimi nakuonea huruma! Enyi Malaika wangu njoni kumfariji Mama yangu; maumivu yake ni makali mno, yanamwelelea, yanambana moyo na pumzi na hana uhai tena wala nguvu. Lakini Utashi wa Mungu unazima mawimbi hayo yote, na unamrejeshea Mama uhai tena.

Tayari Mama umekwishafika juu ya Mdomo wake. Unaubusu. Unaupapasa na kuonja jinsi Midomo ilivyomizwa, na uchachu wa nyongo ulivyounguza sana Mdomo wa Yesu. Huku ukikoroma unaendelea kusema:

“Mwanangu, tamka kauli ya mwisho kwa Mama yako. Je inawezekana kweli nisisikie tena Sauti yako? Maneno yote uliyonitamkia katika maisha, sasa kama mishale mingi mikali, inanichoma moyoni kwa maumivu na kwa mapendo. Na sasa, ninapokuona u kiziwi, maneno hayo yanaingia tena katika moyo wangu uliyoumizwa, na hivyo yananisababishia vifo visivyohesabika. Na kwa nguvu ya ajabu iliyo hai, maneno hayo yanataka kulirarua Neno lako la mwisho. Lakini kwa vile hayalipati yananiumiza na kuniambia: ‘Kwa vile hutaweza kulisikia tena, hutaweza tena kuonja mkazo wake mtamu, melodia ya Neno lake la uumbaji, Neno lililokuwa linaumba paradisi nyingi ndani yako kwa kila Neno alilokuwa anatamka’. Ah, paradisi yangu kaisha na sitapata nyingine isipokuwa machungu. Ah, Mwanangu, nataka kukupatia ulimi wangu ili uuhshe Ulimi wako. Ebu unipe kile ulichoteseka katika Mdomo wako Mtukufu: uchungu wa ile nyongo, kiu chako kile kikali, fidia na sala ulizotoa. Hapo nitakaposikia Sauti yako kupitia hivyo, Teso langu litavumilika zaidi na Mama yako ataweza kuishi kupitia maumivu yako”.

Mama uliyevunjika moyo, nakuona unaharakisha kwa vile wale wanaokuzunguka wanataka kufunga kaburi na wewe, kwa haraka kidogo unashika mikono ya Yesu ndani ya mikono yako, unaibusu, unaibana kwenye moyo wako na pindi unapoingiza mikono yako ndani ya mikono ya Yesu, unayachukua Wewe mateso na michubuko ya Mikono ile mitukufu. Halafu unarukia kwenye Miguu ya Yesu kuangalia mpasuko wa kikatili uliosababishwa na misumari iliyoingia ndanimu; na pindi unapoitolea miguu yako, unatwaa Madonda yale na unajitolea mwenyewe, badala ya Yesu, kuwakimbilia wakosefu ili kuwararua kutoka motoni.

Mama msumbuka sana, nakuona sasa unaaga kwa mara ya mwisho Moyo uliotobolewa wa Yesu. Hapa unafanya pausa kidogo; ni shambulio la mwisho juu ya moyo wa kimama. Unauonja kabisa ukiraruka kutoka kifuni kutokana na moto mkali wa upendo na wa tesu, na moyo wenyewe peke yake unaruka na kutua ndani ya Moyo mtukufu wa Yesu. Na wewe unapojigundua huna moyo, unaharakisha kuchukua Moyo mtukufu na kuuingiza ndani ya moyo wa kwako. Pendo lake lililokataliwa na viumbe wengi sana, matamano yake makali ambayo hayakutekelezwa kutokana na ugumu na ubaridi wao, mateso na matobo ya Moyo mtukufu, yatakayokushikilia uning’inie ukisulibiwa kwa maisha yote. Na unapoangalia lile Donda pana, unalibusu, unailamba Damu na unapoonja Uhai wa Yesu, unaonja nguvu ya kuukabili ule utengano wa uchungu. Kwa hiyo unamkumbatia, na hivyo unaruhusu waliweke lile jiwe na hivyo walifunike na kulifunga lile kaburi.

Mama yangu Mteseka, ninapolia, ninakuomba usiruhusu kwa sasa kuwa Yesu atolewe kutoka machoni petu; ungoje kwanza mimi nifungiliwe ndani ya Yesu kwa ajili ya kuchukua Uhai wake ndani yangu. Iwapo wewe uliye bila doa, mtakatifu kabisa, uliyejaa neema, huwezi ukaishi bila Yesu, mbaya zaidi mimi ambaye ni udhaifu, unyonge na niliyejaa dhambi; nitawezaje kuishi bila Yesu? Mama Mteseka, usiniache peke yangu, unibebe pamoja nawe, lakini kabla ya kuingiza nafsi yangu yote ndani ya Yesu, ondoa kila kitu toka kwangu, ili kuweza kumweka Yesu mzima ndani yangu, kama vile ulivyomweka ndani yako. Kutoka kwa mimi, uanze jukumu lile la kimama alilokupa Yesu pale msalabani, na kwa kupasua kidogo penye moyo wako wa kimama, kwa mikono yako mwenyewe, uniingize mimi ndani ya Yesu na kufungilia ndanimu nafsi yangu yote yote katika umasikini wake mkuu.

Fungilia mawazo ya Yesu ndani ya akili yangu hata isiwezekane kwa wazo lingine kuingia ndani yangu. Fungilia Macho ya Yesu ndani ya macho yangu hata asiweze kutoka mbele ya jicho langu; Sikio lake ndani ya sikio langu hata niwe namsikiliza daima, na katika yote niwe natimiza Utashi wake Mtukufu. Weka Uso wake ndani ya uso wangu hata ninapouona umechafuka namna hiyo kwa kunipenda mimi, mimi niupende, niuhurumie na niutolee fidia; Ulimi wake ndani ya ulimi wangu hata niweze kuzungumza, kusali na kufundisha kwa Ulimi wa Yesu; Mikono yake ndani ya mikono yangu, ili kila ninapojimudu na kila kazi ninayotenda, vyote vipate uhai wao toka kwa kazi na matendo ya Yesu. Weka Miguu yake ndani ya miguu yangu, ili kila hatua yangu iwe ni uhai wa wokovu, wa nguvu na wa ari kwa viumbe wengine.

Na sasa, Mama yangu uliyepondeka, uniruhusu kubusu Moyo Wake na kulamba Damu yake azizi: Wewe ufungie Moyo wake ndani ya moyo wangu hata unifanye niweze kuishi kutoka Pendo lake, matamano yake na kutoka maumivu yake. Na hatimaye sasa, twaa Mkono wa Yesu wa kuume ulioka ili anipe baraka ya mwisho. Na mwishowe sasa uruhusu waliweke jiwe ili kufunga Kaburi. Nawe uliyevunjika moyo, ebu ubusu Kaburi, na huku ukimlilia, umuage kwa mara ya mwisho na ndivyo uliache Kaburi.

Upweke wa Maria Mtukufu

Lakini Mama, mateso yako ni makali mno hata pengine unakuwa ganzi kama jiwe na pengine unaganda kama barafu. Mama yangu uliyepondeka, pamoja nawe nami nasema ‘Kwaheri’ kwa Yesu na huku nikimlilia, nataka kukuliwaza na kuambatana nawe katika upweke wako mkali wa uchungu. Nataka nijiweke ubavuni pako, ili kwa kila pumzi yako, kila hangaiko, kila teso, niwe ninakupa neno la faraja na jicho la huruma. Nitakusanya machozi yako, na nitakushikilia mikononi mwangu iwapo nitaona unatetereka.

Lakini naona unalazimika kurejea Yerusalemu kwa njia uliyojia. Baada ya hatua chache tu, unajikuta mbele ya Msalaba ule ambapo Yesu alikuwa ameteswa sana, na ambapo hatimaye alikufa. Unaukimbilia, unaukumbatia, na unapouona umejaa rangi ya Damu, ndani ya moyo wako yanaamka upya, moja baada ya jingine, maumivu yale aliyopata Yesu pale juu yake. Lakini, kwa kukosa kulihimili teso hilo, unalia kwa kukoroma:

“Ewe Msalaba! Vipi!? Umekuwa mkatili hivi kwa Mwanangu? Ah, hukuweza kumwachilia hata kidogo! Alikuwa amekutendea ubaya gani? Hujaweza kuniruhusu mimi, Mama Mteseka, walau nimpatie tumaji kidogo wakati alipoomba. Na kwenye Mdomo uliokaukiwa wewe umempatia nyongo na siki. Nilijionja moyo wangu uliopondeka unayeyuka kuwa maji, na nikawa natamani kufikisha kwenye midomo ile, moyo wangu ulioyeyuka kusudi kuzima kiu chake. Hapo lakini niliumia sana nilipoona ninasukumiwa mbali. Ewe Msalaba mkatili namna hiyo, lakini u Mtakatifu kwa vile umefanywa Mtukufu na umetakaswa kutokana na kugusana na Mwana Wangu! Ule ukatili uliouonyesha dhidi yake, ebu ubadilishe uwe sasa huruma kwa ajili ya watu wanyonge walio kufani. Na kwa maumivu aliyoyapata juu yako, umwombe neema na nguvu, kwa ajili ya roho zinazoteseke, ili hata moja wao asipotee kwa hoja ya mahangaiko na misalaba. Roho za watu zinanigharimu mno. Zinanigharimu Uhai wa Mwana-Mungu; na mimi kama Mwokozi-mshiriki na Mama, nazifungilia roho hizo kwako Ewe Msalaba”.

Bada ya kuubusu na kuubusu tena, unatoka. Masikini Mama, jinsi ninavyokuhurumia! Katika kila hatua na kila unapokutana na mtu kunazuka maumivu mapya, ambayo kwa kuongeza ukali wake na kuzidi kuwa machungu sana, maumivu hayo yanakuenea, yanakuziba kooni na dakika baada ya dakika unajiona unakufa. Hatua chache baadaye unafika mahali pale ulipokutana naye leo asubuhi, wakati akiwa chini ya uzito mkubwa sana wa Msalaba, amechoka kabisa, akichuruzika Damu kichwani, amevaa taji la miiba, ambayo kila iliposuguana na Msalaba, ilizidi kuchoma na kuzama ndani ndani, na hivyo kusababisha maumivu makali sana ya kifo. Macho ya Yesu yalikutana na macho yako, yalikuwa yanataka huruma, lakini maaskari wale, kwa kutaka kuzuia asipate kitulizo hicho, walimsukuma na kusababisha aanguke na hivyo kumfanya achuruzike damu nyingine zaidi. Wewe sasa unaiona ile ardhi iliyonyonya Damu yake. Unajitupa ardhini na unapobusu Damu ile ninasikia ukisema: “Malaika wangu, njoni na mjiipange kulinda Damu hii ili tone lolote lile lisikanyagwe na kukufiriwa”.

Mama Mteseka, uniache nikupe mkono kukusaidia uinuke na kukufariji, kwani nakuona unaumizwa mno na Damu ya Yesu. Kadiri unavyoendelea kutembea, unapatwa na mateso mapya; kila mahali unaona alama za matone ya Damu, unakumbuka maumivu ya Yesu, ndivyo unaongeza hatua na kwenda haraka hata unafika na kujifungilia katika chumba cha Karamu ya mwisho. Hata mimi najifungilia humo. Lakini Chumba changu cha Karamu ni Moyo Mtakatifu wa Yesu, na kutoka pale nataka kuja kwako ili nikeshe na kuliwaza pamoja nawe katika kipindi hiki cha upweke na uchungu. Moyo wangu hauwezi kuvumilia kukuacha peke yako katika mateso hayo makubwa.

Mama uliye katika ukiwa, umtazame binti yako huyu mdogo: mimi ni kadogo mno, kwa peke yangu, wala siwezi kuishi na wala sitaki kuishi. Kwa hiyo basi unitwae na uniweke juu ya magoti yako, unibane ndani ya mikono yako, na uwe Mama yangu kwani nahitaji mtu wa kuniongoza, wa kunisaidia na wa kuntegemeza. Angalia unyonge wangu, dondosha chozi lako moja juu ya maumivu yangu. Na utakaponiona nimetawanya mawazo, unibanie kwenye moyo wako wa kimama na unikumbushe maisha ya Yesu.

Lakini, wakati naendelea kukuomba, ninalazimika kusimama kwanza, ili kuzingatia maumivu yako makali kabisa. Ninaonja ninatobolewa pale ninapokuona unatikisa kichwa kwa vile unaonja ikiingia na kukuchoma ile miiba uliyotoa kutoka kwa Yesu, yaani, matobo ya sindano za dhambi zetu zote za mawazo. Miiba hiyo inapenya mpaka ndani ya macho. Inakufanya ulie machozi yaliyochanganyika na damu. Unapolia, kwa vile macho yako yanaona yale aliyokuwa anayaona Yesu, unaona mbele ya macho yako yanapita makosa yote ya viumbe. Oh, ni jinsi gani unavyoachwa katika maumivu makali kabisa! Jinsi gani unavyoona kila kitu alichoteseka Yesu, kwani ndani yako unayo mateso yake yale yale!

Kumbe teso moja halingoji lingine lipite: Unapoelekeza sikio unazibwa na mwangwi wa masauti ya viumbe; kila aina ya sauti ya kila kiumbe inapenya ndani ya moyo wako kupitia masikio yako na hivyo kuumiza. Na hapo wewe unarudia kiitikio chako: “Mwana, ni jinsi gani umeteseka.”

Mama katika ukiwa, ni jinsi gani ninakuhurumia! Uniache nipanguse tena uso wako uliolowa machozi na damu. Ninaonja kurejea kwenye hali ya nyuma ninapooona uso wote umevimba, hautambulikani na umedhoofika sana na umepwauka, una rangi ya mauti. Naelewa: hayo ni manyanyaso aliyopata Yesu na wewe umeyachukua juu yako. Ndiyo hayo yanayokutesa kabisa kiasi kwamba, unapotikisa midomo ili usali au ili upumue kutoka kifua chako kinachowaka moto, unaonja hewa kali na chungu, na unaonja pia midomo iliyongua kwa kiu cha Yesu.

Masikini Mama yangu, ni jinsi gani nakuhurumia!. Maumivu yako huongezeka zaidi na zaidi, utadhani yanashikana mikono kati yao. Ninapochukua mikono yako na kuiweka ndani ya mikono yangu natambua kuwa imetobolewa na misumari. Ni katika mikono hii yenyewe, ndimo unasikia teso na unaona matendo ya uuaji, usaliti, makufuru, na matendo yote mabaya yanayorudia kupigilia misumari, hata kuweza kupanua sana madonda, na kuzidisha maumivu yake zaidi na zaidi.

Ni jinsi gani nikuoneavyo huruma! Wewe ni Mama kweli msulibiwa kabisa kiasi kwamba hata miguu haikosi kuwa na misumari. Yamkini huonji tu inapopigiliwa misumari bali unaonja pia wakati miguu hiyo inapasuliwa na hatua nyingi kabisa zinazokwenda motoni, inapasuliwa pia na roho zile zinazokwenda motoni, na ndipo wewe unazikimbilia haraka sana ili zisiangukie kwenye miali ya moto wa milele.

Lakini hayo siyo ndiyo yote, Mama uliyepondeka. Maumivu yako yote, yanapoungana pamoja, hutoa mwangwi ndani ya moyo wako na hivyo kuutoboa siyo kwa mikuki saba, bali kwa mikuki elfu na elfu. Ni mingi zaidi. Kwa vile ndani yako unao Moyo wa kimungu wa Yesu, Moyo ambao unashika mioyo yote na ambao katika pigo lake moja tu kuna kuzinduka kwa mapigo ya roho zote. Moyo huo unapopiga unasema: **“Roho! Pendo!”**. Na wewe, kutokana na pigo lile la kwanza la ‘roho’, unaonja mara katika pigo lako mtiririko wa dhambi zote na wewe unatoa **‘kifo’**, na katika pigo la pili ‘pendo’ unaonja unatoa **‘uhai’**; ni hivyo kwa vile wewe upo daima katika tendo la kifo na la uhai.

Mama Msulibiwa, ninapokuangalia, nakuonea huruma kwa mateso yako; hayaelezeki. Ningependa nibadilishe nafsi yangu iwe ulimi na sauti kwa ajili ya kukuonea huruma, lakini mbele ya mateso hayo yote, mateso ya kwangu ni sawa na si kitu. Kwa hiyo nawaita Malaika na Utatu Mtakatifu, na ninawaomba wao kwa pamoja waweke yafuatayo kukuzunguka wewe: uelewano wao, ridhika yao na uzuri wao. Hayo yawe kwa ajili ya kunogesha na kutuliza maumivu yako makali; wao wakutegemeze katika mikono yao na wageuze maumivu yako yote kuwa upendo.

Na sasa, Mama Mkiwa, asante sana kwa jina la wote, kwa yote uliyoteseka; na ninakusihi, kwa ajili ya ukiwa wako huo wa uchungu, ufike kunisaidia katika saa ya kifo changu. Pindi roho yangu nyonge itakapojionja upweke na imeachika na wote, itakapokuwa katikati ya mahangaiko na katika hofu elfu na elfu, basi ufike wewe unisindikiza tena kama mimi nilivyokufanyia mara nyingi katika maisha. Ufike kunisaidia, ujiweke ubavuni pangu, na umfukuze adui. Osha roho yangu kwa machozi yako, unifunike kwa Damu ya Yesu, univalishe kwa mastahili yake, kwa mateso yako na kwa maumivu yako yote unioshe na uniponye. Kwa kazi za Yesu, na kwa nguvu ya kazi hizo, fifishia mbali dhambi zangu zote na badala yake nipewe msamaha timilifu. Na ninapokata roho, unipokee kwa mikono yako miwili, uniweke ndani ya bushuti lako, unifiche toka jicho la adui, unichukue na kuniwezesha kuruka hadi Mbinguni, na ukaniweke mikononi mwa Yesu. Hivyo tubaki katika maelewano na mapatano nawe Mama yangu mpenzi!

Na sasa nakuomba, hiki nilichokufanyia wewe leo, utende na wewe kwa wale wote walio mahututi leo, yaani uwasindikize. Uwe Mama kwa hao wote. Ni dakika za mwisho kwao, na wanahitaji msaada mkubwa, kwa hiyo, usimnyime hata mmoja wao ile kazi yako ya kimama.

Neno la mwisho kabla ya kukuaga: Nakuomba unifungilie ndani ya Moyo mtukufu wa Yesu. Nawe Mama yangu mteseka, uwe mlinda mlango wangu ili Yesu asinitoe nje ya Moyo wake na wala mimi nisitoke kamwe toka humo ndani hata kama nitakapotaka kufanya hivyo. Ninabusu mkono wako wa kimama na wewe unibariki.



FIKARA NA ZOEZI

Yesu anazikwa, jiwe linamfungilia ndani na hivyo linamzuia Mama hata asiweze tena kumtazamatazama Mwanae . Je na sisi tunajificha ili kuepuka macho ya viumbe? Je wakati watu wote wanapotusahau huwa tunajali au hatujali? Kuhusu mambo matakatifu huwa hatujali, je kwa hiyo hali ya kutojali matakatifu hatuvunji Utashi wa Mungu? Katika kuachika timilifu kwa Yesu, je tunashinda mambo yote kwa kutokuyajali kikamilifu ili tupate kumfikia Yeye daima? Je kwa ustahimilivu wetu tunatengeneza mnyororo mtamu ili kumvutia Yesu kwetu? Je macho yetu yamezikwa ndani ya Macho ya Yesu hata tusiweze kutazama kitu kingine chochote isipokuwa kile anachotaka Yesu? Je sauti yetu imezikwa ndani ya Sauti ya Yesu kiasi kwamba tunapotaka kuzungumza hatuzungumzi chochote isipokuwa kwa ulimi wa Yesu? Je hatua zetu zimezikwa katika hatua zake kiasi kwamba tutembeapo zionekane siyo nyayo zetu bali nyayo za hatua za Yesu? Na je moyo wetu umezikwa ndani ya Moyo wake hata tuweze kupenda na kutamani kama unavyopenda na unavyotamani Moyo wake?

Mama yangu, wakati Yesu, kwa manufaa ya roho yangu, anajificha nisimwone, unipe neema ile uliyokuwa nayo wewe wakati wa kutoweka kwake ili mimi nami niweze kumpa utukufu wote ule ambao wewe ulimpa wakati alipolazwa kaburini.

Ee Yesu, nataka nisali kwako kwa kutumia Sauti yako. Kama vile sauti yako ilivyokuwa inapenya Mbingu na ilivyokuwa inagonga na kujirudia katika sauti za watu wote, ndivyo sauti yangu, ikitoa heshima kwa Sauti yako yenyewe, ipenye hadi mbinguni ili kukupa utukufu na upendo wa neno lako lenyewe.

Yesu Wangu, moyo wangu unapiga, lakini siridhiki mpaka hapo utakapopiga pamoja na Moyo wa kwako, na hivyo, kwa pigo la kwako nitaweza kupenda kama unavyopenda Wewe. Nitakupa pendo la viumbe wote na tutatoa mlio wa sauti moja: Pendo! Pendo!.

Ee Yesu Wangu, utoe heshima kwako Mwenyewe, na katika chochote nitendacho, ingiza ndanimu mhuri wa uwezo wako ule ule, mhuri wa pendo lako na wa utukufu wako.

Nos cum Prole pia, benedicat Virgo Maria

(Sala ya Kushukuru.

Tazama Uk 2)



Kijitabu


‘SAA 24 ZA MATESO YA BWANA WETU YESU KRISTO’

ni

Tafsiri ya KISWAHILI ya Kijitabu cha KIITALIANO

cha

Mtumishi wa Mungu LUISA PICCARRETA kiitwacho



‘LE 24 ORE DELLA PASSIONE DI NOSTRO SIGNORE GESU’ CRISTO’

Tafsiri imetolewa Tarehe 05 Septemba 2019, Sikukuu ya Mtakatifu Teresa wa Calcutta, imeingizwa katika Tovuti tarehe 2 Novemba 2019.

Mtafsiri: +Norbert Wendelin Mtega
Via Castelmonte 2,
33040 Prepotto (U), Italia
Tel : +39 371 185 0494,
E/M: albert.norbert@hotmail.com

Tunaomba masahihisho na maoni yahasuyo lugha ya Kiswahili kilichotumika yapelekwe kwa Mtafsiri kwa ajili ya kuboresha Tafsiri hii ya awali kwa manufaa ya wasomaji katika Tovuti na katika kijitabu.

Makala haya yameingizwa katika Tovuti kwa hisani ya Bi Carla Moraglio wa Roma.

Picha zilizomo za Luisa Piccarreta ni kutoka Tovuti www.Divinovoleredivinoamore.it

Picha zote nyingine zinazoambatana na Saa 24 za Mateso ni kwa hisani ya Bi Laura Scagnetti wa Roma.

YESU PENDO LANGU,

OAMDG



YESU CHEMA CHANGU

AVE MARIA

